

## **ASO LUA, 27 IANUARI 2015**

*Na nofoia le Nofoa e le Fofoga Fetalai i le itula e 9.00 i le taeao.*

Tatalo.

**FOFOGA FETALAI:** E i ai le talitonuga ma le agaga maualalo o lea ua toe potopoto moli i futiafu e tasi i le Maota i lenei taeao fou, i le alafai mai i faguga lelei o le paia maualuga o le Maota i le soifua manuia i a outou Afioga i sui usufono filifilia o itumalo taitasi o lo tatou atunuu. Sui usufono mamalu uma o le Palemene i lau Afioga i le Taitai o le Malo ma lau Kapeneta, aemaise foi le paia maualuga o le Palemene i ona tulaga faalupelupe. Afifio maia ma tala mai aao i le soifua manuia i lenei taeao fou aua ou te manatu o lea ua tatou toe faatasi i a tatou galuega faaauauina, aemaise a tatou polokalame ua faataatia i lenei Aso Fono. E momoli atu le agaga faafetai ona o le onosai mai aemaise foi le taumafai mai pea aua le faaauauina o a tatou galuega e pei ona faatulaga.

Ua tatou taunuu i le amataga o a tatou galuega i lenei aso, alo maia le paia ma le mamalu o lo tatou Maota. E tatalo atu pea le Fofoga Fetalai ona o le faatauaina o lo tatou taimi. E talitonu lava le faamoemoe e le o ni ai e avea, pe tau faatauvaaina outou finagalo, le tofa ma le moe pe a tatou agai e sailiili mataupu taitasi. A o le tatalo lava, ia tatou maua le femalamalamaai ina ia aua ne i tatou toe asaina ogasami ua uma ona asa e nisi o tuleiga ma saunoaga a sui usufono. O le agaga ma le faamoemoe, ia aumai le tofa atoatoa ma le tofa sauni, ia aua ne i faaosofia moegaluaga i saunoaga ona o se saunoaga po o se manatu o se isi sui usufono, a o lea ua faataatia a tatou galuega mo lenei aso, e tele nisi o a tatou Lipoti aemaise foi nisi o Tulafono Tau Faaofi; tatou te velo aso ae tatou te velo aso i mea taua ma mea ogaoga e taatia ai i lagatonu la tatou Fonotaga. A o le tatalo, ia tatou manumanu i o tatou taimi. O lo o i ina pea le tofa ma le faautautaga i sui usufono mamalu aua o fea lava e aga i ai tuleiga ma saunoaga, ia tautata i le moa o le ala ina ia tusa ma a tatou Tulafono Tumau, aemaise mataupu uma o lo o aafia i le taimi e talanoaina ai, ae a tatou o loa e toso le laau felefele, ona ou manatu lea ua umi lo tatou taimi ma maumau ai tulaga i le faatulagaina o se mataupu ua leva ona vave ona uma.

O le Saunoaga Faa-Minisita a le Afioga i le Palemia. Ou te tapa lau Afioga i le Palemia mo le Saunoaga Faa-Minisita.

### **SAUNOAGA FAA-MINISITA A LE AFIGA I LE PALEMIA**

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI (Palemia):** Lau Afioga i le Fofoga Fetalai ma le mamalu o le Maota, e auai foi i le taofi ma le saunoaga ua e tulei i ai,

aemaise le viiga ma le faafetai i lo tatou Matai Sili i Lana pule faasoifua ua faafoi mai ai Lana Palemene i lenei taeao fou e faaauau a tatou felafolafoaiga i a tatou Tulafono ma Lipoti i vaega eseese o le Malo. Ae e le mafai ai lava ona tuua se manatu i le faagasologa o a tatou atinae o lo o fai nei ma a tatou galuega. E i ai le taofi e le uma le fai aso o le Atua, tatou taumafai e ausia le tele o galuega i le asō, ona tatou malolo ai lea ona o le Kapeneta nei e faulai galuega ma feau, e le mafai foi ona faatalitali le atunuu i a latou mataupu. O le ala lena o lea matou te tutulai atu ai pea i nisi o taimi i le tele o mataupu tatou te taamilomilo ai lava ma taamilomilo ai lava, ae e le na o le pau lenei o a tatou galuega fai, ae e tele a tatou galuega. E le fou foi nisi o taofi e lagaia mai pea lagaia mai pea.

O lea lava e matau atu foi ma le totoa i inei ma taumafai e talitali atu i mataupu. A o le tele lava o mataupu e malamalama lava, ae ua le mafai ona tuua le manatu e lelei pea ona fai sina au faamatalaga ona o le taimi sa ou tulai atu ai agai i le tulaga lenei i a tatou faiga paaga ma Malo o lo o taumafai e fesoasoani mai, ma le tulaga o lo o agai i ai nisi o finagalo e alu atu lava i le Maota lenei. O le ala lena ua ou taofi ai, e tataua pea ona fai sina au faamatalaga aloaia i le tulaga Faa-Minisita, ona o le taimi sa ou tulai muamua atu ai ma tau talitali atu i le tulaga maemaea o le Maota nei e taofi ai uiga ia ona o aso nei ma si tamai atunuu, a o le tóatele o tagata o lo o faalagolago i tala faasalalau e saili ai o latou soifua manuia. O le ala lena e tataua ai lava ona faataua e au nei ma le Kapeneta, so o se saunoaga e alu atu i le Maota lenei, aemaise se saunoaga e faaono lamatia ai taumafaiga a le Malo mo le atinae o le atunuu lenei ma saili galuega ai mo a tatou fanau - o le ala lea lau Afioga i le Fofoga Fetalai, aemaise foi o lo tatou atunuu o se tasi o atunuu o lo o maualuga i matatia e faamasino ai le sologa lelei o ana galuega i tulaga ia i le malamalama o mataupu (accountability ma le transparency), pe a fua i le tapenaina o Lipoti ma faamatalaga auiliili e tuuina atu i luma o le Maota. Ia taatia ia a tatou faiga polokiki o le aumai avatū, a o mea tatou te faia e faafoliga pu moomoo ma faaataata a lafoga, ae alu atu lava i fafo i le lalolagi atoa ma tauau ina aafia ai foi ma faamasinoga a i latou o lo o aumai a latou fesoasoani ia Samoa, ma tauau ina afaina ai taumafaiga a lo tatou Malo o lo o taumafai ina ia faamama i o tatou tagata, ae faamamafa i a i latou i fafo ina ia maua mai ai seleni e fesoasoani i lo tatou atunuu. Aua o le mea moni afai loa e le maua mai fesoasoani ia, ona tifato loa lea i lalo o galuega fai pe a faapea lea tatou te faalagolago i lo tatou lava malosī. O le ala lea e mafua ai ona tautoaluaina taumafaiga a le Malo i le le masino o le tapatapa i fafo pe a o atu Minisita uma lava nei o le Kapeneta i fafo pe a fai a latou fonotaga, po o a lava tiute e feagai ma i latou, latou te talanoa ma toso mai ai fesoasoani mo lo tatou atunuu. Afai la e aumai mea ia ae tilotilo mai ua alu atu i nusipepa e laulau atu ai tulaga matautia ona o aso nei ua le o toe mamafi nisi i ni a latou faamatalaga, ona o le manatu foi lea o lea e alu atu faalilolilo i facebook i fafo; a o upu lava e tutupu ai vesiga ma tulaga faapena.

O le ala lea ua ou manatu ai ou te tulai atu ma le agaga faaloalo e fia fai sina au faamatalaga. Pe pao-papa, a o faamatalaga mo le puipuiga o le tatou Malo ma taumafaiga a lo tatou Malo ina ia atiae ai lo tatou atunuu.

Lau Afioga i le Fofoga Fetalai, ua uma ma tea atu lena vaiaso o a tatou talanoaga i le Tala Faatatau Faaopopo o le Tupe. Na o le \$8miliona, ae fa aso lua po o tatou vavao ai ma noatia uma ai lava tatou uma aemaise Afioga i Minisita mai le faatinoina o le mau galuega o lo o faatalitali mai i ai le

atunuu, ae tele lava se taimi sa tatau ona faasaoina mai tatou te taumafai ai e talanoa Tulafono ma Lipoti o i lumamea i le Fono. E ui i lea o lea o le a tatou Fono sosoo i lenei tausaga i masina uma ona o le faamoemoe ia uma galuega tuua o i ai a le Palemene a o le i faataapeina. Aua o le faataape o le Palemene lenei o lea ou te matau atu o le toe 11 masina. O lona uiga e le o toe atoa se tausaga ona faataape loa lea ma tapena i le tatou faiga palota lautele i le amataga o le tausaga fou, ae lua ni mataupu lau Afioga i le Fofoga Fetalai ma lenei Maota ua ou tulai atu ai.

Muamua, o le faasinoinomia pea o atunuu o lo o latou lagolago mai i le atinae o Samoa e pei o Saina, o nisi foi taimi o Iapani ma o latou tagata ua tatou nonofo faatasi i inei e fesoasoani mai i le atiaaina o Samoa. O nisi ua fai paolo mai i tamaitai Samoa ma ua tóatele foi a latou fanau ma o fanau e totolua. E le gata la i alii mai Saina ma Iapani ua usu i ai o tatou tagata i tamaitai ae faapena foi i alii ua usu i tamaitai o na foi atunuu i taimi sa aoga ai nisi ma foi mai ai i totonu o lo tatou atunuu ma nai o latou taitoalua, ua tóatele foi fanau. Ua taua lava o Samoa e le o toe taua o ni tagata mai fafo.

Sa ou laga faalua lenei mataupu i lona vaiaso ua tuanai ona o talaave atu i fafo i nei paaga taua i le atinae o Samoa ma ua latou lagalaga mai foi, “Po o le a le mea ua faapea ai. Ua tele fesoasoani ua aumai, a o lea latou te faitau ma tilotilo i televise o alu atu nei taufaifaiga o i latou. Ua taufaifai ma tuuaia sese ai i latou”

O le ala lea e mafua ai ona i ai sui o Malo i inei i Hai Komisi ma Amapasa. E pei foi ona i ai o tatou Hai Komisi ma Amapasa i atunuu i fafo ma Konesula. O taliga ia ma fofoga o le Malo e faalogologo, o mata ia o le Malo e faalogologo ma matamata ma lipoti mai i le Malo tulaga e faaono tatau ona silafia e le Malo. O uiga ia o lea aua o lea e i inei sui o Malo nei ma o la foi e ave a latou aveai i fafo ma galo uma ai lava ia i latou o faia nei tuuaiga le aoga tele o nei atunuu ia Samoa.

E le tau faamatala atu i lenei Maota le tele o le sao o na foi atunuu, e le gata i le afuafua mai o le Malo o Samoa mai lava i le amataga e pei o Niu Sila, a o le taimi nei i le latou sasaa mai. O le mea moni e leai se atunuu e fia faipaaga ia Samoa pe afai o le faiga lea le tuuai seseina ma taufaifai i ai ma tau atagia, ae nana ai foi i lalo, a o lea latou te iloa lelei lava o upu faailoga lanu o lo o avatu, e tatou te lagona ai foi lo latou le fiafia e fesoasoani pe afai e le gata ina le amanaia se fesoasoani, ae toe faifai i ni upu mataga. Lau Afioga i le Fofoga Fetalai, aemaise lava pe a tausolomua i ni Taitai o le Palemene lenei o Samoa ia tuuaiga matuia, ae fiafia lava le nusipepa e faasalalau, ona foliga ai lea, o ē o lo o faia faasalalau faapea, e alofa ia Samoa, a o le tele o le Palemene lenei, o lea o lo o taumafai e fai ni uiga faatalale e faamalaia ai le atunuu lenei i le lumanai.

Lau Afioga i le Fofoga Fetalai, o lo o tatou taulagi pea i aso uma aso uma, o Samoa o le atunuu tofi e faavae i le Atua, ma o tatou o tagata kerisiano, ae pe faapefea ona tatou lalagi o tatou talitonuga o kerisiano ae tatou te le amioai e pei o le tatou Faaola o Keriso Iesu, na mafua ai ona tau kerisianoina i tatou.

Lau Afioga i le Fofoga Fetalai, e matilatila lava nisi o Afioga a lo tatou Alii, “Ia alofa i tagata ese o lo o mau faatasi ma oe.” E ogatasi ma Tulafono Autu e lua a le Atua, muamua, “Ia e alofa i le Atua ma lou loto atoa ma lou agaga atoa ma lou malosi atoa.” Lua, “Ia e alofa atu i le lua te tuaoi e pei o oe lava ia te oe.” E le mafai ona faitau eseese Tulafono ia e lua, e o faatasi, aua o lou alofa i le Atua, e te alofa ai foi i le lua te tuaoi. Aisea? Aua foi o lo o afio le

Agaga Paia o le Atua i totonu o i tatou uma. A ua faafagogo tagiao le usui usui pea ma le tautuuai o tatou uso a tagata.

Lau Afioga i le Fofoga Fetalai, taoto ia le faaleagaga aua e faamasinoina taitasi i tatou uma e tusa o tatou loto ma a tatou mea e fai, ae le mafai le mafai ona tuuaunoa e le Malo nei tuuaiga le faavaea, aua o lea e tau atu ai ma le Malo, a o le tulaga sili ona le lelei, e tausolomua ai sui usufono o le Maota lenei i uiga ia. O lo o aliali mai pea i nusipepa, o lo o feala ma faapunafanau i manatu sese ua fai manatu ai tagata i le social media, o Samoa ua faatau ia Saina ma le anoano o tuuaiga le faavaea, ae mafua atu lava i totonu o le Maota lenei.

Lau Afioga i le Fofoga Fetalai, a manatu i le 30 tausaga talu ai, sa faatau ipuapa tatou mai lava ia Pipi ma Moles, tiga ona taetaei ma matogitogi ipuapa, ae tatou te o lava faatau mai ma tatou o aai ai, aua tatou te le gafatia le tau taugata o ipu omea sa faaoga e se toaitiiti na maua seleni. Ua a nei? Na amata ona tatou tausasami i ipuo mea ina ua faipisinisi o tatou tagata e tupuga mai ia i latou nei mai fafo, o Saina, o Siamani, o Peretania, Amerika, ma isi ua tatou gafatia ai ona faatau le mau mea ua taugofie i faiga ia faatauvaga ua siitia ina ua tele mai pisinisi o lo o fai e i latou nei mai fafo. E le i mamao atu ona tatou molimau ai le taunuuga o le feala ma le faapunafanau lea ou te fai atu ai, o tulaga ia na oo i le Malo o Toga na sunui faletetele ma fale tu taulaga o lo o faia ai pisinisi. O tulaga tonu ia na ou taua ai le matautia o manatu tuulafoai ma le lē faavaea o lo o fai nei ma mausa ai nisi o sui usufono o le tatou Maota.

Lau Afioga i le Fofoga Fetalai, e galo e talitonuina a outou saunoaga e o tatou tagata ona o outou tulaga faa-Taitai o le atunuu lenei. Ia manatua lelei, o le siitai o le tualoa, o le siitai foi lena o le talitonuina, a o le siitai foi lena o le tiute e amio ai i le tualoa e tataua ona ogatasi ma mamalu o tofiga.

O le mataupu lona lua, o le aveseseina o tualumaga a le tatou Palemene lenei, ua logo 'i logo 'a faasalalaua a nisi o sui usufono o le Komiti o Ofisa o le Palemene i le mea e tupu pe a le amanaia e le Malo a latou fautuaga i le Lipoti a le Pule ma Suetusi Sili lea e tulaiupu e nusipepa. O ia faasalalaua o lo o atagia ai e i ai se isi tulaga ma se malos e oo i ai Tali a le Malo pe a le faamalieina le Komiti. O se tulaga tuulafoai tele ma limataitaiseseina ai le atunuu, e faatupu manatu e i ai se isi malos i se Komiti faasaga i Tali a le Malo ma le Palemene, lea o lo o i totonu o faamaumauga a le Palemene. O le isi foi Faauluuluga o le Malo na alu molia le Kapeneta, molia le Palemene i le tulaga faapea ua le fiafia i le auala ua tagofia ai e le Palemene a latou Lipoti. O le a le mea na tupu? E sau le iuga a le Faamasino Sili, "E leai sa outou feau i Lipoti na, o le mea e saunoa i ai ma fai i ai faaiuga a le Fono Aoao Faitulafono, o le mea lena." Ona faagaulemalie lea o le Faauluuluga o le Matagaluega i le tausaga e 1996, ona alu loa lea molia i le apili, le Faamasinoga aupito maualuga. O le taugata ia o na Faamasinoga. Ona omai ai lea o Faamasino mai fafo na talosaga, e toatolu lea ou te tau manatua, omai fai le iuga. O le tele ia o le mafiafia o le faaiuga, a o lena faaiuga, ua aumaia ai, o le mea e alu atu ai le iuga a le Fono Aoao Faitulafono lenei, lau Afioga i le Fofoga Fetalai ma le 48 lenei o faipule, o le iuga lena. E leai lava se isi malos e i luga atu o le Palemene lenei. Ma e talu ai ona o le Palemene lenei o sui o le atunuu atoa, e pule lava le Palemene i ana auala e faatino ai ana galuega. A loto lava e fai le iuga e sui ai lea Tulafono, sui. A loto lava e fai le

iuga e sui ai lea mea ua uma foi ona fai i ai lana faaiuga muamua, sui. Aisea? E leaga o sui ia o le atunuu atoa o Samoa lea e nofoia le Palemene.

Lau Afioga i le Fofoga Fetalai, ua fia masina o taulagi pea e sui usufono o le Komiti o le Palemene, e le tuumamaina e Komiti le Tali a le Malo pe a le amanaia a latou fautuaga, ma e oo lava i le Faamasinoga pe a le faia e le Malo tulaga ia e fautua mai ai le Komiti. O ni lafoga e aliali mai ai ua sili ae le pule a le Komiti i le pule a le Palemene. Ua foi mai ai le Palemene lenei, ua foi mai ai i mea na, ma ua oo lava i le Faamasinoga Maua luga a le Malo lenei. O le mea e aiaia i totonu o le Palemene lenei ma fai i ai le faaiuga a lau Afioga i le Fofoga Fetalai ma le Palemene lenei e 48 sui usufono ia 49 i lau Afioga i le lafo faatu ma talia i luga o le Fesili ua aumai, o i ina le faaiuga o mea uma. A o sui usufono o le Komiti lea e taulamua, o ni sui usufono foi ua leva, e tatau ona silafia e leai se isi mea i tua atu. A avatu loa Tali a le Malo, o Tali na.

O le tausaga o le Paeaiga lea 1982-1985, 1985-1988, 1988-1991, 1991-1996, o le tele ia o mataupu faapenei, o le avatu o le Tali a le Malo, tu mai le Itu Agai toe lui le tali. E tasi lava le upu a le Fofoga Fetalai, le tatou Tulafono, o le Tali lava e avatu, o le Tali lena, na faauma ai loa lena mataupu. Ae o faaupuga ma folafolaga lea e toso ai le mamalu o le atunuu, e foliga mai a le malilie lava le Komiti i Tali a le Malo, e i ai se isi tulaga i tua atu ina ia faamalieina lava le Komiti.

Lau Afioga i le Fofoga Fetalai, e pei ona fai atu, ua taoto a tatou faiga faa-Palemene o lo o aiaia i a tatou Tulafono Tumau, o isi o faiga masani po o practices e faavae mai faiga faa-Palemene a isi atunuu Temokarasi o le tatou Taupulega o lo o tatou faataitai i ai. O le ala lea e tiga lava ona tau le lava a tatou seleni na aiaia, ae avatu loa se pepa o le a malaga faipule e o e mataitu faiga faa-Palemene e ioe lava le Kapeneta. Aisea? O le naunau o le Kapeneta ina ia maua e tatou faipule le malamalama i faiga faavae o lo o fai ai isi Palemene ina ia toe taliu mai ona agai ai lea i luma a tatou felafolafoaiga.

Lau Afioga i le Fofoga Fetalai, ua taoto atu i tatou faiga faa-Palemene, o lo o aiaia i totonu o tatou Tulafono Tumau, o isi na o practices e faavae mai faiga faa-Palemene a atunuu i fafo, o le 35 lenei o ou tausaga i le Maota lenei, e leai ni felafolafoaiga i Tali a le Malo. O le tatou faiga faa-Palemene lena na sau ai mai le amataga ina ua tutoatasi Samoa, na tatou faaogaina ai faiga faa-Palemene a Niu Sila, lea e oo mai lava i le taimi nei ma nai suiga laiti. E mafua ona ou fai atu, ona o lea ua lata mai le masina o Mati, toe o le vaiaso Fepuari, ona Mati lea, e soloia ai mataupu o lenei Tauaofiaga, a o lea foi ua maua i faasalalaga saunoaga a le sui usufono lava o le Komiti o Ofisa o le Palemene e faapea, ua deliberate le faamulimuli o Tali a le Malo i le Lipoti a le Komiti i le Lipoti a le Pule ma Suetusi Sili. A o sui usufono ua leva, ua leva ona i totonu o le Palemene, o saunoaga ia tuulafoai, pei e foliga o i ai ni faiga piopio o fai e le afaigaluega a le tatou Fono, e leai, o le faasologa masani o galuega a le tatou Malo, lea o lo o sosolo lelei ai lava e i ai le faasologa o mataupu o Fono, e muamua mataupu na muai toai mai, e alu lava i le faasologa. Ae o nei saunoaga faalauaitete, e pei ua atagia ai le Maota ma lana afaigaluega e le o amiotonu ona fai le galuega. O faiga faavae a lo tatou Palemene, e le o ni tulaga faatoa fai nei lau Afioga, ina ua pale mai le HRPP i le 30 ma ona tupu tausaga talu ai, o faiga faavae lava o lo o sosolo lelei ma ituaiga Faigamalo o lo o faatautaia ai foi lo tatou Malo, o le West Minister Democracy, Faigamalo Faatemokarasi a Peretania, e aloaia ai le tuu eseese o Pule, separation of powers e ui ai i le mataituina e le Palemene o galuega a le

Malo, ae i ai le va fealoaloai e le faatonua e le isi poutu le isi poutu o a tatou Faigamalo. O le fa lenei o tausaga o le tatou Paeaiga Lona XV, mo nisi ua tai lua tai tolu pe sili atu foi i Paeaiga o avefa pea ma sui usufono o lenei Maota, e malamalama lelei i a tatou faiga Faa-Palemene, e leai ni felafolafoaiga i Tali a le Malo. A o faaupuga ia e faalele, e le uma ai i i, e oo i le Faamasinoga, o ni saunoaga tuulafoai, taufaasese, e foliga e i ai se isi malosi i tua atu o le Fono Aoaofaifano, e tagofia ai ma fai faaiuga i ana mataupu e tusa ma ana faiga Faa-Palemene, e pei ona ou fai atu, ua foi mai ai le Palemene mai le mea lena, ma e tasi lava le faaiuga ua faia e le Faamasinoga, o le mea lava e finagalo i ai le Fono Aoaofaifano, o le mea lena e fai.

Ou te iloa o le toatele e le o silafia, ae ua manino le finagalo o le Faamasinoga i le va vavae ma le Palemene i le tele o mataupu sa tagofia e le Faamasinoga, pei lava ona ou taumafai e faamalamalama atu, e aloalosa le Faamasinoga e aia i mataupu tau Palemene, e vagana o ni mataupu o lo o aafia ai le Faavae, pau lea, a o nei faasalalau o le a o i le Faamasinoga pe a le faamalieina le Komiti i le Tali a le Malo, e taitaiseseina ai lo tatou atunuu. O le tuualalo, afai e i ai ni finagalo o sui o le tatou Komiti i faiga Faa-Palemene, e i ai le avanoa i le tausaga mulimuli lenei o le Paeaiga e toe iloilo ai le tatou Tulafono Tumau, e mafai ai ona agai atu i ai i le Komiti o Tulafono Tumau e faaali ai ni o outou finagalo mo ni fautuaga e atiae ai tatou faiga Faa-Palemene, ae soia ia le taufaasese i nusipepa ma toso le malamalama atu ai le laau mamafa, ona faafoliga ai lea o le Komiti, pau lava lea o le Komiti amiotonu, a o le Palemene atoa e piopio e corrupt.

Ua ou taua nei tulaga lau Afioga, ona ua tulata foi le taimi e ono lapse uma ai galuega o lenei Tauaofiaga e tusa o faiga sa sau ai, o lea lava tatou te o ai, i lapse foi ae laga ma tuu alaga i magaalā a le Malo, ua a? A o lea lava e aumai uma i le Palemene.

Lau Afioga ua ou tautalagia nei tulaga ona o lea ua lalaga tia o le tau tiaga o le Palota 2016, ne i avefa le naunau i le ia, ae maumau ai le upega. Aua o tatou upu ia o le tatou galuega ma faiga faavae o lo tatou...upuia lava lea o tatou, o le anu i le matagi, o lo o tatou faifai i tagata fai mai aemaise o malo o lo o fesoasoani mai i lo tatou atinae, o le tatou fai atu foi lena i malo o lo o autovaa ma saili manuia atu i ai o tatou tagata, o le faiga foi lea e tataua ona fai ai o tatou tagata i o latou foi malo. O le auga ma le faamoemoe, ia tautuana ma tatou o tatou o Taitai ua tofia ua valaauina o le atunuu lenei ona fuafua ma fetuunai lelei a tatou saunoaga ma mafaufau i aafiaga, o le uta a le potu o le fetalai. Aua o tatou manatu, e mafai ona fua i ai le tali mai foi o a tatou paaga o lo o maua mai ai fesoasoani mo nai o tatou tagata ma lo latou atinaeina ma saili ai ma galuega mo a latou fanau, e mafai foi i nei tuuaiga ona limataitaiseseina ma o tatou tagata. Ua uma ona faatino a tatou Tautoga. O a ia Tautoga? O Tautoga o le loto faamaoni i luma o le Maota lenei, faamaoni o le Tautoga i le Atua. O lo o manino foi le Tulafono o Amio Taualoa Faa-Palemene, o lo o lima taitai ai le faatinoina o tatou tiute, e matua taua ai ia i tatou ona tatou manatua.

Lau Afioga i le Fofoga Fetalai, o lena ua maua mai le agaga o le tautalaga, e faamalulu atu foi pe afai ua i ai se pati ua paopapa, ae e le mafai ona tuua le mea e tataua ona fai, e tataua ona ou tata logo pea, ina ne i tupu mai ni pefea, ae le mafai ona tuuaia au ma le Malo, o Minisita ma vaega uma lava o sui usufono o le vaega lenei, i lou nofonono ae le tau atu i ai, faamanatu atu mea taua nei i le tatou va tapuia ma le va fealoai ai ma Malo o lo o latou

fesoasoani. Ia faamanuia le Atua i lo latou agalelei, ma ia faatupu manatu foi i o latou taitai, aua ne i ave le se ma mea mamafa, ae ia sau pea le fesoasoani ia, ina ia maua e tagata uma o Samoa se soifuaga siitia e manuia ai tagata uma.

Lau Afioga i le Fofoga Fetalai, o lau faamatalaga lea i lenei taeao, soifua ma ia manuia.

**Afioga Hon Palusalua Faapo II (Taitai o le Itu Agai):** Lau Afioga i le Fofoga Fetalai o se mea e fia malamalama ai, lau Afioga.

**FOFOGA FETALAI:** Ia, se i alaala mai i lalo ae se i fai atu muamua le...E momoli atu le agaga faafetai i lau Afioga i le Palemia e tusa ai foi ma le tuleiga ma le saunoaga i lenei taeao, e manatu foi ua faafogafoga ma le manino le tatou Maota i tulaga masani, ia pe a faapea e finagalo lava le Taitai o le Malo ia po o se Minisita i tulaga o saunoaga faa-Minisita, e talitonu foi o lea ua logona le feau aemaise foi le tuualalo a lau Afioga i le Taitai ona o nisi o mataupu, aga ma tu ua tatou i ai i lenei vaitaimi a o faagasolo le tatou Fono. Oo lea ua ou talia ma aloaia le tuuina mai o le Saunoaga Faa-Minisita ma ua faafogafoga foi i ai le Maota i ona tulaga masani.

O le a le mea lea e te finagalo i ai? (*I le Taitai o le Itu Agai sa tulai*).

**Afioga Hon Palusalua Faapo II:** Leai, ou te tulai atu ma lou agaga faaaloalo, e toetiiti atoa le itula i le Saunoaga a le.....

E muamua fai atu lau tala lea faatu ai le lafo aua leaga e taua le Saunoaga a le Afioga i le Palemia. Ona pau lava lea lau Afioga leaga o lea e faalauaitele le tala. Ia manatua o Samoa e i ai le aiatatau a le tagata e faasalalau ai.

**FOFOGA FETALAI:** O lea ua ou maua lou finagalo.

**Afioga Hon Palusalua Faapo II:** Ou te faatu le lafo, *Ina ia faataoto le Saunoaga a le Afioga i le Palemia i luga o le Laulau a Fono, ma e tatalo atu ina ia faanatinati ia mafai ona tatou talanoa ai taeao, leaga e taua mataupu ia e tuuina ai le atunuu aemaise lenei Itu ma ou te faatu atu ai le lafo ia faataatia le Saunoaga Faa-Minisita a le Afioga i le Palemia ma ia vave talanoaina.*

*E le i faamaonia le lafo.*

**FOFOGA FETALAI:** O lea o le a ou faamalamalama atua aga o le Tulafono. O le mea muamua, Palu, ia e manatua lelei o Saunoaga Faa-Minisita a Taitai ma mea faapena, e leai se mea faapena o le tuu taimiina. Ia e silafia lelei ua e malamalama foi i tulaga i mea uma i le faatulagaga, a saunoa loa le Minisita po o le Taitai i tulaga faa-Minisita, e le faapea e tau i ai se agaga tuu taimiina pe tau puipuia. E tuu saoloto le saunoaga a le Taitai po o se Minisita ona o se mataupu ua tulai mai. O lea ua faaalua mai lona finagalo, e tatau ona ou faasaoina le tulaga lena. O le a le tulaga i mataupu e tulai mai e aafia e tuu talaloa ona o se mea ua tulai mai i lea taimi i lea taimi. O lea la ua e saunoa mai i tulaga ia, se i tulai mai lau Afioga i le Minisita mo Tina ma Tamaitai, Atinae o Nu'u ma Afioaga ma Agafesootai.

**Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioaga ma Agafesootai):** Faafetai i lau Afioga i le Fofoga Fetalai. Sa fa'i lava e le faatagaina ae faafetai lau Afioga, o lea ua e saunoa malamalama. Ou te alofa foi i le Taitai o le Itu Agai aua o mea lava ia o lea e opuina ai faavae o le Maota ona o le le malamalama, e leai ni taimi e pei ona e malele. Ona pau lava o lea, o lea ua faatu le lafo ma ou te faaluaina, ia faataatia le Saunoaga Faa-Minisita a le Afioga i le Palemia i luma o le Laulau a Fono. Ona pau lava lea, faafetai.

**FOFOGA FETALAI:** Ia, o le agaga lena lea sa taumafai atu.

**Afioga Hon Aeau Peniamina Leavaiseeta (Falealupo):** Lau Afioga i le Fofoga Fetalai ma le faaaloalo lava, ua ou tulai atu lava i le tulaga lea. Lau Afioga i le Fofoga Fetalai, o le itula atoa lea na saunoa ai i, o le fautuaina o lau Afioga i le mea e tatau ona fai.

Lua, o le fautuaina o lana talanoa sa tatau ona fai i le HRPP, ia faafetai.

**FOFOGA FETALAI:** Malie le sui usufono mo Falealupo o lea ua ou maua lou finagalo. Taatia mai pea lau galuega ia te au, o lea tatou te matau uma lava, o lea foi e fai foi o la outou faafofoga a o lea foi ou te faalogologo au ia. Let me do my job, aua tou te atugalua i le tulaga lena. O lea e faafofoga le Atua Silisiliese o lea e faamasino i le tagata ma lana e fai. O lea e taatia le mea lea, silasila outou, lea, le Standing Order, o le Bible lena a le tatou Palemene, ae tasi lava le tagata e faia le interpretation o le mea lea, o au lea e saofai atu i i, one man. Ia outou faatuatua mai la i le mea lea e avatu, ua uma ona faataatia le tulaga o le tatou galuega, ae le o le tou tutulalai mai ma outou fai mai ia te au ua ova le taimi ma outou fai mai e aoai mai au, e leai. O lea lava ou te lavapapale, a aumai foi a outou saunoaga silasila o lea e avatu le avanoa, o le ava lena i lo ta va nonofo ai, e ava tele leaga o le atunuu lena o le atunuu ua uma ona fai ona tapui ma ona va tuaoi, e le aumaia foi tulafono a papalagi ananafi e fai ai lo tatou ava fatafata ma lo tatou ava faatamalii. O lea ua tatou o i le aganuu ma mea e tatau ona i ai.....

**Afioga Hon Palusalua Faapo II:** Lau Afioga i le Fofoga Fetalai ma le faaaloalo lava.

**FOFOGA FETALAI:** Alaala i lalo Palu, e te ava i le Fofoga Fetalai?

**Afioga Hon Palusalua Faapo II:** Ou te ava ae ou te puipui foi i lou mamalu.

**FOFOGA FETALAI:** Alaala i lalo, alaala i lalo. (*I le Taitai o le Itu Agai*). Ana e puipui e te usitai mai i le mea lea ou te fai atu ai. Usitai mai ma e lavapapale mai i le mea lea e taumafai atu ai le Fofoga Fetalai, o lea e tau tuu i le ogatotonu le tatou Fono.

O lea ua faatu le lafo o lea ua faaluaina.

*Faaluaina e le Minisita mo Tina ma Tamaitai, Atinae o Nuu ma Afioaga ma Agafesootai.*



*Na faamaonia le lafo.*

**FOFOGA FETALAI:** Ia, faasolo loa le Pepa o a tatou Galuega. O se taimi se aso, ona aumai lea i lumafale tatou te talanoa i ai ona fale lea o le mataupu, ae soia tou te agai e tau ta, e pei o lea e naumati Vailoa ma galala le atunuu e tele mataupu taua e tatau ona tatou talanoaina, a lea e faamanatu atu mea ua tulai mai i lenei taimi ina ia o tatou liolio ma puipui o lea tatou te tau lagi nei, o i inei o le Maota e to ai manu o Samoa, ia tatou agai la e tausii le manulauti lena, ia moni a tatou upu ma ia agai le tatou galuega tatou galulue faatasi ina ia manuia le atunuu.

**Afioga Hon Palusalua Faapo II:** Lau Afioga i le Fofoga Fetalai, e toe tasi lava si mea lea faamolemole, leai ou te le toe agai i le mataupu lea ua e taua. Pau lava le mea, o lea o le a uma le Paeaiga, ae leai ma se mea ua faataatia mai i Saunoaga Faa-Minisita nei?

**FOFOGA FETALAI:** O lea foi ua e toe fesiligia au, alaala i lalo Palu.

**Afioga Hon Palusalua Faapo II:** Ae leaga e tatau ona ou fesiligia, o lea o le a uma le masina e leai ma se mea o faataatia mai.

**FOFOGA FETALAI:** O lea e faasolo galuega. A lea e alaala atu le Failautusi o le Fono? Silasila o lea faatoa lavelavea mai? O au le isi tagata lea e tuuaia tele. O lea e pisa le atunuu po o le a le mea lea e tupu i le tuai ona aumai o Lipoti, a o lea e saofafai mai Taitaifono o lea e tele ina le faatinoa le galuega i nisi taimi. O ou pisa? O lea lava ou te taumafai e amo le tuuaiga lea e aumai, o fea o fai i ai a tatou galuega ma mea ia e fai. O ou fai atu ea? O lea faatoa ou fai atu nei, o lea foi ua e toe fai mai foi. Ia malilie le Maota, taatia mai pea le galuega a Fepuleai ma latou ma au nei lea e tau faasoasoa a tatou galuega. O le agaga lena, ia lavapapale mai le tatou Maota o lea e faasolo le tatou galuega i ala o Tulafono Tumau ma mea e tatau ona i ai. O lea ou te tagitagi atu. Ua fia sefulu ma ona tupu Tulafono, fia Lipoti ma mea, ia outou onosai mai o lea e tau faasolo le tatou galuega. O le aso ananafi, faafetai. O le aso, faafetai atu o lea o le a tele le tatou galuega o le a tatou agai i ai.

**TULAFONO TAU FAAOFI O TEUTEUGA O LE TULAFONO O LE  
FAALAPOTOPOTOGA FAAVAE TAU FATUGAO A SAMOA 2015  
– faitauga faatolu**

**FOFOGA FETALAI:** Tulai mai lau Afioga i le Minisita mo le Soifua Maloloina.

**Afioga Hon TUITAMA TALALELEI TUITAMA (Minisita mo le Soifua Maloloina):** Ia, e auai faatasi foi lenei sui usufono i le taulaga molia e lau Afioga i lenei taeao e sulaina ai le alofa ma le agalelei o le Atua i lau Afioga ma sui usufono mamalu o lenei Palemene. Ua se matagi lava e agi malu le faalogologo i lenei taeao i le Saunoaga Faa-Minisita a le Afioga i le Palemia. E ese lava auuala a le Alii e oo mai ai Lona finagalo i totonu o le Maota. Ia, o le tatalo, ina ia ave ma le mana ma ia ulufale i aai o finagalo

pogisa pea, ina ia faamalamalamaina i le upu moni ma Tulafono o lo o limataitaiina ai le tatou Faigamalo ma le tatou Palemene.

Lau Afioga i le Fofoga Fetalai, ua ou tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faalapotopotoga Faavae tau Fatugao a Samoa 2015 i lona faitauga faatolu.*

*Faaluaina e le Minisita mo Galuega Tau Alamanuia ma Atinae a le Malo, Minisita mo Fesootaiga ma Faamatalaga Tekonolosi, Minisita mo Aoga, Taaloga ma Aganuu ma le Minisita mo Punaoa Faanatura ma le Siosiomaga.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**TULAFONO TAU FAAOFI O TEUTEUGA O LE TULAFONO O LE FAALAPOTOPOTOGA O SUESUEGA FAASAIENISI A SAMOA 2015  
– faitauga faatolu**

**FOFOGA FETALAI:** Tulai mai lau Afioga i le Minisita mo Punaoa Faanatura ma le Siosiomaga.

**Tofa Hon FAAMOETAU LOA LEALAI AULOTO ULAITINO FAALE TUMAALII (Minisita mo Punaoa Faanatura ma le Siosiomaga):** Lau Afioga i le Fofoga Fetalai, ma lou ava tele ou te tulai atu ai e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faalapotopotoga o Suesuega Faasaienisi a Samoa 2015 i lona faitauga faatolu.*

*Faaluaina e le Minisita mo Aoga, Taaloga ma Aganuu, Minisita mo Galuega, Felauaiga ma Atinae Esee ma le Minisita mo Leoleo, Falepuipui ma Auaunaga Tau Tinei Mu.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**TULAFONO TAU FAAOFI O TEUTEUGA O LE TULAFONO O FEFAATAUAIGA TALAFEAGAI 2015 – faitauga faatolu**

**FOFOGA FETALAI:** Tulai mai lau Afioga i le Minisita mo Pisinisi, Alamanuia ma Leipa.

**Tofa Hon FONOTOE NUAFESILI PIERRE LAUOFO (Minisita mo Pisinisi, Alamanuia ma Leipa):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fefaatauaiga Talafeagai 2015 i lona faitauga faatolu.*

*Faaluaina e le Minisita mo Galuega Tau Alamanuia ma Atinae a le Malo, Minisita mo Tina ma Tamaitai, Atinae o Nuu ma Afioaga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**TULAFONO TAU FAAOFI O TEUTEUGA O LE TULAFONO O SONE TAU FOLAUGA I LE SAMI 2015 – faitauga faatolu**

**FOFOGA FETALAI:** Tulai mai lau Afioga i le Palemia.

**Susuga Hon TUILAIPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Sone tau Folauga i le Sami 2015 i lona faitauga faatolu.*

*Faaluaina e le Sui Palemia, Minisita mo Galuega Tau Alamanuia ma Atinae a le Malo, Minisita mo le Soifua Maloloina, Minisita mo Aoga, Taaloga ma Aganuu ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**TULAFONO TAU FAAOFI O TEUTEUGA O LE TULAFONO O FAAMALUMALUGA E FAAMAU AI MEATOTINO TAU LE TAGATA LAVA IA 2015 – faitauga faatolu**

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faamalumaluga e Faamau ai Meatotino tau le Tagata lava Ia 2015 i lona faitauga faatolu.*

*Faaluaina e le Minisita mo Galuega Tau Alamanuia ma Atinae a le Malo, Minisita mo le Soifua Maloloina ma le Minisita mo Aoga, Taaloga ma Aganuu.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

## ILOILOGA O LIPOTI A KOMITI FILIFILIA

**P.P.2014/2015 NU.132, LIPOTI A LE KOMITI O MATAUPU  
TAU AOGA, SAIENISI, FESOOTAIGA MA FAAMATALAGA  
TEKONOLOSI I LE P.P.2014/2015 NU.33, 34, 35, 36 & 37, LIPOTI  
FAALETAUSAGA A LE PULEGA O FAAILOGA MA TUSI PASI  
TAUALOA A SAMOA MO TAUSAGA 2008/2009, 2009/2010,  
2010/2011, 2011/2012 & 2012/2013**

– Iloiloga

**Susuga IFOPO MATIA FILISI (Sui Taitaifono, Komiti o Mataupu tau Aoga, Saienisi, Fesootaiga ma Faamatalaga Tekonolosi):** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoaio le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

*Faaluaina e se tasi o sui usufono mo Falealili, Tofa Tusa Misi Tupuola, sui usufono mo le Vaa o Fonoti, se tasi o sui usufono mo le Au Palota Taitoatasi Afioga Maualaivao Pat Ah Him, sui usufono mo Palauli ma le sui usufono mo Sagaga le Falefa.*

**Susuga IFOPO MATIA FILISI:** Lau Afioga i le Fofoga Fetalai;

### “FAUTUAGA:

E fautuaina e le Komiti le Malo ma le Pulega ina ia:-

1. **Tatau i le Pulega ona tapena e latou ia Polokalame mo Aoga resitalaina, ina ia mafai ona tutusa Polokalame aoaoina i aoga taitasi, fua i le laasaga o Tusi Pasi ua tapena e le Pulega.**
2. **Ia tuituililoa e le Pulega ia aoga ua resitalaina ae le i tuuina ni Polokalame mo le siakina ma le faamaoniaina.**
3. **Mo aoga mai fafo e pei o le APTC, e tatau lava ona usitaia pea aiaiga o le Tulafono mo le siakiina ma le faamaoniaina e le Pulega o ana Polokalame faaleaoaoga, ina ia laugatasia ma isi aoga i totonu o le atunuu.**

### IUGAFONO:

E fautuaina e le Komiti ia le Fono Aoaio ina ia faamaonia:

- **P.P.2014/2015, Nu. 33, Lipoti Faaletausaga a le Pulega o Faailoga ma Tusi Pasi Taualoa a Samoa mo le Tausaga Faaletupe na faaiuina i le aso 30 Iuni 2009;**
- **P.P.2014/2015, Nu. 34, Lipoti Faaletausaga a le Pulega o Faailoga ma Tusi Pasi Taualoa a Samoa mo le Tausaga Faaletupe na faaiuina i le aso 30 Iuni 2010;**

- P.P.2014/2015, Nu. 35, Lipoti Faaletausaga a le Pulega o Faailoga ma Tusi Pasi Taualoa a Samoa mo le Tausaga Faaletupe na faaiuina i le aso 30 Iuni 2011;
- P.P.2014/2015, Nu. 36, Lipoti Faaletausaga a le Pulega o Faailoga ma Tusi Pasi Taualoa a Samoa mo le Tausaga Faaletupe na faaiuina i le aso 30 Iuni 2012;
- P.P.2014/2015, Nu. 37, Lipoti Faaletausaga a le Pulega o Faailoga ma Tusi Pasi Taualoa a Samoa mo le Tausaga Faaletupe na faaiuina i le aso 30 Iuni 2013:ma
- Fautuaga a le Komiti ua tuuina atu i lalo.”

**FOFOGA FETALAI:** Malo saunoa i lau Afioga i le Taitaifono o le Komiti.

Tulai mai lau Afioga i le sui usufono mamalu mo Faleata Sisifo.

**Tofa LEALAILEPULE RIMONI AIAFI (Faleata Sisifo):** Faafetai lava i lau Afioga mo le avanoa. Faafetai foi i lenei taeao fou i le malosi faafouina mai le Atua aua le tatou galuega faaaauu. Malo foi i lau Afioga le onosai, e leai se isi Fofoga Fetalai e tusa ma oe i le tele o lou loto ma le lelei o le faagasologa o le tatou Fono. Faafetai i le Komiti mo le Lipoti. Muamua, ua ou fiu e vaavaaai fautuaga a le Komiti e le o sau ai i i. Lua, faafetai o lea e matau e lima Lipoti faaletausaga lea e talanoaina i le Lipoti lenei. Ia, lelei lea faiga, manaia. A o le mea lea e fia fesili ai i lau Afioga i le Taitaifono ma le Komiti i le faaupuga lea e faapea mai, “E ono aoga mai le 20, na o le 6 aoga be set secondary mai le 20 o aoga ua resitalaina. A fua la i ai, mai le 2009 seia oo mai i le 2014, e lima tausaga ae na o le ono aoga ua resitala. O le fesili la i lau Afioga i le Minisita, aisea ua mafua ai lea vaega? E i ai se mafuaaga ua tuai ai ona resitala isi aoga? O lona uiga na o le tasi le aoga i le tausaga? O le isi mea, po o le mea o fesetai le tatou Komiti, po o le aoga lea e refer i ai po o qualifications aua e lua mea?”

**FOFOGA FETALAI:** Se i tulai mai le Minisita mo Aoga, Taaloga ma Aganuu.

**Afioga Hon Magele Mauiliu (Minisita mo Aoga, Taaloga ma Aganuu):** Lau Afioga i le Fofoga Fetalai ou te tulai atu ma le faaaloalo i le fesili a le sui usufono.

O le taimi nei masalo ua ova atu i le 20 aoga ua uma ona resitala. O le tali atu lea ma le faaaloalo.

**FOFOGA FETALAI:** Se i tulai mai le sui usufono mamalu.

**Tofa LEALAILEPULE RIMONI AIAFI:** Faafetai i lau Afioga i le Minisita. O le ala o lau fesili leaga o lea ou te fesili atu i mea o lo o sau i le Lipoti. O lo o manino lava le faamatalaga, na o le ono aoga mai le 20 ua resitalaina. O le mea la lena o lea ua faapopoleina ai lou manatu, pe aisea ua na o le ono ai aoga ae ova i le 20 aoga o i ai nei mai le fia sefulu tausaga talu ona faavae leni itutino taua, a o lea na o le ono.

O le mea la lea aua o lea e faitau ane foi i lalo i qualifications. O lea la ua saunoa lau Afioga i le Minisita o lea ua resitala le 20 aoga, a o lea e maua e le

o tele ni qualification o talia. Po o fea la o i ai le isi aofaiga aua e leai foi se aoga e na o le resitala ae le talia qualifications?

**FOFOGA FETALAI:** O lea o le a tali atu le Minisita. Tulai mai lau Afioga i le Minisita.

**Afioga Hon Magele Mauiliu:** E le o se galuega faigofie. O le tele ia o le process e faaoga i nei mea. E matua vaavaai lelei le Matagaluega ma o e suesue uma auala po o lelei faatino uma mea e pei o le curriculum, o needs, o le level ma tulaga uma faapena. E vaai le fale o fai aoga ma vaai le anoafale ma tulaga uma faapena. E le o se mea la e faigofie, e tele le taimi e alu ai. E i ai foi taimi e o atu ai e asiasi e le talia aoga ma toe tuu i ai le avanoa ma toe o e asiasi. E pei o le tulaga lena o lea o lo o i ai nei, ma o le taimi nei ua gasolo lelei lava galuega a le vaega lea. Na faatoa amata i le 2006 le SQA, faafetai.

**FOFOGA FETALAI:** Malo, e manatu ua malamalama le folasaga a le Minisita le sui usufono mamalu. Tulai mai e faaauau le saunoaga.

**Tofa LEALAILEPULE RIMONI AIAFI:** Faafetai i lau Afioga i le Minisita. Ua aoga le fesili tatou te malamalama uma ai aua a tatou faitau ma tatou avefa le Lipoti lea, i lou lava sui usufono, e le o lelei, ae faafetai i le Afioga i le Minisita o lea ua faamalamalama mai o lea ua faatupulaia.....

**Afioga Tufuga Gafaleata Faitua (Vaisigano Nu.1):** Lau Afioga i le Fofoga Fetalai.....

**FOFOGA FETALAI:** Malie lava le sui usufono o saunoa, se i tulai mai le sui usufono mamalu.

O se mea e fia faamalamalama pe fia faasao le sui usufono mo Vaisigano Nu.1?

Tulai mai le sui usufono mamalu.

**Afioga Tufuga Gafaleata Faitua:** O le Lipoti lea lau Afioga i le Fofoga Fetalai a le matou Komiti, o le mafuaaga e ala ai ona laitiiti le au resitala, ia manatua foi e i ai standards a le SQA. A le meet ina la e aoga auaunaga ia, ona le mafai lea ona resitala. E moni lava e fai a latou aoga, ae e le resitalaina i lalo o le Matagaluega. E pei o le mafuaaga lea e ala ai ona le tóatele ae na o le toano aoga e mafai ona latou meet ina le standard o lo o manaomia e le SQA.

Ma le faaloalo lava, faafetai.

**FOFOGA FETALAI:** O lea ua mafai ona fesoasoani mai le sui o le Komiti. E fai sina tulaga maioio o standard o lo o i ai a le SQA e pei foi ona taumafai mai ai le Minisita. O lea ua molimauina i le finagalo o le sui usufono, e 20+ a tatou aoga ia ua resitala. Ia manatua foi o a tatou Lipoti nei ua fai sina out of date laitiiti, a o le update lea ua aumai e le Afioga i le Minisita ma le Matagaluega. O lea ua tele le suiga mai le taimi na tuuina mai ai le tatou Lipoti i tulaga masani.

Se i tulai mai lau Afioga i le Minisita mo Faamasinoga ma Pulega tau Faamasinoga, lau Afioga i le Sao Faapito.

**Afioga Hon Fiame Naomi Mataafa (Minisita mo Faamasinoga ma Pulega Tau Faamasinoga):** Lau Afioga i le Fofoga Fetalai, e taua le tatou mataupu lea e laga e le sui usufono ma e ao ona tatou manatua, o le vasega lea o aoaoga o le Post Secondary, e le tele ni aoga o i ai. A fua foi i le Iunivesite, a tatou tau matau i ai, o lea ua tuu uma i totonu o le Iunivesite aoga sa taape e pei o le Aoga Faafiaaoga, o le Aoga mo Tausimai, o le Aoga mo Matata Esee ma le Aoga a Marine. E pei la e faafoliga mai o le ono o se fuainumera e laitiiti, a o le mea moni lava e le tele ni a tatou aoga o le vasega lea. O le tele foi o na aoga o lea ua i totonu o le Iunivesite, ae tele le faamalu lea e tuu ai i lalo.

Na o se fesoasoani atu i le tatou mataupu, faafetai.

**FOFOGA FETALAI:** Tulai mai le sui usufono mamalu mo Faleata Sisifo.

**Tofa LEALAILEPULE RIMONI AIAFI:** O lea e avatu lava lou manatu i le tatou Lipoti lea e aumai. O lau sutesuega i ai e 29 aoga Post Secondary lea e i ai, ae 20 aoga ia ua resitala up to date. O lea la e feteenai le finagalo o le Afioga i le Minisita ma le sui o le Komiti, e ese la le mea e tau ina tau mai ua resitala, ese le taliaina o le qualification. E pei la o le mea lena o lea e faatuai i le taimi nei pe a ou faitau i ai e fua i le curriculum ma standard ia e require ma moomia e le SQA, ae e le aveesea lou manatu i le taua na faavae ai lena itutino o le Malo. A o le mea lea e avatu ai lau fesili, afai e i ai ni mafuaaga ogaoga ua ala ai ona faatuai le faatinoga o le auunaga, e tataua ona malamalama i ai tatou pe aisea. Ia tatou fesoasoani uma ina ia fai ia lelei ma faamautu.

O le isi vaega, o le a le mea ua gata ai i le secondary school? Ua tataua ona toe tilotilo le Afioga i le Minisita ma le Malo, ia amata mai le quality i lalo. Ia amata mai i Pre-Schools ma faasau ai e tau i luga. Aua o le taimi nei, ou te talitonu o lea e faatino e le Ofisa o Aoga le vaega lea, ae ou te talitonu ua tataua ona aveane uma i le itutino lea, ona alo lava lea o le Ofisa o Aoga e concentrate i le aoaoina o tamaiti, ae tuu ane le vaaiga o le quality i le itutino lea ia mautinoa ia sau lava mai lalo e tau i luga ua i ai le quality lea tatou te talanoa i ai.

**FOFOGA FETALAI:** Malie le sui usufono se i tulai mai le Afioga i le Minisita.

**Afioga Hon Magele Mauiliu:** Lau Afioga i le Fofoga Fetalai, faafetai lava mo le avanoa. O lea o le a toso solo e le sui usufono lea a tatou aoaoga.

O le SQA ia e mo mea e igoa o Post Secondary Education, e le aafia ai fua a tatou Primary Schools and Secondary Schools, se i vagana foi ua fai ni polokalame a na aoga e fall i le category lea o le Post School Education.

Lau Afioga i le Fofoga Fetalai, o lea ua 20 a tatou aoga ua uma ona resitala ma ua meet foi quality standards. E ono a tatou polokalame ia ua meet foi le quality standard e include ai ma le Maritime. O se faaaliga lata mai lea, a o lea ua alualu lava i luma, o lea ua 20 a tatou aoga ia ua resitala ma ua meet le quality standard, faafetai.

**FOFOGA FETALAI:** E manatu o lea ua malamalama.....

**Tofa Aveau Tuala Lepale Niko Palamo (Faleata Sasae):** Lau Afioga i le Fofoga Fetalai, o au o le sui o le Komiti lea leaga o lea ua fesiligia so o lava le itu lea.

**FOFOGA FETALAI:** Se i fesoasoani la faamolemole i le sui usufono.

**Tofa Aveau Tuala Lepale Niko Palamo:** O aoga ia e lavea ai aoga foi ia e i ai Don Bosco ma aoga faapea. O aoga la ia sa alu lava i lalo o a latou polokalame po o a latou lava curriculum. O lea la ua i ai le manatu o le Malo i lalo o le polokalame lea ia fai ni qualification standards e faatatau a iu mai le tamaitiiti aoga i aoga ia, ae ua mafai ona meet standard e faigaluega ai. O le tele la o aoga ia ua uma ona qualify standards lea e taumafai le SQA e fai se standard e tasi e o uma ai aoga e tai pei o le Aoga a le Metotisi lea e fai i Uesiliana ma aoga faapena, lea e ala ai ona tuai ona resitala ma taumafai se standard e resitala ai, a o la ua i ai aoga ua leva ona faatu.

E pei o le mea lena o lea e ala ai ona tuai ona o aoga ia o aoga o la e i ai a latou curriculum. Ma le faaaloalo lava.

**FOFOGA FETALAI:** Ua e faafofoga la Leala, ua e faafofoga e le ma'i le Komiti. O lea e matua tutu aai mai lava le Komiti.

**Tofa LEALAILEPULE RIMONI AIAFI:** E le o fesiligia le Komiti aua o le matua vaivai o le sui o le Komiti lenei.

E leai o si ou uso foi, e leai e faamalulu atu. E le o fesiligia le mandate, a o lea e fesiligia le performance. Ia manatua foi e pei ona ou fai atu i lau Afioga i le Fofoga Fetalai, e 20 aoga ua uma ona resitala ae ono mataupu. E le sese lau tala, o lea ua faamaonia e le Minisita? Leaga e fai lau research.....

**FOFOGA FETALAI:** Ia, agai ia o lea ua manino le saunoaga a le Afioga i le Minisita.

**Tofa LEALAILEPULE RIMONI AIAFI:** O le quality lea na saunoa i ai le Afioga i le Minisita.....

**Tofa Aveau Tuala Lepale Niko Palamo:** Lau Afioga i le Fofoga Fetalai, e leai e tataua ona faasao le saunoaga a le sui usufono mamalu.

**FOFOGA FETALAI:** Ia, se i tulai ae le sui o le Komiti e faasao le saunoaga a le sui usufono.

**Tofa Aveau Tuala Lepale Niko Palamo:** O lea na fesili le sui usufono po o le a le mea e ala ai ona tuai ona resitala po o le performance. O lea la ua ou faamalamalama atu le mafuaaga e ala ai ona tuai. Ua tuai ona resitala ona o aoga nei e le o ni aoga fou, a o aoga ua leva ona faataatia mai a latou polokalame, e pei ona ou taua atu ai le aoga lea a Don Bosco, e i ai lava a latou polokalame sa mulimuli ai. A o lea ua taumafai le SQA i le isi level i luga ma fai se isi ituaiga polokalame, o lea la e tau faatulaga polokalame ia. Ma le faaaloalo lava.



**Tofa LEALAILEPULE RIMONI AIAFI:** E momoli atu lau faafetai i le Afioga i le Minisita.

**FOFOGA FETALAI:** Malie le sui usufono se i tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, o lau lava tulai atu; e momoli lau faamalo i le Komiti. O le manaia ia o a latou fautuaga ia e aumai, o lea foi e manino le faamalamalama. Ou te masalo o le tasi lea Komiti o le matua lelei o le faatinoga o a latou galuega, ae malie ia le sui usufono o lo o tutulai mai pea. Aua e mafai foi ona ou fesili atu, o le a la le mea o le a taofi ai i Primers ae le ave loa i Aoga Amata? Ae se i e Minisita ia o Tupe i se aso ona fai lea o mea na e te manao i ai, ae taatia mai mea ia aua e oo atu i ai ua atoa uma lava le vaega lea e totoe. Ia manatua foi o mea ua masani ai, a e soona teletelevave tele, e uma ane ua e malepe i luga o le aupa.

**Tofa LEALAILEPULE RIMONI AIAFI:** Lau Afioga i le Fofoga Fetalai, ua leva ona ou Minisita. O lea ou te Minisita Agai. I do not have to be there? I have already a Minister.

Lau Afioga i le Minisita mo Aoga, Taaloga ma Aganuu, faafetai. Lau Afioga i le Tamaitai Pule Sili o le Matagaluega o le SQA, se o le mea e taulagalaga leaga a ou le lagaina, ina ne i te i ua faapea ua sese le Lipoti. E faafetai i le Komiti, a o le quality lea ou te faalogo atu i ai i lau Afioga.....

**FOFOGA FETALAI:** Malie le sui usufono mamalu, se i tuu atu le avanoa i le Minisita mo Tina ma Tamaitai, Atinae o Nuu ma Afioga ma Agafesootai.

**Tofa Hon Tolofuaivalelei Falemoe Leiataua:** Ona o le Fono a le Palemene lau Afioga i le Fofoga Fetalai vaeatu le ee o sui usufono mamalu, tatou te o lava e faamaumau mea moni ma mea o lo o i totonu o Tulafono ua aloaia.

O lo latou lava lea manatu o latou o Minisita Agai, ae faamolemole e leai se mea ua faia faaletulafono e aloaia ai lea vaega. Onosai lou fia Minisita e le i taitai, o lea e i ai le isi faiga palota lea e lumanai. Ou te alofa i si ou uso leaga o la ma te nonofo i Vaitele o lo ma nuu, ae onosai le toe tau o na tofiga aua e tau mai ai ma faafofoga le atunuu ma faapea, “Se leaga le tagata alii e fia Minisita, a o le vaivai o le latou Itu.”

Ma le faaaloalo lava lau Afioga i le Fofoga Fetalai.

**Afioga Hon Palusalua Faapo II:** Lau Afioga i le Fofoga Fetalai ma lou faaaloalo lava. E faanoanoa tele au i le saunoaga lea a le Afioga i le Minisita.

**FOFOGA FETALAI:** Ia, malie ia.

**Afioga Hon Palusalua Faapo II:** O lea e taumafai mai le Afioga i le Palemia ina ia faalagi lelei a matou Minisita Agai. O lea e sao le sui usufono, o lea e faauiga e le Afioga i le Palemia fai mai o Minisita Tutu i le Paolo, o le Shadow Cabinet. Aua le tee le uluga i lau Afioga i le Minisita o Tina ma Tamaitai, Atinae o Nuu ma Afioga ma Agafesootai. E leai, o le faalagiga

lava lea ua masani ai le atunuu. Ua e silasila i nusipepa ma faasalalauga, o Shadow Ministers. Ioe, e te fiu lava la e aveese, ae leai o lea e sao ua aloaia e le atunuu. Pe e te le aloaia, a o lea ua aloaia e Samoa atoa.

**Afioga Hon Tolofuaivalelei Falemoe Leiataua:** Lau Afioga i le Fofoga Fetalai, na o se mea lava e fia faasao ma toe faamanatu i le Afioga i le Taitai o le Itu Agai. O lea tonu lava ua toe saunoa mai le Taitai o le Itu Agai i mea e atugalua ai le Taitai o le Malo. O le o i nusipepa, o i nusipepa, ae e le faaaogaina na mea o nusipepa i totonu o le Maota lenei.

Ma le agaga faaaloalo lava.

**FOFOGA FETALAI:** Faatea lea fuilauvi Leala, e tumau lava tulaga aua o a tatou lava upu ma tala e faamamalu lava e tatou i tatou.

**Tofa LEALAILEPULE RIMONI AIAFI:** O lea ua tali atu le former Minister. E lelei le Shadow Minister i lo le former Minister. So I rather be a Shadow Minister all my life than a Minister and a former Minister, but it is not a Leader of Opposition. Yes sir.

**Susuga IFOPO MATIA FILISI:** Faafetai i lau Afioga i le Fofoga Fetalai.....

**FOFOGA FETALAI:** Tulai mai lau Afioga i le Taitaifono.

**Susuga IFOPO MATIA FILISI:** Ou te talitonu ua malamalama leaga o lea ua talanoa i Shadow Minister, a o le tatou Lipoti o Aoga lea tatou te talanoa ai, ae ua faamalo. Ua faafetai foi i le sui usufono lea na ia lalalaga mai. O lena lava ua sausaunoa atu foi Afioga i Minisita.

Ona pau lava lea o se mea ona ou nofo loa lea i lalo. Mo le silafia, o le 2006 seia oo i le 2013, ae faatali mai i le 2014, ou te iloa e maua ai aoga pe 100 na e te manao i ai.

Ma le faaaloalo lava, faafetai.

**Tofa LEALAILEPULE RIMONI AIAFI:** Faafetai ua maea lau Afioga i le Fofoga Fetalai, faafetai foi i lau Afioga i le Taitaifono o le Komiti aemaise foi lau Afioga i le Minisita. E faamalulu atu foi i le Matagaluega pe afai o le a sa outou faafofoga mai, e leai tatou te galulue faatasi aua le taumafaiga o lenei itutino taua o lo tatou Malo ua faatuina. A o lau lui lena lau Afioga i le Minisita, pe e te saunoa mai i le quality, ae ou te talitonu o le quality e amata atu lava i lalo i Pre-Schools ma alu ai agai i luga.

Ia manuia le Fono, faafetai.

**FOFOGA FETALAI:** Tulai mai le sui usufono mo Aana Alofi Nu.3.

**Afioga TOEOLESULUSULU CEDRIC POSE SALESA SCHUSTER (Aana Alofi Nu.3):** Faafetai i lau Afioga i le Fofoga Fetalai mo le avanoa, e faamalo atu foi i le Komiti. Ona pau lava sina mea lau Afioga i le Fofoga Fetalai e fia maua ai sina malamalamaga. O le agaga o le fesili lea na tau maua mai i le tali a le Minisita, e pei o lea na o Post Secondary Schools. O le agaga lau Afioga ia i ai se vaega a le Ofisa o Aoga po o le SQA, o le taimi nei

o le tele o a tatou tamaiti secondary schools, a suit le SC ae toe fia o atu i atunuu i fafo, Niu Sila, Ausetalia po o Amerika po o Peretania, po o ai le vaega o lo o mafai ona vaavaai i le faiga o le matching o grades a tamaiti tatou ma grades, a faapea o se tamaititi e sue le SC i i nei ae maua se avanoa foi e alu atu ai e taalo po le aoga i Ausetalia, ia pei ona silafia e fa ia tausaga high school a Ausetalia ae lima tausaga high school a tatou. Po o i ai la se taumafaiga e le gata o le Matagaluega aemaise o le SQA ina ia mafai ona match ai. Muamua o subjects ia upgrade foi, ona e eseese ma marking o grades, pei o se faataitaiga o le Maths lea sa i ai nei a tatou, ia e eseese le international standards, a oo ina o atu tamaiti o isi atunuu i isi atunuu, ia e i ai le grade ma le matching ina ia mafai ai ona accept, pei foi lava o le mea o lo o faatinoina nei e le SQA mo Iunivesite, ae mo tatou high school la aemaise lava i tamaiti i le vasega 10, 12 ma le 13 aemaise foi o le Iunivesite, ina ia mafai ona tagatagai i ai le SQA ia po o le Matagaluega foi o le Education mo le lumanai, faafetai.

**FOFOGA FETALAI:** Ia e i ai se isi tali a le Taitaifono ae o le a tuu atu le fesili, le sui usufono mo Aiga i le Tai.

**Susuga Ifopo Matia Filisi:** Leai faafetai.

*Na faamaoni le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P. 2014/2015 NU. 133, LIPOTI A LE KOMITI O GALUEGA,  
FELAUAIAGA MA SIOSIOMAGA I LE P.P. 2014/2015 Nu. 16, LIPOTI  
FAALETAUSAGA A LE PULEGA O MALAE VAALELE A SAMOA  
MO LE TAUSAGA 2012 – Iloiloga**

**Tofa TUSA MISI TUPUOLA (Taitaifono, Komiti o Galuega, Felauaiga ma Siosiomaga):** Lau Afioga i le Fofoga Fetalai ou te tulai atu ma le faaaloalo tele e faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Aiga i le Tai, le sui usufono mo le Vaa o Fonoti, se tasi o sui usufono mo Palota Taitoatasi, Afioga Maualaivao Pat Ah Him, le sui usufono mo Palauli ma le sui usufono mo Sagaga le Falefa.*

**FOFOGA FETALAI:** Tulai mai lau Afioga i le Taitaifono.

**Tofa TUSA MISI TUPUOLA:** Lau Afioga o Fautuaga a le Komiti:

**FAUTUAGA:**

E fautuaina e le Komiti le Malo ina ia:-

4. Lagolago malosi le uunaia o Galuega Tetele ua fuafuaina e le Pulega, lea e aofia ai Galuega Toe Faaleleia o:-
  - Fale o le Malae Vaalele;
  - Le vaega o lo o tulauleele ma tuuvaa-ese atu ai vaalele (runway) ma le vaega o lo o paka ai vaalele;
  - Laina o uaea (cables) i totonu o le malae vaalele.
5. Tatau i le Pulega ona silasila i le faaaogaina o le eletise e gaosi mai i le malosi o le la (solar) i le taimi nei mo nisi vaega o lana auunaga, ina ia faasaoina ai tupe faaalu i le totogi o le eletise.
6. Usitaia aiaiga o le Tulafono mo le vave tuuina mai o Lipoti Faaletausaga a le Pulega i le Palemene.
7. Toe fautuaina le Pulega ina ia tapena faamaea lana Fuafuaga Autu (Master Plan) ona e talitonu le Komiti e taua tele mo ana fuafuaga tetele i le agai atu i le lumanai.

## 1. IUGAFONO

E fautuaina e le Komiti ia le Fono Aoao ina ia faamaonia:

- P.P.2014/2015, Nu. 16, Lipoti Faaletausaga a le Pulega o Malae Vaalele mo le Tausaga Faaletupe na faaiuina i le aso 30 Iuni 2012; ma
- Fautuaga a le Komiti ua tuuina atu i lalo.

Ma le faaaloalo tele.

**FOFOGA FETALAI:** Malo faafetai saunoa i lau Afioga i le Taitaifono. Ia e matauina e leai se sui usufono o fia saunoa i la outou Lipoti, o lona uiga ua malie atoatoa le Komiti ma le faafofogaaga a le Palemene.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

### **P.P. 2014/2015 NU. 134, LIPOTI A LE KOMITI O GALUEGA, FELAUAIIGA MA SIOSIOMAGA I LE P.P. 2014/2015 NU. 25, LIPOTI FAALETAUSAGA A LE PULEGA O LE SUAVAI MO LE TAUSAGA 2012-2013 – Iloiloga**

**Tofa TUSA MISI TUPUOLA:** Lau Afioga i le Fofoga Fetalai ou te tulai atu e faatu le lafo, *Ina ia faautagia e lenei Palemene le Lipoti a le Komiti o*

*lo o tuuina atu ai ana Sailiiliga, Fautuaga ma ana Iugafono. Ma lou faaaloalo.*

*Faaluaina e le sui usufono mo le Vaa o Fonoti, le sui usufono mo Aiga i le Tai, ma le sui usufono mo Palauli.*

**FOFOGA FETALAI:** Tulai mai lau Afioga i le Taitaifono.

**Tofa TUSA MISI TUPUOLA:** Lau Afioga i le Fofoga Fetalai, o le Fautuaga a le Komiti:

**1. FAUTUAGA:**

E fautuaina e le Komiti le Malo ina ia:

1. **Ia tausisia e le Pulega o Suavai a latou Sini Autu ia maua e tagata uma o le atunuu le suavai mama i taimi uma aemaise ai le amanaiaina ai o faasea e tuuina atu e le mamalu o le atunuu e faatatau i le tele o paipa papa.**
2. **Ia taumafai nei le Pulega e foia le faafitauli o lo o tulai mai i Alaoa ma Malololelei ona e matauina e le Komiti, o le vaega lea o lo o faamauina ai le tele o le suavai maua ae peitai, o lo o matauina foi e le Komiti:**
  - **le i ai lea o suavai maumau mai ia nofoaga e i le va o le 68-84%.**
  - **e na o le 16% o le tanevai o lo o faaaogaina e le mamalu o le atunuu ma maua ai tupe a le Pulega.**
3. **Ia silasila le Pulega i le faatanoa vai i Fuluasou lea ua faamauina le tele foi o suavai maumau e tusa ma le 70% mai lea lava faatanoavai ina ia mafai ona foia ni mafuaaga o lea faafitauli. O lona uiga, e na o le 30% o lo o faaaogaina e le mamalu o le atunuu ma maua ai tupe a le Pulega. O le mafuaaga o lea fautuaga a le Komiti ona ua maitauina le faatuputupulaia o le faitau aofai o le mamalu o le atunuu o alaala ma papaaa o i lea foi tafa o Samoa.**
4. **Taumafai le Pulega e tapena se plokalam e fetuutuunai ai le faaaogaina o pamuvai ina ia mautinoa le pamuina mai i luga o le suavai lelei e le sualua mo le fofoga taumafa o le atunuu aua ua matauina e le Komiti le faasolosolo pea ina faaletonu le suavai maua mai le manava o le elele i vaega tulata i le sami ona o le fesuiaiga o le tau.**

## **IUGAFONO:**

E fautuaina e le Komiti ia le Fono Aoaofaitulafono ina ia faamaonia:

- **P.P.2014/2015 Nu. 25, Lipoti Faaletausaga a le Pulega o Suavai mo le Tausaga faaletupe na faaiuina aso 30 Iuni 2013.**

Ma lou faaaloalo.

**FOFOGA FETALAI:** Malo, faafetai i lau Afioga i le Taitaifono.

**Afioga Muagututagata Faamausili Auimatagi Peter Ah Him (Sagaga le Usoga):** Lau Afioga i le Fofoga Fetalai.....

**FOFOGA FETALAI:** Se i tulai mai le sui usufono mo Sagaga le Usoga.

**Afioga Muagututagata Faamausili Auimatagi Peter Ah Him:** Faafetai i lau Afioga i le Fofoga Fetalai mo le avanoa. E matau atu o le Lipoti a le Suavai, ae sa i ai se mea e fia fesili ai lau Afioga, pe le i tau ane ai i le sailiiliga a le Komiti ia le tulaga lea o le tau o le suavai ma le faaaogaina e pisinisi o le taulaga le suavai, lea e ese le tau o le suavai, ia ae ese foi le tau o le 80% o le faaaogaina o le facility la lea e sau ai le otaota i le taulaga, ona pei e tai tali tutusa lava aua o le Lipoti Faaletausaga. O le fesili lau Afioga i le Fofoga Fetalai, o le tau o le suavai i le taulaga, e ese le tau o le suavai, ae ona 80% laia lea o le iunite e te faaaogaina ona faatele lea i le \$3.50 maua atu le pili o le suavai a lau pisinisi i nei i le taulaga, ua ova mamao atu i le tau sao o lau suavai. E talosagaina ai le Komiti, pe le i silasila ane i ai, po o le a se mea e...aua e eseese fale faigaluega, pei o fale faigaluega a le Malo po o le fale lea faamasino lea e tuu mai i i e maua le toaselau o tagata e faaaogaina, a o nai a matou pisinisi, e pei na o le toavalu, toasefulu tagata e faaaogaina le facility lea po o le tulaga le sewage plan lea e alu i ai le otaota, ia a o lea e aumai o le mea lava e tasi, e 80% o iunite e te faaaogaina, e aumai la lau pili po o se mea ole \$59 ae sefe le faaaoga o le facility lea ua \$100 ma ona tupu, faapoopo faatasi laia, ua ova le taugata.

**FOFOGA FETALAI:** O lea ua maua le finagalo o le sui usufono, se i tulai mai le Afioga i le Minisita mo Galuega, Felauaiga ma Atinae Eeseese, tulai mai.

**Afioga Hon Manualesagalala Enokati Posala (Minisita mo Galuega, Felauaiga ma Atinae Eeseese):** O le faafesili i le sui usufono mamalu po o le tulaga foi lea i le vai lafoai po o le vai taumafa lea e agai mai ai, lea e tau fuafua atu i ai se tali, ma le faaaloalo lava.

**FOFOGA FETALAI:** O le vai lafoai po o le vai taumafa?

**Afioga Muagututagata Faamausili Auimatagi Peter Ah Him:** Lau Afioga, o le vai taumafa lea, a alu atu le pili a faapea e 31iunite na e faaaogaina o le vai taumafa, ona toe alu atu lea ma le isi pili i lalo, e 80% o le

31 iunite lea, ona faatele laia lea i le \$3.50, ona maua loa lea o le isi au pili lea e \$108 e faaopoopo i luga o le pili o le vai taumafa. Ia o le tulaga lena o la e access atu ai ia po o la e alu atu ai pili o le taulaga nei. O lona uiga, a o le matou silasila.....

**FOFOGA FETALAI:** Ia, ua malamalama le Minisita, o le a avatu le avanoa, tulai mai le Minisita se i tali mai.

**Afioga Hon Manualesagalala Enokati Posala:** Lau Afioga i le Fofoga Fetalai, e pei o le tulaga lena o lea sa tau fesiligia aua e lua vaega ia, o le vai taumafa ma le vai lea e faaoga lea e sau agai i Sogi mo le vai lafoai foi lea, a o le tau lava lea e faatulaga ai ia le...ia pei lava o le faataitaiga ua masani foi ona fofoga i ai le Maota nei e .50sene i le kalone foi lea 44, pe a fua agai i ai le faatulagaga o le vai lea i a tatou domestic consumers o latou o lo o faaogaina. E i ai la sina eseese laitiiti ma le tau ia e faaogaina ai e tatou aufaipisinisi, ona o le tulaga foi lele e tele le suavai e moomia, ae o lo o i ai lava fuafuaga, o la ua amata ia polokalame lea a le JICA a Iapani lea ua faatino e lavea ai se vaega o le taulaga, e tele le suiga o lo o tau fuafua i ai mai Vailima, ona o Vailima lea sa le faamamaina le suavai, ia a o lea ua faagaioi ia galuega ia e faamama i tane ia ma faasoa mai e lavea ai la le taulaga, ou te iloa afai e atoatoa loa ona faatino le vaega lea, ia ua i ai foi nisi fetuunaiga o le a fuafua agai i ai ia le tatou Pulega mo le tau mo le taulaga aemaise lava mo pisinisi. Ia pei o se tali atu lea ma le agaga faaaloalo.

**FOFOGA FETALAI:** Malo. E manatu, mo le faasaoina, se i tulai mai le sui usufono mamalu, faafetai i lau Afioga i le Minisita, tulai mai lau Afioga i le sui usufono mo Faleata Sasae.

**Tofa Aveau Tuala Lepale Niko Palamo:** Faafetai i lau Afioga i le Fofoga Fetalai. O le tasi lenei Lipoti taua i totonu o le Palemene, ona o le Lipoti lenei o lea ua tau mai ai le tele o le vai lea e liki, lea e faamaumau. O lea foi ua sau i totonu o le Lipoti lenei le aofaiga o le vai o lo o faaoga, o lea foi e faapea mai o le tele o suavai maumau e tusa ma le 70% le vaega lea.

Na pau lava lau fesili sa taumafai i le Komiti lenei, sa tatau ona fautua....

**FOFOGA FETALAI:** Malie lava le sui usufono mamalu, o fea lea e agai i ai lau.... O lau lauga lea e taumafai i le itu lea?

**Tofa Aveau Tuala Lepale Niko Palamo:** Leai o lea ou te fesili i le fautuaga lea e sau e 70% le suavai maumau lea e sau i totonu i i. O lea la ou te fesili ai i le fautuaga, pe le tatau ona faamalosi tele le fautuaga.

**FOFOGA FETALAI:** Malie la Aveautau o le a ou tuuina atu le avanoa i le taimi e te tulai ai e fai lau saunoaga leaga o lea e saunoa le sui usufono mamalu ia Muagututagata, o lea foi ua tali malamalama le Minisita. O lea ua malamalama le tali a le Minisita Muagututagata ae tulai mai e faaiu mai le saunoaga. O le a fai e le Malo le fuafuaga i le lumanai mo pisinisi tu taulaga.

**Afioga MUAGUTUTAGATA FAAMAUSILI AUIMATAGI PETER AH HIM:** Faafetai tele i lau Afioga i le Fofoga Fetalai, faafetai foi i le

Afioga i le Minisita, o lea ua tali mai. Faafetai tele lava, ae pei o se atugaluga lena, o se faataitaiga lea na ou avatua, e 31 iunite sa faaoga e le matou pisinisi, ona 80% lea o le iunite lena e pili ai oe i le suavai lea lafoai. A 80% la, o le 31 lena, e aumai la iunite na, o lea ou te vaai i ai, e faatele i le \$3.50 ona uma ifo lea o lau pili, ua \$100+ lau faaoga o le suavai lafoai ae laitiiti lau suavai lea e te faaogaina, aua o lau suavai taumafa lea e base mai ai le 80% lea. Ae faafetai i lau Afioga i le Minisita o lea ua saunoa manino o le a toe tilotilo i ai le Pulega, ona o le matou mau, e le tutusa uma pisinisi, na o le toavalu tagata o le isi pisinisi, ae 300 le vaega o le isi pisinisi. E eseese la faaogaina o suavai lafoai. Ma le faaloalo lava.

**FOFOGA FETALAI:** Ou te manatu o lea ua manino le taumafai mai a le Afioga i le Minisita, e le taofia ai foi lau Afioga i lou susu sao i le Matagaluga pe fai se lua fesootaiga tuusao ma le Minisita e faamalamalama mai, ua alu le tatou taimi o tau faamalamalama lau pili. O le a lou finagalo lau Afioga i le Minisita, ae manuia le soalaupule o mea ogaoga o lea foi ua e saunoa o le a faaleleia mo le lumanai.

Ua tatou taunuu i le tatou taimi malolo, e faasilasila atu o le a faataatia ese Tualumaga a le Fono Aoa o lana malologa masani o le taeao.

*Na faataatia ese Tualumaga a le Fono Aoa o lana malologa masani i le itula e 10:45 i le taeao ma toe faaauau i le itula e 11:30 i le taeao.*

**FOFOGA FETALAI:** E faia le tatou malologa ua maea ona talifuaitau le Afioga i le Minisita i nisi o saunoaga sui usufono, ae o lo o avanoa le Maota mo saunoaga a nisi sui usufono e toe fia saunoa.

Tulai mai le sui usufono mo Faleata Sasae ona sosoo ai lea ma le sui usufono mo Vaisigano Nu.2.

**Tofa AVEAU TUALA LEPALÉ NIKO PALAMO:** Faafetai i lau Afioga i le Fofoga Fetalai o lea ua maea faamalositino a le Palemene. E faafetai foi i le Komiti i le Lipoti maeaea e pei ona faataatia, ae i ai nai mataupu ia ou te fia fesiligia ai le Lipoti a le Komiti i lalo o suesuega ma fautuaga a le Komiti o lo o faali mai ai i le tele o le suavai o lo o liki, aemaise lava i Fulusou ma Alaoa. O le mea la lea ou te faanoanoa ai i le Komiti, ona e le malosi le latou fautuaga. A tagai i ai i le fautuaga lona tolu lena e fai mai le Komiti, e 70% le suavai o lo o maumau. Ae fai mai le fautuaga, ia silasila le Pulega i le faatanoavai i Fulusou, o lea e fai mai e silasila i ai. O le mea e tataua ona fautua mai...

**FOFOGA FETALAI:** O lea ua maua le finagalo o le sui usufono. Se i tulai mai lau Afioga i le Minisita.

**Afioga Hon MANUALESAGALALA ENOKATI POSALA:** Ou te faafetai i Lipoti a Komiti ma fautuaga ua tuuina mai. Atonu i le silasila a le sui usufono mamalu e le o faamamafa, a o le vaega o la e faamamafa e le Pulega, o lo o agai i ai, o a latou suesuega e i ai le polokalame o le non-revenue water. O la e fai... o Savaii ma Upolu nei, o la e lava, o galuega nei e



faifaipea, e saili aua e le gata o liki i lalo o paipa o lo o taatitia i lalo, a o faaletonu foi o la e i ai i totonu o aiga e ala ai ona tulai mai le tele o le suavai e maumau. E pei la o polokalame na. E sao o lea e 70%, ae ua tele le suiga e oo mai i le taimi nei, o le vaivai maumau lea i le tulaga e i ai, ona o le isi faiga la e fai ai, o le tasui o paipa network nei o pipeline o la e i ai. Ua matauina ua fai si leva o lea... e pei o le sau lea mai Alafua e agai i tai i Lotopa, o le tasi lona vaega ua sui. E agai faapena le Pulega ona o le taumafai lava ina ia tuuitia le vai lea, a o lo o fai foi a latou sailiiliga ma fai suesuega po ua i ai se suiga ma tulaga e i ai.

Ou te faafetai foi i le Komiti o lea lava e lagalaga mai ma aumai, ae mamafa i le Pulega, o lo o faatino ma faaauau pea ia galuega. Ma le faaaloalo lava.

**FOFOGA FETALAI:** Malo. Tulai mai le sui usufono e faaauau mai le saunoaga.

**Tofa AVEAU TUALA LEPALE NIKO PALAMO:** Faafetai lava i lau Afioga i le Minisita. Masalo e le o agaga atu lau faamatalaga i le Pulega, o lea ou te mautinoa o lo o faatino e le Pulega. E pei foi ona silafia sa i ai i le vaitaimi muamua sa fai ai foi le lauga a le sui usufono, e tilotilo le Pulega i ni auala e faatupe ai le faiga o le vaega lea, aua o le tele o vaega ia e le o... ona o le vai lea, o lea e i totonu o Faleata le vai lea o Fuluasou, lea e tele ina feinu uma ai tagata o le atunuu, ae o lea e foliga mai o lea e tele le vai o lo o faamaumau. A o le uiga o lou manatu lea e avatu, e tatau i le Komiti ona ave se fautuaga malosi, pe faapefea ona foia lea faafitauli ae aua le silasila i ai.

A tagai foi i le vaega lona lua i Alaoa, o le vaega foi lea e tasi. E pei o lau fautuaga lea i le Komiti, taumafai e aumai ni fautuaga malolosi ina ia fai, ae aua le aumaia fautuaga faalelelei.

**FOFOGA FETALAI:** Malie se i tulai mai le sui usufono o le Komiti. Tulai mai le sui usufono mo Palauli.

**Afioga Afoafouvale John Moors (Palauli):** Faafetai mo lou avanoa mo se tali e fesoasoani atu i le sui usufono mo Faleata Sasae e tusa ai foi ma le faasea ua tuuina mai i le Komiti. E silasila foi, o lona ua tuuina mai se manatu o le sui usufono mo Faleata, e tatau ona matou avatu se faamatalaga po o le a le ituaiga auala e fai ai, ae silafia foi, o matou e le o ni tagata e faigaluega i le Ofisa o le Vai, ae matou te fautua e silasila po o a ni fofu e tatau ona faatino ai le faafitauli lea, e tatau ona foia ai le faafitauli. A o le gagana lea matou te faaogaina, o se gagana e amanaia ai le aufaigaluega. O lo o i ai foi le tofamamao i le aufaigaluega latou te silafia ai i mea e tatau ona fai, matou te le tau faatonuina foi le aufaigaluega. O le tulaga lona ua uma foi ona matou soalaupuleina i totonu o a matou fonotaga ma le aufaigaluega, ua faapena foi ona latou mulimulitaia faatonuga ma fautuaga ua faapena ona tuuina atu. Ma lou faaaloalo lava.

**FOFOGA FETALAI:** Malo. Ou te manatu ua manino le atugaluga o le sui usufono, o lea foi ua talifuaitau le Komiti, ua manino foi le faamalamalama o le Afioga i le Minisita, atonu o la e ave lava le faataua ma le faamamafa a le Pulega, ua tele tele lenei suavai maumau, e le o ni upu avane ai, 70% is a big

amount. O lona uiga ua tatau ona ave le tinou a le Matagaluega, a o lea ua saunoa manino le Afioga i le Minisita, o lea e agai pea galuega faaauau.

Tulai mai le sui usufono pe i ai se isi mtaupu i le Lipoti.

**Tofa AVEAU TUALA LEPALE NIKO PALAMO:** E leai faafetai, o lea ua maua foi, tautuana ma le Komiti faaiuga faapenei e tatau ona faamautu lelei ina ia faamalosia le fautuaga. Ma le faaaloalo lava.

**FOFOGA FETALAI:** Malo faafetai. Tulai mai le sui usufono mo Vaisigano Nu.2.

**Tofa MOTUOPUAA UIFAGASA AISOLI VAAI (Vaisigano Nu.2):** Faafetai i lau Afioga i le Fofoga Fetalai mo le avanoa, faafetai atu foi i le Taitaifono o le Komiti ma la outou Komiti le galulue maeaea ona o le tapenaga o lenei Lipoti. Ae pau lava lau Afioga i le Taitaifono, se e fia fesili atu lava i la outou Fautuaga Nu.4 – Tapena se polokalame e fetuutuunai ai le faaogaina o pamuvai ina ia mautinoa le pamu mai luga o le suavai lelei e le sualua.

E ala ona ou talanoa atu, ona o le afaina tele o si ou itumalo, aemaise lava matou nei mai Asau e tau atu i Sataua ona o nei pamuvai ua leva ona maua le suavai e pamu ae i le manava o le eleele, ae pei o le faafitauli lava lenei e feagai ma lenei itumalo e faasualua le vai. E le afaina la Falealupo ma Neiafu e maouta le latou pamuvai, e magalo lava, a o matou Sataua e tau i Asau, o lo o maua lava i le faafitauli lea. A o le mea lea o le a sosoo ai nei, o lea ua tatou iloa le fesuiaiga o le tau, climate change, o le a move foi le water table ia. O lea la ou te fesili atu ai i lau Afioga i le Taitaifono, pe na outou fesiligia le Pulega o le Suavai, aua o lena sa afifio atu inisinia ma tamaitai pule. O lea se ituaiga metotia o le a mafai ai ona maua le... aua a pamu ae le vai e sau uma lava i luga le vai sualua ma le vai magalo. Pe i ai se isi alternative, pe faapefea ona pamu mai na o le vai e magalo ae le sau ai ma le vai sualua. Ma lou faaaloalo lau Afioga i le Fofoga Fetalai.

**FOFOGA FETALAI:** Malo faafetai. Ia, se i tuu atu le avanoa i le Afioga i le Taitaifono ona avatu lea o le avanoa i le Minisita.

**Tofa Tusa Misi Tupuola:** Lau Afioga i le Fofoga Fetalai, ou te faafetai tele i le sui usufono mamalu mo le mataupu lea, ae masalo e tatau ona fiafia le sui usufono mamalu o i tonu lea na ala ai ona avatu le finagalo o le Komiti ona o le tulaga lea o le asiasiga a le Komiti ma le Pulega o le Suavai, o lo o fai lava si faaletonu o le suavai lea i Asau faasolo atu i o i le mea lea e saunoa i ai le sui usufono mamalu. A o le saunoaga a lau Afioga ma le mamalu o le Palemene i le faafesili, o le saunoaga a le Ofisa i alii ma tamaitai inisinia, o lo o tumau pea le tulaga sualua o le suavai o lo o i ai i Asau ma le faasolo atu i isi afioaga ia, a o lo o taumafai latou i se auala e fai ai ni suesuega auiliili se i tau tuutuu ai i uta se porehole e mafai ona ola mai ai ma sua mai ai se suavai manino ma le lelei mo le afioaga. Ae o lo o taumafai pea lau Afioga ma le mamalu o le Palemene i nisi o auala. A e silasila foi o le Lipoti lea o le Lipoti o le 2013, o lo o taumafai pea.

O le ala foi lena o lea ou te iloaina o lea e vevesi mai ai nisi sui usufono i le Komiti ona o le le silasila lelei i le Komiti i Tulafono Tumau a le Maota, o le

mea lava e i ai le tausaga o le Lipoti, o le mea lena e tautala i ai le Taitaifono o le Komiti, ae le tautala i luma mai. Ma lou faaaloalo tele lau Afioga.

**FOFOGA FETALAI:** Ia, o le a avatu le avanoa i le Minisita o le Matagaluega. Tulai mai le Minisita mo Galuega, Felauaiga ma Atinae Eeseese ona tuu atu ai lea o le avanoa i se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

**Afioga Hon LEAUPEPE TOLEAFOA APULU FAAFISI (Aana Alofi Nu.1):** Lau Afioga i le Fofoga Fetalai, sa ou taua le tulaga lea i Sagone ma le fuafuaga lea ua i ai, ua fuafua a maea loa le auala lela ua faatulaga e toe sifi i uta le latou pamu ina ia mafai ona maua le suavai talafeagai, o pamu ia ua maea ona faatino, a o lea ua agai i ai le Pulega e toe... o Asau ma Auala. E leaga o lea faatoa fofoga mai i le finagalo o le sui usufono, a o le mea lea sa ou tali atu foi i le sui usufono mo Sagone, o le polokalame, o Asau, o Sagone, o Auala, o le tatou polokalame lena ua fuafua mo le 2015 ua tuuina i totonu o le tatou Budget ina ia mafai ona faaleleia le suavai ia. Ia, o le vaega lea se i oo atu pea sau tala i le tulaga o le tatou vai lea e faaetonu, non-revenue water. Ia o le tulaga o le update la ua i ai i le taimi lena, pei sa 70%, a o la e ua 41%. O Alaoa sa 69% a o la e ua 65%. O la e faatino galuega ma le JICA, o lo o galalue faatasi ma le JICA i le taumafaiga ia faaitiitia lea vaega.

O Fuluasou, lea sa aumai foi e le sui usufono o lo o i ai, sa 72% ae o la e ua 63%. O lona uiga ua ova atu ma le tai 10% le suiga ua i ai le tulaga o le vai lea e le o mafai ona aoina, o galuega faaaau. O la e lava e faaaau a tatou galuega ina ia tuuaitiitia ia vaega. Ma le agaga faaaloalo lau Afioga.

**FOFOGA FETALAI:** Malo. Ia tulai mai lau Afioga i se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi.

**Afioga Hon LEAUPEPE TOLEAFOA APULU FAAFISI:** Faafetai mo le avanoa. Ona e talu ai o lo o faafogafoga mai le itumalo, o lo o talanoaina foi le Lipoti a le Komiti o mea tau suavai, ae ua ou tulai atu na ona faafesili lava i lau Afioga i le Taitaifono aemaise foi o le faafogogaaga a le Minisita ma le Matagaluega, ona o lena foi Lipoti o le Lipoti o le 2013, ae pe na i ai sa outou asiasiga e asia ai le pamu lea e i Leulumoega e faalava mai ai le ofe foi lena e sua ai ia gauta o Nofaalii ma Fasitoouta i le pitonuu o Satui i Fasitoouta, ona o le Lipoti o le 2013 ae tataua ona faaleleia mo le 2014, aua o le 2014 e mafatia lava lo matou itumalo ona e tailua vaiaso ma taifa vaiaso faatoa sua atu le paipa. Pei na ona faafesili atu i ai, ae ou te lagona o lo o i ai se tapenaga a le Matagaluega mo le faafogoga mai a le itumalo, i faapea po o fonu le sui usufono pe leai. Ia pei o le tulaga lea, e lavea ai foi ma Faleasiu, e ui lava ona o lea ua i ai le fuafuaga a le Matagaluega e vili se vai i gauta o Faleasiu e lavea ai ma Lepale, ia ae pei o uta na, ia a o tai i i le mea o lo o taoto ai nei le ofe, o la foi e sua le ofe. Ae pe mafua aisea ona le sua ma taumamafa ai? Pei o le fesili lea ma le agaga faaaloalo, faafetai.

**FOFOGA FETALAI:** Malo faafetai, tulai mai le sui usufono mo Aana Alofi Nu. 3, o le fesili faaiua lena ona tali ai lea o le Taitaifono, oi, ia ma le Taitai o le Itu Agai. E leai?

**Afioga Toeolesulusulu Cedric Pose Salesa Schuster:** Leai, faafetai o lea na tau tali atu e fai ma sui o le Komiti a o lea ua uma ona tali atu ai le Afioga i le Minisita, faafetai.

**FOFOGA FETALAI:** Malo. Lau Afioga i le Taitai o le Itu Agai.

**Afioga Hon PALUSALUE FAAPO II:** Faafetai atu mo le avanoa lau Afioga i le Fofoga Fetalai.

O le mea muamua, o le ave o lau faamalo ma lau faafetai i le Taitaifono ma le Komiti sa feagai ma le suesuega o le Lipoti, leaga e le faatauvaaina a outou galuega fai, o outou o lo o ave i ai le faatuatuaga a le Palemene i la outou galuega fai, o le iloilo lea o Lipoti.

O le mea lea lau Afioga i le Fofoga Fetalai, e tataua ona ou faafetai ma o le upu moni lava, e tataua ona silasila le Malo ina ia tali mai i mea ia, tali mai, ia ma silasila le Palemene i le tali mai e fai i ai se finagalo o le Palemene. O lea ua ou tulai, lau Afioga i le Taitaifono, leaga o oe o le tama Falealili, pei o le upu foi lele, “e ta te fia Falealili fua,” i lau galuega fai aemaise o la outou Komiti, aemaise lava i le tulaga lea i le vai. O le vai e pei ona i ai le faaupuga a le Matagaluega, o le ola, o le vai o le ola, e sao lelei, e sao lelei le vai o le ola, a o la outou galuega lea ua taatia nei la outou Lipoti, faafetai tele lava, e faalagolago i ai le Afioga i le Fofoga Fetalai ma le Maota leni i la outou Lipoti, e le taufaatauvaaina la.

Lau Afioga i le Fofoga Fetalai, pau lava o lea lau Afioga i le Minisita, e tataua ona ave lau faamalo i le Matagaluega le galuega fai i le taumafai e faamalie le atunuu ona o le suavai, vaai i ai ma le fiafia ma le agaga faafetai i le Malo, ona o le mama o le suavai, e moni lava o lo o i ai nisi o afioaga ua o ua le iloa po o le a le mafuaaga fia o ai i vai tumaoti, aua o le tala lava e fai mai, e taugofie atu le vai tumaoti, ioe. A o lo o ave foi la outou fesoasoani i le vai tumaoti, aua foi e le o faapito lava manu ia Tasi i le faiga faavae a le Malo, e le gata i le vai o lo o i lalo o le Faalapotopotoga, a o vai tumaoti ia. Pau lava lea lau Afioga i le Fofoga Fetalai. E pei ona saunoa nisi o sui usufono, o le taugata o le mea lea o le vai lafoai, tasi lea mea ou te talitonu o lo o faavaatuaia i pisinisi, faavaatuaia i kamupani mai fafo. O mea ia e tataua ona silasila i ai le Malo, aua o mea ia e fua i ai le faaiuga a kamupani nei, pe taugata le eletise i Samoa, pe taugata le suavai i Samoa, pe taugata le vai lafoai?

**FOFOGA FETALAI:** Malie lau Afioga i le Taitai o le Itu Agai, se i tuu atu le avanoa i le Minisita, tulai mai le Minisita.

**Afioga Hon MANUALESAGALALA ENOKATI POSALA:** Lau Afioga ma le faaaloalo, ou te iloa e sili ona ou vave tali atu ona ua faamamafa tele e le Taitai o le Itu Agai le taugata.

O le fuafuaina o le tulaga lea i vai lafoai, ia o le tausaga 2009 sa faatino ai, e lua tausaga o faaaoga e le i totagia seia oo i le tausaga e 2012, o lena sa toe review ai loa amata ai loa ona faatulaga, o le 2013 na toe sui ai, tusa na faatulaga i le 2012 sui mai le tasi le tausaga toe sui, pau mai lalo i le 30% ia le tau o le vai lafoai lea, o lea la e faaauauina ai nei. O lona uiga e tele tele le faamama avega lea e faatino e le Malo ae tauala i le Pulega, ia mo le vai lafoai. E manatua foi o le vai lafoai leni e tilotilo agai i le siosiomaga mama,

a o le faatinoga o le galuega lea e tele le eletise leaga o le mea o le pressure lea e faaoga e faasau ai le vai lea i totonu o tatou treatment plant lea e i i Sogi, e tele le galuega, ia o le operations foi e matua mataalia ma i ai i taimi uma e tatau ona faatino ai, o solid waste e ave agai i Tafaigata, e tele le taugata o le operations lea e faatino ai, e le taugofie la. O le ala foi la lena o le taufetuunai, a o le tulaga mama ma le tulaga lelei o lea ua i ai le siosiomaga, talu ai le poloketi, o mea sili ia sa momoo i ai le mafaufau e tatau ona faatino, ua pau, pau mai lava le tau sa faatulaga e 30% lea e i ai nei. Ia o se pau maoae lea mo le tatou tau o le suavai lafoai, ma le agaga faaaloalo.

**FOFOGA FETALAI:** Malo. Ia tulai maia lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, faafetai lava, faafetai lava pe afai ua pau pei ona e saunoa, ia o le agaga fiafia lea. E pau lava lea o le mea lau Afioga i le Fofoga Fetalai ina ia silasila totoa i ai le Malo, i tulaga ia o a tatou atinae ia e taumafai e fai e faatosina mai ai ia kamupani e omai i inei i le galuega lea e fitaituga i ai lau Afioga i le Palemia ma le Kapeneta, faatosina mai, faatosina mai i ituaiga mea la ia, ituaiga mea ia ina ia faigofie ai ona omai i inei e faatutu fale faigaluega, ae aua le faatosina i ai nisi mea ia pei o isi Tulafono ia e mulimuli mai.

O le mea la lea lau Afioga i le Fofoga Fetalai, na ona faapena atu e tuualalo atu i lau Afioga o lo o pulea ma lau faamalo lava lea i Komiti uma a le Palemene e tusa ai ma le latou galuega o lo o fai, ioe, malo le galulue, e faalagolago lava le Palemene ma le atunuu i la outou galuega o lo o fai. Ia manuia le Fono.

**FOFOGA FETALAI:** Malo. E toe fautuaina pea a tatou saunoaga, se malie se tasi o sui usufono mo Salega, Afioga Afualo Wood Uti Salele. Malie le sui usufono, se i fai atu lau tala lea faamolemole.

E le tau faatonuina e le matapia le manaia, ona o le agaga lea e tau tulituliloa atu le tatou taimi, tatou agai pea i le tulaga o le talanoaina o le Lipoti, ae aua ne i toe lauga faalauaitete se isi i luga o a tatou taimi o Lipoti e tuuina mai, tatao i le tatou Lipoti ona vave lea o le tatou galuega, ona faafofoga lea i le tolaulauga o fautuaga ma iugafono, o i ina e sosolo ai le tatou debate. Ia ae le o le toso mai o i ma o e umi ai le tatou taimi ma felefele ai, ona tulai mai foi lea ua tuu ia le tatou fono ae toe agai i le isi pito.

Na ona fautua atu, tulai mai se tasi o sui usufono mo Salega, Afioga Afualo Wood Uti Salele.

**Afioga AFUALO WOOD UTI SALELE (Salega):** Faafetai i lau Afioga i le Fofoga Fetalai mo le avanoa taua, e le tele sou manatu ae ona o lea ua maea le Lipoti, ia faamalo i le Komiti. Na o sina vaega laitiiti lava i le fautuaga lea na aumai, ona o lea sa ou vaavaai lava, pe le i afea e lau Afioga i le Taitaifono, po o lava ia inisinia ia ma e foi e i ai tomai faapitoa e mafai ai ona faafaigaluega i le Matagaluega, aua e tatau lava ona afea i la outou Lipoti, aua ou te masalo o se isi lea vaega e ono maua ai se tali i le 70% lea e maumau, ia e maua ai se fesoasoani, aua o lea ua ave le faamuamua i alo ma fanau foi lea e aoga ai i le faa-Saienisi ma le numera, ia ae tatau ona faaoga lenei avanoa e fautua ai le Komiti i ai ina ia i ai nisi e o faapitoa ina ia lava ni

inisinia, aua ou te talitonu lava e le o lava, ae sa ou faapea au o lea o le a afea i la outou Lipoti, ia a o lea ua fesoasoani atu. Ma lou faaaloalo lava, faafetai.

**FOFOGA FETALAI:** Oi, ua e toe fia saunoa foi le sui usufono mo Aana Alofi Nu. 3? Tulai mai le sui usufono mamalu, ona sosoo ai lea ma se tasi o sui usufono mo Palota Taitoatasi, Afioga Maualaivao Pat Ah Him.

**Afioga Toeolesulusulu Cedric Pose Salesa Schuster:** Faafetai lau Afioga i le Fofoga Fetalai, ona e matauina i se faamatalaga a se sui o le Komiti, ona e matauina o le tele o faafesili o lo o tuuina mai e sui usufono o le Palemene e faatatau i fautuaga a le Komiti, peitai ane lau Afioga i le Fofoga Fetalai, faafetai mo fautuaga, ae a silasila i isi Lipoti i tausaga ua mavae o lea sa ave i ai le faamamafa a le Komiti e le gata o inisinia, lea foi e i ai le feutagaiga a le Komiti ma le Matagaluega, o lea ua faatino. E le gata foi i lea o nisi o vaega sa fautuaina le ave i ai o le faamamafa, o lea sa faamamafa i isi Lipoti i tua ane, pe a silasila i ai le mamalu o le Palemene. O le ala lea ua ala ai ona fua foi le faiga o le Lipoti o lo o tuuina i luma o le tatou Palemene, e toe fagufagu ma toe faamanatu, ae pei ona saunoa le Afioga i le Minisita, leai o la ua faatino, o le galuega foi lea o lo o taumafai i ai le Komiti, o lo o faapea ona feagai pea ma le Matagaluega o le pulega pe a oo mai, faafetai.

**FOFOGA FETALAI:** Malo. Ia o lea la ua saunoa manino se tasi o sui o le Komiti e talia ai finagalo sa laga e sui usufono, ae taua pea le fagufagu ma le faamanatu. Tulai mai se tasi o sui mo Palota Taitoatasi, Afioga Maualaivao Pat Ah Him.

**Afioga MAUALAIVAO PAT AH HIM (Palota Taitoatasi):** Faafetai mo le avanoa i lau Afioga i le Taitaifono.

Ou te talitonu ua tele foi saunoaga e uiga i le mataupu lea o le suavai, o le suavai i lou nei sui usufono e sili atu ona taua i lo se isi lava mea, aua o le suavai pei ona taua nei e se tasi sui usufono o le ola. Ma e i ai foi ni mea ou te iloa o nai faitioga i le Pulega faapea foi le suavai, e i ai lava le auala e fai ai, ou te musumusu pe faafesootai le Afioga i le Minisita ma le Matagaluega.

Ae o lou tulai atu ma le faaaloalo e tasi lava le mea ou te tulai atu ai e faaleo lau faafetai i le taimi ua sola sa fai ai le Fonotaga a le UN SIDS i Samoa nei, ona e i ai vaega taua o le suavai sa tapenaina e lo tatou Malo. O le faaleo la, o le faafetai atu. Sa i ai le popolega ia matou e tusa ai ma atinae nei o faletalimalo ma pisinisi i le taulaga i le suavai, ae peitai ane o le tapenaina o le suiga o le lapopoa o paipa vaeatu le Maota faapea i le tapueina o le suavai, sa leai se mea e faaletonu i le taimi o le SIDS. O le faatuatuga la latou i le taimi nei i le tatou vai, o lo o agai pea ina lelei, e oo foi la i le mama o le suavai, faafetai, ua tutusa lava ma lau inu i le faguvai lea, ioe, ma le mama o le paipa, ua tau le faapena ona faapitoa se i maua se suavai. E ui lava la i le tulaga lea, ae o lo i ai foi lava nisi o itumalo e le o maua le suavai tai pei o Aleisa i isi vaega.

Ae o lou tulai atu e faamau le faafetai tele lava i lo tatou Malo ma le Pulega ma le Matagaluega i le Minisita ma le Komiti, i le manaia o le vaega tonu lea o le SIDS, lelei mea uma. Ia agai pea ma faatino pea ia fuafuaga ia, ia lelei ma faapena ona manuia ai le atunuu, ia ma le toe masalosalo ai i e o lo o fia omai e invest i totonu o le tatou atunuu i le mea lea o le suavai, aua a faalogo

mai, e pe nei, pe taeao, ia palapala le vai, o le mea lena e fia faalogologo i ai ma fia iloa e tagata o lo o fia invest i le atunuu. Ma le faaaloalo lava, faafetai i lau Afioga i le Fofoga Fetalai.

**FOFOGA FETALAI:** Malo faafetai. Tulai mai lau Afioga i le Taitaifono, ona avatu ai lea o le fesili.

**Tofa TUSA MISI TUPUOLA:** Lau Afioga i le Fofoga Fetalai, ona o lea ou te iloa, o le agaga faafetai lava lea e aumai e le mamalu o le Palemene, ae pei na ona ou toe faailo atu le finagalo o se tasi o sui usufono mo Aana Alofi Nu. 1, Afioga Hon Leapepe Toleafoa Apulu Faafisi e pei ona.....o lea lava o lo o taumafai le tatou SWA ina ia faatino pea, aua ia manatua foi o le taimi lea faatoa uma le afa o Eveni, na toe faaoga tupe e toe faaleleia ai a tatou pamu vai aemaise o galuega toe faaleleia, ma e tele foi se tupe sa faaaluina i le taimi lea i le taumafaiga o ia galuega mo le tali atu i manaoga o lo tatou atunuu, aemaise foi o vaega ia e i ai Aleisa ma Faleasiu ma faasolo atu i Saleimoa i uta, o lea lava o lo o faagasolo i ai polokalame mo le suavai. Ma lou faaaloalo tele lau Afioga i le Fofoga Fetalai.

**FOFOGA FETALAI:** Malo faafetai i lau Afioga i le Taitaifono.

*Na faamaonia le Lipoti.*

**FOFOGA FETALAI:** E tusa ai ma Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P.2014/2015 NU.135, LIPOTI A LE KOMITI O GALUEGA,  
FELAUAIAGA MA SIOSIOMAGA I LE P.P.2014/2015 NU.65, LIPOTI  
FAALETAUSAGA A LE PULEGA O UAFU MA TAULAGA MO LE  
TAUSAGA 2011/2012 – Iloiloga**

**Tofa TUSA MISI TUPUOLA:** Lau Afioga i le Fofoga Fetalai, ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

*Faaluaina e le sui usufono mo Aiga i le Tai, le sui usufono mo Palauli ma le sui usufono mo Sagaga le Falefa.*

**FOFOGA FETALAI:** Tulai mai le Afioga i le Taitaifono o le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa.

**Tofa TUSA MISI TUPUOLA:** O Fautuaga lau Afioga i le Fofoga Fetalai a le Komiti.

**“FAUTUAGA:**

E fautuaina le Komiti ina ia:-

- 1. Taofia le toe faaaogaina o ni Tagata po o ni Kamupani Tu-i le-Va e faaoga e le Pulega mo le faatauina mai o ana aseta taugata, ona ua matauina e le Komiti le le ausia o le tulaga aupito sili ona moomia (quality) o ia aseta.”**

Lau Afioga i le Fofoga Fetalai ma le mamalu o le Palemene, ua uma ona fai i ai le faaiuga a le Malo i le tulaga lea e pei ona silafia e le Palemene.

- 2. “Silasila i se Faaiuga Talafeagai mo le aitalafu a le Pulega i le va ma le Matagaluega o Tupe Maua talu mai le lima tausaga talu ai seia oo mai i le vaitaimi o lo o iloiloina, ona o lea aitalafu e afua mai i tiute o masini na auina mai mo galuega a le Malo.”**

O le mataupu foi lena lau Afioga i le Fofoga Fetalai ma le mamalu o le Palemene, ua maea ona fai i ai le faaiuga a le Malo, le Palemia ma le Kapeneta e pei ona i ai i le Tala o le Tupe talu ai.

- 3. “Tatau ona faalelei ma siitia le tulaga o le uafu i Matautu mo faamoemoega o tupe maua faafaigaluega, ae toe fetuunai fuafuaga mo le fausia o se isi uafu fou ona ua faamaonia mai i faamaumauga a le Pulega o lo o faaitiitia le aofai o vaa o lo o afea Samoa.”**

- 4. E tatau i le Pulega ona tausisia ma faatau aiaiga o Tulafono Tau Le Gataifale Faava-o-Malo (IMO) mo le faatinoina o latou galuega ina ia mautinoa le faamalieina ma le usitaia o aiaiga o ia Tulafono Faava-o-Malo.**

**IUGAFONO**

E fautuaina e le Komiti ia le Fono Aoa ina ia faamaonia:

- P.P.2014/2015, Un. 65, Lipoti Faaletausaga a le Pulega o Uafu ma Taulaga a Samoa mo le Tausaga Faaletupe na faaiuina i le aso 30 Iuni 2012; ma**
- Fautuaga a le Komiti ua tuuina atu i lalo.”**

Ma le faaaloalo tele.

**FOFOGA FETALAI:** Faafetai i lau Afioga i le Taitaifono.



**Susuga Papalii Lio Faavaivaiomanu Taeu Masipau (Faasaleleaga Nu.2):** Lau Afioga i le Fofoga Fetalai.....

**FOFOGA FETALAI:** Tulai mai le sui usufono mo Faasaleleaga Nu.2.

**Susuga PAPANII LIO FAAVAIVAIOMANU TAEU MASIPAU:** Lau Afioga i le Fofoga Fetalai, faafetai tele i le Afioga i le Taitaifono mo sailiiliga maea a le Komiti. O lea e matau atu ua tele lava ina tali le Malo i isi fautuaga, ae ona pau lava sina vaiulu lea e fia avatu ai se tala i lau Afioga i le Taitaifono, ona o lea ua taua mai le faaleleia o a tatou uafu. O lea ua taua Matautu, a o lea foi ua fuafua lo tatou Malo i nisi faamoemoega.

O lau fesili i lau Afioga i le Taitaifono ma le Komiti, o lo o i ai lava sina faafitauli i le uafu i Mulifanua pe a sua le tai. Ou te talitonu e maua uma lava e le tóatele o tatou o lo o faimalaga i Savaii. A sua le tai, o le faigata ia i nai taavale ia e maualalo. E saoloto lava taavale lapopoa e pei o taavale ia tatou te feoai ai e o atu lava ma tulioso i luga, a o nai taavale laiti. Ua leva le faafitauli lea i Mulifanua. E le afaina Salelologa aua ou te iloa o la e lelei lava le uafu lea i Salelologa i so o se taimi lava e sua ai le tai ma papau foi le tai, e faigofie lava. A o iinei lava i Mulifanua o lo o i ai lava le faafitauli lena ua fai sina leva. O lea e tele ina aveane laupapa, se i vaeatu le paia o le Maota e faaae ai nai taavale laiti ma maualalo.

O le uiga lena o se faamatalaga ona ua avea foi lenei avanoa e avatu ai se fesili a o faafogafoga lau Afioga i le Taitaifono ma le Malo, faafetai.

**FOFOGA FETALAI:** E i ai se isi sui usufono e fia saunoa a o le i tulai mai le Minisita e tali? Malie lava lau Afioga i le Minisita, se i tuu atu le avanoa i le sui usufono mo Vaisigano Nu.2.

**Tofa MOTUOPUAA UIFAGASA AISOLI VAAI:** Faafetai lava i lau Afioga i le Fofoga Fetalai mo le avanoa.

E fia faafetai atu foi i le Komiti ona o le Lipoti ua maeaea ona tuuina mai. Ou te fia tautala lava i le uafu lea i Asau lau Afioga i le Fofoga Fetalai. Faafetai i le Komiti ona ua i ai se fautuaga ma se manatu i le toe faaleleia o le uafu lea i Asau. Ou te iloa a oo ina toe faaleleia lenei uafu, o le a tele lava se suiga o Savaii faapea foi le Malo – faafetai i le Komiti.

Na ou tulai atu ou te faafetai ona ua i ai se fuafuaga o le a i ai se manatu o le Malo aua le faaleleia o le uafu i Asau ma nisi mea o le a fai ai, faafetai.

**FOFOGA FETALAI:** Tulai mai lau Afioga i le Minisita e tali fuaitau ona tuu atu ai lea o le avanoa i le Taitaifono.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai, atonu o le tulaga lea i Mulifanua, o lea ua taoto i le tatou Palemene nei le suiga o le Tulafono i uafu ia i Mulifanua ma Salelologa o le a i lalo o le vaaiga a le Faalapotopotoga o Vaa a Samoa. O lena ua outou silasila ua i ai nai suiga ua mafai ona faatino, a o mea uma lava na o le a vaavaai i ai ma faaleleia. O le tulaga foi lena e taua ai le tasi o le Faalapotopotoga e vaaia, e atili vaavaai ai i tulaga e lelei ai vaa ma ia mafai ona saogalemu femalagaiga ma faatumauiina le lelei o vaa mo le agai i luma.

O le uafu i Asau, e leai o le uafu ia o la e faaleleia. O la e teu ma vaai lelei ma o la foi e i ai lava vaa e mafai ona afea ma faaaogaina. O le isi lena tulaga o lea e i ai le silasila a le Malo, e le gata o le uafu i Asau, o a tatou malae vaalele o lo o i Savaii aua tasi ia tupe o lo o agai i ai ina ia faatumauina, le availability o le service o la e i ai po o le a le taimi e manaomia ai. E faatumauina e ui lava ina e le o afea e ni vaa, a o la e faaoga le uafu lea i Asau.

Ma le agaga faaaloalo lava.

**Susuga PAPANII LIO FAAVAIVAIOMANU TAEU MASIPAU:** Lau Afioga i le Fofoga Fetalai, faafetai lava i le Afioga i le Minisita o lea ua maua o lea ua fesui ai agai i le Kamupani Vaa, ae e talitonu o lau Afioga i le Minisita o lo o umia le Kamupani Vaa ma le uafu, ae faafetai mo nei fuafuaga.

**FOFOGA FETALAI:** E te le fia saunoa lau Afioga i le Taitaifono? Malie lava, le sui usufono mo Aiga i le Tai, o i ai se mataupu e te fia saunoa ai?

**Susuga IFOPO MATIA FILISI:** E leai e fia momoli foi le faafetai tele i le Minisita aemaise lava le Taitaifono o le Komiti po o le Komiti foi. Ona pau lava le talosaga a lou sui usufono, faaoo atu le silasila i le uafu foi lea e i Manono i le alu i tai faamolemole.

Ma le agaga faaaloalo, faafetai.

**FOFOGA FETALAI:** E i ai sou uafu? (*I le Taitai o le Itu Agai o lo o tulai*).

**Afioga Hon Palusalua Faapo II:** Pe maua sina avanoa aua o lea ua tuu le avanoa i o?

**FOFOGA FETALAI:** O le a la le mea lena e te fia saunoa i ai?

**Afioga Hon Palusalua Faapo II:** Ioe, e le sou uafu o le uafu a Samoa le uafu le la e i o i Satitooa.

**FOFOGA FETALAI:** E a le uafu i Satitooa?

**Afioga Hon Palusalua Faapo II:** O lea ou te fesili atu i le Afioga i le Taitaifono i le tulaga ua i ai le uafu aemaise lava le taimi lena i le galu. Ua matua siisii lava.....

**FOFOGA FETALAI:** Tulai mai lau Afioga i le Minisita. Na ona e faaleo mai lava leaga o lea ua fesili i le uafu i Satitooa, ae ou te iloa o le uafu i Satitooa o lo o faagaioi.

**Afioga Hon Palusalua Faapo II:** E le i uma atu lata faafesili. O lau fesili la i le Taitaifono.....

**Afioga Hon MANUALESAGALALA ENOKATI POSALA:** O lou usitai i lau Afioga i le Fofoga Fetalai lea ua ou tulai atu ai.

**FOFOGA FETALAI:** Tulai mai lau Afioga i le Minisita mo Galuega, Felauaiga ma Atinae Eeseese.

**Afioga Hon MANUALESAGALALA ENOKATI POSALA:** E tasi lea mataupu e laga pea i nusipepa ma televise. E tiga lava ona silasila atu o la e faaaoga. Na faaaoga nei le uafu i Satitua i le taimi o a tatou taliga-malo. Sa i ai vaa ma faaaouu faiga malaga i Tutuila. A silasila foi i ai i le taimi lenei, o lea e i ai le vaa o le Lady Samoa II la e tu ai. O vaa e fia faaaoga i le tatou slipway, le nofoaga toso vaa, o la e o atu ma taula i ina ma faaaoga. O lo o i ai nisi fuafuaga i nisi vaa e agai mai e faaaoga i ai le tatou uafu ma faaaoga i ai le tatou nofoaga toso vaa. O la e faaaoga le tatou uafu ma le agaga faaaloalo.

**FOFOGA FETALAI:** Lau Afioga i le Taitaifono.

**Tofa TUSA MISI TUPUOLA:** E momoli atu lau faafetai tele i lau Afioga i le Fofoga Fetalai ae faapea foi le mamalu o le Palemene ma le Afioga i le Minisita, aemaise foi o Faauluuluga o Matagaluega o lo o gafa ma lenei Komiti. Ua faamalo faafetai i la outou lagolago, ua malo le galulue, ua faamalo foi i lo outou agalelei ia Samoa ma ana atinae.

Ia manuia tele le Fono ma le faaaloalo lava.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P.2014/2015 NU.136, LIPOTI A LE KOMITI O MATAUPU TAU FAAMASINOAGA, LEOLEO & FALEPUIPUI MA FAAMASINOAGA O FANUA & SUAFA I LE P.P.2014/2015 NU.6, LIPOTI A LE KOMISI O LE TOEFUATAIGA O TULAFONO A SAMOA I LE TULAFONO O FAAMASINOAGA FAAITUMALO 1969, LIPOTI 12/13 - Iloiloga**

**Tofa TUISA TASI PATEA (Sagaga le Falefa):** Faafetai lava i lau Afioga i le Fofoga Fetalai mo le avanoa.

Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

*Faaluaina e le sui usufono mo Palauli, le Sui usufono mo Aiga i le Tai ma se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow.*

**FOFOGA FETALAI:** Tulai mai le sui usufono e faitau Fautuaga ma Iugafono.

**Tofa TUISA TASI PATEA:** Lau Afioga i le Fofoga Fetalai o Fautuaga nei a le Komiti.

**“FAUTUAGA:**

I le faia i luga o ana sailiiliga, e fautuaina ai e le Komiti le Malo:-

**Ina ia faautagia le Lipoti a le Komisi o le Toefuataiga o Tulafono a Samoa, o lo o auiliili atu ai ana Fautuaga mo le toefuataiga o le Tulafono o Faamasinoga Faaitumalo 1969.**

**IUGAFONO:**

I le maea ai o Iloiloga a le Komiti, na faaiugafonoina ai e fautuaina le Fono Aoao:

**Ina ia faamaonia le P.P 2014/2015 Nu.6, Lipoti a le Komisi o le Toefuataiga o Tulafono a Samoa i le Tulafono o Faamasinoga Faaitumalo 1969, Lipoti 12/13.”**

Faafetai lava.

**Tofa Lealailepule Rimoni Aiafi:** Lau Afioga i le Fofoga Fetalai.....

**FOFOGA FETALAI:** Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai lava i lau Afioga i le Fofoga Fetalai mo le avanoa, e faafetai foi i le Afioga i le Taitaifono o le Komiti.

Muamua, o lena ua tagai i ai lau Afioga i le Fofoga Fetalai, e leai ni fautuaga a le Komiti. Ona pau lava le mea lea e i ai o le tolaulau mai o le toefuataiga o Tulafono i a latou recommendations ia e i ai, ona aumai lea tatou te faitau ai.

O le Lipoti lea i lau faitau i fautuaga ia e tuu mai e le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa, muamua, e tele le taua i le taumafai lea e siitia le malosiaga o le Faamasinoga Faaitumalo po o le District Court mai le tulaga o i ai nei lona malosiaga ina ia sii atu i luga i le vaegatupe lea e i ai e \$10,000. Ua sii mai i luga le malosiaga o le Faamasino Fesoasoani mai le \$1,000 agai i le \$5,000 ina ia vave ai le faatinoina o faamasinoga ma fetuutuunai ai mai lea fale faamasino i lea fale faamasino.

O le fesili muamua lau Afioga i le Taitaifono, o lea e foliga mai o lo o tamau lava i le \$10,000 le malosiaga o le Faamasinoga Faaitumalo. Pe aisea ua tumau ai, a o lea ua siitia i luga i le Faamasino Fesoasoani.

O lona lua, o lea e fautuaina mai e le Komiti le mea lea o le faatuina o se Faamasinoga o le Drugs and Alcohol Court, mea ia i mataupu tau le ava malosia ma fualaau faasaina.

O le fesili lau Afioga i le Taitaifono, pe na tapa se finagalo o le Matagaluega o Faamasinoga i a outou fautuaga, aua e moni lava o fautuaga mai ia i latou

na toe faamaumauina pe tusia tatou Tulafono, a o le faatinoga e faatino mai le Matagaluega o Faamasinoga. Po o le a le tulaga o i ai, aua i le taimi nei, po o lava Alii Faamasino, po o lava resources e fai ai nei mea, aua o la e ua i ai i le taimi nei le Family Court, la e i ai le Youth Court, e i lalo uma lava o le District Court. A toe tuu atu la i ai ma le Court lea, ia, pe le i ova Court ai, aua e le natia le taua o le mea lea o le Faamasinoga i mea ia o ava malosia ua faatupulaia tele le solitulafono. Ae pe le o mafai i le taimi nei ona faatino i se faamasinoga o i ai i le taimi nei le tulaga lea.

O le isi lena vaega lau Afioga, i tulaga ia o le fesiitaiga o le malosia o le Tulafono aemaise le District Court, o lea ua pasia le Family Court, le Faamasinoga mo Aiga, a o lea e matau atu e le i tuuina aloaia i totonu o le Tulafono o le District Court. Ia ma se i toe tagai la lau Afioga, po o le a sau suesuega i le mea lea o le le mafai ona siitia o le malosia o le District Court mai le malosia o i ai i le taimi nei i se isi vaegatupe i luga atu. Ma le faaaloalo lava lau Afioga i le Fofoga Fetalai.

**FOFOGA FETALAI:** Malo. Tulai mai le sui usufono mo Aana Alofi Nu.3.

**Afioga TOEOLESULUSULU CEDRIC POSE SALESA SCHUSTER:** Faafetai i lau Afioga i le Fofoga Fetalai mo le avanoa. E tasi lava si fesili ona o le tusiina o le Lipoti, pe i ai ni tagata na suesueina e le Komiti, pe na o le Lipoti lava lea na faatino ai. Atonu o le tulaga lea ua leai ai ni fautuaga ona e pei e le i i ai ni molimau na suesueina faamolemole. Atonu o lea ua oo ae foi se manatu i le tele o fautuaga o lo o aumai e le Komisi.

**FOFOGA FETALAI:** O le matau i le Lipoti lena, o se Lipoti e tulaga ese, ona o le Lipoti lena e tuusao lava mai le Law Reforms lea sa faatulaga mai. O lona uiga ua i ai le talitonuga o le Taitaifono, ua matua atoatoa lava le Lipoti e sau loa alu loa, e leai nisi mea e toe suesue ai fua o lea ua manino ma malamalama. Na pau lava le fautuaga taua lea e tau mai i i, ina ia faamaonia le Pepa a le Palemene 2014/2015. O le sao lea lau Afioga i le Taitaifono? Se i tulai mai.

**Tofa TUISA TASI PATEA:** Faafetai atu i lau Afioga i le Fofoga Fetalai mo le avanoa. Masalo e faigofie ona ou fai atu faapea i fesili uma lava a sui usufono mamalu, o le tatou Law Reform Commission, o i latou nei sa faatautaia le galuega lea. I le amataga la o le galuega, e toatele lava latou sa faagasoloa, e lavea ai foi ma le Matagaluega o Faamasinoga, lavea ai ma tagata lautele, sa valaaulia foi le atunuu atoa, e toatele lava. Sa i ai foi ma Loia i totonu o le faatalatalanoaga lea. O lea la ua uma le latou galuega fita sa fitaituga ai, ma le talitonuga o le Komiti e matagofie faaiuga ua oo i ai le latou taunuuga. O lea la pei ona avatu i la matou fautuaga, ina ia faautagia le Lipoti a le Komisi o Toefuataiga o Tulafono a Samoa. Sui usufono mamalu, se i tagai i le Lipoti o i ina o lo o alu atu ai fautuaga uma, e ese le matagofie o fautuaga.

O le fesili a le sui usufono mamalu mo Faleata Sisifo, o nisi ia o finagalo, e toatele finagalo na faaalua, pei lava ona avatu i le Lipoti, e manao e sui le District Court Jurisdiction. O isi na faaali o latou finagalo e sui i le \$20,000, \$40,000 e oo i le \$50,000. Peitai ane, o le tualuga lava o finagalo o le

recommendation a le tatou Law Reform, e tatau lava ona faatumauina pea i le aofaiga lea e \$10,000.

Ia, e pei foi ona i ai le tatou Criminal Jurisdiction i le District Court, o lena pei ona outou tagatagai ifo i ai, o lena ua toe tului mai le lima tausaga i le fitu tausaga i faasalaga pei ona i ai, ona o le tatou Tulafono faatoa pasia le tatou Tulafono lea o Soligatulafono 2013, ua faaopoopo ai foi nisi o faasalaga. O le autu tonu lena ma le ala lena ua faaopoopo ai foi ma le Jurisdiction a le tatou District Court ona ua tele mataupu.

O le tali atu lena. Faafetai tele.

**Tofa Lealailepule Rimoni Aiafi:** Lau Afioga i le Fofoga Fetalai, a ou togia le Lipoti lea, e fuamoa, vaeane lau Afioga i le Fofoga Fetalai. O le mea ua ou faanoanoa ai, o le toatele ia o Loia lea e i totonu o le Komiti lea, o Loia Sinia, ae o le Lipoti, e le o se Lipoti le mea lea.

**FOFOGA FETALAI:** Malie le sui usufono mamalu e le tatau ona... O lea ua ou maua lou finagalo Lealailepule. Malie lau Afioga e le mafai ona tatou manatu e toe taufaatauvaaina se galuega a se Komiti. Atonu lava tatou te faaataata a lafoga a o la e foi e faafofoga le atunuu. O lea ou te molimauina, o le ala lena o lou fai atu, e le fou le mea lea o le tatou agai i le tatou Law Reforms. Ou te manatu foi e fai si tele o suesuega sa fausia, ae soia ia tou te atugalu, ou te talitonu o le mafuaaga lena na saunoa sao ai le Taitaifono, ua leai ni latou fautuaga ua mautinoa ua pasi atoatoa, a o lea ua aumai na o Iugafono, tatou talia ia le Lipoti ma le agaga faaloalo.

**Afioga TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai, faamolemole lava ta te fia malamalama i Tulafono a le tatou Maota, i le tusa ai ma fautuaga o lo o aumai i le faaiuga a le Law Commission, o le fesili lau Afioga i le Fofoga Fetalai, afai e pasia nei e le tatou Palemene le fautuaga lenei, o le a sii loa le tau lea e fautua mai ai le Law Commission lea e tusa ai o lea ua pasia i totonu o le Palemene fautuaga nei, ona... E pei i lau vaai atu i ai, e i ai Tulafono e tatau ona tapenaina, ma e tatau ona iloilo ina fautuaga nei mo le siitia o le tau ma le femeiai solo lea. E pei o vaega ia e fia malamalama i ai lou sui usufono lau Afioga i le Fofoga Fetalai.

**FOFOGA FETALAI:** O le Lipoti lea ua maua le finagalo o le sui usufono, ou te manatu ua malamalama mea uma. Se i tulai mai Lefau.

**Tofa Lefau Harry Schuster (Vaimauga Sisifo):** Faafetai lau Afioga i le Fofoga Fetalai, o le lagolago atu lava i le matou Taitaifono. Ia o le folasaga a le sui usufono mo Faleata Sisifo foi lea pei o lau tau faalogo atu i lana folasaga, o le Komiti a matou o le Komiti kopi foi lea na ona aumai lava o le Lipoti a le Law Commission, na o le kopi lava aumai i i ae leai se matou suesuega sa fai i ai. E le faapea o se mimita o matou o Loia. E toatolu matou o Loia, e aafia ai le matou Taitaifono o le Loia. Sa matou fesiligia le toatele o molimau aemaise lava le aufaigaluega ma le Tamaitai Pule. O le tulaga sa fesiligia e le sui usufono mo Faleata Sisifo e faapea pe na fesiligia i le tulaga lea o le siitia o le Civil Jurisdiction. O le fautuaga lena na aumai i le Komisi ae sa matou fesiligia la po o le a la le fetuunaiga la ma... aua e aafia ai le

Matagaluega o Faamasinoga. O le latou tali mai, e fetuutuunai latou, ua uma ona fai latou feutanaiga ma le Ofisa o le Loia Sili, o la e i ai ma le Parliamentary Counselor e tusia le Tulafono ma le Matagaluega o Faamasinoga. Ua uma la ona feutagai latou, o lea la e aumai ai le fautuaga lea ma le Lipoti lea, ma na talia e le matou Komiti le fautuaga lea na aumai e le Komisi ona sa matou suesueina po o le a le faavae o le manatu lea na aumai. A na faapea i le vaai a le matou Komiti e le talafeagai fautuaga ma tulaga o le Tulafono ma le Faavae o le tatou Malo, matou te le aumaia foi la le fautuaga lea e talia atoatoa le suesuega a le Komisi. Ma le faaaloalo lava, ae le o matou o se Komiti kopi.

**FOFOGA FETALAI:** Malie le sui usufono mo Faasaleleaga Nu.2 se i tulai atu le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ou te faamalo i le Komiti aua o le latou galuega sa fai e faavae i luga o Lipoti ia na aumai e le Komisi lea o le Toefuataiga o Tulafono a le tatou Malo. Ua uma ona soalaupule e latou. A faapea la e aumai se Lipoti ua lava tapena, o le a la le mea a le Komiti e toe fai i ai? Afai e aumai ua lava tapena, ona aumai sao loa lea. Ou te faamalo atu ai i le Komiti. E le faapea o le a leai se faaopoopoga a le Komiti, o la e ua uma ona silafia e le Komiti o la e ua lelei tapena.

Ou te manatu e tataua ona malamalama lelei le Itu lea, afai lava o la e lelei se mea, o le a le mea o le a toe sui ai? Ia o le tulaga lena o lea ua ou toe tulai atu ai e momoli atu lau faamalo i le Komiti ona o le latou Lipoti na aumai.

**FOFOGA FETALAI:** Malo faafetai. Papalii.

**Susuga PAPANII LIO FAAVAIIVAIOMANU TAEU MASIPAU:** Lau Afioga i le Fofoga Fetalai, pau lava si mea lea sa fesili ai le sui usufono mo Aana Alofi Nu.3, o le **process** ne i te i ua faapea a aumai loa i le Lipoti ua otometi lava le Tulafono. Leai, o le Lipoti a le Law Reform Commission, e fai le **hard cover** faapenei le lapoa, ia ona aumai lea i le Komiti fautuaina ma pasia i totonu o le Palemene ona toe foi lea i le Malo ma silasila i ai le Loia Sili po o talafeagai faaletulafono, ona malamalama ai lea i le tulaga lea pei ona fesili le sui usufono mo Aana Alofi Nu.3.

**Tofa Lealailepule Rimoni Aiafi:** Lau Afioga i le Fofoga Fetalai, e leai, e faamalulu atu foi i sui usufono o le Komiti, o le a foi se sasi, a o lea faatoa ou malamalama ina ua tali nai sui usufono ia o le matou Vaega.

**FOFOGA FETALAI:** Sa tataua lava ona e silasila ifo i le saina a Tapuai Toese. Silasila i lou le migao i le Faafeagaiga a ua e togi le latou Lipoti o se mea faatauvaaina. E faamalulu atu i lau Susuga i le Faafeagaiga, ia maua lou loto faamagalo. Tuisa, e i ai se isi mea ae o le a avatu le fesili?

**Tofa TUISA TASI PATEA:** Faafetai o lena ua faamalamalama uma mai e sui usufono o le matou Komiti. O le mea lea e fia faafofoga i ai le sui usufono lea, seiloga lava e faamalamalama e sui usufono o le latou Itu ona malamalama gofie lea. Faafetai.

**FOFOGA FETALAI:** He is not an easy man to convince.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 154, e ao i le Malo ona tuuina mai le Tali aloaia i totonu o le 90 aso ina ua maea ai ona pasia e le Fono Aoao le Lipoti.

**P.P.2014/2015 NU.137, LIPOTI A LE KOMITI O MATAUPU TAU FAAMASINOVA, LEOLEO & FALEPUIPUI MA FAAMASINOVA O FANUA MA SUAFA I LE P.P.2014/2015 NU.13, 14 MA LE 24, LIPOTI FAALETAUSAGA A LE MATAGALUEGA O LEOLEO MA FALEPUIPUI MO LE TAUSAGA 2009/2010, 2010/2011 MA LE 2011/2013 – Iloiloga**

**Tofa TUISA TASI PATEA:** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

*Faaluaina e le sui usufono mo Aiga i le Tai ma le sui usufono mo Palauli.*

**Tofa TUISA TASI PATEA:** Lau Afioga i le Fofoga Fetalai;

**“FAUTUAGA:**

I le faia i luga o ana Sailiiliga ma lana Asiasiga, e fautuaina ai e le Komiti le Malo:-

- 1. Ina ia silasila totoa le Malo ma faautagia Tupe Faatatau a le Matagaluega ua toe fafoi ae o lo o tele ma anoanoai ana galuega o lo o manaomia le faatinoina ina ia faaleleia atili ai lana auunaga. Ia faamalosia pea le pulega ma le Matagaluega i le faaogaina o seleni ma ia tausisia le pulea lelei o tupe ua tuuina atu mo a latou galuega faatino.**
- 2. Maitauina foi e le Komiti le telegese o le faooina mai o Lipoti Faaletausaga a le Matagaluega. E fautuaina ai e le Komiti ina ia silasila totoa i lenei faaletonu ina ia aua nei toe tulai mai ae ia faataua le tuuina vave mai o Lipoti Faaletausaga a le Matagaluega i tausaga faaletupe taitasi.**

**IUGAFONO:**

I le maea ai o Iloiloga a le Komiti, na faaiugafonoina ai e fautuaina le Fono Aoao,

**Ina ia faamaonia P.P.2014/2015 Nu.13, Lipoti Faaletausaga a le Matagaluega o Leoleo ma Falepuipui mo le Tausaga Faaletupe 2010–2011.**

**P.P.2014/2015 Nu.14, Lipoti Faaletausaga a le Matagaluega o Leoleo ma Falepuipui mo le Tausaga Faaletupe 2009–2010.**



**P.P.2014/2015 Nu.24, Lipoti Faaletausaga a le Matagaluega o Leoleo ma Falepuipui mo le Tausaga Faaletupe 2011–2013.”**

Faafetai.

**FOFOGA FETALAI:** Tulai mai le sui usufono mo Aana Alofi Nu.3.

**Afioga TOEOLESULUSULU CEDRIC POSE SALESA SCHUSTER:** Faafetai i lau Afioga i le Fofoga Fetalai mo le avanoa. E tusa ai o le fautuaga muamua lau Afioga i le Fofoga Fetalai, ona o lea na maua foi i se tasi o saunoaga a le Afioga i le Palemia, e le faafoia ni tupe i Matagaluega pe a toe suia le faamatalaga lea ina ia faamatala sao ai le uiga ona o lea na saunoa le Afioga i le Palemia e le avea, e moni foi o lea e tuu uma i le Treasury e le o avea i ni Matagaluega ia vaega. Ma le faaapapalagi lau Afioga, e fai lava si ou le malamalama, pe mafai ona maua mai i le Taitaifono o le Komiti ma le Komiti le uiga o le upu lea i le Recommendation 1, take into account the huge total of the Ministry’s budget that are being returned while there are still many obsessions.

E fia malamalama lou sui usufono po o a obsessions ia e i ai, pe ono faasao ona o faamaumauga a le tatou Palemene. Faafetai.

**FOFOGA FETALAI:** Ia, o le a avatu le avanoa mulimuli i le sui usufono mo Faleata Sisifo ona tali mai lea o lau Afioga i le Taitaifono.

**Tofa LEALAILEPULE RIMONI AIAFI:** Faafetai lava i lau Afioga i le Taitaifono, manaia le Lipoti, tele le suiga. O lea e fia matau lau Afioga, amata mai le amataga, na pau le mea o le sasi lea e i ai pe o sao au. Lau Afioga, o le Lipoti i le tausaga faaletupe 2009/2010, 2010/2011 ma le 2011/2013. Ou te fia malamalama la po o le a le sao, po o le 2011/2012 po o le 2011/2013. E foliga mai o lea ua lua Tala o le Tupe lea ua i totonu o le isi Lipoti lau Afioga, aua e tatau lava ona sau, 2011/2012 ma le 2012/2013. E tele foi le sasi i ina i lau Afioga, ona ou fesili lea i le vaega taua lea...

E muamua ona momoli le faafetai i lau Afioga i le Minisita mo Leoleo ma le Matagaluega. I lou lava sui usufono, ua tele le suiga i totonu o le Matagaluega mai ia tausaga, aemaise lava o a latou galuega faifaipea i le saogalemu o tatou tagata ma mea ia e faatino i po mo le saogalemu lautele.

A o le mea lea ou te fia fesili i le mea lea na taua i le Lipoti i le vaega faalauiloa mo le atunuu, community and engagement unit, po o faaauau pea le unit lea, leaga na amata mai le 2008, leaga e tele le sao o le vaega lea i le tatou saogalemu ma le faaitiitia o le solitulafono, po o faaauau pea lea vaega i le taimi nei. Ma le faaaloalo lava. Faafetai.

**FOFOGA FETALAI:** Ia, tulai maia lau Afioga i le Taitaifono e tali mai.

**Tofa TUISA TASI PATEA:** Faafetai mo le avanoa lau Afioga i le Fofoga Fetalai. O le fesili muamua pei ona faafesili ai le sui usufono mo Aana Alofi Nu.3, o lena e manino le faamatalaga, o le fautuaga muamua, e le o ni... E pei foi ona saunoa le Afioga i le Palemia, o savings, o tupe lava foi nei ua toe faafoi mai, sa talosagaina mo le Paketi a le Matagaluega, ae peitai ane, o nei seleni ua toe faafoi mai ona ua le faaogaina. E moni le saunoaga ua toe foi

mai lava i totonu o le tatou Treasury, e le faapea o ni tupe o toe alu i se isi tulaga. A o le matau a le matou Komiti, o lo o i ai lava nai galuega sa tatau ona faatinoina. Ae ui i lea, e pei lava ona matauina foi e le matou Komiti, ua tele lava le suiga ua i ai nei, ua faaitiitia lava lea vaega ona o le tele ma le anoanoai o le auaunaga ua siitia a le Matagaluega o Leoleo. E pei foi ona fesiligia le community engagement, o le tasi lea vaega a le tatou Matagaluega e ese foi le taua. Ua tele lava le silafia o tagatanuu uma o Samoa, o tulafono, ua malamalama tagata uma i tulafono ma faaiuga o tulafono, pe a molia oe i le Matagaluega o Faamasinoga. O le apoapoiga foi ma le tuualalo a le Matagaluega, ua matagofie ai aua le malupuipua o si o tatou atunuu ina ia malamalama tagata uma i le tulafono.

O le tali la i le fesili lea, o lo o faaauau lava lea galuega po o lea foi matafai o le tatou Ofisa o Leoleo, ma ua molimauina foi le faaitiitia o soligatulafono, ona o le aoga tele o le tatou community engagement.

O le isi fesili, o le...

**FOFOGA FETALAI:** Se i tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ua matua ou talia le faaupuga lea e i ai. O ituaiga nanu nei e faaigoa panupanu, ua talia foi i totonu o le Maota. O lea lava ua matagofie le aumaiga, ae tatau ona tatou faataitai i Palemene foi nei o Papua Niu Kini, e i ai foi mea e igoa o pigeon English, nanu panupanu. Tatou talia o nanu panupanu lava ae o la e manino.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54 e ao i le Malo ona tuuina mai se Tali i totonu o le 90 aso ina ua maea ona pasia e le Fono Aoao le Lipoti.

**P.P.2014/2015 NU.138, LIPOTI A LE KOMITI O TUPE MAUA MA TUPE TOTOGI I LE P.P.2014/2015 NU.10, LIPOTI FAALETAUSAGA A LE KAMUPANI O PULEGA FAAPUTUGATUPE TEUFAAFAIGALUEGA O MAVAEAGA TAUSI A SAMOA MO LE TAUSAGA FAAIUINA ASO 30 IUNI 2013 – Iloiloga**

**Susuga Hon PAPALIITELE NIKO LEE HANG (Taitaifono, Komiti o Tupe Maua ma Tupe Totogi):** Lau Afioga i le Fofoga Fetalai ua ou tulai atu ma le faaaloalo e faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faaluaina e se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow ma le sui usufono mo Sagaga le Usoga.*

**Susuga Hon PAPALIITELE NIKO LEE HANG:** Lau Afioga i le Fofoga Fetalai;

**“FAUTUAGA:**

I le maea ai o Iloiloga a le Komiti na faaiugafonoina ai e fautuaina le Malo –

1. **Ia tuuina mai i le Palemene i le lumanai Lipoti Faaletausaga a le Faaputugatupe Teufaafaigaluega o Mavaega Tausi a Samoa, ma le Lipoti mo le silafia ai e le Palemene.**
2. **Ia faaauau pea polokalame faalauiloa a le Faaputugatupe e le gata i Samoa nei, ae faapea foi i atunuu mamao mo le faalauiloaina o lana auaunaga aua lava le faatosinaina mai o le atunuu lautele mo le teuina faafaigaluega o a latou seleni i le Faaputugatupe o Mavaega Tausi a Samoa.**

**IUGAFONO:**

Ia faamaonia le P.P.2014/2015 Nu.10, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa, mo le Tausaga Faaletupe Faaiuina i le aso 30 Iuni 2013.”

Ma le faaaloalo lava.

**FOFOGA FETALAI:** Faamalo i lau Afioga i le Taitaifono. Ou te manatu ua auai faatasi le tatou Maota i le taliaina aloaia o le Lipoti.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai se tali i totonu o le 90 aso ina ua pasia aloaia e le Fono Aoa le Lipoti a le Komiti.

**P.P.2014/2015 NU.143, LIPOTI A LE KOMITI O MATAUPU TAU  
AOGA, SAIENISI, FESOOTAIGA MA FAAMATALAGA  
TEKONOLOSI I LE P.P.2014/2015 NU.80, LIPOTI FAALETAUSAGA  
A LE IUNIVESITE AOAO A SAMOA MO LE TAUSAGA FAAIUINA  
1 IULAI 2011 – 30 IUNI 2012 - Iloiloga**

**Susuga IFOPO MATIA FILISI:** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Saililiga, Fautuaga ma Iugafono.*

*Faaluaina e le sui usufono mo Palauli.*

**Susuga IFOPO MATIA FILISI:** Faafetai i lau Afioga i le Fofoga Fetalai.

**“FAUTUAGA:**

I le maea ai o ana Iloiloga, e fautuaina e le Komiti le Malo ina ia:-

1. Lagolagosua i le faia o se afi faaleoleo mo le vaega i tai (*Ocean Side*) o le Iuivesite mo le faamautinoaina o le lelei faagasolo o aoaoga ma suega ae faapea foi i auaunaga o lo o iai nei pe'a tulai mai le motusia faafuasei ai o le eletise. E le gata i lea, ae o le a fesoasoani tele i le Iunivesite i le faasaoina ai o nisi o vaegatupe mo nisi o ana fuafuaga ma galuega faatino.
2. Faaleleia moli tu auala o lo o i fafo o le pa a le Iunivesite ona o lo o savalia e tama ma teine aoga pea tuua vasega po mo le saogalemu o alo ma fanau o le atunuu.
3. E fautuaina le Iunivesite ina ia faamalosi le galulue felagolagoma'i ai ma Matagaluega ma Faalapotopotoga Tumaoti o lo o iai sootaga i le itu tau auaunaga o lo o aoaoina i totonu o le Iunivesite mo le mataituina o agavaa o lo o moomia mo le faaleleia o ia auaunaga eseese.
4. E fautuaina le Iunivesite ina ia usitaia faiga faavae ma taimi faatapulaaina mo le saunia o Lipoti Faaletausaga ma tuuina mai i le Palemene e tusa ai ma aiaiga faa-le-Tulafono.

#### IUGAFONO:

I le maea ai o iloiloga a le Komiti na faaiugafonoina ai e fautuaina le Fono Aoa ina ia faamaonia:

- **P.P.2013/2014 Nu. 80, Lipoti Faaletausaga a le Iunivesite Aoa o Samoa Iulai 2011-Iuni 2012.”**

**FOFOGA FETALAI:** Malo faafetai. Se i tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Lau Afioga i le Fofoga Fetalai, faafetai lava mo le avanoa. Leai o le fesili tuusao, ona o fautuaga nei, o le Lipoti lea e talanoaina o le Lipoti o le 2011/2012, a o fautuaga ia e tuuina mai i i, e pei e foliga mai o fautuaga mo le taimi nei, po o le a se silasila i ai a le Komiti pe na toe asia lea vaega, aua afai o lea e fautuaina se afi moli ina ia faatino i le taimi nei, po o le mea e le i i ai lava i lena tausaga e oo mai i lenei taimi. O le mea la lea e fesili ai i lau Afioga i le Taitaifono, pe na toe asia ua faatino lea tulaga, aua e taua le afi lea. O le isi mea, o moli auala, o mea uma ia e aoga i tupulaga ma le aoga, ma fautuaga uma ia e aumai, ona o lea e tagai atu, o Lipoti ua maotua, a o fautuaga pei o lea e... O fautuaga lelei, ae po ua toe asia la, po ua faatino lea mea i lenei tausaga, pe a fua i le 2011. Ma le faaloalo lava.

**FOFOGA FETALAI:** Se i tulai mai lau Afioga i le Taitaifono.

**Susuga IFOPO MATIA FILISI:** Faafetai lava. Ou te tali atu ma le faaaloalo, ia, o lo o asia. O le isi mea e fia iloa, o lo o i ai le afi lea e pito i uta mo le agai i nisi o faleaoga ma mea ia. O le isi afi lea e talanoaina, o se isi afi faaleoleo lea mo le pito i tai, pei o le Ocean Side, po o gatai mai o le Gym pe a faapea o la e te silafia. Ma le faaaloalo lava faafetai.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona aumai se tali i totonu o le 90 aso ina ua maea ona pasia e le Fono Aoa le Lipoti.

**P.P.2014/2015 NU.172, LIPOTI A LE KOMITI O FAAFOEGA TAU  
PULEGA A LE MALO I LE P.P.2014/2015 NU.51, LIPOTI  
FAALETAUSAGA A LE OFISA O LE LOIA SILI MO LE TAUSAGA  
FAALETUPE 2012/2013 – Iloiloga**

**Tofa Hon TUUU ANASII LEOTA (Taitaifono, Komiti o Fafoega Tau Pulega a le Malo):** Lau Afioga i le Fofoga Fetalai, ua ou tulai atu ma le faaaloalo e faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faaluaina e se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.*

**Tofa Hon TUUU ANASII LEOTA:** Lau Afioga i le Fofoga Fetalai;

**“FAUTUAGA:**

I le faia i luga o ana Sailiiliga e fautuaina ai e le Komiti le Malo e faapea:-

- 1. Ia faaleleia nisi o vaega o le nofoaga o le Ofisa o le Loia Sili o lo o i ai nei i le Maota a le Malo i Sogi, ina ia atoatoa ai le faatinoga o lana auaunaga. E fautuaina foi le fausia ma le faatulagaina o ni potu faapitoa (private consultations rooms) e faatino ai faatalatalanoaga o mataupu e faatoai atu i le Ofisa aua lava le faatumauina o le malupuipua o faamatalaga ma le lelei faatino o mataupu e faatoai atu i le Ofisa.**
- 2. Ia ave le faamuamua a le Malo mo le sailia ma faafaigaluegaina loa se tasi e i ai le tomai faapitoa e faia ai taotoga o mafuaaga lilo o maliu (Forensic Pathologist), i totonu lava o Samoa. E manatu le Komiti ua tatau ona faafaigaluegaina tumau se isi ona e tusa ai ma le molimau a le Ofisa o le Loia Sili, ua tele naua tupe faaalu a le Matagaluega mo le aumaia o Fomai faapitoa nei e aofia ai pasese o vaalele, totogi o apitaga ma le totogiina o le auaunaga a o i ai i totonu o Samoa.**

## **IUGAFONO:**

E fautuaina e le Komiti le Fono Aoao Faitulafono ina ia faamaonia le:

- **P.P.2014/2015 Nu.51, Lipoti Faaletausaga a le Ofisa o le Loia Sili mo le Tausaga Faaletupe na faaiuina i le aso 30 Iuni 2013.”**

**FOFOGA FETALAI:** Malo faafetai i lau Afioga i le Taitaifono. Tulai mai le sui usufono mo Faasaleleaga Nu.2.

**Susuga PAPALII LIO FAAVAIIVAIOMANU TAEU MASIPAU:** Lau Afioga i le Fofoga Fetalai, faafetai tele lava i le Taitaifono ma le Komiti i le fautuaga foi pei ona i ai se manaoga mo se tatou Pathologist po o se fomai faapitoa mo taotoga faaletulafono. E manaia tele lenei fautuaga, ou te talitonu foi o lo o faafogafoga mai le Afioga i le Minisita, tasi lenei mataupu sa laga foi i le amataga o le tatou Paeaiga lenei. Sa faapea mai le Afioga i le Minisita, o lea o le a vaavaai, ua i ai e ua aoga faapitoa. Peitai la o lea ua matau atu, o lea e oo mai i le taimi lenei e le i ai. E faatauaina le tulaga lea pei ona laga e le Ofisa o le Loia Sili, ona o le taugata ma le tau.

O le isi la itu e silasila i ai lau Afioga i le Fofoga Fetalai ma le paia o le Maota, o le taliga o nai aiga pe a faapea o moomia se taotoga faaletulafono, o le tele lava o nai aiga e tutupu loa faalavelave faapea, manatu loa ia vave ona faataunuu ma teu, a o le tulaga lea e i ai e pei o lo o faatali lava ina ia maua se tatou fomai mo taotoga, ma le faaaloalo lava lau Afioga.

**FOFOGA FETALAI:** Tulai mai lau Afioga i le Taitaifono, e manatu pau lea o le mea e afea o se tatou fomai faapitoa.

**Tofa Hon TUUU ANASII LEOTA:** Faafetai, faafetai i le finagalo o le sui usufono na saunoa nei, o le tulaga lena o lo o ua tapena nei i ai le ofisa ma ua amata foi ona sailia, masalo e le o toe umi. Ma lou faaaloalo.

**FOFOGA FETALAI:** Malo.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P. 2014/2015 NU. 173, LIPOTI A LE KOMITI MO OFISA O LE PALEMENE I LE P.P. 2014/2015 NU. 4, LIPOTI FAALETAUSAGA A LE PENISIONE A LE PALEMENE MO LE TAUSAGA 2013 – Iloiloga**

**Afioga MUAGUTUTAGATA FAAMAUSILI AUIMATAGI PETER AH HIM:** Faafetai i lau Afioga i le Fofoga Fetalai, lau Afioga i le Fofoga

Fetalai ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ana Sailiiliga, Fautuaga ma Iugafono.*

*Faaluaina e le Sui Fofoga Fetalai, se tasi o sui usufono mo Palota Taitoatasi, Susuga Hon Papaliitele Niko Lee Hang, se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow, ma se tasi o sui usufono mo Palota Taitoatasi, Afioga Maualaivao Pat Ah Him.*

**FOFOGA FETALAI:** Tulai mai le Taitaifono.

**Afioga MUAGUTUTAGATA FAAMAUSILI AUIMATAGI PETER AH HIM:** Lau Afioga i le Fofoga Fetalai:

**“FAUTUAGA:**

I le faia i luga o ana Sailiiliga e fautuaina ai e le Komiti le Malo e faapea:-

- 1. Ina ia toe silasila le Pulega ma le Komiti Faatonu mo se teuteuga i le Tulafono Autu (Tulafono o Penisione a le Palemene 1998) e mafai ai ona tuufaatasia alauni (allowances) ma totogi (basic salary) a sui usufono a le Palemene ona faatoa galueaiina lea o le 10% o le saofaga atoa mo sui usufono mo le Penisione a le Palemene;**
- 2. Ia tuuina mai faamatalaga auilili o saofaga o Penisione a le Palemene faavaitaimi mo le silafia ai e sui usufono le tulaga o i ai a latou saofaga;**
- 3. Ia silasila le Pulega ma le Komiti Faafae mo le sailia o se kamupani po o se alo o le atunuu e i ai le agavaa po o le tomai faufautua faapitoa mo le mataituina o Penisione a le Palemene. E manatu le Komiti o le a tele se vaegatupe e faasaoina mai pe a i ai se tasi e i ai le agavaa faapitoa mo lenei auaunaga.**

**IUGAFONO:**

E fautuaina e le Komiti ia le Fono Aoa Faitulafono ina ia faamaonia le:

- P.P. 2014/2015 Nu. 4, Lipoti Faaletausaga a le Penisione mo le Palemene mo le Tausaga Faaletupe na faaiuina i le aso 30 Iuni 2013.”**

Ma lou faaaloalo lava.

**FOFOGA FETALAI:** Malo. Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai i lau Afioga mo le avanoa, e puupuu le manatu.

Muamua, faafetai i le Tamaitai Pule ma le NPF i le vaaiga o le tatou Penisione aemaise le faafaigaluegaina o tatou tupe, a o lau fesili i le Afioga i le Taitaifono, i le mea e saunoa i ai i le Fautuaga lea e faapea mai e tuufaatasi o tatou alauni ma totonu ona fai ai lea o le 10%. O lea ou te fia fesili, o fea tonu alauni ia e refer i ai lea e taua mai e le Komiti, alauni o Fonotaga foi ia Faa-Palemene, alauni o fonotaga Faa-Komiti? Aua e le mafai ona tatou iloa le aofai o alauni e tatou te maua i le tausaga, seia vagana e fua i fonotaga ma tulaga faapena. O le mea la lena o lea e fesili ai i le Afioga i le Taitaifono, pe na fai se suesuega a le Komiti, pe mafai ona faatino lea mea? E faigofie, ou te auai, ae ou te le iloa pe faapefea po o le a se formula e faaoga ai, pe na galue la e latou e mafai ona faatino lea tulaga?

Lona lua, o le mea foi lea sa tatou talanoaina ananafi le Death Benefit, ou te le o mataua leaga ua leva ona laga muamua le mea lea pe entitle ai tatou i le Penisione lea? E pei lava ua mafai ea? Ae toe fesili i le Afioga i le Taitaifono pe na toe saili e agavaa ai tatou? Aua tatou te le iloa le taimi e oo mai ai le valaau a le Atua i le tagata, a o maua lea mea e fesoasoani ia te outou i o outou lauava, ma le faaaloalo lava, faafetai.

**FOFOGA FETALAI:** Ia o lea lava e i ai le Death Benefit a tatou o le mea masani, o ai e lagia ona fai atu lea e Fepuleai le submission e ave ai i le Kapeneta, ia ona faafoe ai lea, e i ai tulaga masani e pei ona i ai.

Se i tulai mai lau Afioga i le Taitaifono.

**Afioga MUAGUTUTAGATA FAAMAUSILI AUIMATAGI PETER AH HIM:** Faafetai i le sui usufono mo le faafesili.

Lau Afioga e tele lava se taimi a le Komiti nei sa faatalatalanoa le mataupu nei, ona o le Penisione lea e aafia uma ai tatou, ma o le matau a le Komiti nei ia mo le faateleina o tupe o tatou nei o sui usufono, o le ala lena o le talosagaina o le tulaga lea.

O le 10% lea e fai i luga o le tatou basic salary, a o mo alauni, ia o alauni ia o tatou fono ma tulaga faapena, e tatau lava la e le faapea e tau mataua uma alauni o lea tausaga, e leai, aua a tatou fono lava i totonu o Komiti, ia ona e iloa lea o lou alauni, o i ina la e taumafai e tuufaatasi, ia ona fai laia lea. O lona uiga o le tali atu, e iloa lava e i ai le tulaga e iloa ai alauni, ae le faapea o ni alauni foi lea taumatemate, ma le faaaloalo.

**FOFOGA FETALAI:** Ia tulai mai le Afioga i le Sui Fofoga Fetalai, tulai mai le sui usufono mo Palauli Sisifo.

**Tofa AGAFILI PATISELA ETEUATI TOLOVAA (Palauli Sisifo):** Lau Afioga i le Fofoga Fetalai, e fesoasoani atu i le matou Taitaifono. O le suesuega a le Komiti, a faapea e maua lau gross i le lua vaiaso, ona tax atoa lea o le basic salary ma ou alauni, ae a oo i le taimi e galueaiina ai le saofaga a le sui usufono, e fai mai luga o lana basic salary ae le lavea ai ia ana alauni. E manatu la le Komiti, e le talafeagai, a faapea o lea e tax le gross earning a le sui usufono i le lua vaiaso, e tatau foi ona galueaiina mai i ina le 10%, aua e faapena foi le galueaiina o saofaga a sui lautele o le NPF, e galueaiina mai



le gross, ae le galueaiina mai i le basic salary, a maua ni a latou ovataimi, ona galueaiina faatasi mai ai lea. O le faamalalamalama lea ma le faaaloalo.

**FOFOGA FETALAI:** Malo. Ua manino ma malamalama le taumafai mai a le Komiti.

**Tofa LEALAILEPULE RIMONI AIAFI:** O lea la ua ou faamaonia le mea e toe fia afio ai le Sui Fofoga Fetalai e fia faiaoga Maths, o le matua malamalama lelei, e sao la, o le gross la i le fortnightly, a? Ae le o le mea lea pei ona tau saunoa mai le susuga i le Taitaifono, faafetai.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P. 2014/2015 NU. 186, LIPOTI A LE KOMITI O MATAUPU TAU  
FAAMASINOGA, LEOLEO & FALEPUIPUI MA FAAMASINOGA O  
FANUA & SUAFA I LE P.P. 2014/2015 NU. 92, LIPOTI  
FAALETAUSAGA A LE KOMISI O LE TOEFUATAIGA O  
TULAFONO A SAMOA MO LE TAUSAGA FAALETUPE 2012/2013  
– Iloiloga**

**Tofa TUISA TASI PATEA:** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Gagaifomauga Nu. 1.*

**FOFOGA FETALAI:** Tulai mai le sui usufono mamalu.

**Tofa TUISA TASI PATEA:** Lau Afioga i le Fofoga Fetalai, ua fautuaina e le Komiti o Faamasinoga, Leoleo & Falepuipui ma Faamasinoga o Fanua ma Suafa le Fono Aoao Faitulafono ina ia faautagia lana Lipoti:

**“FAUTUAGA:**

I le maea ai o iloiloga a le Komiti na faaiugafonoina ai e fautuaina le Malo ina ia:-

- 1. Tuuina atu le lagolago e ala i vaegatupe faatatauina mo le Komisi ona ole tele o ana galuega faatino taua o lo o fuafuaina mo le siitia o le auaunaga tuuina mo le atunuu lautele, ia silasila totoa i le taua o le faatinoina o galuega a le Komisi, ina ia mafai ona oo ma pai atu polokalame nei i le lautele o le atunuu atoa ma ia malamalama tagata uma i tulafono iloiloina a le atunuu.**

**IUGAFONO:**

I le maea ai o iloiloga a le Komiti, na faaiugafonoina ai e fautuaina le Fono Aoa, **Ina ia faamaonia P.P. 2014/2015 Nu. 92, Lipoti Faaletausaga a le Komisi o le Toefuataiga o Tulafono a Samoa mo le Tausaga Faaletupe 2012-2013.**”

Ma lou faaaloalo lava.

**FOFOGA FETALAI:** Malo.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

**P.P. 2014/2015 NU. 187, LIPOTI A LE KOMITI O MATAUPU TAU  
FAAMASINOGA, LEOLEO & FALEPUIPUI I LE P.P. 2014/2015 NU.  
123, LIPOTI FAALETAUSAGA A LE MATAGALUEGA O  
FAAMASINOGA MA LE FAAFOEINA O TULAGA TAU  
FAAMASINOGA MO LE TAUSAGA FAALETUPE 2012/2013  
– Iloiloga**

**Tofa TUISA TASI PATEA:** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Gagaiformauga Nu. 1, le sui usufono mo Palauli, ma le sui usufono mo Aiga i le Tai.*

**FOFOGA FETALAI:** Tulai mai le Taitaifono.

**Tofa TUISA TASI PATEA:** Lau Afioga i le Fofoga Fetalai, ua fautuaina e le Komiti o Faamasinoga, Leoleo & Falepuipui, ma Faamasinoga o Fanua ma Suafa le Fono Aoa ina ia faautagia lana Lipoti.

**“FAUTUAGA:**

I le maea ai o iloiloga a le Komiti na faaiugafonoina ai e fautuaina le Malo ina ia:-

1. Silasila i ni aiaiga talafeagai mo le filifilia o ni Faamasino agavaa ma talafeagai mai le Faamasinoga Maualuga ma le Faa-Itumalo e avea ma Sui Peresetene e taitaia iloiloga a le Faamasinoga o Fanua ma Suafa mo so o se Talosaga Apili. O lea tulaga o le a vave tagofia ai le tele o mataupu e le i tagofia i le taimi nei, ma vave ai ona tali atu i faasea a le atunuu lautele.

- 2. Tuuina atu le lagolago e ala i le siitia o Vaegatupe Faatatauina mo le Matagaluega e fesoasoani ai i le faatupeina o nisi o ana galuega faatino o lo o ave i ai lana faamuamua i le taimi nei.**

### **IUGAFONO:**

I le maea ai o iloiloga a le Komiti, na faaiugafonoina ai e fautuaina le Fono Aoa, **Ina ia faamaonia P.P. 2014/2015 Nu. 123, Lipoti Faaletausaga a le Matagaluega o Faamasinoga ma le Faafoeina o Tulaga tau Faamasinoga mo le Tausaga Faaletupe 2012-2013.”**

Faafetai.

**FOFOGA FETALAI:** Malo, tulai muamua mai le sui usufono mo Aana Alofi Nu. 3.

**Afioga TOEOLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai mo le avanoa, e faamalo atu foi i le Taitaifono ma le Komiti. E pau le faafesili lau Afioga ona o lea e matau atu i le fautuaga lona lua, o le faafesili, po o a tonu vaega ona pei foi ona pasia le tatou Tala Faatatau o le Tupe ma le tele o nisi o fuafuaga a lo tatou Malo a o lea e naunau lava i le faaogaina o seleni i le utiuti o seleni a lo tatou Malo o lo o i ai a o lea o lo o i ai le fautuaga taua, po o a tonu vaega o lo o ao ona naunau e faatino, ma o lo o manaomia ai le seleni i lea Matagaluega.

O le agaga o le fesili lau Afioga i le Fofoga Fetalai, e pei e ao foi ona faamaoti mai i totonu o fautuaga po o a tonu vaega ia e manaomia ai le fesoasoani pe afai e le o mafai ona maua i le taimi nei mo le lumanai e tusa o le Tala o le Tupe, faafetai.

**FOFOGA FETALAI:** Se i tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** E tau taga tutusa lau fesili ma le fesili a le sui usufono. A e tagai i le Lipoti, e 9% le siitia o le tupe faaopoopo mai le Tala o le Tupe 2012/2013. O lona uiga la e foliga mai i le Lipoti a le Komiti, e le taitai lava. Ia manatua foi lau Afioga i le Fofoga Fetalai, e leai lava se Matagaluega a le Malo e omai faapea mai e lava a latou tupe. O lou talitonuga i le vaega lea e moomia lava e Matagaluega uma tupe faaopoopo i lea tausaga ma lea tausaga. A fua i ai, e 9% le faaopoopoga lea e i ai mai le isi tausaga i le isi tausaga, a o lea e faapea mai e le lava. O lona uiga e tatau ona toe tagai i ai aua tasi foi lea Matagaluega o lo o faaopoopo pea tagata faigaluega ina ia faamama avega i a latou galuega o lo o fai.

O le mea lea e fesili atu ai i le Taitaifono i le tulaga lea, po o le a tonu lava e pei foi ona fesiligia e le sui usufono ua tuanai atu. A o le mea taua lea e taua iinei, o le mea lea e tau o le Legal Aid lea foi na tatou talanoa ai i le isi taimi, ona o lea e tumau lava le tupe lea e ave i ai. E talitonu e lagolagoina e lou sui usufono pe afai e itemize lelei mai tulaga ia e ala ai ona manaomia le

fesoasoani lenei ma e faigofie ai foi ia tatou ona taliaina tupe faaopoopo i lea tausaga i lea tausaga.

O le isi vaega taua lau Afioga i le Fofoga Fetalai, aua o le Lipoti lenei o le 2012/2013, o lau lava fautuaga i le tele o Matagaluega, ua pei o se avega mamafa ia i latou nei mea o Lipoti Faaletausaga. A o lou talitonuga, o se mea faigofie tele aemaise lava Matagaluega a le Malo o lo o sue tusi e le Ofisa o le Pule ma Suetusi Sili. E leai se faigata aua na o le lisi lava i lalo o galuega fai o lenei tausaga ma tupe faaalu uma, ma le tigaina fua e faamafiafia ma faatele, ae leai se taua tele. A o le taua o le tolaulau mai o galuega na fai i lenei tausaga ma le tupe na faaaluina, uma.

Ma le faaaloalo lava, faafetai.

**FOFOGA FETALAI:** Ia, Mr Chairman.

**Tofa TUISA TASI PATEA:** Faafetai lava mo faafesili a le sui usufono mamalu. Ou te talitonu e pei ona fesiligia po o a galuega fai ua mafua ai ona tuuina i totonu e lagolagoina le siitia o vaegatupe faatatauina mo le Matagaluega. O le tala moni, e matua tele lava galuega a le Matagaluega. E pei foi ona silafia e le Maota, o lea faatoa maea atu le tatou Family Court, o lea foi ua i ai le tatou Youth Court, ua i ai foi ma le fuafuaga mo le Alcohol and Drugs ma le tele o nisi o fuafuaga tatau a le Matagaluega e manaomia ai tupe.

E pei foi la ona taua e le sui usufono mamalu mo Faleata Sisifo le Legal Aid lea, o lena e pei ona manino foi i le fautuaga a le Komiti, na o le \$250,000 lena o lo o avatu e le Malo i le Matagaluega mo le Legal Aid, ae ua matauina foi o lo o tele lava le faatupulaia o o tatou tagatanuu mai lea tausaga i lea tausaga, faatasi ai foi ma le tele o le solitulafono. O lona uiga e tele lava vaegatupe o lo o manaomia e le Matagaluega e faaleleia atili ai le auunaga lea.

O le tali atu lea i le ava ma le faaaloalo.

**Afioga TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai, e pei o le vaega lea na ala ai ona avatu le fesili ona o lea e pei ona faailoa foi le manaomia o le increase, ae peitai ane e sau le faamatalaga o tupe maua a le Matagaluega o lea e alu i lalo, ae pe e le o i ai se fautuaga a le Komiti aua e tatau foi ona fautua i ai ina ia faaleleia le aoina o seleni ina ia alu i luga. Afai foi e sau ai le manaoga, e faigofie foi ona talia manaoga ae e le o le alu i lalo o tupe maua ae alu i luga manaoga, faafetai.

**FOFOGA FETALAI:** Masalo o lea e sau i le isi Lipoti lea e mulimuli mai leaga o lea e faatulaga mai e le Komiti e le uma ai a tatou Lipoti, ae tautuana ma le Komiti.

**Afioga Afoafouvale John Moors:** Lau Afioga i le Fofoga Fetalai.....

**FOFOGA FETALAI:** Se i tulai mai le Afioga ia Afoafouvale.

**Afioga AFOAFOUVALE JOHN MOORS:** Ou te tulai atu ma le faaaloalo e fia avatu le lagolago i le Afioga i le Taitaifono ona o le fesoasoani atu aua le fesili lea e tusa ai ma le aoina o seleni. O le popolega lava foi o le

Matagaluega ona e fua taimi e siitia ai tau o le aoina o seleni ma auaunaga. Aua a siitia foi, ona tulai mai foi lea o le la Itu ma faapea mai ua taugata auaunaga a le Matagaluega.

O isi galuega faaopoopo e moomia ai seleni e faapena ona faaopoopo i le Tala o le Tupe a le Matagaluega e le i maua, o le vaitau lenei o lea ua alualu i luma le soifuaga, e tatau ona i ai ni metotia fou faatekonolosi tatou te faaaogaina. O le taugata ia o ia ituaiga metotia, a o lo o taumafai le Matagaluega ia tuuina uma i totonu o vaega faatekonolosi faamaumauga eseese. O le polokalame lea o lea e taumafai le Matagaluega e ausia ina ia mafai ona faatumauina le saogalemu ma le malupuipua o faaiuga o faamasinoga.

O le fesoasoani atu lea ma lou faaaloalo lava.

**FOFOGA FETALAI:** Malo faafetai fesoasoani i le Taitaifono o le Komiti.

**Tofa LEALAILPULE RIMONI AIAFI:** Faamolemole lau Afioga i le Fofoga Fetalai e fia faasao le saunoaga a le sui usufono. Na ia faapea mai a sii ona tulai atu foi lea. O le mea lea ua i ai ua sii, a o le mea lea e finau atu ai matou ia faaleleia le aoina o tupe nei. E le iloa po o le tali lena, ae le o le oso i le tali faigofie. Aua e faigofie lava le sii aua o lona uiga we are paying for the efficiency i le aoina o tupe nei.

**FOFOGA FETALAI:** E manatu o lea ua malamalama lau Afioga i le Taitaifono. Ia tautuana foi mea ia e fautua atu ai sui usufono ina ia mataalia le faatinoga o fautuaga e ave i Komiti.

*Na faamaonia le lafo.*

**FOFOGA FETALAI:** E tusa ai ma Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

E manatu ona o lea ua tatou taunuu i lo tatou taimi malolo, ae tulai mai lau Afioga i le Palemia mo se lafo.

## LAFO MO LE SUIA O ITULA FONO

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ma le mamalu o le Maota, ou te tulai atu e faatu le lafo, *Ina ia suia o tatou itula Fono e faapea: 9.00 i le taeao i le 1.00 i le aoauli ona toe amata ai foi lea i le 3.00 i le afiafi seia oo i le 7.00 i le po.*

*Faaluaina e le Sui Palemia.*

*Na faamaonia le lafo.*

**FOFOGA FETALAI:** O le agaga lena le tatou Maota i lenei vaega o le aso. Ou te masalo a lelei lava le faasologa nanei, ona tatou faaiu ai lea. E lelei

foi lo tatou tigaina puupuu. O lea na talosaga atu i le tele ma le anoanoai o a tatou galuega. Ua outou silasila mai i le cue paper o le aso lenei, e le i afa? O lona uiga e tatau ona onosai mai le paia ma le mamalu o lo tatou Maota. E tele ma anoanoai a tatou Lipoti, o lea ua tatou i le Lipoti 13. A oo atu la nanei ua tatou ausia le Lipoti 43 ua manaia tele. E tele nisi o a tatou galuega o lo o faagasolo mai ona tatou saoloto loa lea i le Aso Faraile po o le Aso Toonai. E manaia lena e oo atu ai i se isi taimi ua mama a tatou galuega.

E faasilasila atu o lea ua saunia le tatou taumafataga masani o le aoauli leaga o lea ua toe suia o tatou taimi Fono. E le mafai ona faaitiitia le agaga faafetai e momoli atu i le Afioga i le Pule Sili o le STEC, Tofa Patea ona o fua o faaeleeleaga o lo o tua i ai le Ofisa o le Fono e ala i taumafataga. O faalifu fai ma faalifu talo ia tou te tausasami ai, o fua na o faaeleeleaga o le fesoasoani mai a le Tofa Loli.

Ou te faasilasila atu o le a faataatia ese Taulumaga a le Fono Aoao Faitulafono mo lana malologa seia aulia le itula e 3.00 i le afiafi.

*Na faataatia ese Taulumaga a le Fono Aoao i le itula e 1:00 i le aoauli seia aulia le itula e 3.00 i le afiafi.*

*Na toe faaauau Taulumaga a le Fono Aoao i le itula e 3:00 i le afiafi.*

**FOFOGA FETALAI:** E faasilasila atu o le a toe amataina Taulumaga a le Fono Aoao Faitulafono.

E momoli atu le agaga faafetai ma le faamalo i le tatou Maota i lenei vaega o le aso, e manatu o lea ua tatou tini taunuu i le tatou taimi tuupoina amata, ona i ai lea o le faamoemoe o le a amata malie le tatou Fono, e manatu foi o lea e maua o lea e agai mai nisi o Minisita ma nisi o sui usufono, e talitonu o le a le afaina lea o lea na uma ona faatulaga le tatou polokalame ma o lo o i ai foi le talitonuga o lo o tatou sosolo lava mai le aso analeila.

Ua tatou taunuu mai.....

**Afioga Hon Palusalue Faapo II:** Lau Afioga i le Fofoga Fetalai.....

**FOFOGA FETALAI:** Ia lau Afioga i le Taitai o le Itu Agai.

**Afioga Hon Palusalue Faapo II:** Ma le faaaloalo lava, e le o lava le tatou.....

**FOFOGA FETALAI:** O lea ua ou maua, o le ala lena o lou fai atu lau Afioga i le Taitai o le Itu Agai, o lea ua ou maua lou fingalo, a lea ua tuu mai, tasi, lua ona atoa lea o le tatou fuainumera, e le.....

**Afioga Hon Palusalue Faapo II:** Ia ona o Tulafono Tumau lava ma Tulafono o le Maota, ia tatou alu sese ia faapea.

**FOFOGA FETALAI:** Ia ou te....leai e le o ni upu e avane ai, ua e iloa foi le mea lenei a atoa loa sao o le nuu fai le fono. Ia o le tulaga ia, o la e

tauavamea mai o la e tele le tuatuagia ma le tuatuanoa, e le faapea o le taufaatauvaaina, o lea lava ua i ai lau Afioga i le Taitai o le Itu Agai, o lea foi ua atoa tagi le tino o le Kapeneta, e te toe faatali la i fea? O lea ua ou i ai, ia ua tatau ona faagasolo le tatou galuega, o lo o atoa ma onomea le tulaga i le taeao analeila o lea e ta te sosolo mai lava i le quorum lena.

## **ILOILOGA O LIPOTI A KOMITI FILIFILIA**

### **P.P. 2014/2015 NU. 188, LIPOTI A LE KOMITI O MATAUPU TAU FAAMASINOGA, LEOLEO & FALEPUIPUI I LE P.P. 2014/2015 NU. 11, LIPOTI FAALETAUSAGA A LE MATAGALUEGA O FAAMASINOGA MA LE FAAFOEINA O TULAGA TAU FAAMASINOGA MO LE TAUSAGA FAALETUPE 2011/2012**

#### **– Iloiloga**

**Tofa TUISA TASI PATEA:** Lau Afioga i le Fofoga Fetalai, e talitonu ua maea palegaauau ma saoialo foi le taliga o le sua i lenei itula o le aso i le faasiliga malosi o sui usufono mamalu uma o le Maota. Ae lau Afioga i le Fofoga Fetalai ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faaluaaina e le sui usufono mo Palauli.*

**FOFOGA FETALAI:** Ia tulai mai lau Afioga i le Taitaifono e saunoa i Fautuaga ma Iugafono.

**Tofa TUISA TASI PATEA:** Lau Afioga i le Fofoga Fetalai, ua fautuaina e le Komiti o Faamasinoga, Leoleo & Falepuipui, ma Faamasinoga o Fanua ma Suafa le Fono Aoao ina ia faautagia lana Lipoti.

#### **“FAUTUAGA:**

I le maea ai o Iloiloga a le Komiti na faaiugafonoina ai e fautuaina le Malo ina ia:-

- 1. Tuuina atu le lagolago mo le faaauauina o le poloketi o le Tuumasiniina o Faamaumauga a le Faamasinoga, ina ia mafai ona fesoasoani i le vave tuuina atu o faamaumauga moomia e le atunuu.**
- 2. Faaauau pea le auina mai o Faamasino mai fafo i taimi talafeagai e fua i mataupu e moomia ai lo latou sao taua, ona o faaaitaui ua matauina i sootaga o nisi o tatou Faamasino.**
- 3. Tuuina atu le lagolago e ala i vaegatupe faatatauina mo le Matagaluega ona o le tele o ana galuega faatino taua o lo o fuafuaina mo le siitia o le auaunaga tuuina mo le atunuu lautele.**

## **IUGAFONO:**

I le maea ai o Iloiloga a le Komiti, na faaiugafonoina ai e fautuaina le Fono Aoao, **Ina ia faamaonia P.P. 2014/2015 Nu. 11, Lipoti Faaletausaga a le Matagaluega o Faamasinoga ma le Faafoeina o Tulaga tau Faamasinoga mo le Tausaga Faaletupe 2011-2012.”**

**FOFOGA FETALAI:** Malo faafetai i lau Afioga i le Taitaifono. Tulai mai le sui usufono mamalu mo Aana Alofi Nu. 3.

**Afioga TOEOLESULUSULU CEDRIC POSE SALESA SCHUSTER:** Faafetai i lau Afioga i le Fofoga Fetalai mo le avanoa, faafetai foi i le Komiti mo le Lipoti, e faafesili i lau Afioga ona o lea e taua o lea ua digitize ia nisi o faaiuga a le Faamasinoga. O le fesili, po o lea la ua mafai ona access foi i ai ma le public pei ona i ai foi i isi website a le Paalii lea e i ai faaiuga, pe na o Faamasino lava o lo o mafai ona access i ai i le digitization lea ua fai. E matau atu foi o lea e faamoemoe e faatinoina lea iuga o Faamasinoga mo Fanua ma Suafa, po o le a se faataatiaga o i ai, pe mafai foi ona access i ai ia le general public, ae po o le a se faataatai i se vaitaimi e mafai ona faaiuina ai nei avanoa? Faafetai.

**FOFOGA FETALAI:** Malie lau Afioga i le Taitaifono, se i tuu atu le avanoa i le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai lava i lau Afioga, faafetai foi i lau Afioga i le Taitaifono, aua o lea....tatou te le i tuua sa tatou talanoaina le Lipoti o le 2012-2013, o lea la ua tatou toe foi i tua 2011 i le 2012 i le Matagaluega lava lea e tasi, e le afaina lea itu. Pau le mea lea e i ai, i le 2012 i le 2013, sa talosagaina ai e le Komiti ia le toe iloilo ina lea o ni Faamasino Maualuga Faaitumalo e avea ma Sui Peresetene o Faamasinoga o Fanua ma Suafa, a o lea e matau e ono ia Faamasino sa faatautoina i le 2011. O le fesili la i lau Afioga, pe le i maua i ina nai sui e i ai lo latou agavaa e faasee atu i luga e fai ma Sui Peresetene e fesoasoani i lea vaega.

Lona lua, o le Records lea e taua i faamaumauga foi ia a o fia maua se faamaumauga ona o le tele o faila ua faatamaia ma ua leiloloa, po o ua maea lea vaega?

Ma le vaega mulimuli, i le tulaga lava lea o le aumaiga o Faamasino foi ia mai fafo, ona o lea e faapea e i ai ia feteenaiga. Ia tailo i ai, po o le mea o le Faamasinoga Maualalo o le Lands & Titles po o le Faamasinoga Maualuga lea i Faamasinoga lea e aumai ai ia nei Faamasino, e fia maua ai se malamalamaaga. Aua i lou talitonuga e le o lava Faamasino i le taimi nei i ia vaega, ae se i vagana le Court of Appeal. Ia ma le faaaloalo lava, faafetai.

**FOFOGA FETALAI:** Malo, tulai mai lau Afioga i le Taitaifono.

**Tofa TUISA TASI PATEA:** E faafetai atu mo faafesili, o le fesili muamua i le polokalame lea o le tuumasiniina o faamaumauga a le Faamasinoga, digitization project, pei ona silafia e le Maota ma le mamalu foi o le atunuu, ua leva ona faagaoioi lea fuafuaga, i le taimi o lenei Lipoti, o le tala na tuuina mai, ia ua faagasolo i le tatou Ofisa o Faamasinoga, pei lava ona taua foi e na



o Faamasino i le taimi sa i ai, a o le fuafuaga o lo o i ai, o lo o fia faagasolo uma aua le silafia lautele o le atunuu. Ia ma le tulaga foi o lo o i ai, o lo o manaomia foi le faagasoloina ma le faaauauina o lea poloketi, ina ia mafai foi ona cover ai ma le Lands & Titles. O le taua o lea fuafuaga ona o le tele o fuafuaga uma a le Faamasinoga e ao ona tuumasiniina ina ia faafaigofie ai le access o tagata uma, e faafaigofie ai foi ma galuega a le tatou Ofisa o Faamasinoga.

O le fesili a le sui usufono mamalu mo Faleata Sisifo, ia o Sui Peresetene e toaono. E moni le saunoaga, o fuafuaga lea e pei ona i ai, o le toaono lea o Faamasino tofiaina i le 2011 mo le Faamasinoga o Fanua ma Suafa. Ae pei foi ona avatu i se Lipoti o muamua le naunautaiga a le Komiti, ina ia ,afai ona faaaogaina a tatou Faamasino po o i latou e onomea ona avea ma Faamasino o Faamasinoga Mauualalo ma Faamasinoga Mauualuga e taitaia a tatou Faamasinoga ia, ona o le tele foi o nisi o faasea a le atunuu o lo o i ai, e pei lava foi ona malie i saunoaga, ia o nisi o Faamasino e tau foi i nisi o tagata o le tatou atunuu, pei o le ala lea. A o le Faamasinoga, o le Faamasino mai fafo pei ona taua, pei lava foi ona manino i nisi o tausaga ua mavae, e i ai a tatou Faamasino mai Ausetalia ma Niu Sila foi sa aumaia e fesoasoani i le tele o mataupu i le tatou Faamasinoga Mauualuga. Ia o na fuafuaga, ia ona o nisi foi o le tele o galuega e fia faatautaia a le Ofisa o Faamasinoga i le Faamasinoga Mauualuga, ma o le tulaga foi lena e tua i ai a tatou Faamasino po o le Afioga foi i le Faamasino Sili ma le mamalu o le Faamasinoga i afioga i alii ma tamaitai Faamasino, o lo o i ai nisi e mafai ona tua i ai pe a i ai se conflict of interest i nisi o Faamasino ma le mamalu o le atunuu.

O le tali atu lea, faafetai.

**FOFOGA FETALAI:** Malo.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

**P.P. 2014/2015 NU. 192, LIPOTI A LE KOMITI O MATAUPU TAU FAAMASINOGA, LEOLEO & FALEPUIPUI MA FAAMASINOGA O FANUA & SUAFA I LE P.P. 2014/2015 NU. 12, LIPOTI A LE KOMISI O LE TOEFUATAIGA O TULAFONO A SAMOA I LE PULEGA O MEASINA A SAMOA, LIPOTI 13/13 – Iloiloga**

**Tofa TUISA TASI PATEA:** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Gagai fomauga Nu. 1, le sui usufono mo Palauli ma le sui usufono mo Aiga i le Tai.*

**FOFOGA FETALAI:** Tulai mai lau Afioga i le Taitaifono.

**Tofa TUISA TASI PATEA:** Lau Afioga i le Fofoga Fetalai, ua fautuaina e le Komiti o Faamasinoga, Leoleo & Falepuipui, ma Faamasinoga o Fanua ma Suafa le Fono Aoaoina ina ia faautagia lana Lipoti:

**“FAUTUAGA:**

I le faia i luga o ana sailiiliga, e fautuaina ai e le Komiti le Malo:-

**Ina ia faautagia le Lipoti a le Komisi o le Toefuataiga o Tulafono a Samoa, o lo o auiliili atu ai ana Fautuaga mo le Toefuataiga o le Lipoti Pulega o Measina a Samoa.**

**IUGAFONO:**

I le maea ai o Iloiloga a le Komiti, na faaiugafonoina ai e fautuaina le Fono Aoaoina, **Ina ia faamaonia le P.P. 2014/2015 Nu. 12, Lipoti a le Komisi o le Toefuataiga o Tulafono a Samoa i le Pulega o Measina a Samoa, Lipoti 13/13.”**

**FOFOGA FETALAI:** Malo, e manatu ua malamalama lelei le tatou Maota i le Lipoti a le Komiti. Tulai mai le sui usufono mo Faleata Sasae.

**Tofa AVEAU TUALA LEPALE NIKO PALAMO:** Faafetai i lau Afioga i le Fofoga Fetalai, faafetai foi i le Taitaifono o le Komiti aemaise o le Komisi o lea sa auiliiliina leni Lipoti taua. O le Lipoti leni e ese le tele o le Lipoti leni, ona o lea aumai ai le faatagaga foi lea i measina po o vaaiga foi ia faa-Atunuu, a, i lalo e i ai se Komisi latou te vaaia. E i ai la vaega ia e i ai i o le Lipoti e avatu ai sau fesili faamolemole. E i ai le vaega o le Lipoti lea e faapea mai, e mafai e le Komiti lea ona fai ni tulafono laiti e fua lea i le Tulafono lea e faaoga e le Ofisa o Faigafaiva e mafai ai ona latou pulea ia vaega ia, ae silasila foi, o le Tulafono lea e faaoga e le Ofisa o Faigafaiva, o lea e faaoga i luga o le sami, a o le Komisi lea e faatino i i, o luga o fanua tuusaoloto po o fanua faale-Aganuu. O le eseese lena o le vaega lea, e le tatau ona aumaia le Tulafono lea e faaoga nei e le Ofisa o Faatoaga e puipui ai ia i totonu...e faatusatusa i i le Tulafono lea, e ese le vaega lea i luga o le sami, ese le vaega lea.

O le isi vaega o le Tulafono lea, o lea foi ua faatusatusa le isi vaega o le Tulafono lea i atunuu foi ia i fafo e mafai ona latou owni ia mea nei, e mafai ona latou faataua, o lea e faatusatusa i atunuu i fafo e i ai ia le Atu Kuki ma vaega faapena, e le tatau ona faatusatusaina ia fanua tau Samoa fanua ia tau aganuu i vaega ia o atunuu ia i fafo, e le tatau ona faatusa ai le Tulafono leni. E tatau ona tagai i ai, o lau fautuaga i lau vaavaai i ai, e tatau lava ona tagatagai i le vaega lea, ona o fanua nei e talanoa ai, o mea foi nei o lea e tu i totonu o fanua faaleaganuu, maimoaga foi ia pei o le fale o le mau i Vaimoso, mataaga faapena lea e faatatau i ai le vaega lea.

E manaia le tele o vaega o le Tulafono e fesoasoani e atiae ma faaleleia ma puipuia, a o le isi vaega o le Lipoti lea po o le vaega o le Tulafono a le Komisi lea faapea e mafai ona latou faatauina, e mafai ona fai ni Tulafono

laiti latou te pulea ai, e le auai le sui usufono o lenei itumalo. Ma le faaloalo lava.

**FOFOGA FETALAI:** Se i tulai mai le Afioga i le Taitaifono.

**Tofa TUISA TASI PATEA:** Faafetai. E ese le faigata o le fesili a le sui usufono lea. Ae o le tali atu i lau Afioga i le sui usufono mamalu, e ese le taua o lenei Tulafono o lo o tau fuafua e le Samoa Law Reform Commission. E pei lava foi ona silafia le process o nei Tulafono, a maea le galuega lenei ona toe tuu atu lea i le Malo ma le Kapeneta, ona toe tuu mai ai loa lea i totonu o le Maota lenei. A maea lenei, ona toe tuu atu foi lea i Komiti faa-Palemene. O lona uiga la, e tele lava le avanoa e mafai ai ona toe faatalanoaina fesoasoani ia e pei lava ona saunoa i ai le sui usufono mamalu, aua ou te talitonu e taua. Ae mo le amataga o lenei fuafuaga ua i ai le tatou Samoa Law Commission, e ese le taua ona o avanoa lelei nei e tilotilo ai i se Tulafono faavae e aiaia lelei aua lava le vaaiga faalelei o measina a le atunuu. E le gata la i measina faaleaganuu ma faalenatura, ae i ai foi ma measina aaganuu fefiloi ma measina faalenatura. E pei lava foi ona avatu i le Lipoti a le Komisi, ua matagofie aiaiga foi a le tatou Komisi i le tele o le galuega, aua e le o se galuega na fai i se aso se tasi, o le tele o latou na fai o latou sao i lenei galuega, a o lea e le i taitai ona oo i ona iu. Ou te talitonu e i ai se taimi o muamua ona toe oo foi lea i le Kapeneta ma le Malo, toe sau i totonu o le Maota lenei, ona faapea foi lea ona toe faaali nisi o finagalo i le faalauteleina ma le faaleleia atili o lenei Tulafono aua e ese le taua mo le lumanai o Samoa.

*Na faamaonia le Lipoti.*

**FOFOGA FETALAI:** E tusa ai ma Tulafono Tumau 54, e ao i le Malo ona tuuina mai se Tali i totonu o le 90 aso ina ua maea ona pasia e le Fono Aoao lana Lipoti.

**P.P.2014/2015 NU.70, LIPOTI A LE KOMITI O OLOA GAOSIA  
TULAGA MUAMUA, MATAUPU TAU PISINISI, ALAMANUIA MA  
LEIPA I LE P.P.2013/2014 NU.82, LIPOTI FAALETAUSAGA A LE  
MATAGALUEGA O FAATOAGA MA FAIGAFIIVA MO LE  
TAUSAGA 2011/2012 – ILOILOGA**

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te tulai atu e faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faaluaaina e le sui usufono mo Siumu, sui usufono mo Gagaiformauga Nu.1 ma le sui usufono mo Sagaga le Falefa.*

**“FAUTUAGA:**

E fautuaina e le Komiti le Malo ina ia:-

1. **Tuuina atu le lagolago e ala i ni vaegatupe faatatauina mo le Matagaluega e faatupeina ai:**
  - **Polokalame Faalauiloa a le Matagaluega o Faatoaga ma Faigafaiva. O ni polokalame taua tele, aua o le faamoemoega o le Aufaifaatoaga mo a latou atinae tau faatoaga, o fautuaga e faasoa atu e le Matagaluega;**
  - **Toe Iloiloina o le Tulafono Autu a le Matagaluega o Faatoaga ma Faigafaiva 1959, mo aiaiga ua talafeagai ona toe suia, fuafua i lenei vaitau ma suiga ua faagaioi ai le auaunaga a le Matagaluega.**
2. **Mataitu pea e le Matagaluega aafiaga o le amu i le aloalo e afua mai i suiga o le tau (vevela o le la) ma le palapala tafia mai i vaitafe, ma tapena ni fofu talafeagai e foia ai le faafitauli. E tatau foi i le Matagaluega ona galulue faatasi ma le Matagaluega o le Punaoa Faalenatura ma le Siosiomaga ma le Pulega o le Suavai, i aafiaga o vaitafe i le soona taina o le vaomatua.**
3. **Fesootai le Matagaluega o Faatoaga i le mamalu o le Aufaifaatoaga ma le atunuu lautele, i taimi e tufatufa ai anufe mafolafola mo faamoemoega e tineia ai le sisi Aferika ina ia mautinoa o lo o aofia uma itu o le atunuu o lo o tele ai lenei manu faalafua. E tatau foi ona sailiili lelei le Matagaluega i ni aafiaga o le anufe mafolafola, ona o lo o fesoasoani tele i le toe faaleleia o le palapala.**
4. **Silasila le Matagaluega o Faatoaga ma le Matagaluega o Punaoa Faalenatura ma le Siosiomaga i auala e faaititia ai le aofai o le manulele o le Myna (Myna Bird) i se aofaiga talafeagai, ae le o le tineia e pei ona fautuaina e le Matagaluega o Punaoa Faalenatura ma le Siosiomaga. O le itu taua i le silasila a le Komiti ona o le aoga o lea manulele i le atinae o manupapalagi i totonu o le atunuu.**
5. **Vave faatautaia ni polokalame a le Matagaluega o Faatoaga ma Faigafaiva i le tineia o le manu-ai-niu ona ua matauina le toe faatupulaia o lea manu faalafua i le taimi nei. E tatau foi ona tapa le lagolago a le Matagaluega o Tina ma Tamaitai e ala i le galulue faatasi ai ma Sui o le Malo (Pulenuu).**
6. **Mataitu lelei e le Matagaluega o Faatoaga ma Faigafaiva le faasoasoina o vaegatupe o le Polokalame Fesoasoani mo faatoaga na aafia i le afa o Eveni i le tausaga 2012. Manatua le Komiti, e tatau ona faatonutonu lelei le faasoasoina o lea fesoasoani, ina ia mautinoa le faasopolia uma o le**

**Aufaifaataoaga na aafia, ina ia ogatasi ma aiaiga o lea Polokalame Fesoasoani.**

- 7. Toe faaauau le Polokalame o le faasao mo le figota o le maso (Green Mussel) ma le faisua i afioaga o Asau ma aofia atu ai ma le afioaga o Falealupo. O le filifilia o ia afioaga, ona e mautinoa e itiiti aafiaga o le siosiomaga faalenatura mo le ola lelei o figota ma ia. E moomia foi le mataalia o le Matagaluega o Faatoaga ma Faigafaiva i le mataituina ma le vaaia lelei o ia atinae i le taimi o le a faatino ai.**

## **IUGAFONO:**

E fautuaina e le Komiti le Fono Aoao ina ia faamaonia:

- P.P.2013/2014 Nu.82, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe na faaiuina i le aso 30 Iuni 2012; ma**
- Fautuaga a le Komiti ua tuuina atu i lalo.”**

**FOFOGA FETALAI:** Malo saunoa i lau Afioga i le Taitaifono. Ia, tulai mai le sui usufono mamalu Toeolesulusulu, sui usufono mo Aana Alofi Nu.3.

**Afioga TOEOLESULUSULU CEDRIC POSE SALESA SCHUSTER:** Faafetai i lau Afioga i le Fofoga Fetalai mo le avanoa. E faamalo atu i le Komiti. E talitonu ua maeaea suesuega a le Komiti i le faatinoina o a latou fautuaga. O nai faafesili e tusa ai o se tasi o fautuaga o lo o tuuina mai ai i le naunautai lea o le Komiti ina ia faaola pea le manu lea o le myna bird i totonu o Samoa, peitai ane lau Afioga i le Fofoga Fetalai, o lo o i ai foi polokalame a le Siosiomaga, e taumafai ina ia faaititia ai lenei manulele, ona o le tele foi o aafiaga. Ou te talitonu o lo o i ai i fautuaga i lea vaega, o le faafesili i le Afioga i le Taitaifono aemaise sui usufono o le Komiti o le a se itiiti i a outou suesuega, o le a se itiiti o manu nei e tatau ona i ai i totonu o Samoa, po o se sefulu po o se selau, ae po o le a foi se aoga o silafia e le Komiti e ao ona taofia ai ma faaolaina pea lenei manu faalafua.

**FOFOGA FETALAI:** Na pau lava lena o le fesili Leaupepe. Oi, ia se i malie la se i tuu atu le avanoa i le sui usufono mo Faleata.

**Tofa LEALAILEPULE RIMONI AIAFI:** Lau Afioga, ona o lea e pei o le a feteenai ai Matagaluega a le Malo aua o le mea lea e i lou mafaufau, ia tineia ma faauma le manu lea o le myna bird. A o lea la ua fautua mai le Komiti e ala i le Matagaluega o Faatoaga, e leai, e tatau ona tuu ni nai manu foi nei e aoga foi. O le mea la lena o lea ua feteenai ai nei ma le mautu ai matou, po o fea tonu le mea lea e agai i ai le finagalo o le Malo aemaise le fautuaga. O le isi mea, o mea ia o sisi Aferika ma manu ainiu, o tulaga uma faapena, aua o lea e highlight mai i le Lipoti po o le a se tulaga o i ai. A o le mea lea ou te faaluaina le fesili a le sui usufono mamalu, e fia maua lava se tali vave i le aso faamolemole. Faafetai.

**FOFOGA FETALAI:** Ia, tulai mai lau Afioga i le Taitaifono o le Komiti.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai, ma le faaaloalo lava ona o le fautuaga sa aumai i le Komiti e faapea o le atinae foi lenei o manupapalagi o faapena ona fuafuaina ina ia tasi le atinae o silasila i ai le Malo e tatau ona faatupulaia. Sa tapa foi i latou o e atamamai ma poto faapitoa i lea tulaga, o le latou faaaliga, o le tasi lea manulele e fesoasoani i le ola lelei o le manupapalagi lea o le myna bird, mo le utufiti ma tulaga faapena. Ia, ae pei ona manatu ai lea, e....

**FOFOGA FETALAI:** Malie lava lau Afioga i le Taitaifono, se i avatu le avanoa i le Minisita lea e tau tulai mai. Tulai mai lau Afioga i le Minisita.

**Tofa Hon FAAMOETAULOA ULAITINO FAALE TUMAALII:** Lau Afioga i le Fofoga Fetalai, ou te fia fesoasoani atu foi i le tulaga o le Lipoti lea leaga o le tulaga lava ia o le faiga faavae lea e alu ai le Matagaluega o le Siosiomaga, o le tineia lea o le manu faalafua lea o le myna bird. O le tulaga lava lenei pei ona i ai nei. Atonu foi o le tulaga pei ona i ai le manulele lea ona o le tulaga foi lea o le faatamaia o le utu o le manupapalagi. O lo o i ai lava isi metotia e mafai ona foia ai le faafitauli lea, a o lea ua vaai le Matagaluega, aua o le myna bird lea na introduce, o lea ua faatamaia ai ma nisi manu foi ia, natural o Samoa, manu e fitoitonu lava ia Samoa i le tulaga lea e i ai, ua faatamaia ai tulaga o manufelegelele na. E pei la o le tulaga lenei, ae le gata foi i lenei, o le faaleaga ai lea o mea o fale ma mea faapena. E pei la o le tulaga lenei o lea e i ai le Matagaluega, o le tulaga foi lea ina ia tineia le tulaga o le... ma o lo o galulue ai foi le Matagaluega. Ma lou faaaloalo lava.

**FOFOGA FETALAI:** Malo. Tulai maia lau Afioga i le Taitaifono o le Komiti.

**Afioga Hon LEAUPEPE TOLEAFOA APULU FAAFISI:** Ua ou iloa o le tali sao lea lau Afioga e ma le mamalu o le Palemene, aua e le au foi i ai se iloa o le Taitaifono, ae pei lava foi ona silafia, o le Polofesa le Minisita mo Punaoa Faanatura ma le Siosiomaga i le tulaga o lo o i ai, ae atonu e i ai isi vaega ia pei ona saunoa i ai le Afioga i le Minisita e le o maua e i latou sa faapena ona faamatalaina le faaaliga lea e tusa o le matou Lipoti. Ae afai o le sao lea e saunoa i ai le Afioga i le Minisita, e ioe foi i ai le Komiti ina ia faapena ona faaumatia le tulaga o lea foi manu faalafua, pe afai e mautinoa e i ai se isi faiga e ese mai le manu lea latou te tineia utufiti o le manupapalagi. Ma lou faaaloalo. Faafetai.

**FOFOGA FETALAI:** Ia, se i tulai mai le sui usufono mamalu.

**Tofa Lealailepule Rimoni Aiafi:** Ia o lea ua ou malamalama i le fesili ae po o le a la le finagalo o lau Afioga ae faaogaina le Lipoti aua o lea e le o talafeagai.

**FOFOGA FETALAI:** Ia manatua foi Lealailepule o le a lava le tatou faatofalaiga ma le fautuaga a le Komiti, o lea lava e toe oo i le vaietele ona aumai ai lea o le faamalamalama o lea lava ua tali manino le Afioga i le

Taitaifono ma tautino le solo a le tamaloa. O lea ua tali manino le Minisita, the myna bird has to go, ua tele ina afaina miti ma iao ma manutagi ma mea na. O lona uiga o le faamalalamamaga lona, a o lea ua tautino foi, o lo o i ai le isi fofu. O le mea na aumai e tau togafiti ai nisi o faafitauli, ae ui i lea, o lea ua malamalama le faatulai mai.

Se i tuu atu la le avanoa i le sui usufono mo le Vaa o Fonoti.

**Afioga TIALAVEA FEA TIONISIO SEIGAFOLAVA (Vaa o Fonoti):**

Lau Afioga i le Fofoga Fetalai, faafetai lava mo le avanoa i lau Afioga, ona o au o le sui usufono o le Komiti lea, e tatau foi ona silafia e le Maota o le Lipoti o le Lipoti a le Matagaluega o Faatoaga, ae le o le Lipoti a le Matagaluega o Punaoa Faanatura ma le Siosiomaga. E tatau la ona talanoa lelei le Matagaluega lea ma le Matagaluega o Faatoaga, ona o fautuaga ia na aumai i le Matagaluega o Faatoaga lea e avatu i le matou Lipoti. Faafetai.

**FOFOGA FETALAI:** Ia, pei o lea e maua... o le fetufaaiga lava o finagalo. O lea foi e tulitatao mai le pitolaau a le Afioga i le Minisita mo le puipuiga o le oa faanatura. Ae atonu foi e i ai nisi o taimi ona fesootai lea leaga o lea e le o afio mai le Minisita mo Faatoaga, ona manino ai lea ma malamalama le mataupu.

Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele**

**Malielegaoi:** Lau Afioga i le Fofoga Fetalai, o lea ua uma ona saunoa atu le Afioga i le Minisita, ma e o le mataupu lea e aafia ai faiga faavae. O lea la o lo o i ai tatou poloketi ia o lo o i ai nei, e agai tonu lava i le tapeina, tape lipi lava o le manu lenei ona ua faitau miliona ma miliona tala tupe ia e le maua e le aufaifaatoaga, aemaise lava o mea o fruit industry lea ua faaleaga e le manu lenei. O le isi mea ua feoti ai foi tagata i le manu lenei, i le tulaga lea o le felelele felelele i luga ae vaai mai ua tolotolo ane le loi ona faapea lea o se utu lele mai togi a i vae o tagata ma feoti atu ai foi ma tagata.

Lau Afioga i le Fofoga Fetalai, o le mea lona lea ua tupu i le manu, o le matua faalafua, ma o se tasi lea o polokalame o lo o tapa ai e le Malo ia fesoasoani mai fafo i se auala e vave tape ai, o lea o lo o i ai a tatou traps ua uma ona fausia ae faigata tele, o isi atunuu tai pei o Ausetalia latou te spray ina i mea o chemicals o vailaau, aemaise lava pe a oo i le po, o outou manatua foi pulu ia sa i luma o le fale o le Malo, e oo loa i le afiafi tumu ai i ina, o lea foi la sa faaoga i ai ia isi meatotia na, e vave usu tama e ta i vaveao e le i oso atu ni taavale e feseetai solo ai i luga o manu. Lau Afioga o le project lona a le Malo ou te manatu e le o se mea e faaumiumi ai ona tatou talanoa i lea vaega.

**FOFOGA FETALAI:** Ia se i tulai mai le Afioga i le Taitaifono.

**Afioga Hon LEAUPEPE TOLEAFOA APULU FAAFISI:** Lau Afioga ona o lea ua malele le Afioga i le Palemia e leai foi se matou tala e toe faasili, ae pau o le itu o lea ou te tulai atu ai, o le fia puipuia o le Matagaluega o Faatoaga, Faleoloa o Faatoaga ma Faigafaiva, ona o le latou lea faaaliga, e i ai le aoga, ae i le aotelega, o lea ua malele le Afioga i le Palemia, o le ala foi lona na faapuupuu atu ai sa matou tala ina ia vave foia le faafitauli lea, aua o

lea ua maua i le saunoaga a le Minisita mo Punaoa Faanatura ma le Siosiomaga, o lo o i ai isi fofo e fofo ai le faafitauli lea mo le atinaeina o manupapalagi, ma lou faaloalo, a o le aotelega lea ua saunoa i ai le Afioga i le Palemia, ma le faaloalo faafetai.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

## ILOILOGA O PEPA

**P.P. 2014/2015 NU. 42, TALI ATU A LE MALO I LE P.P. 2013/2014 NU. 107, LIPOTI A LE KOMITI O OLOA GAOSIA TULAGA MUAMUA, MATAUPU TAU PISINISI, ALAMANUIA MA LEIPA I LE P.P. 2012/2013 NU. 76, LIPOTI FAALETAUSAGA A LE FAALAPOTOPOTOGA O LE ESETETE TAUSI A SAMOA MO LE TAUSAGA 2011**

**FOFOGA FETALAI:** Tulai mai lau Afioga i le Minisita mo le Esetete Tausi a Samoa.

**Tofa Hon FAAMOETAULOA LEALAI AULOTO ULAITINO FAALE TUMAALII:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le P.P. 2014/2015 o lo o tuuina atu ai Tali a le Malo i le P.P. 2013/2014 Nu. 107, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2012/2013 Nu. 76, Lipoti Faaletausaga a le Faalapotopotoga o le Esetete Tausi a Samoa mo le Tausaga 2011, e tusa ai ma le Tulafono Tumau 54.*

*Faaluaina e le Minisita mo Galuega, Felauaiga ma Atinae Eeseese ma le Minisita mo Leoleo ma Falepuipui.*

**FOFOGA FETALAI:** Tulai mai lau Afioga i le Minisita.

**Tofa Hon FAAMOETAULOA LEALAI AULOTO ULAITINO FAALE TUMAALII:** Lau Afioga i le Fofoga Fetalai, mo le silafia e le Maota atoa ai ma le faafofogaaga a le atunuu, ou te faitauina atu ai ni Tali e uiga i Fautuaga i lenei Lipoti e faapea:

**TALI ATU A LE MALO I LE P.P. 2013/2014 NU. 107, LIPOTI A LE KOMITI O OLOA GAOSIA TULAGA MUAMUA, MATAUPU TAU PISINISI, ALAMANUIA MA LEIPA I LE P.P. 2012/2013 NU. 76, LIPOTI FAALETAUSAGA A LE FAALAPOTOPOTOGA O LE ESETETE TAUSI O SAMOA MO LE TAUSAGA FAALETUPE NA FAAIUINA ASO 30 IUNI 2011.**



1. E talia ma le agaga faafetai e le Malo le fautuaga muamua a le Komiti, mo le lagolagoina malosi o atinae a le faalapotopotoga.
2. E lagolagoina e le Malo le fautuaga a le Komiti mo ni vaegatupe mai le Tala Faatatau o le Tupe a le Malo mo le puleaina ma le atinaeina o eleele o le Malo o lo o i lalo o le faalapotopotoga.
3. O se fautuaga talafeagai tele lenei, ina ia faamalasia ma faamuamua le faatinoga o lenei fautuaga taua tele, mo le feutagai ma faatino loa se sailiiliga o fanua o lo o i ai le MNRE, SLC ma le STEC ina ia manino lenei eleele o le Malo o lo o vaaia ma pulea e pulega nei e tolu o le Malo, aemaise o fanua na fesui ai i lalo o le Tulafono o le Toe Faatulagaina o le Faalapotopotoga o Esetete Tausi o Samoa 1990, lea e i ai fanua na manino lava le tuu atu i le Malo ma fanua e toe tuuina mai i le STEC e pei o Lata, Savaii ma Falelima/Asau i Savaii. E faapena foi i isi fanua sa i ai i le STEC e le o i lalo o le Tulafono, ae ua liliu atu i le SLC e tusa ai ma le Lesitala o fanua i le MNRE.
4. Ua maea na faailoaina e le faalapotopotoga se 200eka o fanua i Faleolo mo atinae o faatoaga, e le faaaogaina ai ni vailaau (organic farming) ma e moomia le aufaigaluega togiaso e toatele mo le faatinoga o nei galuega, aua e vave tele le ola o le vao ma isi laau faalafua e aafia ai faatoaga e lē faaaoga ai ni vailaau oona. O le toe totoina foi o le niu, koko ma le kofe ma isi laau e umi lona aoga e moomia ai le aufaigaluega atoa ai ma totogi talafeagai.
5. Talia foi e le Malo le fautuaga a le Komiti mo ni masini mo le atinae o auala o le fanua ma se taavale land cruiser pick up e faaaoga mo le faatoaga, felauaiga o meafaigaluega, aufaigaluega ma galuega o faatoaga.

Ma lou faaaloalo tele.

**Afioga Hon Palusalue Faapo II:** Lau Afioga i le Fofoga Fetalai, na o se mea lava e fia faamalamalama. O le Tulafono Tumau e 54, e le o taua mai ai se mea faapea e le mafai ona i ai ni felafolafoaiga i Lipoti nei, o lea e manino lava.

**FOFOGA FETALAI:** O lea o le a ou faamalamalama atua le tulaga lena le Taitai o le Itu Agai, o lea o le a ou faamalamalama atua.

O lo o manino i lalo i tatou practice a le Palemene, o lo o i ai faiga faavae a le Palemene e ese mai na i le Tulafono Tumau. E faamalasia i lalo o le Tulafono Tumau le Tali mai a le Malo, a o le practice la, e tali mai le Malo i le Tali e amanaia pei o le mea lea na saunoa nei i ai le Afioga i le Minisita. O le Tali lava la e aumai, o le Tali lena e tau mai ai ua amanaia Lipoti sa tuuina atu e Komiti Faa-Palemene. Sa tatou faamalamalamaina foi i se tasi o tatou Fonotaga e le i mamao tele atu, ma o lo o sosolo ai lava i luga o tulaga na.

*Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P. 2013/2014 Nu. 107, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2012/2013 Nu. 76, Lipoti Faaletausaga a le Faalapotopotoga o le Esetete Tausi o Samoa mo le Tausaga Faaletupe Faaiuina aso 30 Iuni 2011 ua faamaonia.*

**P.P.2014/2015 NU.43, TALI ATU A LE MALO I LE P.P.2012/2013 NU.96, LIPOTI A LE KOMITI O LE SOIFUA MALOLOINA, GALUEGA TAU LE VA FEALOAI, MATAUPU TAU LOTOIFALE MA ATINAE O AFIOAGA MA AGAFESOOTAI I LE P.P.2011/2012 NU.64, LIPOTI FAALETAUSAGA A LE FAAPUTUGATUPE MO LE LUMANAI MANUIA O TAGATA SAMOA MO LE TAUSAGA FAALETUPE FAAIUINA ASO 30 IUNI 2011**

**FOFOGA FETALAI:** Tulai mai lau Afioga i le Minisita o Tupe.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le P.P. 2014/2015 Nu. 43 o lo o tuuina atu ai Tali a le Malo i le P.P. 2012/2013 Nu. 96, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le P.P. 2011/2012 Nu. 64, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe Faaiuina aso 30 Iuni 2011, e tusa ai ma le Tulafono Tumau 54.*

*Faaluaina e le Sui Palemia.*

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Ona e umi le faasologa lea o le a alu atu, aua le poia Faleolo o le lava ua fia tofa, tofa.

Lau Afioga i le Fofoga Fetalai, e fia tuuina atu ma le faaloalo tele tali tusitusia a le Ofisa o le NPF i mataupu ua fautuaina o lo o tuuina mai le Lipoti e pei ona taua i luga, ma o le a faagasolo atu i numera e pei ona i ai i lea Lipoti.

**TALI ATU A LE MALO I PEPA 2012/2013 NU. 96, LIPOTI A LE KOMITI O LE SOIFUA MALOLOINA, GALUEGA TAU LE VA FEALOAI, MATAUPU TAU LOTOIFALE MA ATINAE O AFIOAGA MA AGAFESOOTAI I LE P.P. 2011/2012 NU. 64 – LIPOTI FAALETAUSAGA A LE FAAPUTUGATUPE MO LE LUMANAI MANUIA O TAGATA SAMOA 2011.**

### **Fautuaga 1:**

Fautuaina le Faaputugatupe ina ia silasila totoa i le lumanai o Pisinisi ma Kamupani ua fuafua e tuuina atu i ai ana tupe (Sea) mo le faafaigaluegaina e faaitiitia ai tupe gau a le Faaputugatupe.

### **Tali a le NPF i le Fautuaga 1:**

O lo o faaauau pea ona matua silasila totoa le Ofisa o le NPF i le faagasologa o tulaga o i ai Pisinisi ma Kamupani ua tuuina i ai tupe faafaigaluega a le Faaputugatupe (Sea), aua ni tupe maua mai ai, atoa ma le faamautinoaina o le faaitiitia o ni avanoa o ni tupe gau mai a le Faaputugatupe o le NPF.

### **Fautuaga 2:**

Fautuaina le Faaputugatupe ina ia faaopoopoina ana tupe teu faafaigaluega i atunuu mamao o lo o lelei le tamaoaiga ina ia maua ai ni faasiliga lelei mo le Au Faisaofaga.

### **Tali a le NPF i le Fautuaga 2:**

Ua amata nei fuafuaga a le Faaputugatupe e pei ona sa fautuaina ai mo le faamatuina atu o ana tupe teu faafaigaluega i atunuu mamao, ma le fuafuaga e fia maua mai ai ni faasiliga lelei mo le Au Faisaofaga.

O lenei fuafuaga mamao o le a faaopoopo auuau ai tupe faafaigaluega a le NPF mai le 2% i le 10% i totonu o le lua i le tolu tausaga o lumanai i Faletupe ua maea ioeina e le Komiti Faatonu i totonu o Ausetalia.

### **(E) Manatu Aoaotetele e tusa ai o Fautuaga:**

Lau Afioga i le Fofoga Fetalai, ua tinou pea le Komiti Faatonu aemaise ai o le Pulega e faatino fautuaga uma e tuuina mai, e tusa ma aiaiga o le Tulafono ua limataitaiina ai galuega faatino a le Faaputugatupe aua le manuia lautele o ana Sui Faisaofaga.

Tuuina atu ma le faaaloalo tele.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu. 43, Tali Atu a le Malo i le P.P. 2012/2013 Nu. 96, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le P.P. 2011/2012 Nu. 64, Lipoti Faaletausaga a le Faaputugatupe mo le Lumanai Manuia o Tagata Samoa 2011 ua faamaonia.*

**P.P. 2014/2015 NU. 44, TALI ATU A LE MALO I LE P.P. 2012/2013  
NU. 90, LIPOTI A LE KOMITI O LE SOIFUA MALOLOINA,  
GALUEGA TAU LE VA FEALOAI, MATAUPU TAU LOTOIFALE  
MA ATINAE O AFIOAGA MA AGAFESOOTAI I LE P.P. 2011/2012  
NU. 33, FAAMATALAGA O SINI AUTU A LE FAAPUTUGATUPE  
MO LE LUMANAI MANUIA O TAGATA MO LE VAITAIMI  
2012-2013**

**FOFOGA FETALAI:** Tulai mai lau Afioga i le Minisita o Tupe, lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faamaonia e leni Fono Aoa le P.P. 2014/2015 Nu. 44 o lo o tuuina atu ai Tali a le Malo i le P.P. 2012/2013 Nu. 90, Lipoti a le Komiti o le Soifua Maloloina, Galuega tau le Va Fealoai ma Atinae o Afioga ma Agafesootai i le P.P. 2011/2012 Nu. 33, Faamatalaga o Sini Autu a le Faaputugatupe mo le Lumanai Manuia o Tagata mo le Vaitaimi 2012-2014, e tusa ai ma le Tulafono Tumau 54.*

*Faaluaina e le Sui Palemia ma le Minisita mo Galuega Tau Alamanuia ma Atinae a le Malo.*

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ou te tuuina atu ma le faaaloalo Tali tusitusia i mataupu ua fautuaina o lo o tuuina mai i le Lipoti e pei ona taua i luga, ma o le a faagasolo atu i numera e pei ona i ai i lea Lipoti.

**TALI A LE MALO I LE PEPA 2011/2012 NU.33,  
FAAMATALAGA O SINI AUTU A LE FAAPUTUGATUPE  
MO LE LUMANAI MANUIA O TAGATA MO LE VAITAIMI  
2012-2014.**

**Fautuaga 1:**

Silasila pea le Faaputugatupe i le faaleleia atili o le puleaina o ana tupe teufaafaigaluega mo le siitia o ana tupe maua aua ni tupe faasili mo faamanuiaga mo Sui Faisaofaga aemaise le lagolagoina o le tamaoaiga o le atunuu.

**Tali a le NPF:**

Ua faaauau pea ona tagai totoa le Komiti Faatonu aemaise o le Pulega i Tulafono ma Taiala, aemaise ai o aiaiga ua maea faataatitia aua le puleaina ma le faafaigaluegaina o ana tupe teufaafaigaluega, amaise ai o tului (interests) i luga o tupe o lo o faatino ai nonogatupe i le taimi nei, aua ni tupe faasili mo faamanuiaga tuuina atu i ana Sui Faisaofaga. Ua iloiloaina pea foi ma faatusatusa Tului o Nogatupe faamatuu atu i Tului a isi Faletupe, ina ia mautinoa le lelei o tupe

faasili e aoina mai, aua le toe faasafua atu mo faamanuiaga a Sui Faisaofaga.

E pei ona faamauina i Tala o le Tupe i tausaga taitasi, ua faatupulaia meatotino aemaise o tupe faaputupu a le Faaputugatupe o le NPF, ma o se tulaga lelei lea mo Sui Faisaofaga. O le a mataitu pea itu uma, ina ia faaauau ona lelei ni faamanuiaga e tuuina atu i Sui Faisaofaga a le NPF i tausaga taitasi.

Avea lenei avanoa e faafetaia ai le Komiti i fautuaga ua tuuina mai, aua le lelei alualu i luma o la tatou Faalapotopotoga o le NPF.

**Fautuaga 2:**

Silasila i nisi auala e siitia ai pasene o faamanuiaga (ponesi) e tuuina atu i le Aufai-Saofaga i tausaga taitasi.

**Tali a le NPF:**

E faamauina le agaga faafetai o le tatou Faalapotopotoga i le Komiti ona o fautuaga tuuina mai.

Mo le silafia e le Komiti mamalu, o faamanuiaga tau Tului o lo o faaopoopo atu i luga o Saofaga a Sui, e faalagolago lea i tupe faasili a le Faaputugatupe e maua mai i ana teugatupe faafaigaluega, i tausaga Faaletupe taitasi. E tusa ma le 98% o tupe faafaigaluega a le NPF o lo o faafaigaluega i totonu lava o Samoa. O ni faasiliga o ia tupe faafaigaluega ua faalagolago lava i le tamaoaiga o si o tatou atunuu, a o lo o tatou maitauina faatasi le utiuti o avanoa e faatupulaia o lea tulaga i le taimi nei.

Ona o lea tulaga, ua tinou ai pea le Komiti Faatonu e sailiili matagi, ma tuuina atu ai loa i Faletupe i fafo le 2% o ana tupe teuafaigaluega faavaitaimi, e pei ona teuina ma faafaigaluega ai nei i le Black Rock i Ausetalia lea vaega o ana seleni faafaigaluega. Ua i ai le fuafuaga e faaopoopo faasolosolo lenei vaega o aseta tau tupe teu-faavaitaimi i totonu o Ausetalia seia oo ina ausia le 10% i totonu o le lua i le tolu tausaga. O lenei taumafaiga o le naunau lava lea ia lelei ma faatupulaia ni faamanuiaga tau Tului e tuuina atu i Sui Faisaofaga o le NPF.

**Fautuaga 3:**

Faaauau aooga ma tulituliloa avanoa e siitia ai le tomai manaomia o le aufaigaluega aua le faatinoina atoatoa o le auaunaga.

**Tali a le NPF:**

O le manulauti faaauau lenei a le NPF, o le tuliloaina lea ma le faaaogaina o avanoa lelei uma e maua e le Faaputugatupe e faaleleia ma tapue ai tomai ma agavaa o le Aufaigaluega, ina ia faatuputupu pea agavaa ma tomai moomia, aua le tautua faifaiepa mo sui mamalu o lenei Faalapotopotoga o le NPF. Ua iloiloaina pea Taiala ina ia

mautinoa le faafaigaluegaina mai o Sui e agavaa ma i ai tomai moomia, ina ia ausia Matatia o Galuega a le NPF.

Ua faaaauu Polokalame Faale-aoaoga i totonu lava o le Ofisa, e faaoga ai Ofisa Sinia e tapue ma faamanatu nisi vaega o agavaa moomia e le Aufaigaluega i totonu o kuata taitasi, aemaise ai o le tapueina lea o tomai masani e fia faaleleia.

E talia lelei e le Pulega le fesoasoani mai o le Komiti, pe afai o silafia ni vaega o lo o moomia le faaleleia i le tulaga tau auaunaga. E manatu o le a fesoasoani tele lea i le Pulega i le sailia o ni tali ma se fofo, ina ia ausia Matatia Galuega a le NPF nei.

#### **(E) MANATU AOAOTETELE E TUSA AI O FAUTUAGA**

So o se faamanuiaga e maua pe totogi atu i Sui Faisaofaga e aiaia uma lea i lalo o le Tulafono o Faaputugatupe mo le Lumanai Manuia 1972, lea ua maea pasia ai nei le Tulafono Teuteu 2010 ma le Tulafono Faatonutonu 2010.

Ona o lea tulaga, o fautuaga e faia e le Pulega, e tuuina atu mo se faaiuga a le Komiti Faatonu, mo so o se faamanuiaga mo Sui Faisaofaga, e ao ona limataitaiina ma faatulai sea fautuaga, ia ogatasi ma aiaiga o le Tulafono.

Tuuina atu ma le faaaloalo tele.

*Na tuuina atu le Fesili ma ina ua manumalo le Ioe, na tulai loa Tali a le Malo i le Pepa 2011/2012 Nu.33, Faamatalaga o Sini Autu a le Faaputugatupe mo le Lumanai Manuia o Tagata mo le Vaitaimi 2012-2014 ua faamaonia.*

**P.P.2014/2015 NU.45, TALI ATU A LE MALO I LE P.P.2012/2013 NU.94, LIPOTI A LE KOMITI O LE SOIFUA MALOLOINA, GALUEGA TAU LE VA FEALOAI MA ATINAE O AFIOAGA MA AGAFESOOTAI I LE P.P.2011/2012 NU.59 MA LE P.P.2011/2012 NU.66, FAAFOEGA MA FAAMATALAGA TAU TUPE MO FAAMANUIAGA A TAGATA MATUTUA A SAMOA MO LE TAUSAGA FAALETUPE 2010/2011 MA LE TAUSAGA 2011/2012**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le Pepa 2014/2015 Nu.45, o lo o tuuina atu ai Tali a le tatou Malo i le P.P.2012/2013 Nu.94, Lipoti a le Komiti o le Soifua Maloloina, Galuega Tau le Va Fealoai, Mataupu Tau le Va Fealoai ma Atinae o Afioga ma Agafesootai i le P.P.2011/2012 Nu.59 ma le P.P.2011/2012 Nu.66, Faafoga ma Faamatalaga tau Tupe mo*

*Faamanuiaga a Tagata Matutua a Samoa mo le Tausaga Faaletupe 2010/2011 ma le tausaga 2011/2012, e tusa ai ma le Tulafono Tumau 54.*

*Faaluaina e le Sui Palemia ma le Minisita mo Galuega Tau Alamanuia ma Atinae a le Malo.*

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai mo le silafia e le Maota atoa ai ma le faafofogaaga a le atunuu, ou te faitauina Tali o lo o tuuina atu i lenei Pepa.

**TALI ATU A LE MALO I LE P.P. 2011/2012 NU.59, FAAFOEGA MA FAAMATALAGA TAU TUPE A LE FAAPUTUGATUPE MO FAAMANUIAGA A TAGATA MATUTUA O SAMOA MO LE TAUSAGA FAALETUPE 2010/2011 NU.66, MA LE TAUSAGA 2011/2012.**

**Fautuaga 1:**

Fautuaina le Faaputugatupe ina ia faaauuina pea ona mataitu taitala ma mulimulitaia ina ia siitia ai pea le auunaga.

**Tali a le SCBF:**

O le a faaauuina pea le vaavaai ma le totoa i taiala uma ua faataatitia ma saunia mo galuega a le Ofisa o Faamanuiaga mo Tagata Matutua o Samoa ina ia faamalieina lelei mataupu uma a le Aumatutua aua le sologa lelei o le auunaga ofoina mo i latou.

**Fautuaga 2:**

Ina ia galulue faatasi le Faaputugatupe ma nisi Matagaluega a le Malo i le aoina mai o faamatalaga moomia e foia ai le tala faasolitulafono o Saofaga a i latou ua maliliu ma malaga nofomau i atunuu mamao.

**Tali a le SCBF:**

O le a faaauuina pea le galulue felagolagomai ma isi Matagaluega a le Malo pei o le Matagaluega o Fuainumera ma Pepa Fanau/Maliu, Ofisa o Femalagaaiga, Faalapotopotoga o Vaa, Matagaluega o le Soifua Maloloina, ma le Matagaluega o Tina ma Tamaitai, Nuu ma Agafesootai ina ia faamutaina i se taimi vave faamanuiaga a le Aumatutua ua maliliu po ua malaga foi i atunuu mamao, e pei ona fautuaina e le Komiti.

**E) MANATU AOAOTETELE E TUSA AI O FAUTUAGA**

So o se faamanuiaga e maua pe totogi atu i le Aumatutua, e aiaia uma lea i lalo o le Tulafono o lo o faagaoioia ai nei faamanuiaga ua faamatuu mai e le Malo.

Tuuina atu ma le faaloalo tele.

*Na tuuina atu le Fesili ma ina ua manumalo le Ioe, na tulai loa Tali a le Malo i le Pepa 2011/2012 Nu. 59, Faafoega ma Faamatalaga Tau Tupe a le Faaputugatupe mo Faamanuiaga a Tagata Matutua o Samoa mo le Tausaga Faaletupe 2010/2011 Nu.66, ma le Tausaga 2011/2012 ua faamaonia.*

**FOFOGA FETALAI:** Se i tulai mai le Taitai o le Itu Agai.

**Afioga Hon Palusalue Faapo II:** Lau Afioga i le Fofoga Fetalai, se i malolo foi le Malo, ua matauina ma le totoa e fai lava si tele o Lipoti nei, ae leai lava se mea e fai ai se felafolafoaiga.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, e leai se mea e popole ai le Taitai o le Itu Agai, o matou ua leva ona koleni. E tamomoe i le ao tamomoe i le po, ma taimi faapenei. E leai se mea e popole ai. Ua e vaai mai o lea matou te tutu atu ma sauniuni, aua e te popole. O le ala foi lena na ou fai atu ai, afai ua e popole, tofa ma e moe lelei, aua le poia Faleolo.

**Afioga Hon Palusalue Faapo II:** Lau Afioga, o le ala o lou tulai ona o le le mafai ona fai i ai se tala i nei Tali e aumai.

**FOFOGA FETALAI:** O lea ua ou maua lou finagalo Palu. A tatou o nei e.....

**Afioga Hon Palusalue Faapo II:** Ua ta le iloa la po o le a le aoga tatou te omai ai ae na o le ioe, ioe, ioe.

**FOFOGA FETALAI:** E leai se mea tatou te alofia o lea e i lalo o tatou Tulafono Tumau. O le tu ma le aga o le usitaia o le Tulafono Tumau, e tali le Malo, faaalologia le galuega sa outou fai, galuega a Komiti Faapalemene. O le 2005 na ae ai le tofa i lena Paeaiga latou te aumaia le Tulafono Tumau taua lenei, aua e le aoga lenei mea o le fai fai fai o Lipoti a Komiti ona tuu loa lea faapea na ala ai ona amend le tatou Tulafono Tumau i le 2005, e aumai se i fai se tali o Lipoti ia e tuuina mai.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o aso la faatoa ou sau i totonu o le Palemene lenei, o mea sa fai, na ona aumai lava tali atu le Malo, uma. Ou te manatua le isi aso na aumai ai le Fesili, tulai ae Tofilau ma le faulaiga lava, lau atu lava e le toeaina fesili mai i le ta o le 9:00 seia ta lava le 1:00 o la e lau lava. Ia, ua fiu lava la le Itu Agai i lena taimi e taofiofi mai, a o le tali lea a le toeaina, “Ua leva ona ou tapena i mea nei, a o le aoga o le laulau atu pea, se i outou mafaufau ai i le faavalevalea o a outou fesili na aumai. Ona lau lava lea e Tofilau o fesili. O lea foi la ua lau atu fautuaga na aumai e Komiti, a o lea foi ua tutulai mai e pei e foliga mai ua lava lea. Ia malilie ua leva ona tatou talanoaina Lipoti. Ua leva ona outou fai mai e aumai ia, aumai ia tali. O lea la ua avatu tali. Ua na o lo outou o i nusipepa ma fai i ai, “O fea o i ai tali, o le a le mea ua tuai ai ona aumai tali?” O lea la ua avatu tali. E oo lava nanei i le ta o le 14 o lau atu lava tali. Onosai, o lea ua ou fai atu, a ua outou le lavava, momoe pea, a o le a lau pea tali na outou mananao i ai.



**FOFOGA FETALAI:** Ia malie ia lau Afioga i le Taitai o le Malo.

**Afioga Hon Palusalue Faapo II:** Na o sina mea lava lea e taumafai atu ai. Maumau e pe ana mafai ona matou fesili atu i Tali.

**FOFOGA FETALAI:** Ua uma ona fai le tatou galuega. We have already done our job is to report, the government respond now.

**Afioga Hon Palusalue Faapo II:** Ia leaga o lena e te nanu mai.

**FOFOGA FETALAI:** O le uiga lena o lau tala pe a e le malamalama i lou fai atu soo. O le a le isi upu e toe gagana atu ai o lea e taumafai e faamalamalama atu?  
Lealailepule.....

**Tofa Lealailepule Rimoni Aiafi:** E leai o lou sui usufono e ese le malamalama gofie. O le mea foi lea e mafua ai ona ou fesili soo ona ou te fia malamalama.

O lea ua aumai tali, o le fesoasoani a le Itu lenei, pasia uma tali. Oka le matagofie o tali, ua matou faitauina uma. A na i ai se isi mea i luga atu o le 100% ua tuu i ai. E 100% tali a le Malo ua aumai.

**FOFOGA FETALAI:** Malie le sui usufono Lealailepule. E fai foi o lou naunau mai ae e tautala aso a tatou galuega; onosai mai.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o tali nei na tapena uma e le Vaega lenei ma le Kapeneta. Afai lava la e faatu mai sa outou lafo ua outou malilie aua o lena ua ia te outou tali, e leai foi se mea o i ai e augofie le Vaega lenei. Afai ua outou le lavava faalogologo, e tasi lena auala e mafai ona faatu mai ai sa outou lafo ona matou lagolagoina lea. Ona tatou see lea i isi a tatou mataupu, ae talia atoa tali pe afai o outou finagalo ia.

**Afioga Hon Palusalue Faapo II:** Ona pau lava le lafo lea matou te faatu atu, e teena uma tali a le Malo lea ua aumai. Ona pau lena o le lafo lea ou te sauni e faatu.

**FOFOGA FETALAI:** A foi o le uiga lena o lau tala lea e tau fai atu Palu. E le iloa la po o fea o sasa i ai lou finagalo, a o lea ou te taumafai atu se i tuu atu ia le avanoa se i tali malamalama le Malo. O le tele o taimi o lea lava e tui mai au, "O fea a matou fesili, o fea a matou tali?" O lea ua faasolosolo atu. Alo mai laia, o le 14 i le 15 nanei faatoa tatou malolo ai.

Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o lea ua tulai mai le isi sui matua o le Tautua. O ia sa taulamua i le faatuina o le Tautua, ona avea lea ma Taitai ae Taitai lona lua Palu. Ona fai lea o le la lapiti, o le a faamavae ae toe o e fai le faiga palota. Ona sao mai lea o Palu, ae faaletonu le ulupoo le la. Ona sau loa lea o Palu Taitai, a o lea ua ou le iloa po o le a le

tulaga i lalo lea ua i ai. O lea la ua saunoa mai le sa faatuina le la Vaega, ua uma ona faitau uma la outou Itu ma outou malilie, a o lea foi e tulai mai le Taitai ma fai mai e teena uma. O le a le mea ua faapea ai outou, ua feteenai faapea aisea?

**Afioga Hon Palusalue Faapo II:** Lau Afioga i le Fofoga Fetalai, o le mea e fia faasao. E matua leai se feteenai o i inei. Na o lau Vaega lena e feteenai. Lau Afioga i le Palemia, o lau Vaega lena e feteenai. Aua la le tusitusi lima mai i inei, o lea e matua maopoopo lava le matou Vaega.  
Ioe, ua o ta alofa atu i lau Afioga.

**FOFOGA FETALAI:** E leai, taatia lena mataupu. O lea ua maua Palusalue.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** O le mea lea ou te fai atu ai, ia vaai la i ai i le mea lea o le pepelo le ata? Faatoa uma nei lava ona tulai mai le sa faatuina la outou Vaega e talia, ae tulai mai oe lea ua e laki ua e alu i luga ona ua pau le ulupoo, fai mai e teena. O lea la e feteenai la outou Itu. A o lea foi ua ou fai atu po o le a le mea ua outou faapea ai, a o lea foi ua ese le tali lea ua aumai.

**Tofa Lealailepule Rimoni Aiafi:** Lau Afioga i le Fofoga Fetalai, e le aveesea lou manatu ou te manao e pasia uma Tulafono, ae faigata ia te au leaga ou te ava i lou Taitai. O lea ua saunoa lou Taitai, leaga o au ou te fai Taitai. O lea ua saunoa le Taitai, leaga o matou na toleni e savavali ae e le i toleni e faalogologo.....

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o lea la ua ou maua. O lea ua ava le malie le Taitai lona tolu, o le a alu ai lava faapea le malie i le le faafofoga o lona Taitai ia te ia sa Taitai muamua.

O le uiga lena o le mea na ou tulai atu ai, o outou lena e feteenai, a o lea e faafofoga mai le atunuu i le eseese o outou taofi.....

**Afioga Hon Palusalue Faapo II:** Aua e te eua le utupoto i le mata o le isi ae eu le utupoto lena e i lou mata lau Afioga. A uma atu le Palemene fonu le caucus, uma atu le Palemene fonu le caucus. E mafua aisea? E le faapena le Itu lenei.

**FOFOGA FETALAI:** Palu, o lea ua maua lou finagalo. O le a tauau ina tuu le tatou Fonu.....  
Tuuu, se i tulai mai le sui usufonu mamalu.

**Tofa Hon Tuuu Anasii Leota:** Lau Afioga i le Fofoga Fetalai ma lou faaaloalo, a faapea ua le faia le tiute o le Taitai o le Itu lea, ua ou tulai atu ma lou faaaloalo, tatou talia loa Lipoti ma Tali a le Malo ae tatou malolo. Ma lou faaaloalo.

**FOFOGA FETALAI:** Lau Afioga i le Minisita se i tulai mai.

**Tofa Hon Tolofuaivalelei Falemoe Leiataua:** E leai o le fesoasoani atu i le Taitai o le Itu Agai ona o lea e tumau lona teena, a o lea ua faaaloalo i ai lona soa. Afai o le finagalo lea o le Taitai o le Itu Agai e faaauau pea a matou tali, ou te talitonu foi matou te fia faalogologo uma lava i o matou leo pe a oo i taimi matou te tali atu ai.

E pei o le tulai atu lea ma le agaga faaaloalo.

**FOFOGA FETALAI:** O lea ua maua atu le finagalo o lau Afioga i le Minisita. E faamalulu atu i le paia ma le mamalu o le tatou Maota. E fai foi o lena a o lenei, e le o ni upu e avane ai pe tatou te manatu faatauvaa i le galuega sa fauao faupo e Komiti Faapalemene. E faamalulu atu foi leaga e le na o tatou lea e Fono, a o lea e faafogoga le Atunuu.

O le tele o tali nei ua fofogaina e le Malo, e anoa ma e tali ai nisi o tuatuaanoa e i ai finagalo sa lagalaga foi i lena Itu o le Maota aemaise foi finagalo o Komiti Faapalemene na saunia. Ia malilie le Maota, e faaauau lava a tatou galuega. Ina ne i alu alu foi i le lumanai faapea mai foi, “O le a lava le mea o le a tatou o ai i luma ma o i tua?”

O le Tali Nu. 5.....

**Afioga Hon Leaupepe Toleafoa Apulu Faafisi:** Lau Afioga i le Fofoga Fetalai.....

**FOFOGA FETALAI:** Se i tulai mai se tasi o sui usufono mo Aana Nu.1, Afioga Hon Leaupepe Toleafoa Apulu Faafisi.

**Afioga Hon Leaupepe Toleafoa Apulu Faafisi:** E le seetia foi i le malu o le tai taeao le sui usufono mo Siumu ma lou foi sui usufono ona o matou lea sa fai sina televave mai nei a o le i toe amataina le tatou Fono i le itula e 3.00.

Na matou feiloai i tuafale ma le Taitai o le Itu Agai ma le Itu Agai uma. Na o le Sui Taitai, Afioga Hon Aeau Peniamina Leavaiseeta e le i i ai. O le latou faaaliga ia matou a o matou faatasi i o ma inu le matou ipu kofe, e talia ma le agaga fiafia tali uma a le Malo, ae faafetai i le Malo lea ua faamanino tali uma o lea sa talosaga i ai le Palemene. O lea la na faapea e faaauau o latou finagalo, a o lea e pei ua olegia e le Taitai o le Itu Agai le Itu Agai ma lenei Itu o le Maota. E ui o lea, o le ala foi lena o le seetia o le sui usufono mo Siumu ma lagolago atu, ae ui lava i lea, o le mea lava e fulisia i ai le finagalo o le Malo o lena.

**FOFOGA FETALAI:** Malo faafetai. E manatu ua manino, faatea lea fuilauvi. O le tele ia o mea ia e manatu e tatau ona faagasolo ai a tatou galuega.

**Afioga Hon Palusalua Faapo II:** Lau Afioga i le Fofoga Fetalai, se ou te faaaloalo tele i le Afioga i se tasi o sui usufono mo Aana Alofi Nu.1 leaga o le Afioga ia Leaupepe.

**FOFOGA FETALAI:** E tatau ona e faaaloalo i tama o le nuu.

**Afioga Hon Palusalue Faapo II:** E leai ni mea na matou talanoa ai i fafo. Ona pau lava lana tala, “Se ua ou faanoanoa lava i le mea ua oo i ai le matou Pati.” Ona pau lava lea o le tala, a o isi mea e leai.

O le mea lea e faamalie atu ai i lau Afioga Leaupepe, e leai tatou te le i talanoa i ni Lipoti ae na tatou talanoa i la outou Pati.

Ma le faaaloalo lava.

**FOFOGA FETALAI:** O lea ua maua, taatia mai lena mataupu.

**P.P.2014/2015 NU.185, TALI ATU A LE MALO I LE P.P.2013/2014 NU.56, LIPOTI A LE KOMITI MO OFISA O LE PALEMENE I LE P.P.2013/2014 NU.12, LIPOTI A LE SUETUSI SILI A LE MALO I LE FONO AOA O FAITULAFONO MO LE TAUSAGA FAALETUPE FAAIUINA 30 IUNI 2010 MA 30 IUNI 2011**

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le P.P.2014/2015 Nu.185, o lo o tuuina atu ai Tali a le Malo i le P.P.2013/2014 Nu.56, Lipoti a le Komiti mo Ofisa o le Palemene i le P.P.2013/2014 Nu.12, Lipoti a le Suetusi Sili a le Malo i le Fono Aoa Faitulafono mo le Tausaga Faaletupe faaiuina 30 Iuni 2010 ma 30 Iuni 2011 e tusa ai ma Tulafono Tumau 54.*

*Faaluaina e le Minisita mo Galuega Tau Alamanuia ma Atinae a le Malo.*

**FOFOGA FETALAI:** Tulai mai lau Afioga i le Palemia.

**TALI ATU A LE MALO I LE P.P.2013/2014 NU.56, LIPOTI A LE KOMITI MO OFISA O LE PALEMENE I LE P.P.2013/2014 NU.12, LIPOTI A LE SUETUSI SILI A LE MALO I LE FONO AOA O FAITULAFONO MO LE TAUSAGA FAALETUPE FAAIUINA 30 IUNI 2010 MA 30 IUNI 2011.**

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, mo le silafia e le Maota atoa ma le faafofoga a le atunuu, ou te faitauina Tali ua tuuina atu i lenei Pepa.

E tusa ai ma le lipoti na tuuina mai i le Fono Aoa Faitulafono e le Komiti a le Palemene (Komiti) i le faatinoga o galuega a Matagaluega ma Faalapotopotoga a le Malo, ou te fiafia e tuuina atu i outou luma le tali a le Malo i vaega e pei ona faaalua faatasi ai ma auala e foia ai ia faafitauli e tusa ai o fautuaga a le Komiti.

E faamauina le faamalo i le iloiloga e pei ona faatautaia e le Komiti e tusa ai o le lipoti a le Suetusi Sili a le Malo (Suetusi) mo tausaga faaletupe na faaiuina ia Iuni 2010 ma Iuni 2011. Ua faamauina fautuaga uma ma ua maea ona faataatitia nisi o alafua ma suiga lelei mo le manuia o atinae i le lumanai.

O le tali atu a le Malo e tusa ai o fautuaga a le Komiti, o lo o mulimulitaia pea ana anavatau tauave e pei o le mafai ona tali atu ma ia manino ma malamalama sui usufono uma o le Palemene aemaise le mamalu lautele o le

atunuu i taunuuga o galuega faatino a lenei foi tafa o galuega a le Malo. E tatau foi ona silafia, e ui o le lipoti a le Suetusi e faatatau i tulaga tau tupe o le 2010 ma le 2011, peitai o lea lava na oo le iloiloga a le Komiti i galuega a nisi o Matagaluega ma Faalapotopotoga a le Malo faasino i tausaga faaletupe 2007 ma le 2008.

1. **Iloiloga o le Polokalame o lo o faaaogaina mo le faamauina o Faamatalaga tau Tupe a le Malo e aofia ai Faamatalaga o le Fetafeaiga o tupe (Cashflow).**

O le polokalame mo le faaleleia o le pulega o Tupe a le Malo (Public Finance Management Reform Plan) i lona amataga na ave le faamamafa i itu tau lipoti ma faamaumauga tau tupe a le Malo. E le i mamao atu foi ona faamaeaina le iloiloina o le Chart of Accounts ina ia mafai ona aofia ai le Cash flow i ia lipoti, ma o faamaumauga tau tupe la o le tausaga na faaiuina ia Iuni 2014, o le a aofia ai loa le Cash flow, e mulimulitaia ai foi fautuaga mai le Ofisa o le Suetusi Sili ae faapea taiala faava o Malo mo le faamauina ma le tuuina atu o Faamatalaga tau Tupe a le Malo mo le silafia e tagata lautele.

2. **Faaleleia taiala e pulea ma faatonutonu ai faatinoga o galuega a Matagaluega ma Faalapotopotoga a le Malo.**

O lo o manino mai i le Lipoti le moomia ona faalelei ma faamalosia auala e faatonutonuina ai le faatinoga o galuega a Matagaluega ma Faalapotopotoga a le Malo. E lagolagoina leni manatu aua o internal control systems e faamalosia ai le puleaina ma le vaaia lelei o aseta a le Malo. Ua faatuina nei i lalo o le taitaiga a le Matagaluega o Tupe i ana polokalame toe fetuunai, se Internal Audit Forum e gafa ma le soalaupule ma le iloiloina o faaletonu i internal controls a Matagaluega ma Faalapotopotoga, ma fausia ni taiala e mafai ona vave foia ai ni faaletonu e ono tulai mai. Ua maea ona tapenaina se Fuafuaga Autasi mo lea Komiti Faafae ma o lea ua faagasolo nei le faatinoina o galuega e pei ona faataatia i totonu o leni Fuafuaga.

Ua maea ona faatautaia e le Matagaluega o Tupe ni faatalatalanoaga ma Matagaluega ma Faalapotopotoga a le Malo e pei ona aofia i le Lipoti a le Komiti, ma faamaonia ai ua maea ona faatinoina e nisi o Matagaluega ma Faalapotopotoga ni auala e faaitiitia ai faafitauli e pei ona faaalai i le lumanai. Ae peitai e i ai lava nisi o Matagaluega o lo o galulue lava e faamautinoa auala talafeagai e faaleleia ai a latou galuega faatino. O leni Komiti (Internal Audit Forum) o le a mataituina manaoga talafeagai ma o le a lagolagoina e le Matagaluega o Tupe e ala i lana vaega tau internal audit Matagaluega ma Faalapotopotoga uma a le Malo e le o i ai ni a latou internal audits i le taimi nei. O le a iloilo i le lumanai le faavaa o lo o i ai le taimi nei ina ia mataitu pe mafai ona faatu ni internal audit divisions i totonu o Matagaluega ma Faalapotopotoga uma a le Malo. O leni galuega e tatau ona faatino fuafua i tulaga o lo o manaomia mo le

faaleleia o le itu tau lipoti faapea le tau (costs) o le faatuina o vaega tau internal audits i Matagaluega.

### **3. Tali atu mo Matagaluega e pei ona aofia i le Lipoti**

Na faailoa mai foi e le Lipoti a le Komiti ni tulaga faaletonu sa faailoa i taimi o latou fonotaga ma Matagaluega ma Faalapotopotoga a le Malo, e faatatau lea i tausaga na faaiuina ia Iuni 2007, 2008 ma le 2009. Ua matauina foi o nisi o ia tulaga faaletonu ua maea ona faataatitia ma ua faamaonia auala e foia ai aua le agai i luma.

O le vaega lenei o le Lipoti o lo o taumafai e faamanino tulaga faaletonu e le i mafai ona tali mai ai nisi o Ofisa o le Malo i le taimi o fonotaga ma le Komiti, ma ua folasia atu ai ma se otootoga o le tulaga ua oo i ai nei le faatinoga o fautuaga a le Komiti.

#### **3.1 Matagaluega o Tupe – Faamaumauga Tau Tupe 2007-2008**

O lea ua tuuina mai foi i le Fono Aoaofa o le Tali aloaia a le Malo i le Lipoti a le Komiti mo le Faamaumauga Tau Tupe 2007 ma le 2008, ona o tulaga foi ia na fesiligia ai le Matagaluega o Tupe mo se faamaninoga o galuega ausia fua i tupe na faatatauina, vaevaeina o tupe faaalu fuafua i le galuega faatino, faapea foi le faataatitia o taiala aua le pulea lelei o atinae e faatupeina mai a tatou paaga mai fafo.

#### **3.2 Matagaluega o Leoleo ma Falepuipui 2007-2008**

O le resitalaina o tagata e faatauina auupega malolosi ua maea ona toe iloilo. Ua maea ona fausia e le Matagaluega auala ma taiala mo le talosagaina o laisene e i latou e fia faatauina auupega malolosi. O le resitalaina o suafa o ia tagata e faia i tausaga taitasi. O lo o i ai foi se auivi ua maea ona tapenaina e le Matagaluega o Leoleo mo le talosagaina o laisene. O le taimi nei o lo o iloilo foi e le Matagaluega le tulaga tau le faia o laisene mo le umiaina o 'laau malosi ona e na o le laisene mo le faaaogaina o laau malosi o lo o i ai nei, ae le o i ai se laisene faapitoa mo le tagata e umiaina le laau malosi. E le gata i lea, o lo o galulue foi le Ofisa Sili ma le Matagaluega faapea isi faalapotopotoga talafeagai i le fausiaina lea o se Tulafono mo Auupega, aua lava le faatonutonuina o le faatauina ma le faaaogaina o laau malosi ina ia faaitiitia ai faaletonu e pei ona faailoaina mai i le Lipoti a le Komiti.

Ua maea foi ona faatumauina le lesitala mo aseta, faapea foi le faaleleia o reconciliations. E le gata i lea, ua maea ona iloilo faila mo tagata taitoatasi e pei ona faafaigaluega ai i totonu o le Matagaluega. O lenei galuega tele, na mafai ona faataunuina ina ua amata faafaigaluega le ofisa e fitoitonu ma le faamaumauina o faamatalaga mo tagata faigaluega uma a le Matagaluega.

### **3.3 Ofisa o le Palemia 2007-2008**

Sa laga foi ni faaletonu i le vaavaaia o tusifolau ma foliga mai e le o i ai se faamaumauga talafeagai mo le pulea lelei o tusifolau. I le taimi nei, o auala e faaleleia ai lea tulaga e pei ona sa faatinoina mai le 2012, ua matauina le faatinoina lelei. Ua maea foi ona faataatitia auiui ma taiala mo le faafoeina o galuega tau tusifolau, pemita ma le avea ma tagatanuu, e ui e le fesootai lenei system ma le system o lo o faafoe ai tupe a le Malo (finance one), ae mafai ona faatino faamatalaga faatusatusa i tupe o lo o aoina i aso taitasi. Ua mautu foi taiala e foia ai tusifolau faaletonu (damaged passports), ma o lo o fautuaina pea le aufaigaluega ina ia faamalosia le faatinoina o galuega i luga o nei taiala mo le saogalemu o tusifolau mai le faaleagaina pe leiloloa foi.

### **3.4 Matagaluega o Soifua Maloloina 2007-2008**

O le faaiuga a le Komiti o Tauofoga na faia i le 2009 ina ia tuu i lalo le fale sa fai e nonofo ai tausimai, sa faavae i luga o le lipoti tutoatasi a le inisinia mo lea poloketi. E i ai le manatu e tele ni aafiaga tau tupe e feagai ma le Malo pe ana faapea e faaaauu pea lea galuega ae te i ua mulimuli ane solofa i lalo lenei fale ma aafia ni tagata. o le mafuaaga tonu lea na taofia ai le galuega. E ao foi ona silafia o lea ua maea fausia le fale fou mo tausimai, ma ua faaoga nei e tamaiti aoga tausimai mai nuu i tua faapea tagata faigaluega e malaga mai Savaii mo aoaga i le Falemai i Motootua.

I le tulaga tau tupe faaalu i le faatauina o mea taumafa mo fonotaga ma aoaga, ua maea ona tuuina atu le faamaninoga a le Matagaluega i le Komiti e pei ona faamaonia ai o lo o ogatasi lava ma tupe ua maea ona fuafua mo lea vaega, e pei ona aofia i le Tala Faatatau o le Tupe a le Malo faapea foi aiaiga ma paaga o lo o galulue soosoo tauau ma le Matagaluega o le Soifua Maloloina.

E ao foi ona silafia o le Tala Faatatau o le Tupe a le Malo e faalagolago i tupe faatatau mo galuega faatino taitasi (output budgeting), ma e i lalo lava o le malosiaga a le Pule Sili le faia lea o ni fetuunaiga talafeagai i le faaaogaina o tupe i totonu lava o le galuega faasino (output) pe afai e manaomia, pau lava le tulaga taua ia aua ne i aafia le tapulaa o tupe faaalu o lea galuega faatino e pei ona faamaonia i le Tala Faatatau Autu o le Tupe.

### **3.5 Matagaluega o Faamasinoga 2007-2008**

E pei ona taumafai e faapupula atu i le amataga o lenei Lipoti, o le tele o faaletonu e pei ona faalia e le Komiti ua maea ona faatino e Matagaluega ma Faalapotopotoga a le Malo. Mo le Matagaluega o Faamasinoga, e i ai auala o lo o ua faatinoina nei ua faamautuina ai faamatalaga tau tupe o lo o maua mai i mataupu tau vaetamaina o fanau ma ulugalii tetea. O lo o ua i ai foi siaki masani mo le

faapaleniina o tupe maua ma lesitala o galuega faatino i le maea ai o aso taitasi.

I le tulaga tau le tuuina atu o faasalaga (fines), o lo o matauina le vave ona totogi o ia faasalaga. O le aoina mai o aitalafu ua faamaumauina e le Matagaluega e umi se taimi e faatino ai, peitai ua matauina le vave ona logo ma galulue soosootauau le Matagaluega ma nuu ma faalapotopotoga. O lo o i ai pea le faafitauli e tusa ai o nisi o aitalafu ua umi e le i toe totogiina ona e matua faigata tele ona toe faaolaina. Ua saunia ai se pepa mo le Kapeneta mo nei aitalafu tuua ae faapefea foi ona foia mo le agai i luma.

### **3.6 Matagaluega o Tupe Maua 2007-2008**

O lo o tuuina pea e le Matagaluega o Tupe le lisi o suafa o i latou ua le toe taliaina ni a latou siaki (dishonoured cheques) i Matagaluega uma a le Malo i masina taitasi, ma o lea tulaga o lo o fesoasoani i ai latou o lo o aoina ma faalisitiina tupe maua (cashiers). O siaki a tagata taitoatasi e le o toe taliaina. O lo o galulue pea le Matagaluega mo le iloilo ina ma mataituina le lisi o siaki teena (dishonoured checks) mo le tusieseina ma tusi a o le i maea le tausaga faaletupe lenei.

### **3.7 Matagaluega o Galuega, Femalagaina ma Galuega Tetele 2007-2008**

Ma i le aso 1 Iulai 2013, o le puleaina o Fale nofo totogi a le Malo ua faasee atu i le Faalapotopotoga o Fale a Samoa (SHC). O lo o ua galulue nei le Faalapotopotoga o Fale i le iloilo ina o totogi o ia fale faapea foi ma le toe faaleleia aemaise le aoina mai o aitalafu tuua.

### **3.8 Matagaluega o Tina ma Tamaitai, Atinae o Nu'u ma Agafesootai**

Ua maea ona faia ni feutagaiga i le totogiina o galuega o lo o faatino i le va lava o Matagaluega a le Malo, e pei ona sa faafoeina e le Matagaluega o Tupe. O le faanaunautaiga lava o le Malo ina ia vave totogi auaunaga ae aua ne i faatupulaia ni aitalafu i totonu lava o le Malo. O lenei galuega o lo o aofia uma ai Matagaluega a le Malo, ae faapea foi i Faalapotopotoga e pei o le Faalapotopotoga o le Malosiaga Faaletise ma le Pulega o le Suavai. Ua faamaonia foi e le Matagaluega o Tamaitai ma Agafesootai i le Komiti ua maea ona totogiina aitalafu uma, ma o lo o mataituina pea le faatinoina o lenei galuega ina ia faatumaui ai pea i le maualuga ua ausia nei.

### **3.9 Matagaluega o Aoga, Taaloga ma Aganuu 2007-2008**

Ua le o toe faia ni teugatupe (trust fund) e pei ona faaalua mai i le Lipoti a le Komiti, ina ua tapunia nofo tumau a le Kolisi o Samoa, Kolisi o Avele ma le Kolisi o Vaipouli. E le o toe po malae i le vaega



lea ua see ai nei le faatinoga o aoga, ua gafa lava lea ma Komiti o Aoga taitasi latou te faafoeina atoa ma le fesoasoani a pule ma vasega o faiaoga, aua mea e talafeagai ma moomia e aoga taitasi. O le luitau lea o lo o i ai nei i le Matagaluega, ina ia faia aoaoga e siitia ai le tomai faatausi galuega lelei a Komiti Aoga ina ia latou fuafuaina tatau le faafoeina o galuega faatino mo le faaleleia o aoaoga a le fanau.

#### **4. Sueina o Tusi a Faalapotopotoga a le Malo**

E 12 Faalapotopotoga o lo o aofia i totonu o le Lipoti a le Komiti i vaega e ao ona faaleleia ma o nisi o Faalapotopotoga ua maea ona tuuina a latou tali maumaututu i le Komiti. Ua manatu foi le Malo ua talafeagai lea e tali atu ai i le Komiti ae o lo o otooto atu i lalo nisi o faamaninoga o mataupu na laga mai Faalapotopotoga.

O lea ua faagasolo lava le toe uunaia o le lelei faatino o galuega a Faalapotopotoga e ala i fesuaiga ua i ai nei taitaifono ma Komiti Faatonu. O Komiti Faatonu a Faalapotopotoga uma a le Malo ua ofi atu nei i ai sui o le afaipisinisi. O lenei faiga ina ia fesoasoani ai tomai faapisinisi a le vaega tumaoti e uunai ma siitia ai le silasila mamao a Faalapotopotoga i galuega e maua mai ai tupe faasili mo le tatou Malo, faapea le siitia o le auaunaga i le mamalu lautele o le atunuu.

O le mataituina o galuega a Faalapotopotoga uma a le Malo o le a faasee atu lea i le Matagaluega fou, le Matagaluega mo Faalapotopotoga a le Malo pe a pasia le Tulafono Tau Faaofi lea o le a tagofia e le Palemene i lana fonotaga muamua o le 2015. Na tusia le Lipoti lenei ae le i pasia le tatou Tulafono, ma o lea ua maea ona pasia. O le faavaa o lo o sosolo ai galuega o le a avea ai Komiti Faatonu e patino i ai le vaavaaiga a le Minisita e umia sea ma o le a pau le uluulu o le laau i luga o nei Komiti Faatonu pe a le ausia e Faalapotopotoga a latou sini autu e pei ona faamaonia i a latou Fuafuaga Autasi. O le ala foi lea na ou manatu ai, e taua tele le tofia o le Taitaifono o le Komiti o Tupe le Susuga ia Papalii Niko Lee Hang e avea ma Minisita Lagolago i le Faalapotopotoga lenei, e lagolago ai i le Minisita i lona tomai lautele i mataupu e aafia ai Faalapotopotoga Tumaoti.

##### **4.1 Faalapotopotoga o Malosiaga faa-Eletise 2008-2009; 2009-2010.**

Ua faamautuina se auivi e limataitaiina ai le faatinoga o galuega mo le faamaumauina o faamatalaga tau tupe a le Faalapotopotoga e pei ona fautuaina e le Ofisa o le Suetusi Sili. O suiga i tulaga tau tekonoosi o lo o ua faaogaina nei e le Ofisa ua alagatau ai foi aoaoga e faamasani ai le afaigaluega i le tuufaatasiaina o faamatalaga tau tupe a le Faalapotopotoga.

O lo o faagasolo foi i le taimi nei le toe iloiloina....

**Tofa Lealailepule Rimoni Aiafi:** Lau Afioga i le Fofoga Fetalai, se i taumafa se vai a le Afioga i le Palemia. O lena e misi le faitau, a oo i le parakalafa fou, ia amata.

**FOFOGA FETALAI:** O le Tali a le Malo Lealailepule, e pule lava le Palemia i le faitauga o lana Lipoti. E i ai foi nisi o lea e avatu le faaopoopoga i luga, lea tatou te matauina, ae onosai mai o lea o le a uma.

**Tofa Lealailepule Rimoni Aiafi:** O le matuai manaia lava a o lena e misi faamamafa ma tulaga faapena, e tataua ona detail mai. Ae manaia.

**FOFOGA FETALAI:** O lea ua maua le finagalo o le sui usufono. Tulai mai le Palemia e faaauau lau saunoaga.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o se parakalafa fou:

Ua faamautuina se auivi e limataitaiina ai le faatinoga o galuega mo le faamaumauina o faamatalaga tau tupe a le Faalapotopotoga e pei ona fautuaina e le Ofisa o le Suetusi Sili. O suiga i tulaga tau tekonoosi o lo o ua faaogaina nei e le Ofisa ua alagataua ai foi aoaoga e faamasani ai le aufaigaluega i le tuufaataasiaina o faamatalaga tau tupe a le Faalapotopotoga.

O lo o faagasolo foi i le taimi nei le toe iloiloina atoa o le Faalapotopotoga i ana galuega faatino ae faapea foi tagata faigaluega e moomia. O lo o aofia ai foi le vaavaai lelei o vaega o auunaga e mafai ona faasee atu i tua i vaega tumaoti ma faasaoina ai tupe faaalu a le Faalapotopotoga i le naunautaiga e siitia ai le faatinoga o galuega pe afai e faataua mai i ai kamupani ma pisinisi tumaoti.

#### **4.2 Faalapotopotoga o Elele o Samoa 2008-2009**

Ua faamauina e le Malo fautuaga mai le Komiti ma le Suetusi Sili e faasino tonu i le Faalapotopotoga. O le vaivai o taiala e puipuia ai faatinoga o galuega aemaise le lē magafagafa lelei o le aufaigaluega na mafua ai ona tulai mai faaletonu i le Faalapotopotoga. Ua maea foi ona faatonuina e le Malo le Faalapotopotoga ina ia vaavaai lelei auala e faaleleia ma siitia ai tupe maua aemaise le tausaiaina lelei o tusi a le Faalapotopotoga e foia ai faaletonu e toe aliae mai i le lumanai.

O tupe maua na fuafuaina mo le tausaga e pei ona iloilo sa le mafai ona ausia ona o atinae tetele e le i mafai ona tino mai tupe maua i totonu o le 12 masina ae faatoa ausia i tausaga mulimuli mai. Na faamauina tupe maua mai tausaga i luma mai o le 2008 ma le 2009 mai le faatauina o fale i Tauese ma fesuiaga o fanua ma le Malo lea ua i ai nei le fale tele o le Tui Atua Tupua Tamasese i Sogi. O lo o

faagasolo foi le faamautuina lelei o lisi i afioaga pei o Vailele, Letogo ma Vaitele e ausia ai tupe maua sa fuafuaina.

O le mau a le Komiti i le siitia o tupe faaalu a le Faalapotopotoga e le sao ona e le o se tino i tupe na faaaluina ae ua na o se fuainumera e faamauina ai le faaitiitia o le tau po o le aoga o aseta (depreciation). Na o le faafoeina o malae tapolo ma pili eletise sa faamauina i le siitia o tupe faaalu fuafua i tupe faaalu na fuafuaina, ae o isi uma vaega sa i totonu lava o tupe faaalu na fuafuaina.

I le mataupu e faatatau i le faaaogaina o se Kamupani latou te sueina mai pisinisi mo le Faalapotopotoga, ua faamauina lea tulaga ma ua aliali mai ai le le usitaia e le Komiti Faatonu ma le Pulega o taiala ma tulafono faatonutonu e faasino i le faafoeina o tauofoga a le Malo, peitai e leai se faamaoniga na togitupe le Minisita po o se tasi foi o le aufaigaluega e le kamupani middleman.

O lo o manino lava faiga faavae a le Faalapotopotoga i fanua faatau e le aufaigaluega, lea e faatauina i le 60% o le tau o le fanua. O lo o i ai uma faamaumauga i le Faalapotopotoga o fanua uma na faatauina e le aufaigaluega i lalo o lea vaega o le faavae. O tupe faaalu uma foi i Komiti faufautua i le fausiaina o le maketi i Salelologa, Vaitele aemaise Komiti Faafoe mo fanua o lo o i lalo o le Faalapotopotoga o lo o faamauina uma lava i vaega e fitoitonu i galuega faatino a le Minisita. O lisi tuua o lo o i ai nei e mo atinae tau i faatoaga ma o lo o galulue lava le Faalapotopotoga ina ia aoina uma mai nei vaegatupe.

O le konekarate foi mo le faamamaina o fanua ma togalaau i malae tapolo, na mulimulitaia lava le tuuina mai o quotes e 3 ma fai i ai le faaiuga e pei ona i ai nei konekarate mo le malae tapolo i Faleata ae faapea foi le maketi i Salelologa.

O nisi nei o mataupu ogaoga e pei ona laga mai e le Komiti, ma e pei ona faailoa muamua atu, ua maea ona tuuina atu tali a le Matagaluega ma Faalapotopotoga i le Komiti a o iloiloina le Lipoti a le Suetusi Sili ma e le o i ai se isi manatu faasili atu nai lo faamaumauga maumaututu na tuuina atu muamua.

Ua faamauina foi e le Malo le moomia ona siitia le faatinoina o galuega, aemaise ai i lona tulaga lelei ma le faamaoni, e le gata i le Faalapotopotoga o Eleele o Samoa, ae faapea Matagaluega ma Faalapotopotoga uma a le Malo, aemaise lava i itu e tuuina atu ai galuega atinae i se faiga faataufofo. O lea ua mauaa taiala mo tauofoga o lo o taitaiina e le Matagaluega o Tupe ma o le lui o lo o ua i ai o le faia lea o ni aoaoga faaauau e faamasani ai le aufaigaluega uma a le Malo i nei foi ituaiga galuega aua e tele lava nai vaega e ao ona vaavaai lelei i ai ae le i amata le tauofoga o ni atinae tetele, e foia ai le toe siitia o le tau (variations) o le atinae pe a amata ona fausiaina mai le tau na fuafuaina mai i le amataga.

O manaoga tau Lipoti i lalo o le Tulafono mo le Pulega o Tupe a le Malo 2001 ma le Tulafono mo Faalapotopotoga a le Malo 2001 o lo o manino lava, ma o vaega ia o lo o faamalasia pea e le Matagaluega o Tupe i ana galuega faatino. E manatu foi le Malo o le a toe siitia le galuega faatino pe a faatuina le Matagaluega mo Faalapotopotoga a le Malo ina ia manino matafaioi a Komiti Faatonu i le pulea lelei o nei aseta tetele a le Malo.

E avea ai foi lenei avanoa e momoli atu ai le faafetai tele a le Malo i le Komiti ma le latou Lipoti, aemaise foi le iloiloga tutoatasi a le Ofisa o le Suetusi Sili. E aoga mataupu laga e toe vaai i ai le Malo i ana galuega faatino, o tagata faigaluega aemaise le toe iloilo ina o ana faiga faavae ina ia mautinoa o lo o gasolo i se tulaga manuia le atinaeina o le tamaoaiga o si o tatou atunuu.

Lau Afioga i le Fofoga Fetalai, o le Tali atu lena pei ona manaomia e le Komiti.

**FOFOGA FETALAI:** Malo faafetai i lau Afioga i le Palemia.

**Afioga Hon Palusalua Faapo II:** Lau Afioga i le Fofoga Fetalai, na o sina avanoa laitiiti lava ma lou faaaloalo.

**FOFOGA FETALAI:** Se o le a tatou toe agai foi e fai le taimi ua uma ona faamalamalama atu. E leai se mea e mafai...

**Afioga Hon Palusalua Faapo II:** Se ona o le Lipoti lea e aupito sili ona taua o lo o faatalitali i ai le atunuu, aemaise ai....

**FOFOGA FETALAI:** A lea ua uma ona tolaulau le Tali a le Malo. Palusalua, ia lea foi o le a ou toe taumafai e faamalamalama atu le mea ua uma ona faamalamalama atu muamua.

**Afioga Hon Palusalua Faapo II:** Leaga e ese lava tali ia e aumai ese tali o fautuaga a Komiti.

**FOFOGA FETALAI:** E le tulia i le mea lena, o lea ua uma ona avatu le suesuega. E le mafai ona tatou agai i le mea lena. O lona uiga a tatou agai loa i le mea lena, lona uiga e aulia taeao o tatou iinei. O lea ua uma ona ou faamalulu atu, tatou o ai lea i le mea lena.

**Afioga Hon Aeau Peniamina Leavaseeta:** Lau Afioga i le Fofoga Fetalai, faafetai e malamalama lelei lava i lau faamalamalama. Ae ua ou tulai atu ona o au o se tasi o le Komiti lea, OPC. Faafetai o lea ua faafofoga le Maota....

**FOFOGA FETALAI:** Malie Aeau, o lea o le a tauau ina... o lea o le a talatala atu lava le tatou mataupu....

**Afioga Hon Aeau Peniamina Leavaiseeta:** Lau Afioga, o lona uiga e sa ona fai se manatu i le Tali, e sa?

**FOFOGA FETALAI:** E le mafai, silasila i lalo, o lea la o le a ou tau atua, e le mafai. O lea e i lalo o le tatou Parliamentary Practice and Procedures lea, o lo o i ai uma lava faamaumauga o le mea lea. Faamolemole Fepuleai se i avatu se...

**Afioga Hon Aeau Peniamina Leavaiseeta:** Ua maumau lava la lo tatou taimi. A na pasia analeila e.....

**FOFOGA FETALAI:** E le o maumau. Aeau, tasi ae foi lau saunoaga, tatou o i ala o mea ma le Tulafono Tumau ma le tatou Parliamentary Procedure lea. A lea, lea ou te uu atua. O lo o mau lava i i ma atagia ai i i le tulaga o le tatou Tulafono Tumau ma faiga faavae a le tatou Palemene. O le faasilasilaga mulimuli lena a le Fofoga Fetalai i le mataupu lena.

**Afioga Hon Palusalua Faapo II:** Lau Afioga, e sili atu le aloaia o le Tulafono Tumau.

**FOFOGA FETALAI:** O ai la e faauigaina le Tulafono Tumau? O oe po o au?

**Afioga Hon Palusalua Faapo II:** O tatou uma lava.

**FOFOGA FETALAI:** E leai la. O lea la ua ou fai atua le mea.

**Afioga Hon Palusalua Faapo II:** A silasila i ai, e leai ma se mea o aumaia e sa felafolafoaiga.

**FOFOGA FETALAI:** Alaala i lalo. Palu, e le o i ai foi se mea o i i ina o tuu mai ai se mea e fai se felafolafoaiga. O le discretion la, o le discretion a le Fofoga Fetalai. A tatou o nei e fai le finauga lena ona sili lea lou sau e te saofai atu iinei ae ou alu atu i ina. Ia malilie sui usufono o lea ua uma ona ou faamalamalama atu a tatou Tulafono.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.185, Tali Atu a le Malo i le P.P.2013/2014 Nu.56, Lipoti a le Komiti mo Ofisa o le Palemene i le P.P.2013/2014 Nu.12, Lipoti a le Suetusi Sili a le Malo i le Fono Aoao Faitulafono mo le Tausaga Faaletupe faaiiina 30 Iuni 2010 ma 30 Iuni 2011 ua faamaonia.*

**FOFOGA FETALAI:** O le a fai se malologa mo le tatou malologa masani o le afiafi.

**Afioga Hon Palusalua Faapo II:** Lau Afioga i le Fofoga Fetalai, sa tataua ona aumai uma le Fesili - e leai.

**FOFOGA FETALAI:** Alaala i lalo. Alaala i lalo, a fai atu loa lau faatonuga ona e alaala lea i lalo. *(I le Taitai o le Itu Agai o lo o tulai).*

O le a faataatia ese Taulumaga a le Fono Aoa mo lana malologa masani o le afiafi.

*Na faataatia ese Taulumaga a le Fono Aoa mo lana malologa masani i le itula e 4:56 i le afiafi ma toe faaauau i le itula e 5:30 i le afiafi.*

**FOFOGA FETALAI:** E fai le tatou malologa o lo o faagasolo pea nisi o Tali a le Malo e pei ona faafogafoga i ai le Maota ma e manatu o le a tatou papa-aveloa mo a tatou galuega faaauau.

E talitonu o lea ua maua le faamalosi tino e ala i le tatou taumafaga ti i le afiafi nei, ma e i ai le agaga maualuga ua faafoisia lo outou malosia o le tino, o le agaga ma le mafaufau atonu e faatonutonu folau ai i aai o finagalo o lo tatou Maota i lenei itula o le afiafi.

**Afioga Hon Palusalue Faapo II:** Lau Afioga i le Fofoga Fetalai, ou te tulai atu ma le faaloalo.....

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon Palusalue Faapo II:** Ou te avatu malu i puega i se taimi ua tuanai. E faamalulu atu i lau Afioga i le Fofoga Fetalai, leaga o au ou te tausi mamalu tele i lau Afioga i le Fofoga Fetalai. O le mea lea, o a foi ni upu ua laavale - ona pau lava lea lau Afioga i le Fofoga Fetalai, o le issue lea na uma atu nei i le Lipoti lea leaga na faamavae ai le Minisita a le Malo.

**FOFOGA FETALAI:** O lea ua ou maua Palu.

**Afioga Hon Palusalue Faapo II:** O le ala lea e mafua ai ona ou tutulai atu.

**FOFOGA FETALAI:** Aua le faaogaina lau faatoesega e toe ui mai ai foi aua o lea foi o le a e toe taamilo i le ogasami lea e taumafai atu.

**Afioga Hon Palusalue Faapo II:** Ua ou tulai atu la e faatu le lafo, *Tatou pasia ia Lipoti ia ona ua alofa atu i le Afioga i le Minisita aua e leai se aoga e le mafai ona fai i ai ni fesili.*

*E le i faaluaina le lafo.*

**FOFOGA FETALAI:** O lea ua maua atu lou finagalo.

**Afioga Hon Palusalue Faapo II:** Ua faaletonu mai le tau, e tataua ona tatou vave o i aiga, a o le lafo lea ma lou faaloalo lau Afioga i le Fofoga Fetalai.

**FOFOGA FETALAI:** Lau Afioga i le Taitai o le Itu Agai, ua e silasila mai o lea ua toe foi mai le tatou Fono mai le malologa. A e silasila mai ou te le i toe agai atu i lau Afioga i le taimi ua sola, ona e malamalama lea ua fou le taimi ua fou foi mafaufauga i le tatalo leleoa i le Atua, ae tau ina ou fai atu i

lau Afioga i le Taitai o le Itu Agai Palusalua, ia fua se tapu i lo ta va faafeagai ai.

A silasila ma faafogafoga le Maota i Tualumaga o le tatou Paeaiga lenei i le fa tausaga talu ai, o lenei lava e olo le fua ma avatu le faaloalo i lau Afioga i le Taitai o le Itu Agai, mai lava i le uluai aso e oo mai i le taimi lenei. A o le mea lea e matauina, Palusalua ua latalata ina tatou oo i le tulaga o le ova atu o tuleiga ma saunoaga agai i le mamalu o le Nofoa. O le taimi muamua lenei o lea ua e tulai mai ai e te faatoese i le Fofoga Fetalai ma ia faasaosao tulaga e pei ona e taumafai mai i ai. Ana leai le Agaga o le Atua, ua leva lava ona e i fao i o. O le tautinoga lena, ae ava tele atu leaga o oe o le tagata ua tau matuaina i le tatou Paeaiga ma le Palemene. O oe foi ua avea ma Taitai o le Itu Agai i lenei vaitau. Se i silasila i le mea lea e ava atu ai? Se faataitaiga i totonu o le Maota lenei se tagata ua taua o se Taitai ae tulai mai ai ni mea faapea ua e fesiligia le faaiuga a le Nofoa? O lea lava e folo i le manava. Ona e a? E ava, leaga e le o lau Afioga ae ava i le itumalo. E te tu ma e sasau ma e le manatu i le tapuaiga a le paia i Aiga Sa-Tunumafono, o le Vaa Nofoa o le te tausia; o lena e te silafia.

Ona ou manatu lea lau Afioga i le Taitai o le Itu Agai, e faapena se lagona. A o tulaga i lo tatou va nonofo ma Tulafono Tumau ma mea uma, e malamalama mea uma i le taumafai atu. O lea foi ou te avatua avanoa. O nisi foi taimi e matau le atunuu, ua ou tuu atu tele avanoa ia te outou. A o lou talitonuga ma lou manatu, ona o outou o le Itu itiiti o la tatou galuega. E tataua pea ona avatu le avanoa ina ia maua outou avanoa tou te tali mai ai i mea ia e taumafai atu ai le Malo, ae aua le avea le tuu atu o avanoa e fai ma mea tou te le vaai ai i lo tatou va nonofo ai.

Ua ou talia lau faatoesega Palu ma aua ne i toe faia. Ia ulimasalo la tatou folauga i lenei Paeaiga. Ia fai oe ma faata, ia fai oe ma faataitaiga lelei mo le lumanai ma le agai i luma o a tatou Fono. Po o fea e agai i ai lou malaulau i le finau i le Malo, aua ne i agai mai i le Nofoa. O le a e agai mai i le Nofoa o lea e te malu ai? Aua e te agai mai o lea ou te fuafua atu lo ta va faafeagai ai.

O nisi o taimi o lea lava e mau le toovae ma mau le faamalumalu. O lea ua e talanoa tonu i le Lipoti, ae na e talanoa nei i le Lipoti na aupito sili ona fue ai faaiuga a le Fofoga Fetalai i luga o nusipepa. “O fea le Lipoti, o fea ua fai i ai, o le a le mea ua tuai ai ona aumai?” O lea ua aumai, a o lea ua outou fai mai e pasia faapea ma nunumi uma ai tali a le Malo e le faia.

Malie le Taitai o le Itu Agai ou te le talia lau lafo, tuu pea le avanoa i le Malo o le a le itula e oo i ai Tualumaga o le afiafi ma le po lenei, o le tulaga lena e oo i ai. Ua uma ona faataatia a tatou galuega ma ua uma ona pasia le lafo. A o le tulaga i lo ta feeseeseaiga Palusalua, e lagona le loto faamagalalo o le Fofoga Fetalai, leaga e le o oe o se isi. E le gata o oe o le Tootouli o le atunuu ua loa foi lou soifua i totonu o le Palemene, ma e fai ou tofi i le lotu. O le agaga lea ia lavapapale ma ia maua le agaga o lo tatou galulue felagolagomai ina ia taoto i lagatonu a tatou galuega.

O le faasilasilaga lea a le Fofoga Fetalai, ia malu avea i fale foi i le faafogaga a le Maota i lenei itula o le afiafi. Lau Afioga i le Palemia ma lau Kapeneta, o le agaga ma le faamoemoe ina ia taatia i lagatonu a tatou galuega, ia lavapapale ma maua le onosai e faaauai ai a tatou galuega i lenei afiafi.

**P.P.2014/2015 NU.46, TALI ATU A LE MALO I LE P.P.2013/2014  
NU.38, LIPOTI A LE KOMITI O OFISA O LE PALEMENE I LE  
P.P.2010/2011 NU.13, FAAMATALAGA O TUPE O LE PENISIONE  
MO LE PALEMENE MO LE TAUSAGA FAALETUPE FAAIUINA  
ASO 30 IUNI 2010**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI  
SAILELE MALIELEGAOI:** Lau Afioga i le Fofoga Fetalai, e momoli atu  
foi le faamalo i le Maota ona o lea ua toe talii mai i le malologa, ua sao i alo  
le taligasua. E faamalo foi i lau Afioga i le Taitai o le Itu Agai ona ua  
matauina lava lou taumafai e fesoasoani mai i le avega o lo o tauave e lenei  
Itu o le Maota, ae o le a onosai mai pea ae se i matou taumafai atu.

Lau Afioga i le Fofoga Fetalai ou te faatu le lafo, *Ina ia faamaonia e lenei  
Fono Aoa o le P.P.2014/2015 Nu.46 o lo o tuuina atu ai Tali a le Malo i le  
P.P.2013/2014 Nu.38, Lipoti a le Komiti o Ofisa o le Palemene i le  
P.P.2010/2011 Nu.13, Faamatalaga o Tupe o le Penisione mo le Palemene  
mo le Tausaga Faaletupe faaiiuna aso 30 Iuni 2010 e tusa ai ma le Tulafono  
Tumau 54.*

*Faaluaina e le Sui Palemia.*

**FOFOGA FETALAI:** Tulai mai lau Afioga i le Palemia.

**TALI ATU A LE MALO I LE P.P. 2010/2011 NU.13,  
FAAMATALAGA O TUPE O LE PENISIONE MO LE  
PALEMENE MO LE TAUSAGA FAALETUPE FAAIUINA  
ASO 30 IUNI 2010.**

**Susuga Hon TUILAEPFA FATIALOFA LUPESOLIAI AIONO  
NEIOTI SAILELE MALIELEGAOI:** Lau Afioga i le Fofoga  
Fetalai ou te tuuina atu ma le faaaloalo tali tusitusia a le Ofisa o le  
NPF i mataupu ua fautuaina o lo o tuuina mai i le lipoti e pei ona taua  
i luga ma o le a faagasolo atu i numera e pei ona i ai i lea lipoti.

**Fautuaga 1:**

Silasila i ni Teuteuga Talafeagai o le Tulafono o le Penisione mo le  
Palemene e faatulafonoina ai le avea o le Komiti Faatonu o le  
Faaputugatupe mo le Lumanai Manuia o Tagata ma Komiti Faatino o  
le Penisione mo le Palemene ae faataape le Komiti Faatino o lo o i ai  
nei ina ia faasaoina ai tupe faaalu.

**Tali a le NPF:**

**Ua maea ona faia suiga i le Komiti Faatino o le Penisione Faa-  
Palemene e le Kapeneta mamalu. KOMITI FAATINO FOU:-  
“LEAI NI ALAUNI & NI TOTOGI O FAATONU.”**



Ua maea ona ioeina e le Kapeneta suiga ua i ai nei sui mamalu o le Komiti Faatino mo le Penisione Faa-Palemene F.K. (12) i le 30 Aukuso 2012. O lenei suiga ua tofia ai Sui Faatonu mai Matagaluega ma Faalapotopotoga a le Malo e pei ona faailoa atu i lalo:

1. Minisita o Tupe – Taitaifono.
2. Ofisa Sili o Pulega, Matagaluega o Tupe.
3. Loia Sili, Ofisa Loia Sili.
4. Failautusi o le Fono Aoao Faitulafono.
5. Ofisa Sili o Pulega, SNPF.

O sui mamalu e pei ona taua i luga e leai ni alauni po o ni totogi o galulue ai i le Komiti Faatino mo le Penisione Faa-Palemene, ona o i latou o lo o faigaluega i totonu o Galuega a le Malo.

**Fautuaga 2:**

Saunia ma tuuina atu faamatalaga o paleni o Saofaga mo tausaga taitasi i Sui Faisaofaga taitasi o le Penisione a le Palemene, ina ia silafia ai le faagasologa o le faagaoioiga o le Penisione.

**Tali a le NPF:**

O lo o mafai ona faatinoina le tulaga e pei ona fautuaina ai le Ofisa e le Komiti, pe a talosaga mai le sui mamalu i se faamalamalamaga o ana saofaga i so o se taimi.

Ua talia e le NPF le fautuaga a le Komiti e pei ona tuuina mai mo sui mamalu, o lea o le a saunia ai e le Ofisa kopi o faamatalaga o saofaga a sui mamalu o le Penisione, i le maea ai ona tuuina aloaia mai Lipoti a Suetusi i tausaga taitasi.

O le a faaopoopo i le tau o galuega fai mo le Penisione mo le Palemene lenei auaunaga.

Tuuina atu ma le faaaloalo tele.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.46, Tali Atu a le Malo i le P.P.2013/2014 Nu.38, Lipoti a le Komiti o Ofisa o le Palemene i le P.P.2010/2011 Nu.13, Faamatalaga o Tupe o le Penisione mo le Palemene mo le Tausaga Faaletupe faaiiina aso 30 Iuni 2010 ua faamaonia.*

**P.P.2014/2015 NU.49, TALI ATU A LE MALO I LE P.P.2013/2014  
NU.43, LIPOTI A LE KOMITI O OFISA O LE PALEMENE I LE  
P.P.2012/2013 NU.18, LIPOTI FAALETAUSAGA A LE  
FAALAPOTOPOTOGA O TAU MO FAALAVELAVE FAAFUASEI  
MO LE TAUSAGA FAALETUPE 2010/2011**

**FOFOGA FETALAI:** Tulai mai lau Afioga i le Minisita mo Galuega tau Alamanuia ma Atinae a le Malo ma le Komisi o Galuega a le Malo, Hon Lautafi Fio Selafi Purcell.

**Afioga Hon LAUTAFI FIO SELAFI PURCELL (Minisita mo Galuega tau Alamanuia ma Atinae a le Malo):** E faafetai atu i lau Afioga i le Fofoga Fetalai. Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le P.P.2014/2015 Nu.49, Tali atu a le Malo i le P.P.2013/2014 Nu.43, Lipoti a le Komiti o Ofisa o le Palemene i le P.P.2012/2013 Nu.18, Lipoti Faaletausaga a le Faalapotopotoga o Tau mo Faalavelave Faafuasei mo le Tausaga Faaletupe 2010/2011 e tusa ai ma le Tulafono Tumau 54.*

*Faaluaaina e le Minisita mo le Soifua Maloloina.*

**FOFOGA FETALAI:** Tulai mai lau Afioga i le Minisita.

**TALI ATU I FAUTUAGA I LE P.P.2013/2014 NU.43, E  
FAATATAU I LE LIPOTI FAALETAUSAGA A LE  
FAALAPOTOPOTOGA O TAU MO FAALAVELAVE  
FAAFUASEI 2010/2011.**

**Afioga Hon LAUTAFI FIO SELAFI PURCELL:** Lau Afioga i le Fofoga Fetalai mo le silafia e le Maota atoa ma le faafofogaaga a le atunuu, ou te faitauina tali o lo o tuuina atu i lenei Pepa. E faamalulu atu i lau Afioga i le Fofoga Fetalai faapea le mamalu o le Maota ona e le o maua iinei fautuaga sa tuuina mai, ae na o tali ia o le a ou taumafai e tolaulauina atu.

(1). **Talosaga mo Tau.**

- O lo o lima taitaiina le faatinoina o le auaunaga a le Faalapotopotoga o Tau mo Faalavelave Faafuasei i faiga faavae ma taiala ua taatitia. O le manulauti o le faamoemoe ia ausia ona sini autu e ala lea i le vave ona totogi atu tau i tagata ua aafia, ma uunaia, faalauiloa tulaga tau saogalemu.
- E fiafia foi e faailoa atu, ua mafai ona faagaoioi talosaga ma totogi atu tau i le aso e faaoo mai ai po o le aso e sosoo ai pe afai e faaoo mai uma mea moomia mo le faagaoioiina o lea talosaga. Ua faaaogaina nisi metotia fou ina ia faaleleia atili ma vave ona maua e tagata mafatia se tau, po o fesoasoani talafeagai.

(2). **Tupe a le Faalapotopotoga.**

- O lo o tausisia ma mulimulitai i taiala ua faataoto mo le aoina ma le malupuipua o tupe a le Faalapotopotoga. O lo o tilotilo foi le Faalapotopotoga i auala e vave ona maua ai nisi tupe faasili ia faatupulaia ma tumau ai pea i tulaga lelei le alualu i luma o tupe a le ACC.

(3). **Polokalame Faalauiloa.**

**Auala o Femalagaiga – (Tau Taavaleafi).**

O le sao taua o le ACC i le saogalemu i auala o femalagaiga, o le tuuina atu lea o faamaumauga o faalavelave tutupu mo polokalame faalauiloa lea e galulue faatasi ai ma le ACC i aoga tulagalua ma pre-schools, Komiti a Pulenuu ma isi Faalapotopotoga tumaoti. E le aofia ai polokalame faalauiloa o le saogalemu e ala i Radio Safety Ads i luga o leitio faasalalau a le 2AP ma le 98FM, lea ua 4 tausaga sosoo o faia pea. O lo o faapea foi ona uunaia le saogalemu i Workshops o lo o fai a le ACC ma Employers ma a latou tagata faigaluega i le faalauiloaina o galuega ma matafaioi a le ACC.

I le tulaga maualuga o le fuainumera o e maliliu mai faalavelave o auala o femalagaiga, o lo o atagia ai se ata tuga (severity) o faalavelave o lo o maliliu ai i latou, lea e pei ona faailoa atu i luga, o le tele e mafua mai i le soona saosaoa ma le ave taavale ona.

**3.1 Faalavelave tutupu i Nofoga o Galuega:**

O se tasi o itu taua ua matauina i le vaega lea o le saogalemu o nofoaga o galuega, ona o le sootagata vavalalata o le ACC ma isi stakeholders aemaise employers ma le MCIL e ala i le galulue faatasi. E pei lava o nisi o upu masani, without consultations confrontations will prevail ma o le a faafaigata foi ona maua le sini o se taumafaiga.

I le faatinoina o galuega a le Safety Promotion ma le Rehabilitation e tusa o lana Manual, o lo o i ai se Hazard Report Form e galulue ai alii ma tamaitai Safety Promotion Officers i le faiga o la latou galuega suesue. Ma o faalavelave tutupu uma e low le assessment, e fai lava e le Safety Promotion Officer le fautuaga mo se fofo i le e ona le galuega ma follow-up e ia i se taimi talafeagai. Ae o faalavelave tutupu uma e Medium pe High le Assessment, e tataua ona refer i le MCIL (for private sectors) ma le PSC (for Government Ministries) mo le faamalosi ma le tuliloaina i se taimi mulimuli ane ai.

**3.2.1. Faalavelave e Aafia ai Tagata Faigaluega i le Maea ai o Galuega:**

O le faalauiloaina o ituaiga faalavelave nei i tagata faigaluega, o lo o faatino faatasi lava i le taimi o faalauiloa ai le saogalemu i nofoaga o galuega faatasi ai ma fautuaga e tuuina i aiga i le taimi e asia ai le nofoaga na tupu ai le faalavelave.

**Aotelega:**

E ui o lo o ua agai i luga le aofai o faalavelave faafuasei, tagata manunua ma e maliliu mai faalavelave tau auala o femalagaaiga, peitai, e i ai le manatu o se siitaga lava e ono taliaina (acceptable) pe a fua i le gasologa o faalavelave tutupu tau auala o femalagaaiga i le lima tausaga talu ai, aemaise o le faatupulaia pea o le numera o taavale-afi auina mai i totonu o le atunuu. O le maualuga o le numera o e maliliu mai i faalavelave o lo o atagia ai se tulaga matuia (severity) o ia faalavelave. I le tulaga o faalavelave i nofoaga o galuega, o lo o faaauau pea le gasologa o le faaitiitia na amataina mai le tausaga faaletupe 2011/2012. Ma afai e faaauauina le gasologa o lo o i ai nei, e oo atu i le aso 30 Iuni 2014 e uma ai le tausaga faaletupe, o lo o pau pea i lalo le fuainumera. O faalavelave e aafia ai tagata faigaluega a ua maea galuega o lo o faatumauiina le pau maualalo i le 27 mai le maualuga e 40 sa i ai i le tausaga faaletupe 2008/2009.

**(4). Fausiaina o le Maketi i Fugalei.**

E le o toe po se lilo i foliga vaaia o le galuega o le fausiaina o le maketi e pei ona fautuaina

O so o se poloketi tele faapenei, e i ai lava ma ona faafitauli, peitai o lo o mulimulitai lava le Taitaifono ma le Komiti Faatonu i fautuaga a le Afioga i le Minisita aemaise le FK a le Kapeneta e tuuina mai i lea taimi i lea taimi.

O lo o faapea ona logoina nei itutino o le Malo i le gasologa o le galuega, po o nisi mea e manatu le Taitaifono ma le Komiti Faatino e alagatatau ona logoina ai le Minisita, le Palemia ma le Kapeneta.

Atonu o le vaega lea o le lipoti mulimuli lau Afioga i le Fofoga Fetalai ma le mamalu o le Maota. O lea ua silafia ua maea le maketi ma ua tulai mai o se maketi e fiafia i ai lo tatou atunuu. O le tali atu lea lau Afioga i le Fofoga Fetalai.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.49, Tali Atu a le Malo i le P.P.2013/2014 Nu.43, Lipoti a le Komiti o Ofisa o le Palemene i le P.P.2012/2013 Nu.18, Lipoti Faaletausaga a le Faalapotopotoga o Tau'i mo Faalavelave Faafuasei mo le Tausaga Faaletupe 2010/2011 ua faamaonia.*

**P.P.2014/2015 NU.50, TALI ATU A LE MALO I LE P.P.2013/2014 NU.57, LIPOTI A LE KOMITI O GALUEGA, FELAUAIIGA MA SIOSIOMAGA I LE P.P.2011/2012 NU.60 & P.P.2011/2012 NU.92, FAAMATALAGA O SINI AUTU A LE FAALAPOTOPOTOGA O LE MALOSI FAA-ELETISE MO LE VAITAIMI 2012-2014 MA LE LIPOTI FAALETAUSAGA A LE FAALAPOTOPOTOGA O LE MALOSI FAAELETISE MO LE TAUSAGA FAALETUPE FAAIUINA ASO 30 IUNI 2011**

**FOFOGA FETALAI:** Tulai mai lau Afioga i le Minisita mo Galuega, Felauaiga ma Atinae Eeseese.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai ma le paia maualuga o lenei Maota, ae ou te le i oo i le faatuina o le lafo, e momoli atu vaimalu i puega i lau Afioga i le Fofoga Fetalai i le faatautaiga o le Maota leaga o la e faafofoga mai lo ma itumalo o Safata. E a Ulu tafega ae selefutia ai Vaisigano, leaga o le Maota lenei e faafoe i le uta a le potu. E fetalai, ina ne i manao tele i le i'a ae maumau ai le upega. Ua faamalo le lavapapale ma to'a le tai i le Maota. O faaletonu o le Afioga Palusalue, o le faaletonu foi lea o Manualesagalala o le tasi o sui usufono mo le itumalo o Safata, ae faafetai ua fale i le Atua outou finagalo ua mafai ai ona toa malie le mataupu e pei ona i ai.

O le faafofoga foi a lo matou itumalo i la outou tapuaiga, ia tapuaia faiva. O ni faaletonu, tatou saili i le Atua e fesoasoani mai i le vaivai.

Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le P.P.2014/2015 Nu.50, o lo o tuuina atu ai Tali a le Malo i le P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60 & P.P.2011/2012 Nu.92, Faamatalaga o Sini Autu a le Faalapotopotoga o le Malosi Faa-Eletise mo le vaitaimi 2012-2014 ma le Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe faaiiuna aso 30 Iuni 2011 e tusa ai ma le Tulafono Tumau 54.*

*Faaluaina e le Minisita mo Galuega Tau Alamanuia ma Atinae a le Malo.*

**Afioga Hon Palusalue Faapo II:** Lau Afioga i le Fofoga Fetalai.....

**FOFOGA FETALAI:** Palu, o le a le mea lea e te tulai mai ai?

**Afioga Hon Palusalue Faapo II:** Lau Afioga i le Fofoga Fetalai, o au e tumu i le ava i lou uso a sui usufono vaeatu le Afioga i le Minisita.

**FOFOGA FETALAI:** O le a le faaletonu o le saunoaga a le Minisita?

**Afioga Hon Palusalue Faapo II:** E leai se mea e ala ai ona faatoese fua ia. O lea ou te tulai atu o au o le Taitai o le Itu Agai. O lea e fai lou tiute faa-Taitai o le Itu Agai, ae e le o le faatoese fua on my behalf, e le fetai.

**FOFOGA FETALAI:** O lea e taatia i lagatonu le mea lea. O le a le mea na e momoe mai ai mai fafo ae na e alu i fafo e te nofonono ai?

**Afioga Hon Palusalue Faapo II:** E leai, leaga e le fetau le mea lea.

**FOFOGA FETALAI:** Alaala i lalo. (*I le Taitai o le Itu Agai*).

**Afioga Hon Palusalue Faapo II:** Leaga o la e faafofoga mai lou itumalo e pei e foliga e sese lau mea lea e fai.

**FOFOGA FETALAI:** Alaala i lalo - ua fai atu faafia e te le alaala i lalo?

**Afioga Hon Palusalue Faapo II:** E tatau ona e faasaoa.

### **FAAIUGA A LE FOFOGA FETALAI**

**FOFOGA FETALAI:** Ou te manatu la ua tatou taunuu i le taunuuga na ou le manao e oo i ai. Sa ou maua le agaga o le loto faamagalō i le aso aneleila, a o lea e matau atu e leai la ua tatau ona fai le faaiuga, ia tulai.

Satini o le Maota, ave le Taitai o le Itu Agai i fafo. O le a se i ou mafaufau po o le a le mea e fai ia te oe. Ua ova, ua tumu le fua, ua lava foi lea.

E faamalulu atu i lau Afioga i le Minisita, o lena e sagatonu lau o le fo i lau saunoaga leaga e le faaloaloavale le itumalo. O la e faafofoga tupu ma ee o le itumalo. O au foi lenei e Safata mai lava le tumuai e tau i tamatamaivae, a o le ava tele lea e fai atu.

Ua lava lea, lau Afioga i le Minisita tasi ae foi lou finagalō. Ua ou talia ma le agaga faaloalo lau faamaulaloga e ala i le itu lea, ae ua ou manatu ua tatau ona aoai le Taitai o le Itu Agai.

**Afioga Hon Aeau Peniamina Leavaiseeta:** Lau Afioga i le Fofoga Fetalai.....

**FOFOGA FETALAI:** Alaala i lalo Aeau – alaala i lalo. Ou te le toe tuua ni avanoa. Ua lava le taimi lea na ou faaloalo atu ai.

Tulai mai lau Afioga i le Minisita.

*Na toe faaauau felafolafoga i le P.P.2014/2015 Nu.50, Tali Atu a le Malo i le P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60 & P.P.2011/2012 Nu.92, Faamatalaga o Sini Autu a le Faalapotopotoga o le Malosi Faaeletise mo le vaitaimi 2012-2014 ma le Lipoti Faaletausaga a le Faalapotopotoga o le Malosi Faaeletise mo le Tausaga Faaletupe faaiuina aso 30 Iuni 2011.*

**TALI ATU A LE MALO I LE P.P.2011/2012 NU.60, FAAMATALAGA O SINI AUTU – FAALAPOTOPOTOGA MALOSI FAAELETISE MO LE VAITAIMI 2012 – 2014 MA LE P.P.2011/2012 NU.92, LIPOTI FAALETAUSAGA A LE FAALAPOTOPOTOGA MALOSI FAAELETISE MO LE TAUSAGA FAALETUPE NA FAAIUINA I LE ASO 30 IUNI 2011.**

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai o Fautuaga a le Komiti.

**1. Fautuaga a le Komiti:**

I le maea ai o ana iloiloga, ua fautuaina ai e le Komiti le Malo ina ia:

- 1.1 Lagolago malosi poloketi o lo o faatino e le Faalapotopotoga mo se eletise gafataulimaina mo le atunuu, e pei o le:-
- Malosiaga e maua mai le la.
  - Malosiaga o le Savili.
  - Eletise e maua mai le:
    - suauu popo.
    - Patiki.
    - ma isi laau.
  - Isi nofoaga fou o lo o maua ai le suavai.

**Tali Atu:**

- Ua maea ona komisi le 546kWp o le malosiaga mai le la e pei ona tatalaina i le aso 11 Aperila 2014. O lenei poloketi ua vaevaeina i ni vaega se tolu (i) Tanugamanono – 150kWp, (ii) Vaitele – 246kWp ma (iii) Salelologa – 150kWp. Na faatupeina lenei poloketi i se tupe faameaalofa mai le Malo o Iapani e tauala mai i le Pacific Energy Community fund o lo o faatautaia e le Pacific Islands Forum Secretariat.
- Ua maea le 250kWp o le malosiaga o le la i luga o le Gym 3 i le malae taalo i Tuanaimato. Sa faatupeina lenei poloketi i se tupe faameaalofa mai le Malo o Niu Sila.
- O lo o faagasolo le faapipiina o le 2,200kWp o le malosiaga o le la i le malae tutuu solofanua i Tuanaimato. O lea poloketi o lo o faatupeina i se tupe faameaalofa mai le Malo o Niu Sila.
- O lo o faagasolo le faapipiina o le 250kWp po o le malosiaga o le la i Salelologa. O lea poloketi o lo o faatupeina i se tupe faameaalofa mai le Malo o Niu Sila.
- O lo o faagasolo le faapipiina o le 400kWp po o le malosiaga o le la i Asau. O lea poloketi o lo o faatupeina i se tupe faameaalofa mai le Malo o Niu Sila. O lo o faaauau ia fuafuaga mo lea poloketi.
- O lo o faagasolo le faapipiina o le 4,000kWp po o le malosiaga o le la o lo o faatinoina e le kamupani a le Greenpower. Latou te gaosia le eletise ma faatau mai i le EPC.

- O lo o faagasolo le faatalanoaina o le Power Purchase Agreement mo le 4,000kWp po o le malosiaga o le la o lo o faatinoina e le kamupani a le Solar mo Samoa.
- O lo o faagasolo le faatinoina o le Power Purchase Agreement ma le kamupani a le Biogen3 mo le 4,000kWp mai le susunuina o laau ma faatau mai i le EPC.
- O lo o faagasolo le faatalanoaina o le Power Purchase Agreement mo le 6,000kW mai le susunuina o pau taavale o lo o faatinoina e le kamupani a le Samoa Tyre Recycle. Latou te gaosia le eletise ma faatau mai i le EPC.
- O lo o faagasolo le faatalanoaina o le Power Purchase Agreement mo le 6,000kW mai le susunuina o le lapisi o lo o faatinoina e le kamupani a le Village Life Energy. Latou te gaosia le eletise ma faatau mai i le EPC.
- O lo o faagasolo le atinaeina o malosiaga o le suavai i (i) Faleaseela, (ii) Tafitoala, (iii) Tiapapata, (iv) Fuluasou, (v) Vaipu ma (vi) Faleata i Vailoa, Palauli.

## 2. **Fautuaga a le Komiti:**

- 2.1 Ave le faamuamua a le Faalapotopotoga mo le faaleleia o vaega o le auaunaga o lo o tulai mai ai le faafitauli o le eletise maumau e pei o le faaletonu i laina eletise ma le faafitauli i mita eletise ma mita eletise totogi muamua, ina ia oo atu i le isi lua tausaga o lumanai, ua i ai se faaitiitiga o le eletise maumau.

### **Tali Atu:**

- O lo o faagasolo pea galuega a le Faalapotopotoga mo le faaitiitia o le eletise maumau. Mo le silafia e le Palemene, e i ai le eletise e faaogaina e afi ma masini e gaosi ai le eletise e tusa lea ma le 5% o le eletise gaosi, faatasi ai ma le eletise e leiloa i luga o laina eletise e tusa lea ma le 7% o le eletise o lo o tuuina atu mo le faaogaina e le mamalu o le atunuu (for sales). O ia vaega e le mafai ona alofia aua e moomia e afi ma masini le eletise e ola ai pamu suauu, pamu vai, peapea e faamalu ai afi, moli, switchgears atoa ai ma le eletise e leiloa i le vevela (heat) i transformers ma laina eletise. O lona uiga e na o le 5 i le 6% le eletise o lo o leiloa i meter tamper, mita le faitaua, sese i le faitauga o mita, ma isi mafuaaga.
- Ua maea ona upgrade uma laina eletise ina ia tuuitiitia le eletise leiloa i transformers ma laina eletise ina ua faatupulaia le eletise e momoli atu i laina eletise (freeder loadings).



- O lo o faagasolo le galuega faifaiepa i le siakiina o mita eletise mo i latou o lo o faaaogaina faasolitulafono le eletise.
- O lo o faaauau pea le suiina o mita faitau ua faaletonu. Ua taofia le toe aumaia o mita cashpower. Ua faataitai nei nisi o mita tofogi muamua o le JOY meter ma le Taslexus Tarus meter.
- O se tulaga masani le tulai mai o eseesea i le faitauina o mita mai le aofaiga o le eletise sa tuuina atu e faatau e fua i le taimi e faatinoina ai ia vala e lua. E masani ona iloa le aofai o le eletise e gaosia ma tuuina atu mo le faatauina atu i le masina atoa ae o le eletise e faatau atu (sales) e faalagolago i le faaauau pea ma le taimi e faitauina ai mita. Mo le faaleleia atili o lea tulaga, ua tagai ai nei le Faalapotopotoga i le faaaogaina o SMART Meters.
- Ua faatulaga foi e le Faalapotopotoga e ala i le faaaogaina o se polokalame faakomepiuta e faamaumau ai ana aseta uma (GIS System), se faafanua mo laina uma o lo o tufatufaina atu ai le eletise i le atunuu lautele (distribution feeders), ma o le a fesoasoani tele lenei faiga e iloa ai le eletise maumau i laina eletise ma le nofoaga tonu o lo o aafia ai.
- Ua maea foi ona faapipiina i luga o le system mita (revenue meters) mo laina eletise o lo o tufatufaina atu ai le eletise mo le lautele (distribution feeders), ma ua mafai ai ona iloa le aofai o le eletise i kWh lea o le a tufatufaina atu i le atunuu lautele.

### **3. Fautuaga a le Komiti:**

- 3.1 Uunaia le faamalositia o Polokalame Faalauiloa a le Faalapotopotoga i le Televise ma le Leitio mo le silafia e le atunuu o mafuaaga o le motusia faafuasei o le eletise i le tele o taimi, ina ia faaitiitia ai faitioga a le atunuu i le motusia soo o le eletise e aunoa ma ni faasilasilaga mo lo latou silafia.

#### **Tali Atu:**

- O lo o faaauau pea le faasalalauina i le atunuu o galuega faatino a le Faalapotopotoga e aafia ai le tapeina o le eletise.
- O lo o faasalalau foi le pe faafuasei o le eletise i taimi e tulai mai ai.
- O lo o faagasolo polokalame faalauiloa a le Faalapotopotoga e le gata i atinae o lo o faagasolo, ae faapea foi le suiga o le tau o le eletise ma isi auaunaga.

**4. Fautuaga a le Komiti:**

- 4.1 Tausisia pea le Faaiuga a le Kapeneta lea ua faamutaina ai le toe tuuina atu o ni iunite tau eletise mo le faaaogaina e le Komiti Faatino ma sui o le Pulega, e aunoa ma se tupe totogi.

**Tali Atu:**

I le taimi nei, e le o toe maua e le Komiti Faatonu, Pulega ma le Aufaigaluega le faamanuiaga o eletise maua fua.

**5. Fautuaga a le Komiti:**

- 5.1 Faaauau pea galuega mo le faapipiina o mita eletise totogi muamua ma ia mautinoa le lelei atoatoa o ia masini. Fautuaina foi le silasila o le Faalapopotoga i nisi ituaiga masini (mita eletise totogi muamua) e sui ai le ituaiga masini o lo o i ai nei, ona e vave leaga ina ia foia ai le faafitauli o le maumau o le eletise ma faaitiitia ai foi vaegatupe faaalu i galuega mo le fuaina o mita ma taavale o lo o faaaogaina ai.

**Tali Atu:**

- O lo o faaaauau pea le faapipiina o mita totogi muamua.
- Ua taofia le toe aumaia o mita cashpower, ae ua faataitai nei nisi o mita totogi muamua o le JOY meter ma le Taslexus Tarus meter.
- O lo o silasila foi le Faalapopotoga i le faaaogaina o mita e mafai ona faitau mai i le ofisa (smart meters) e sui ai mita a pisinisi ina ia faigofie ona faitau ma mataitu i taimi uma.

**6. Fautuaga a le Komiti:**

- 6.1 Faaleleia afi eletise suauu o lo o i ai nei i Savaii i ni afi eletise fou, ina foia ai faafitauli o le faaaauau pea o le motusia o le eletise aemaise lava i le vaiatau o aso fiafia i le faaiuga o tausaga taitasi.

**Tali Atu:**

O lo o faaaauau ona faaleleia afi suauu tuai o lo o i Salelologa, Savaii e talitali ai le fale eletise fou o lo o fuafua i Vaiaata. Ae ua uma foi ona pasia le Komiti o Tauofoga na tuuina atu i le Kapeneta, nisi o afi fou o le a faatau mai mo Savaii.

**7. Fautuaga a le Komiti:**

- 7.1 Vave faapipii se masini fou (new voltage regulator) i le poumoli o lo o tu lata ane i le pamuvai fou i Falealupo, e faatonutonu ai le fesuisui ai o le malosi o le eletise e faaaoga e lea pamuvai. O le vave faapipii o lea masini o le a mafai ona faasaoina mai ai lea aseta taugata a le Malo mai le

faaleagaina ona o le fesuisui ai o le malos i o le eletise ma mafai ai ona ausia faamoemoega lelei na fausia ai.

**Tali Atu:**

O lo o fai suesuega a le Faalapotopotoga i le faafitauli i le pamu vai i Falealupo. Mo le taimi nei o lo o taumafai e faalatalata le transformer i le pamu vai. E ao foi i le Pulega o le Suavai ona faapipii ni latou protection e pei o tulaga masani e puipuia ai le pamu vai.

**8. Fautuaga a le Komiti:**

8.1 Galulue faapaaga a le Faalapotopotoga ma le Matagaluega o Punaoa Faanatura ma le Siosiomaga mo punavai ma vaitafe o lo o tamaoaiga i le suavai, e talafeagai mo le gaosia o le eletise.

**Tali Atu:**

O lo o galulue soosootauau le Faalapotopotoga ma le Matagaluega o le Punaoa Faanatura ma le Siosiomaga (MNRE), Matagaluega o Tupe (MOF) i le atinaeina o afi e alu i le suavai. O lo o faagasolo nei atinae i Faleaseela, Tafitoala, Fuluasou, Vaipu i Afulilo, Faleata i Vailoa Palauli.

Lau Afioga i le Fofoga Fetalai, e talosaga atu i lau Afioga ona o le faaiuga ua faia i lou uso a sui usufono, ia fesoasoani mai le Atua e toe talia ai, faafetai.

*Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P. 2014/2015 Nu. 60, Lipoti a le Komiti o Galuega, Felauaiga ma Siosiomaga i le P.P. 2011/2012 Nu. 60 & P.P. 2011/2012 Nu. 92, Faamatalaga o Sini Autu a le Faalapotopotoga o le Malosi Faaeletise mo le Vaitaimi 2012-2014 ma le Lipoti Faaletausaga a le Faalapotopotoga o le Malosi Faaeletise mo le Tausaga Faaletupe Faaiuina aso 30 Iuni 2011 ua faamaonia.*

**FOFOGA FETALAI:** Lau Afioga i le Minisita, o au e tumu i le ava atu i lau Afioga ona o oe o se tasi o le itumalo. E manatu foi o lea e faafofoga tapuai le atunuu ua faafofoga le Maota i lenei aso. Faafetai i lou fetepaaina ona o le tulaga sa i ai le tulaga sa talanoa atu ai le Taitai o le Itu Agai, e le o ni upu e avane ai, ae o i lea e iloa ai, e le moni le faatoesega na fai mai nei i le Fofoga Fetalai. O lea ua e faaopoopo mai e tusa e molimoli mai malu i puega i le faafofoga a le Maota, aemaise le faatoesega na aumai i le Fofoga Fetalai, o i e tau mai ai e le moni le upu na fai, ma ua tatau loa ona fai le faaiuga e tatau ona fai. O le ala lea lafo mai lau faautaga ma le mea ua e talosaga mai i ai, ia se i moe manatunatu le aso pei o le upu o le tamaloa Aana po o le a le mea e tatau ona fai, fesili i le Atua po o le a le faaiuga e aumai, o le faaiuga lena o le a tatou o i ai. Ae ua ou talia ma le faaaloalo lau faatoesega.

**Afioga Hon Aeau Peniamina Leavaiseta:** I le ava e tatau ai ou te tulai ai i le pau o le Maota nei, aua ou te lagona e tatau, ioe, e leai e ava tele ma

matau i lau faaiuga, ae tau lava ina faitau ane ai lau Afioga leaga o tiute fai i totonu o le Maota. O se leo e taumolimoli atu i lau Afioga ma le pau o le Maota nei, ua sasi foi le Afioga i le Taitai o lenei Vaega Faaupufai. Ioe ou te talitonu e le o agaga lea lau Afioga i le Afioga i le Taitai o le itu nei, na ona faataatia atu e valuvalusia aa o le fau i le faatofalaiga ma le tatalo, ia faale-Atua le faautaga ma le tofa, faatuatua tele, o le a lava le tanoa i lau Afioga, e tai alalo le ia a sa Saumani i le Maota nei. Ae tau ina faitau ane ai lagona, e ava tele, a o le tiute fai e tatau ona fai. O le tatalo lea ma le faamaualaloga i lau Afioga e tusa ai ma sasi foi a le Afioga i le Taitai o lenei Vaega Faaupufai, i le ava e tatau ai, faafetai.

**FOFOGA FETALAI:** Ia, lau Afioga i le Sui Taitai, e manatu o lea e faafofoga ma le manino le tatou Maota, aemaise le faafofogaaga a le tatou atunuu. Lau Afioga Aeau, a tu le too ae tepa i le ata i le savaliga o le tatou Paeaiga lenei, paga lea, ia na ona matau lava ma le loto faanoanoa, ae sa olo lava le fua ma folo mea uma ona o lo tatou va faafeagai ai, ae matua atu le tuu i ina leaga o lau Afioga o le Sui Taitai, sa e saofai foi i le Nofoa lenei ou te taumafai atu ai. E le o se Nofoa o le Laaulialemalietoa po o lenei itumalo, o le Nofoa o Samoa, o se tagata la e le migao i le Fofoga Fetalai, o le le migao lena i le Palemene lenei, o le le migao lena i le faafofogaaga a Samoa ma lana tapuaiga. O le ala lea Aeau o le a sau matau i le aso lenei, ou te matua atu i ina, leaga o nisi foi taimi ia e le tau fai atu o lea lava ou te molimau atu i luma nei, o le tuualalo ma le faaoololomaau, ia o lea e tafitifiti ai le Taitai o le Itu Agai. Ae taatia maia lou finagalo, o lea ua uma ona ou fai atu o le a tatou momoe manatunatu i lenei afaifi, alafai i le taeao fou, ia ona tatou lagona lea o nisi musumusuga mai le Alii.

Ae faafetai mo le manatu mai ma le faamaualaloga ua tuuina mai i lau Afioga i le Sui Taitai o le Itu Agai.

**P.P. 2014/2015 NU. 60, TALI ATU A LE MALO I LE P.P. 2013/2014 NU. 130, LIPOTI A LE KOMITI MO OFISA O LE PALEMENE I LE P.P. 2012/2013 NU. 74, LIPOTI I LE PALEMENE A LE OFISA O LE KOMESINA O SULUFAIGA E TAU I LE ASO 30 IUNI 2012**

**FOFOGA FETALAI:** Tulai mai lau Afioga i le Minisita mo le Ofisa o le Komesina o Sulufaiga.

**Tofa Hon TOLOFUAIVALELEI FALEMOE LEIATAUA:** Lau Afioga i le Fofoga Fetalai e tulai lava ma le faaaloalo e faatu le lafo, *Ina ia faamaonia e lenei Fono Aoa o le P.P. 2014/2015 Nu. 60 o lo o tuuina atu ai Tali a le Malo i le P.P. 2013/2014 Nu. 130, Lipoti a le Komiti mo Ofisa o le Palemene i le P.P. 2012/2013 Nu. 74, Lipoti i le Palemene a le Ofisa o le Komesina o Sulufaiga e tau i le aso 30 Iuni 2012, e tusa ai ma le Tulafono Tumaui 54.*

*Faaluaina e le Minisita mo Galuega Tau Alamanuia ma Atinae a le Malo, le Minisita mo Fesootaiga ma Faamatalaga Tekonolosi ma le Minisita mo le Soifua Maloloina.*

**FOFOGA FETALAI:** Tulai mai lau Afioga i le Minisita.

**Tofa Hon TOLOFUAIVALELEI FALEMOE LEIATAUA:** Lau Afioga i le Fofoga Fetalai, mo le silafia e lenei Maota atoa ai ma le faafogafogaaga a le atunuu, ou te faitauina Tali o lo o tuuina atu i lenei Pepa, ma e mo le saga faamaninoina o lenei Tali, ia o lea ua i ai le manatu lau Afioga i le Fofoga Fetalai, o le a ou faitauina muamua ia le Fautuaga mai le Komiti ia ma faapena ona mulimuli faitau atu lona Tali. Ma e o le Fautuaga mai le Komiti o lo o taina i le lomitusi vaivai, a o le Tali a le Malo, ua taina i le lomitusi ua malosilona lanu ina ia eseese ai.

Lau Afioga o le Fautuaga muamua.

**TALI ATU A LE MALO I LE P.P. 2013/2014 NU. 130, LIPOTI A LE KOMITI O OFISA O LE PALEMENE I LE P.P. 2012/2013 NU. 74, LIPOTI I LE PALEMENE A LE OFISA O LE KOMESINA O SULUFAIGA E TAU I LE ASO 30 IUNI 2012.**

**Fautuaga 1:**

- (i) Faatulaga ni vaegatupe mo avanoa faigaluega moomia o le Ofisa o le Komesina o Sulufaiga, ona o le toagaogao o le aufaigaluega i le taimi nei, ae o lo o tele galuega o lo o fia faatinoina.

**Tali:**

O lea ua faagaioi le faatinoina o le fautuaga mo le faatulagaina o ni vaegatupe mo avanoa faigaluega moomia o le Ofisa o le Komesina o Sulufaiga, ona o le toagaogao o le aufaigaluega, ae o lo o tele galuega o lo o fia faatinoina;

**Fautuaga 2:**

- (ii) E fautuaina le Ofisa o le Komesina o Sulufaiga, ina ia faatino ni Polokalame Faalauiloa mo le atunuu lautele, e silafia ai le taua o le auaunaga o lo o faatinoina.

**Tali:**

Ua fuafuaina foi le faatinoina o Polokalame Faalauiloa mo le atunuu lautele, e silafia ai le taua o le auaunaga o lo o feagai ma le Ofisa o le Komesina o Sulufaiga, pe a maea ona tofia i le aufaigaluega moomia;

**Fautuaga 3:**

- (iii) Ia tuufaatasia le Lipoti Faaletausaga ma faamatalaga o tupe a le Ofisa o le Komesina o Sulufaiga i le isi Tausaga Faaletupe.

**Tali:**

O le tali a le Malo e ala i le Komesina o Sulufaiga, ua toeitiiti lava maea le faatinoina o le Lipoti Faaletausaga mo le Tausaga Faaletupe

e tau ia Iuni 2013-2014, ma ua fuafuaina e tuuina atu i le Palemene i se taimi o lenei masina.

Lau Afioga i le Fofoga Fetalai, o le agaga faafetai lea i le Malo ona o lea ua tafa le finagalo o le Matagaluega o Tupe sa o latou le lagolagoina o lenei vaega o le aufaigaluega faaopoopo a le Matagaluega, peitai pei ona silafia i le Tala Faatatau Faaopoopo Muamua o le Tupe o lenei tausaga seia oo ia Iuni i le tausaga nei i le 2015, ia o lea ua i ai i totonu le \$30,000 e fesoasoani i le totogi o se tagata faigaluega se toatasi, ia ae o lo o moomia pea nisi tagata faigaluega.

Ae faafetai mo lenei tali mai, o Fautuaga a le Komiti, ia o lea ua tali mai le Malo, ia talosia ia ia manuia galuega a lenei vaega o lala a lo tatou Malo, aua le manuia o ona tagata soifua.

Ia o le faaaliga lea ma le agaga faaaloalo, ia manuia le Fono.

*Na tuuina atu le Fesili ma ina ua manumalo le Ioe, na tulai loa Tali a le Malo i le P.P. 2013/2014 Nu. 130, Lipoti a le Komiti mo Ofisa o le Palemene i le P.P. 2012/2013 Nu. 74, Lipoti i le Palemene a le Ofisa o le Komesina o Sulufaiga e tau i le aso 30 Iuni 2012 ua faamaonia.*

**P.P. 2014/2015 NU. 61, TALI ATU A LE MALO I LE P.P. 2013/2014  
NU. 96, LIPOTI A LE KOMITI O MATAUPU TAU AOGA, SAIENISI,  
FESOOTAIGA MA FAAMATALAGA TEKONOLOSI I LE P.P.  
2013/2014 NU. 20, LIPOTI FAALETAUSAGA A LE IUNIVESITE  
AOAO O SAMOA MO LE TAUSAGA FAALETUPE FAAIUINA ASO  
30 IUNI 2011**

**FOFOGA FETALAI:** Tulai mai lau Afioga i le Minisita mo Aoga, Taaloga ma Aganuu.

**Afioga Hon MAGELE MAULIU:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le P.P. 2014/2015 Nu. 61 o lo o tuuina atu ai Tali a le Malo i le P.P. 2013/2014 Nu. 96, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2013/2014 Nu. 20, Lipoti Faaletausaga a le Iunivesite Aoa o Samoa mo le Tausaga Faaletupe faaiiuna aso 30 Iuni 2011, e tusa ai ma le Tulafono Tumau 54.*

*Faaluaina e le Minisita mo Punaoa Faanatura ma le Siosiomaga, le Minisita mo Tina ma Tamaitai, Atinae o Nu'u ma Afioga ma Agafesootai, le Minisita mo Fesootaiga ma Faamatalaga Tekonolosi, le Minisita mo Galuega, Felauaiga ma Atinae Eeseese ma le Minisita mo Leoleo & Falepuipui.*

**FOFOGA FETALAI:** Tulai mai lau Afioga i le Minisita.

**Afioga Hon MAGELE MAULIU:** Lau Afioga i le Fofoga Fetalai mo le silafia e le Maota ato ai ma le faafofogaaga a le atunuu, ou te faitauina Tali o lo o tuuina atu i lenei Pepa.

**TALI ATU I FAUTUAGA A LE KOMITI O MATAUPU TAU AOGA, SAIENISI, FESOOTAIGA & FAAMATALAGA TEKONOLOSI I LE P.P. 2013/2014 NU. 20, LIPOTI FAALETAUSAGA A LE IUNIVESITE AOA O SAMOA MO LE TAUSAGA FAALETUPE 1 IULAI 2010 FAAIUINA ASO 30 IUNI 2011.**

**Fautuaga:**

1. Silasila i ni auala talafeagai e faaleleia ai auaunaga o lo o manaomia e tali atu ai i aafiaga o le siitia pea o le faitauaofai o tagata aoga i totonu o le Iunivesite i le Papaigalagala, e pei o le:
  - Moomia le faalauteleina o le potutusi (library), potu Komepiuta ma potu aoga mo le faaleleia o auaunaga tau aoga ma polokalame tau suesuega i totonu o le Iunivesite.
  - Moomia le faaleleia o auaunaga tau initaneti (wireless) mo aoga ma suesuega a alo ma fanau o lo o aotauina i le Iunivesite.
  - Moomia le faapoopoina o se tagata agavaa ma o lo o i ai ni ona faailoga taualoa mo le auaunaga i le vaaiga o mataupu e patino i alii ma tamaiti aoga, pae ma auli (Counsellor).

**Tali:**

Ua aofia i totonu o le Fuafuaga o Taiala a le Iunivesite Aoa o Samoa 2010-2020 (NUS Strategic Plan 2010-2020) auala talafeagai ua talitonu le Iunivesite e matua moomia e tali atu ai i aafiaga o le siitia pea ole faitauaofai o tagata aoga i le Iunivesite i le Papaigalagala, e pei o le:

- fausia o se Faletusi (library) fou e i ai komepiuta mo suesuega, fausia o se Nofoaga Tutotonu mo Auaunaga Lagolago mo Tagata Aoga (Student Support Services Centre) e i ai potu Komepiuta faapitoa mo le faaogaina e tagata aoga mo a latou suesuega; ma le fausia o se Nofoaga Tutotonu mo le faafoeina o aoga ma suesuega i mataupu tau Samoa. O le fausia o nei nofoaga fou o le a matua faaleleia ai auaunaga tau aoga faapea polokalame tau suesuega i totonu o le Iunivesite. E le gata i lea, ae o le a maua ai avanoa e faalautele ai potu aoga i faleaoga o i ai nei.
- faamuamua ua tuuina atu pea i le faaleleia o auaunaga tau initaneti ona o le taua tele mo aoga ma suesuega a alii ma tamaiti aoga i le Iunivesite, e le gata i masini moomia, faalauteleina o le ala o fesootaiga faa-Initaneti (bandwidth) ae faapea ai foi le siitia o agavaa ma tomai o le aufaigaluega i le Vaega o Faamatalaga, Fesootaiga ma Tekonolosi a le Iunivesite.
- siitia o le tulaga o auaunaga faafautuaga mo tagata aoga, e pei ona maea ai ona tofia se Faufautua Tamaitai ua i ai faailoga taualoa manaomia (Bachelor of Social Work) mai i

le Iunivesite i Niu Sila ma agavaa i le faatinoina o polokalame fesoasoani mo tupulaga talavou i Niu Sila ma Samoa nei. O le Faufautua Tamaitai lea ua faaopoopo atu i le Faufautua Alii o i ai nei. O le a galulue Faufautua e lua ma tagata aoga uma ua aafia a latou aoga ona o faafitauli o le soifuaga e aafia ai siosiomaga faaleaiga, faigauo ma le maualalo lava o le lagona lelei i lona lava tagata ma ona malosiaga. Ae mo faafitauli e patino i tamaitai aoga, o le a faapea ona tauaveina e le Faufautua Tamaitai.

Ma le faaaloalo lau Afioga i le Fofoga Fetalai.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.61, Tali Atu a le Malo i le P.P. 2013/2014 Nu. 96, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2011/2012 Nu. 20, Lipoti Faaletausaga a le Iunivesite Aoa o Samoa mo le Tausaga Faaletupe faaiiina aso 30 Iuni 2011 ua faamaonia.*

**P.P. 2014/2015 NU. 62, TALI ATU A LE MALO I LE P.P. 2013/2014 NU. 63, LIPOTI A LE KOMITI O MATAUPU TAU AOGA, SAIENISI, FESOOTAIGA MA FAAMATALAGA TEKONOLOSI I LE P.P. 2011/2012 NU. 55, LIPOTI FAALETAUSAGA A LE IUNIVESITE AOA O SAMOA MO LE TAUSAGA FAALETUPE FAAIUINA ASO 30 IUNI 2010**

**FOFOGA FETALAI:** Tulai mai lau Afioga i le Minisita mo Aoga, Taaloga ma Aganuu.

**Afioga Hon MAGELE MAULIU:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le P.P. 2014/2015 Nu. 62 o lo o tuuina atu ai Tali a le Malo i le P.P. 2013/2014 Nu. 63, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2011/2012 Nu. 55, Lipoti Faaletausaga a le Iunivesite Aoa o Samoa mo le Tausaga Faaletupe faaiiina aso 30 Iuni 2010, e tusa ai ma le Tulafono Tumau 54.*

*Faaluaina e le Minisita mo le Soifua Maloloina, le Minisita mo Punaoa Faanatura ma le Siosiomaga, le Minisita mo Galuega Tau Alamanuia ma Atinae a le Malo, ma le Minisita mo Leoleo & Falepuipui.*

**FOFOGA FETALAI:** Tulai mai lau Afioga i le Minisita.

**Afioga Hon MAGELE MAULIU:** Lau Afioga i le Fofoga Fetalai mo le silafia e le Maota ma le faafofogaaga a le atunuu, ou te faitauina Tali o lo o tuuina atu i lenei Pepa.



**TALI ATU I FAUTUAGA A LE KOMITI O MATAUPU TAU AOGA, SAIENISI, FESOOTAIGA MA FAAMATALAGA TEKONOLOSI I LE P.P. 2011/2012 NU. 55, LIPOTI FAALETAUSAGA A LE IUNIVESITE AOAO O SAMOA MO LE TAUSAGA FAALETUPE FAAIUINA ASO 30 IUNI 2010.**

**Fautuaga:**

1. Ave le faamuamua i galuega talafeagai mo le foia o faafitauli ua taua i lalo o lo o taotaomia ai galuega e lagolago ai le atinae o aoaoga i totonu o le Iunivesite.
  - Potu Suesue faapitoa e faatotogaina i masini komepiute ua faapolokalameina i polokalame tau komepiuta, polokalame tau tausitusi, polokalame faapitoa, polokalame tau initaneti mo aoaoga e faatinoina i luga o upega tafailagi, mo suesuega a alo ma fanau;
  - Faalauteleina o potu komepiuta o lo o i ai nei ona ua siitia le aofai o tamaiti resitala aemaise ai o le tele o mataupu, e moomia le faaaoga o potu komepiuta;
  - Potu avanoa po o se nofoaga e malolo i ai tamaiti ma fai ai a latou meaaoga, ina ia taofia mai ai le feoi solo e tau saili se nofoaga paganoa ma le toafilemu e suesue ai a latou meaaoga.

**Tali:**

O tulaga ua tuuina mai i fautuaga, o faafitauli nei ua tele tausaga o feagai ma le Iunivesite i le taumafai malosai ai e faamalieina le faatinoga o ona tiute ma matafaioi faaletulafono aemaise i le tuuina atu o auunaga tatau ma moomia mo se tulaga maualuga i le aoaoina o alo ma fanau a Samoa.

E taumafai pea le Iunivesite Aoao o Samoa e ave le faamuamua i le faaleleia o auunaga faatekonolosi mo alii ma tamaitai aoga ina ia faafaigofie le faatinoga o vaega moomia o lo latou aoaoina faapea a latou meaaoga.

1. Ua i totonu o le Fuafuaga o Taiala 2010-2020 a le Iunivesite Aoao o Samoa auala ma gaoioiga ua ave i ai le faamuamua mo le foia o faafitauli ua loa ona taotaomia ai galuega e lagolago i le atinae o aoaoga i totonu o le Iunivesite.
  - I le taimi nei, o lo o i ai potu faapitoa (Computer Laboratories) e fa (4) ua faatotogaina i masini komepiuta ua faapolokalameina i polokalame faakomepiuta eseese e faatino ai auunaga faa-Komepiuta e aofia ai avanoa e aoaoina ai tagata aoga ma latou faaaogaina polokalame faakomepiuta mo a latou suesuega. Ua i ai foi masini komepiuta i faletusi e lua a le Iunivesite mo le faia o suesuega a tagata aoga. E i ai foi potu komepiuta a nisi o Saofaiga mo le faaaogaina e tagata aoga o ia Saofaiga e fai ai a latou

meaaoga. E faatau foi i tausaga taitasi masini komepiuta e faaopoopo i komepiuta o i ai i potu komepiuta faapitoa ma potu tusi. Ae peitai, ona o le maualuga pea o le fuainumera o alii ma tamaitai aoga i lea tausaga ma lea tausaga, e le i ausia lava le tulaga atoatoa ua naunau i ai mo leni auaunaga. O le tuuina atu o aoga i isi vaega o Samoa faapea atunuu o le itulagi ma le lalolagi, e ala atu i faamatalaga ma auala faatekonolosi, o se galuega lea o lo o atinae i le taimi nei.

- O le faalauteleina o potu komepiuta o lo o i ai nei, ua aofia lea i totonu o le Fuafuaga o Taiala 2010-2020 a le Iunivesite.
- Ia i ai se potu po o se avanoa e malolo i ai tamaiti aoga ma fai ai a latou meaaoga;

I le taimi nei, e lata i le selau laulau ua faatulaga i avanoa talafeagai i faleaoga o i ai nei faapea lalo o tamaligi tetele e malolo i ai tagata aoga ma fai ai a latou meaaoga. O le tele o avanoa ua faatutu ai nei laulau i faleaoga e leai se pisa ma e talafeagai e malolo ma fai ai meaaoga. Ae peitai, e fiafia tagata aoga e faapotopoto i polotito tetele o faleaoga ma pisapisao ai. Ua aofia i totonu o le Fuafuaga o Taiala 2010-2020 a le Iunivesite Aoa o Samoa, ma ua ave i ai le faamuamua mo le faatinoga le fuafuaga ua faamauiina i lalo:

Fausia o se Nofoga Tutotonu e i ai i totonu auaunaga uma mo le lagolagoina o tagata aoga e aofia ai potu komepiuta e fai ai meaaoga ma suesuega, potu e malolo i ai tagata aoga, o auaunaga tau fautuaga ma isi tulaga talafeagai mo le lagolagoina o tagata aoga.

2. Ua maea ona faatau ma faatulaga le afi faaleoleo i le Iunivesite ina ia le toe faalavelaveina vasega, faia o meaaoga ma suega a tagata aoga i le motusia soo o le eletise. O gaoioiga a le Iunivesite mo le faasaoina o tupe e pei o le 'Aso Faraila Pogisa' ua mafai ona faasaoina ai vaegatupe ua fesoasoani i le faatupeina o nisi o atinae taua a le Iunivesite. O nisi auala e maua mai ai le eletise o se tulaga lea o le a silasila i ai le Iunivesite i le lumanai.

E talitonu le Iunivesite Aoa o Samoa o alafua ma gaoioiga ua i totonu o lana Fuafuaga o Taiala, o le a foia ai faafitauli o lo o taotaomia ai galuega e lagolago ai le atinae o aoga i totonu o le Iunivesite, e pei ona tuuina mai i fautuaga a le Komiti o Mataupu tau Aoga, Saienisi, Fesootaiga ma Faamatalaga Tekonolosi.

Lau Afioga i le Fofoga Fetalai, faafetai.

*Na tuuina atu le Fesili ma ina ua manumalo le Ioe, na tulai loa le Tali atu a le Malo i le P.P.2013/2014 Nu.63, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P.2011/2012 Nu.55, Lipoti Faaletausaga a le Iunivesite Aoa o Samoa mo le Tausaga Faaletupe faaiiina aso 30 Iuni 2010 ua faamaonia.*

**P.P.2014/2015 NU. 63, TALI ATUA LE MALO I LE P.P.2013/2014 NU.121, LIPOTI A LE KOMITI O GALUEGA, FELAUAIIGA MA SIOSIOMAGA I LE P.P.2013/2014 NU.5, LIPOTI FAALETAUSAGA A LE FAALAPOTOPOTOGA O LE MALOSI FAA-ELETISE MO LE TAUSAGA FAALETUPE FAAIUINA ASO 30 IUNI 2012**

**FOFOGA FETALAI:** Tulai mai lau Afioga i le Minisita mo Galuega, Felauaiga ma Atinae Eeseese.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai ou te faatu le lafo, *Ina ia faamaonia e leni Fono Aoa le P.P.2014/2015 Nu.3, o lo o tuuina atu ai Tali a le Malo i le P.P.2013/2014 Nu.121, Lipoti a le Komiti o Galuega, Felauaiga ma Siosiomaga i le P.P.2013/2014 Nu.5, Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe faaiiuna aso 30 Iuni 2012, e tusa ai ma le Tulafono Tumau 54.*

*Faaluaina e le Minisita mo Leoleo ma Falepuipui, Minisita mo Punaoa Faanatura ma le Siosiomaga, Minisita mo Aoga, Taaloga ma Aganuu ma le Minisita mo le Soifua Maloloina.*

**FOFOGA FETALAI:** Tulai mai lau Afioga i le Minisita e saunoa.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai, o le Tali atu a le Malo i mataupu sa laga e le Komiti o Galuega, Felauaiga ma le Siosiomaga:

**TALI ATUA LE MALO I LE P.P.2013/2014 NU.121, LIPOTI A LE KOMITI O GALUEGA, FELAUAIIGA MA SIOSIOMAGA I LE P.P.2013/2014 NU.5, LIPOTI FAALETAUSAGA A LE FAALAPOTOPOTOGA O LE MALOSI FAA-ELETISE MO LE TAUSAGA FAALETUPE FAAIUINA ASO 30 IUNI 2012.**

**1. Fautuaga a le Komiti:**

Silasila i le ono faaauau o le atinae o le poloketi mo le eletise e gaosi mai i le malosia o le savili ona ua tele tausaga o taumafai mai lea galuega, e le i mautu lava ni faamaumauga e ono gafatia ai se gaosiga o le eletise, aemaise ai ua tele vaegatupe ua faaalu ai talu mai le amataga o lea galuega e oo mai i le taimi nei.

**Tali:**

- 1.1 Ua talia e le Faalapotopotoga le fautuaga a le Komiti.
- 1.2 Mo le silafia ua faatino nei le atinae e 500kw o le malosiaga o le savili i Vailoa Aleipata ma e faatupeina i se fesoasoani mai le Malo o Alapi (ABU DHABI).
- 1.3 Ua i ai foi se kamupani ua latou faailoa mai le latou fuafuaga (proposal) mo le gaosia o le eletise mai le malosiaga o le savili i le mauga o Lepue ma faatau mai i le EPC. O lo o faagasolo faatalatalanoaga o leni atinae.

**2. Fautuaga a le Komiti:**

Ia faanatinati le faatinoina o le poloketi mo le suia o laina eletise tuai o lo o aafia i le eletise maimau, ina ia faasaoina ai ana tupe faaalu i le gaosia o le eletise.

**Tali:**

- 2.1 Ua talia e le Faalapotopotoga le Fautuaga a le Komiti.
- 2.2 Ua maea ona suia uma uaea tuai i le motu o Upolu.
- 2.3 Ua 90% o uaea o le motu o Savaii ua maea.

**3. Fautuaga a le Komiti:**

Ia uunaia le faatinoina o polokalame faaleaoaoga mo le tapueina o tomai o le aufaigaluega i le faatinoina o lana auunaga.

**Tali:**

- 3.1 Ua talia e le Faalapotopotoga le fautuaga a le Komiti.
- 3.2 O poloketi uma o lo o faagasolo o lo o maua ai le avanoa e faatinoina ai polokalame faaleaoaoga mo le aufaigaluega.

*Na tuuina atu le Fesili ma ina ua manumalo le Ioe, na tulai loa le Tali atu a le Malo i le P.P.2013/2014 Nu.121, Lipoti a le Komiti o Galuega, Felauaiga ma Siosiomaga i le P.P.2013/2014 Nu.5, Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe faaiiina aso 30 Iuni 2012 ua faamaonia.*

**P.P.2014/2015 NU.64, TALI ATU A LE MALO I LE P.P.2013/2014 NU.119, LIPOTI A LE KOMITI O GALUEGA, FELAUAIGA MA SIOSIOMAGA I LE P.P.2013/2014 NU.4, FAAMATALAGA O SINI AUTU A LE FAALAPOTOPOTOGA O LE MALOSI FAA-ELETISE MO LE VAITAIMI 2013-2015**

**FOFOGA FETALAI:** Tulai mai lau Afioga i le Minisita mo Galuega, Felauaiga ma Atinae Eseeese.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai mo le silafia e le Maota atoa ai ma le faafofogaaga a le atunuu, ou te faitauina Tali o lo o tuuina atu i lenei Pepa.

**FOFOGA FETALAI:** Malie lau Afioga i le Minisita se i faatu muamua mai le lafo.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le P.P.2014/2015 Nu.64, o lo o tuuina atu ai Tali a le Malo i le P.P.2013/2014 Nu.119, Lipoti a le Komiti o Galuega, Felauaiga ma Siosiomaga i le P.P.2013/2014 Nu.4, Faamatalaga o Sini Autu a le Faalapotopotoga o le*

*Malosi Faa-Eletise mo le Vaitaimi 2013-2015 e tusa ai ma le Tulafono Tumau 54.*

*Faaluaina e le Minisita mo Leoleo ma Falepuipui, Minisita mo Punaoo Faanatura ma le Siosiomaga, Minisita mo Aoga, Taaloga ma Aganuu ma le Minisita mo le Soifua Maloloina.*

**FOFOGA FETALAI:** Tulai mai lau Afioga i le Minisita e saunoa i le Tali.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai;

**TALI ATU A LE MALO I LE P.P.2013/2014 NU.119, LIPOTI A LE KOMITI O GALUEGA, FELAUUAIGA MA SIOSIOMAGA I LE P.P.2013/2014 NU.4, FAAMATALAGA O SINI AUTU A LE FAALAPOTOPOTOGA O LE MALOSI FAA-ELETISE MO LE VAITAIMI 2013-2015.**

**1. Fautuaga a le Komiti:**

Silasila le Faalapotopotoga i le faatulagaina o sini autu e limataitaiina ai ana galuega faatino ina ia ogatasi ma aiaiga o lo o tuliloaina e lana Fuafuaga Autasi:

**Tali:**

- 1.1 E i ai le talitonuga o le Faalapotopotoga o lo o ogatasi ana sini autu e limataitaiina ai ana galuega faatino ina ia ogatasi ma aiaiga o lo o tuliloaina e lana Fuafuaga Autasi. Ae ua talia e le Faalapotopotoga le fautuaga ua tuuina mai.

**2. Fautuaga a le Komiti:**

Ia faatelevave le faagasologa o Poloketi a le Faalapotopotoga e pei o le faaagaina o le malosiaga eletise faafouina mo faamoemoega o se eletise gafataulimaina ma faatuatua e toomaga i ai ona o le siisii pea o le tau o le suau mo le gaosiina o le eletise.

**Tali:**

- 2.1 Ua maea ma komisi le 546Wp o le malosiaga mai le la e pei ona tatalaina i le Aso 11 Aperila 2014. O lenei poloketi ua vaevaeina i ni vaega se tolu (i) Tanugamanono – 150kWp, (ii) Vaitetele – 246kWp ma (iii) Salelologa – 150kWp. O lenei poloketi na faatupeina i se tupe faameaalofa mai le Malo o Iapani e tauala mai i le Pacific Energy Community Fund o lo o faatautaia e le Pacific Islands Forum Secretariat.
- 2.2 Ua maea le 250kWp o le malosiaga o le la i luga o le Gym 3 i Tuanaimato. Sa faatupeina lenei poloketi i se tupe faameaalofa mai le Malo o Niu Sila.

- 2.3 O lo o faagasolo le faapipiina o le 2,200kWp o le malosiaga o le la i le malae tutuu solofanua i Tuanaimato. O lea poloketi o lo o faatupeina i se tupe faameaalofa mai le Malo o Niu Sila.
- 2.4 O lo o faagsaolo le faapipiina o le 250kWp o le malosiaga o le la i Salelologa. O lea poloketi o lo o faatupeina i se tupe faameaalofa mai le Malo o Niu Sila.
- 2.5 O lo o faagasolo le faapipiina o le 400kWp o le malosiaga o le la i Asau. O lea poloketi o lo o faatupeina i se tupe faameaalofa mai le Malo o Niu Sila.
- 2.6 O lo o faagsolo le faapipiina o le 4,000kWp o le malosiaga o le la o lo o faatinoina e le Kamupani a le Green Power. Latou te gaosia le eletise ma faatau mai i le EPC.
- 2.7 O lo o faagasolo le faatalanoaina o le Feagaiga (Power Purchase Agreement) mo le 4,000kWp o le malosiaga o le la o lo o faatinoina e le Kamupani a le Solar mo Samoa ma faatau mai i le EPC.
- 2.8 O lo o faagasolo le faatinoina o le Power Purchase Agreement ma le Kamupani a le Biogen3 mo le 4,000kW mai le susunuina o laau ma faatau mai i le EPC.
- 2.9 O lo o faagasolo le faatalanoaina o le Power Purchase Agreement mo le 6,000kW mai le susunuina o pau taavale o lo o faatinoina e le Kamupani a le Samoa Tyre Recycle. Latou te gaosia le eletise ma faatau mai i le EPC.
- 2.10 O lo o faagasolo le faatalanoaina o le Power Purchase Agreement mo le 6,000kW mai le susunuina o le lapisi o lo o faatinoina e le Kamupani a le Village Life Energy. Latou te gaosia le eletise ma faatau mai i le EPC.
- 2.11 O lo o faagasolo le atinaeina o malosiaga o le suavai i (i) Faleaseela, (ii) Tafitoala, (iii) Tiapapata, (iv) Fuluasou, (v) Vaipu ma (vi) Faleata i Palauli.

### **3. Fautuaga a le Komiti:**

Ia mafai ona ausia le 5% o le faaitiitia o le eletise maimau (non-technical losses) i totonu o le vaitaimi fuafuaina o le Faamatalaga o Sini Autu (2013-2015) ona ua faamaonia e le Komiti le siisii pea o eletise maimau mai tausaga ua tuanai.

#### **Tali:**

- 3.1 O lo o faaauau pea galuega a le Faalapotopotoga mo le tuuaitiitia o le eletise maimau. Ua maea le System Loss Study sa faatinoina e le kamupani a le KEMA i le tausaga e 2011-2012 faatasi ai ma le Benchmarking sa faatinoina e le Pacific Power Association i le tausaga 2011-2012. O ia lipoti o lo o atagia ai o lo o feoololo le tulaga o le eletise leiloa e fua i isi atunuu o le Pasefika e

- ui ina tele pea se tulaga moomia mo le faaleleia atili. O se tasi lea o sini autu o le Fuafuaga Autasi o lo o galulue i ai le Faalapotopotoga ina ia ausia. Ua mafai nei ona ausia e le Faalapotopotoga le 3-5% le eletise leiloa (non-technical loss). O se matatia maoae lea ua ausia e le Faalapotopotoga. E momoli atu ai le faamalo ma le faafetai i le Komiti Faatonu, Pulega ma le Aufaigaluega.
- 3.2 Ua maea ona upgrade uma laina eletise ina ia tuuaititia le eletise leiloa i transformers ma laina eletise ina ua faatupulaia le eletise e momoli atu i laina eletise (feeder overloads) ma ua tulai mai ai le technical losses i le 6.67% o le eletise tuuina atu mo le faatauina.
  - 3.3 O lo o faagasolo galuega faifaipea i le siakiina o mita eletise mo i latou o lo o faaoga faasolitulafono le eletise, ma tuuina atu i le tulafono.
  - 3.4 O lo o faaauau le suiina o mita faitau ua faaletonu. Ua taofia foi le toe aumaia o mita cashpower. Ua faataitai nei nisi o mita totogi muamua o le JOY meter.
  - 3.5 Ua maea ona sui uma mita a le Afioga o Magiagi, Faleatiu ma Tanugamanono i Prepayments Meters.

Ma le faaaloalo.

*Na tuuina atu le Fesili ma ina ua manumalo le Ioe, na tulai loa le Tali atu a le Malo i le P.P.2013/2014 Nu.119, Lipoti a le Komiti o Galuega, Felauaiga ma Siosiomaga i le P.P.2013/2014 Nu.4, Faamatalaga o Sini Autu a le Faalapotopotoga o le Malosi Faa-Eletise mo le Vaitaimi 2013-2015*

**P.P.2014/2015 NU.69, TALI ATU A LE MALO I LE P.P.2013/2014 NU.88, LIPOTI A LE KOMITI O TUPE MAUA MA TUPE TOTOGI I LEP.P.2013/2014 NU.21, LIPOTI FAALETAUSAGA A LE FAALAPOTOPOTOGA INISUA TAU SOIFUA A SAMOA MO LE TAUSAGA FAALETUPE 2011/2012**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faamaonia e leni Fono Aoa le P.P.2014/2015 Nu.69, o lo o tuuina atu ai Tali a le Malo i le P.P.2013/2014 Nu.88, Lipoti a le Komiti o Tupe Maua ma Tupe Totogi i le P.P.2013/2014 Nu.21, Lipoti Faaletausaga a le Faalapotopotoga Inisua Tau Soifua a Samoa mo le Tausaga Faaletupe 2011/2012, e tusa ai ma le Tulafono Tumau 54.*

*Faaluaina e le Sui Palemia, Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.*

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai e tusa ai ma le Lipoti a le Palemene ua taua i luga ma fautuaga ua tuuina mai e uiga i le Lipoti Faaletausaga a le Faalapotopotoga Inisiua Tau Soifua a Samoa mo le Tausaga Faaletupe 2011/2012, ua tuuina atu ai nei Tali e tusa o fautuaga a le Komiti.

**TALI ATU A LE MALO I LE P.P.2013/2014 NU.88, LIPOTI FAALETAUSAGA A LE FAALAPOTOPOTOGA INISIUA TAU SOIFUA A SAMOA MO LE TAUSAGA FAALETUPE 2011/2012.**

**Fautuaga 1:**

Ia faatinoina ma uunaia malosi polokalame faalauiloa a le Faalapotopotoga e faalauiloa ai i le atunuu lautele le taua o le faia o Inisiua Tau Soifua, ma faamanuiaga eseese e agavaa i ai Sui Faisaofaga.

**Tali:**

O lo o faaauau pea le faatinoina o polokalame faalauiloa a le vaega o le Maketi a le Faalapotopotoga i luga o leitio, nusipepa ma le TV ina ia silafia ai e le atunuu lautele ituaiga Inisiua Tau Soifua ma le taua o le faia o se inisiua, ma faalauiloa atu ai foi ma faamanuiaga e agavaa i ai Sui Faisaofaga.

**Fautuaga 2:**

Ia faailoa ma uunaia malosi e le Faalapotopotoga o Inisiua Tau Soifua a Samoa i le atunuu lautele le taua o le tausisia ma faatumauina le teuina pea o a latou saofaga tau inisiua seia aulia tausaga faatapulaaina e matua ai (mature). E manatu le Komiti e ao ona faatauaina lea tulaga ina ia agavaa ai le aufai-inisiua i faamanuiaga tau seleni ma ponesi e maua i le vaitaimi e matua ai a latou saofaga.

**Tali:**

E taua tele le malamalama o sui faisaoaga i le aoga o le faia o se inisiua i le Faalapotopotoga Inisiua Tau Soifua a Samoa. E fautuaina foi le aufai saofaga ina ia taofiofi o latou inisiua seia matua (mature) ma agavaa ai i faamanuiaga pe a matutua (maturity) faatasi ai ma ponesi (bonus).

E tatau foi ona galulue faatasi tagata faigaluega uma a le Malo i le aoina faatasi mai lea o perime (premiums) mai totogi o le aufaigaluega. O se auala lea e fesoasoani ai i sui faisaoaga ma faatumauina ai le faaauauina lea o le totogiina o inisiua seia matutua.



**Fautuaga 3:**

Ia tulituliloa ma faasalalau faalauaitele i le atunuu atoa ma atunuu i fafo, suafa o i latou o lo o i ai pea i le Faalapotopotoga a latou saofaga po o inisiua tau soifua ma tutua ae le i talaina i tua.

**Tali:**

O lea faasalalau faalauaitele i Samoa ma atunuu i fafo mo le silafia o le atunuu lautele i luga o le TV, leitio ma nusipepa suafa o i latou o lo o i ai pea saofaga po o inisiua ua matutua (maturity) ae le i talaina i tua.

**Fautuaga 4:**

Ia soalaupuleina e le Pulega ma le Komiti Faafoe nisi auala mo le faalauteleina atu o lana auunaga i le faatinoina o isi inisiua e ese mai i inisiua tau soifua e pei ona faatinoina e le Faalapotopotoga i le taimi nei.

**Tali:**

O le a vaavaai totoa i ai le Pulega ma le Komiti Faafoe i nisi o ituaiga inisiua e ese mai i le vaega o mafai ona faatino i lalo o le Tulafono a le Faalapotopotoga Inisiua Tau Soifua 1976, aua le faalauteleina o le auunaga i le mamalu o le atunuu mo le faaleleia atili o le soifua lautele o le atunuu ma ona tagata.

**Fautuaga 5:**

Ia silasila le Pulega ma le Komiti Faafoe mo le toe iloiloina o pasene o tului (interest) o lo o faaee atu i luga o nonogatupe laiti o lo o agavaa i ai le aufai saofaga.

**Tali:**

O le a vaavaai totoa i ai le Pulega ma le Komiti Faafoe ma toe iloilo pasene o tului o lo o i ai nei i luga o nonogatupe laiti e agavaa i ai le aufai saofaga.

O le tali atoa lena lau Afioga.

*Na tuuina atu le Fesili ma ina ua manumalo le Ioe, na tulai loa le Tali a le Malo i le P.P.2013/2014 Nu.88, Lipoti Faaletausaga a le Faalapotopotoga Inisiua Tau Soifua a Samoa mo le Tausaga Faaletupe 2011/2012 ua faamaonia.*

**P.P.2014/2015 NU.70, TALI ATU A LE MALO I LE P.P.2013/2014 NU.65, LIPOTI A LE KOMITI O MATAUPU TAU AOGA, SAIENISI, FESOOTAIIGA MA FAAMATALAGA TEKONOLOSI I LE P.P.2011/2012 NU.58 & P.P.2011/2012 Nu.59, FUAFUAGA AUTASI A LE FALEMELI O SAMOA MO LE VAITAIMI 2012-2014 MA LE FAAMATALAGA O SINI AUTASI A LE FALEMELI O SAMOA MO LE VAITAIMI 2012-2014**

**FOFOGA FETALAI:** Tulai mai lau Afioga i le Minisita mo Fesootaiga ma Faamatalaga Faatekonolosi.

**Afioga Hon TUISUGALETAUA SOFARA AVEAU (Minisita mo Fesootaiga ma Faamatalaga Tekonolosi):** Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faamaonia e lenei Fono Aoa le P.P.2014/2015 Nu.70, o lo o tuuina atu ai Tali a le Malo i le P.P.2013/2014 Nu.65, Lipoti a le Komiti o Mataupu Tau Aoga, Saienisi, Fesootaiga ma Faamatalaga Tekonolosi i le P.P.2011/2012 Nu.58 & P.P.2011/2012 Nu.59, Fuafuaga Autasi a le Falemeli o Samoa mo le Vaitaimi 2012-2014 ma le Faamatalaga o Sini Autasi a le Falemeli o Samoa mo le Vaitaimi 2012-2014, e tusa ai ma le Tulafono Tumau 54.*

*Faaluaina e le Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.*

**FOFOGA FETALAI:** Tulai mai lau Afioga i le Minisita.

**Afioga Hon TUISUGALETAUA SOFARA AVEAU:** Lau Afioga i le Fofoga Fetalai, mo le silafia e le Maota atoa ai ma le faafofogaaga a le atunuu, ou te fia faitauina Tali o lo o tuuina atu i lenei Pepa.

**TALI ATU A LE MALO I LE P.P.2013/2014 NU.65, LIPOTI A LE KOMITI O MATAUPU TAU AOGA, SAIENISI, FESOOTAIIGA MA FAAMATALAGA TEKONOLOSI I LE P.P.2011/2012 NU.58 & P.P.2011/2012 Nu.59, FUAFUAGA AUTASI A LE FALEMELI O SAMOA MO LE VAITAIMI 2012-2014 MA LE FAAMATALAGA O SINI AUTASI A LE FALEMELI O SAMOA MO LE VAITAIMI 2012-2014.**

**Fautuaga 1:**

Uunaia pea le Polokalame Fuafuaina a le Faalapotopotoga mo faamoemoega ina ia mafai ona faaleleia le tulaga o ana tupe maua, aemaise o lana auunaga mo le atunuu lautele.

**Tali:**

O lo o faagasolo pea e le Falemeli o Samoa, le faatinoina uma o ana fuafuaga, e pei ona tuuina atu i lana Fuafuaga ma Sini Autasi mo le vaitaimi 2012-2014. O nei fuafuaga e aofia ai le faaleleia ma le faaauunaga o le tuuina atu o auunaga i Falemeli i nuu i tua, atoa ai ma Falemeli faa-itumalo i Savaii. O lo o faaauau foi ona ausia tupe

faasili e le Falemeli o Samoa, talu mai ona avea ma Faalapotopotoga Tumaoti a le Malo, i le tausaga e 2008.

**Fautuaga 2:**

Fautuaina le Faalapotopotoga, ina ia ave pea le faamuamua i le toe tapueina o vaega o lana auaunaga e fesootei ma ona matafaioi autu faaletulafono, ina ia faigofie ona taulai i ai le taumafaiga o isi atinae, ua fuafuaina mo le toe siitia o lana auaunaga.

**Tali:**

O lo o faaauau pea ona faaleleia e le Faalapotopotoga ana auaunaga autu ma matafaioi faaletulafono, e tauala i le toe faaleleia ma le faafouina o Falemeli faa-Itumalo i Savaii, o systems o lo o faatinoina ai galuega tau meli, atoa ai ma le aoaoina pea o le aufaigaluega, i tomai faapitoa ma tuuina atu auaunaga tau meli i le maualuga e tata ai. Peitai, o lo o tauave faatasi ma le faatosinaina mai, o nisi auaunaga fou, e fesoasoani ai i tulaga tau tupe maua a le Faalapotopotoga, ina ia mafai ai ona tuuina atu pea nei auaunaga i le mamalu o le atunuu i Savaii, i se tulaga faifaipea. E le gata i lea, ia mafai ona faaauau pea ona manaomia nei auaunaga ma ausia ai ana matafaioi faaletulafono, o le maua lea o tupe faasili a le Faalapotopotoga ma totogi atu dividends i le Malo.

**Fautuaga 3:**

Silasila le Faalapotopotoga i ni auala e faafetaiai ai faafitauli o lo o feagai ai i le tulaga o maketi o fesooteaiga ona o le televave o le tekonoosi fou ua oo mai i Samoa e pei ona i ai telefoni feaveai, o imeli, initaneti ma isi.

**Tali:**

O lo o faatinoina e le Faalapotopotoga nisi auaunaga fou e faaopoopo i ana auaunaga autu, e pei o auaunaga faafaletupe, o tupe faamomoli i Samoa ma atunuu mamao, o auaunaga faa-initaneti, o pili totogi mo le vai, e totogi mo le telefoni, eletise ma isi. O lenei taumafaiga, ina ia mautinoa e tulaga lelei ma manaomia pea ana auaunaga faatino. E le gata i lea, o le fesoasoani o nei auaunaga faaopoopo i tupe maua a le Faalapotopotoga, aemaise lava i le suiga o fesooteaiga ua faaogaina tele e le mamalu o le atunuu i lenei foi vaitau.

Ma le faaaloalo.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.70, Tali atu a le Malo i le P.P.2013/2014 Nu.65, Lipoti a le Komiti o Mataupu Tau Aoga, Saienisi, Fesooteaiga ma Faamatalaga Tekonoosi i le P.P.2011/2012 Nu.58 & P.P.2011/2012 Nu.59, Fuafuaga Autasi a le Falemeli o Samoa mo le Vaitaimi 2012-2014 ma le Faamatalaga o Sini Autasi a le Falemeli o Samoa mo le Vaitaimi 2012-2014 ua faamaonia.*

**FOFOGA FETALAI:** Ia, ou te manatu o lea ua tatou taunuu i le tatou taimi malolo faatulagaina, ae lafo atu i lau Afioga i le Palemia e tulai mai.

## LAFO MO LE FAAAUAUINA O ITULA FONO

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia tatou faia se malologa ona tatou toe omai lea faauma, e le o toe umi nai Pepa ia e totoe pe a ma se itula, ona tatou malolo ai lea mo lenei afiafi.*

*Faaluaina e le Minisita mo Galuega Tau Alamanuia ma Atinae a le Malo ma le Afioga i le Sui Palemia.*

*Na faamaonia le lafo.*

**FOFOGA FETALAI:** Ia, o lea ua sauni le tatou taumafataga o le afiafi. E momoli atu le agaga faafetai. O le a faataatia ese Taulumaga a le Fono Aoao Faitulafono mo lana malologa o le afiafi.

*Na faataatia ese Taulumaga a le Fono Aoao mo lana malologa i le itula e 7:02 i le po ma toe faaauau i le itula e 7:34 i le po.*

**FOFOGA FETALAI:** Ia, o lea ua tatou toe taliu mai i le tatou malologa masani. E i ai le faamoemoe ua maea ona palegaauau le taliga o le sua ma le tautega. E faamalulu atu foi i se taumafaiga vaivai a le Afioga i le Failautusi o le Fono.

E momoli atu foi le faafetai i le Malo ona o le manatu mai i le tatou galuega. E pei lava ona tatalo atu le Fofoga Fetalai i le amataga o le Fonotaga o leni masina ona o le tele ma le anoanoai o le tatou galuega o lo o faagasolo.

O leni afiafi, o lea ua logo 'i logo 'a le faafofoga a Samoa i le tele ma le anoanoai o mataupu ma mea uma sa tuufesili ai le atunuu e le gata i luga o leitio faasalalau, a o nusipepa. O lea ua aumai le tali a le Malo i nisi o Lipoti sa fuafuaina i le taimi talafeagai e tuuina mai ai, o lea ua tatou aleaga faatasi i leni afiafi. E momoli atu le faafetai tele i le onosai o lau Afioga i le Palemia ma lau Kapeneta, malo foi le onosai ma le faapalepale i le paia ma le mamalu o le tatou Maota. E le o toe umi, masalo na o nai itula ona tatou malolo ai lea.

**P.P.2014/2015 NU.71, TALI ATU A LE MALO I LE P.P.2013/2014 NU.100, LIPOTI A LE KOMITI O MATAUPU TAU AOGA, SAIENISI, FESOOTAIGA MA FAAMATALAGA TEKONOLOSI I LE P.P.2012/2013 NU.57, FUAFUAGA AUTASI FALEMELI O SAMOA 2013-2015 & P.P.2012/2013 NU.58, FAAMATALAGA O SINI AUTASI A LE FALEMELI O SAMOA 2013-2015**

**FOFOGA FETALAI:** Tulai mai le Minisita mo Fesootaiga ma Faamatalaga Tekonolosi.

**Afioga Hon TUISUGALETAUA SOFARA AVEAU:** Faafetai i lau Afioga i le Fofoga o le Maota mo le avanoa aemaise foi o le faiga malologa e pei ona i ai le faasiliga malosi.

Ou te tulai atu ma le faaaloalo lau Afioga i le Fofoga Fetalai e faatu le lafo, *Ina ia faamaonia e leni Fono Aoa le P.P.2014/2015 Nu.71 o lo o tuuina atu ai Tali a le Malo i le P.P.2013/2014 Nu.100, Lipoti a le Komiti o Mataupu Tau Aoga, Saienisi, Fesootaiga ma Faamatalaga Tekonolosi i le P.P.2012/2013 Nu.57, Fuafuaga Autasi Falemeli o Samoa 2013-2015 & P.P.2012/2013 Nu.58, Faamatalaga o Sini Autasi a le Falemeli o Samoa 2013-2015, e tusa ai ma le Tulafono Tumau 54.*

*Faaluaina e le Minisita mo Galuega Tau Alamanuia ma Atinae a le Malo, Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo le Soifua Maloloina.*

**FOFOGA FETALAI:** Tulai mai lau Afioga i le Minisita.

**Afioga Hon TUISUGALETAUA SOFARA AVEAU:** Lau Afioga i le Fofoga Fetalai, mo le silafia e le Maota atoa aemaise foi o le faafofogaaga a le atunuu, ou te faitauina Tali o lo o tuuina atu i leni Pepa.

**TALI ATU A LE MALO I LE P.P.2013/2014 NU.100, LIPOTI A LE KOMITI O MATAUPU TAU AOGA, SAIENISI, FESOOTAIGA MA FAAMATALAGA TEKONOLOSI I LE P.P.2012/2013 NU.57, FUAFUAGA AUTASI FALEMELI O SAMOA 2013-2015 & P.P.2012/2013 NU.58, FAAMATALAGA O SINI AUTASI A LE FALEMELI O SAMOA 2013-2015.**

E tusa ai ma fautuaga na tuuina mai e le Komiti e uiga i le Fuafuaga Autasi a le Falemeli o Samoa 2013-2015, ma e tali atu le Falemeli o Samoa e faapea:

1. Mo le fautuaga muamua:
  - I. O lo o faaauau pea le faalauiloaina o auaunaga a le Falemeli o Samoa i luga o leitio ma televise mo le mamalu o le atunuu. E faapea foi ona asiasia e le vaega o Maketi ma Fefaatauaiga, o paaga faapisinisi autu a le Falemeli, ina ia mautu ma mafana fesootaiga faapisinisi, ma faalauiloa ai auaunaga fou.
  - II. Ua mafai ona faatosina mai nisi auaunaga fou e faatinoina e le Falemeli i ona lala i Matafele ma Savaii, i ana faiga paaga ma le aufaapisinisi. O nei auaunaga, e aofia ai tupe faamomoli, talaina o penisione a le aumatutua, auaunaga faafaletupe e tauala mai i le Faletupe o Samoa (NBS), faatauina o iunite i le Faaputugatupe o Mavaega Tausi o Samoa, ma isi.
  - III. Ua mafai foi ona sainia faiga paaga ma pisinisi i atunuu mamao mo Tupe Faamomoli mai so o se atunuu o le lalolagi, faatasi ai ma le faiga paaga ma le Kamupani meli tumaoti i Ausetalia.
2. O le fautuaga lona lua i le faatinoina o le Poloketi o le Postcode e faapea
  1. O lea ua maea le poloketi mo le Postcode a Samoa, ma faalauiloa aloaia mo le faaogaina e le mamalu o le atunuu i

le Aso 15 Aperila 2014. O lenei poloketi, e le gata ina ia faaitiitia ai meli lafo sese, ae faapea foi lona faaaogaina mo oloa e faatauina i luga o initaneti.

Ma le faaaloalo i lau Afioga.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.71, o lo o tuuina atu ai Tali a le Malo i le P.P.2013/2014 Nu.100, Lipoti a le Komiti o Mataupu Tau Aoga, Saienisi, Fesootaiga ma Faamatalaga Tekonolosi i le P.P.2012/2013 Nu.57, Fuafuaga Autasi Falemeli o Samoa 2013-2015 & P.P.2012/2013 Nu.58, Faamatalaga o Sini Autasi a le Falemeli o Samoa 2013-2015 ua faamaonia.*

**P.P.2014/2015 NU.72, TALI ATU A LE MALO I LE P.P.2013/2014 NU.124, LIPOTI A LE KOMITI O FAAFOEGA TAU PULEGA A LE MALO I LE P.P.2011/2012 NU.42, LIPOTI FAALETAUSAGA A LE FALEMELI O SAMOA MO LE TAUSAGA FAALETUPE 2009/2010**

**FOFOGA FETALAI:** Tulai mai lau Afioga i le Minisita mo Fesootaiga ma Faamatalaga Tekonolosi.

**Afioga Hon TUISUGALETAUA SOFARA AVEAU:** Lau Afioga i le Fofoga Fetalai ou te tulai atu e faatu le lafo, *Ina ia faamaonia e lenei Fono Aoa le P.P.2014/2015 Nu.72, o lo o tuuina atu ai Tali a le Malo i le P.P.2013/2014 Nu.124, Lipoti a le Komiti o Faafoega Tau Pulega a le Malo i le P.P.2011/2012 Nu.42, Lipoti Faaletausaga a le Falemeli o Samoa mo le Tausaga Faaletupe 2009/2010, e tusa ai ma le Tulafono Tumau 54.*

*Faaluaina e le Minisita mo Galuega Tau Alamanuia ma Atinae a le Malo, Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo le Soifua Maloloina.*

**FOFOGA FETALAI:** Tulai mai lau Afioga i le Minisita.

**Afioga Hon TUISUGALETAUA SOFARA AVEAU:** Lau Afioga i le Fofoga Fetalai, mo le silafia e le Maota atoa ma le faafofogaaga a le atunuu, ou te faitauina Tali o lo o tuuina atu i lenei Pepa.

**TALI ATU A LE MALO I LE P.P.2013/2014 NU.124, LIPOTI A LE KOMITI O FAAFOEGA TAU PULEGA A LE MALO I LE P.P.2011/2012 NU.42, LIPOTI FAALETAUSAGA A LE FALEMELI O SAMOA MO LE TAUSAGA FAALETUPE 2009/2010.**

**Fautuaga 1:**

Ia faaauau ma uunaia malosi le auaunaga o lo o faatinoina e le Pulega o le Falemeli o Samoa mo le atunuu, aemaise lava i nuu i tua, ona o le toatele o le atunuu e le maua ni masini komepiuta e avanoa ai e faaoga i fesootaiga tau tekonolosi faaonaponei.

**Tali:**

O lo o faaaauau pea le faaleleia o Falemeli i nuu i tua mo le tuuina atu o auaunaga lelei mo le mamalu o le atunuu. Ua i ai foi auaunaga faainitaneti i le Falemeli i Salelologa, Falemeli i Tuasivi, ma le Falemeli i Fagamalo. O Falemeli i Asau ma Salailua, ua fuafuaina foi e faatuina ai auaunaga faainitaneti, pe a oo atu i ai laina o fesootaiga faainitaneti (Broadband).

**Fautuaga 2:**

Ia faatinoina ni polokalame faalauiloa a le Pulega mo le faatosina mai o le mamalu o le atunuu e faaoga lana auaunaga aua le siitia ai o ana tupe maua.

**Tali:**

O lo o faaaauau pea polokalame faalauiloaina, i auaunaga eseese a le Falemeli o Samoa, i luga o leitia ma televise. O lo o faaaauau foi ona faalauiloa atu le Falemeli o Samoa, mo faiga paaga ma pisinisi tumaoti i atunuu mamao, e fesoasoani ai i le tuuititia pea o meli lafo, i totonu o si o tatou atunuu.

Ma le faaaloalo.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.72, Tali a le Malo i le P.P.2013/2014 Nu.124, Lipoti a le Komiti o Faafoga Tau Pulega a le Malo i le P.P.2011/2012 Nu.42, Lipoti Faaletausaga a le Falemeli o Samoa mo le Tausaga Faaletupe 2009/2010 ua faamaonia.*

**P.P.2014/2015 NU.74, TALI ATU A LE MALO I LE P.P.2013/2014 NU.120, LIPOTI A LE KOMITI O OFISA O LE PALEMENE I LE P.P.2012/2013 NU.5 & P.P.2013/2014 NU.2, LIPOTI FAALETAUSAGA O LE PENISIONE O LE PALEMENE MO LE TAUSAGA 2010/2011 MA LE TAUSAGA 2011/2012**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le P.P.2014/2015 Nu.74 o lo o tuuina atu ai Tali a le Malo i le P.P.2013/2014 Nu.120, Lipoti a le Komiti o Ofisa o le Palemene i le P.P.2012/2013 Nu.5 & P.P.2013/2014 Nu.2, Lipoti Faaletausaga o le Penisione o le Palemene mo le Tausaga 2010/2011 ma le Tausaga 2011/2012, e tusa ai ma le Tulafono Tumau 54.*

*Faaluaina e le Sui Palemia, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.*

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ou te tulai atu e tuuina atu ma le faaaloalo Tali tusitusia a le Ofisa o le NPF i mataupu ua fautuaina o lo o tuuina mai i le Lipoti e pei ona taua i luga ma o le a faagasolo atu i numera e pei ona i ai i lea Lipoti.

**TALI ATU A LE MALO I LE P.P.2013/2014 NU.120, LIPOTI A LE KOMITI O OFISA O LE PALEMENE I LE P.P.2012/2013 NU.5 & P.P.2013/2014 NU.2, LIPOTI FAALETAUSAGA O LE PENISIONE O LE PALEMENE MO LE TAUSAGA 2010/2011 MA LE TAUSAGA 2011/2012.**

**Fautuaga 1:**

Silasila totoa le Malo i ni avanoa e auina atu ai nai alo ma fanau i atunuu i fafo i le taimi nei mo ni polokalame faale-aoaoga po o ni avanoa e aoaoina ai le tomai ma le poto faapitoa i tulaga tau tupe o Penisione. Ua tatau foi ona uunaia ma faamalosi se Polokalame mo lea Tomai Faapitoa i le Iunivesite Aoao o Samoa ina ia foia ai le auina mai o isi tomai faapitoa mai fafo mo lea auunaga, ma faasaoina ai foi nisi vaegatupe a le atunuu o lo o tofogi ai latou mai fafo.

**Tali a le NPF i le Fautuaga 1:**

E faamauina le finagalo faaalua o le Komiti mamalu e pei ona tuuina mai faa-fautuaga i le Ofisa nei.

Mo le silafia, sa oo i ai feutanaiga ma sailiiliga a le Komiti Faatonu ma le Pulega i nai tausaga ua mavae atu, ona o se tofa na ae, e auina se tagata faigaluega a le NPF, e aoga ma koloni mai i lenei tomai faapitoa Ausetalia po o Niu Sila.

Na afua lenei sailiiliga ona o le manatu e pei ona faaalua e le Komiti mo le Palemene, ia faasaoina tpe a le Penisione Faa-Palemene, o lo o tofogi ai lenei auunaga faapitoa.

Peitai ane, i le maea ai o sailiga ma fesootaiga ma le Ofisa o Sikolasipi a le Malo, na faailoa mai ai, e fai lava si maualuga o tulaga tau aoaoga e tatau ona ausia muamua e se tasi e auina atu e aoga faapitoa mo lenei tomai.

I le maea ai o le 3-4 tausaga muamua, e moomia le toe aoga ma galue ai pea i atunuu i fafo o lea sui, mo le puepueina o le tomai masani i galuega faatino.

Ona o ia tulaga, aemaise ai o le tau e faaoga ma tasi ai le nofo ai i fafo o se Sui faigaluega mai le NPF, ua toe faapafala ai lenei finagalo na ae, ae manatu ai e tuu atu ia i le Ofisa o Sikolasipi a le Malo e tagai i ai, faatasi ai ma le Iunivesite Aoao o Samoa, ina ia i ai ni alo o le atunuu e filifilia e aotauina i lenei tomai faapitoa i le lumanai.



E manatu le Ofisa, ona pau lea o se auala e mafai ai ona foia le togoti atu o tupe i Konesale faapitoa, latou te iloiloaina le lelei au iluma o le Penisione Faa-Palemene, ma tuuina mai ni fautuaga mausali, e fuafua i ai le faagasologa o auunaga faapenei.

E le gata i lea, e tusa pe i ai se tasi o le afaigaluega e i ai le potu faapitoa, e tatau ona faatinoina se iloiloga tutoatasi (independent actuarial review) ina ia iloa ai le taatiaga manino o aseta a le NPF pe talafeagai ma penisione fuafuaina.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.74, Tali atu a le Malo i le P.P.2013/2014 Nu.120, Lipoti a le Komiti o Ofisa o le Palemene i le P.P.2012/2013 Nu.5 & P.P.2013/2014 Nu.2, Lipoti Faaletausaga o le Penisione o le Palemene mo le Tausaga 2010/2011 ma le Tausaga 2011/2012 ua faamaonia.*

**P.P.2014/2015 NU.75, TALI ATU A LE MALO I LE P.P.2013/2014 NU.66, LIPOTI A LE KOMITI O MATAUPU TAU AOGA, SAIENISI, FESOOTAIIGA MA FAAMATALAGA TEKONOLOSI I LE P.P.2012/2013 NU.6, P.P.2012/2013 NU.7 & P.P.2012/2013 NU.8, LIPOTI FAALETAUSAGA A LE MATAGALUEGA O AOGA, TAALOGA MA AGANUU MO TAUSAGA FAALETUPE 2008/2009, 2009/2010 MA LE 2010/2011**

**FOFOGA FETALAI:** Tulai mai lau Afioga i le Minisita mo Aoga, Taaloga ma Aganuu.

**Afioga Hon MAGELE MAULIU:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le P.P.2014/2015 Nu.75 o lo o tuuina atu ai le Tali a le Malo i le P.P.2013/2014 Nu.66, Lipoti a le Komiti o Mataupu Tau Aoga, Saienisi, Fesootaiga ma Faamatalaga Tekonolosi i le P.P.2012/2013 Nu.6, P.P.2012/2013 Nu.7 & P.P.2012/2013 Nu.8, Lipoti Faaletausaga a le Matagaluega o Aoga, Taaloga ma Aganuu mo Tausaga Faaletupe 2008/2009, 2009/2010 ma le 2010/2011, e tusa ai ma le Tulafono Tumau 54.*

*Faaluaina e le Minisita mo le Soifua Maloloina, Minisita mo Punaoa Faanatura ma le Siosiomaga ma le Minisita mo Leoleo ma Falepuipui.*

**FOFOGA FETALAI:** Tulai mai lau Afioga i le Minisita mo Aoga, Taaloga ma Aganuu.

**Afioga Hon MAGELE MAULIU:** Lau Afioga i le Fofoga Fetalai, o le tali atu lea a le Malo i le fautuaga a le Komiti.

**TALI ATU A LE MALO I LE P.P. 2013/2014 NU. 66, LIPOTI A LE KOMITI O MATAUPU TAU AOGA, SAIENISI, FESOOTAIIGA MA FAAMATALAGA TEKONOLOSI I LE P.P.2012/2013 NU. 6, P.P. 2012/2013 NU. 7 & P.P.2012/2013 NU.**

**8, LIPOTI FAALETAUSAGA A LE MATAGALUEGA O AOGA, TAALOGA MA AGANUU MO TAUSAGA FAALETUPE 2008/2009, 2009/2010 MA LE 2010/2011.**

1. **Faamalosia aiaiga o le Tulafono o lo o faamalosia ai le auai atu o tamaiti i le aoga i itula aoga, ona o lo o molimauina nisi o tamaiti e le o usitaia aiaiga o le Tulafono. E tatau foi ona i ai ni aiaiga mo tamaiti o lo o faaaoga i faatauga oloa i nofoaga faitele i taimi e tuua ai le aoga.**

**Tali:**

O polokalame nei o lo o faatino e le Matagaluega e tali atu ai i le Tulafono e faamalosia le auai uma o tamaiti i le aoga:

*i. Totogiina o Pili Aoga (SSFGS) i Aoga Tulagalua.*

O le polokalame leni na amata faalauiloa i le 2010, ma o lo o faatupeina e Malo o Ausetalia ma Niu Sila, ma le Malo o Samoa. Na amata faatupe e Niu Sila ma Ausetalia i le tausaga muamua, ma lagolago ai loa le Malo o Samoa i le tausaga lona lua. E faamaea le fesoasoani a Niu Sila ma Ausetalia i le 2014 ona tauave atoa loa e le Malo o Samoa leni polokalame. O leni faamamaavega ua ave ai le faataua i le lagolagoina o Tulaga Moomia ma ona naunautai e aofia ai:

- (a) Totogi ai e le Malo pili aoga mo tamaiti aoga i aoga tulagalua (a le Malo ma Ekalesia)  
 (e) ave le fesoasoani e lagolago ai aoga e ala i seleni e faatino ai galuega aua le faaleleia o aoga.

Talu ona amata leni polokalame, ua maitauina le siitia o le tulaga o alagaoa mo le aoaoina i aoga. Ua mafai foi ona faatinoina e Pule Aoga faaiuga talafeagai mo le faatauina o alagaoa ma aseta e lagolago ai polokalame i totonu o potu aoga. O leni foi polokalame ua mafai ai ona faamautuina le galulue faatasi o aoga ma Komiti o Aoga. O le vaai mamao ina ia alu aoga fesoasoani o lo o faatupe ai aoaoga ina ia siitia le tulagao aoaoga i aoga tulagalua, faapea ai ma le siitia o le tulaga o tamaiti e aoaoina mai lea tausaga i lea tausaga e pei ona faailoa atu i le Siata o lo o i lalo.

**Aofai o Tamaiti mo Aoga uma, 2004 – 2013**

Year	Primary								Total
	1	2	3	4	5	6	7	8	
2004	5,704	5,257	5,383	5,134	5,045	4,652	4,620	4,378	40,173
2005	5,471	5,130	5,153	5,248	5,041	4,921	4,591	4,519	40,074
2006	5,407	4,867	4,895	5,099	5,146	4,835	4,810	4,461	39,520

2007	5,273	4,930	4,855	4,922	5,066	5,032	4,789	4,601	39,468
2008	5,239	4,919	4,895	4,955	4,789	4,969	4,906	4,704	39,376
2009	5,263	4,830	4,983	4,925	4,899	4,763	4,896	4,820	39,379
2010	6,086	5,106	4,970	4,953	4,914	4,842	4,842	4,887	40,600
2011	5,470	5,169	4,849	4,906	4,735	4,729	4,571	4,683	39,114
2012	5,449	5,059	5,130	4,843	4,748	4,640	4,626	4,578	39,073
2013	5,975	5,263	5,145	5,199	4,818	4,782	4,645	4,711	40,538

*Source: MESC Statistical Digest 2013*

ii. *Polokalame Faalauiloa i Nuu ma Afioga.*

*O lo o faaauau pea polokalame faaleaoga ma faalauiloa i nuu ma afioga aua le faamalamalamaina atili ma faalauiloa le tulaga o le Tulafono. O nei polokalame o lo o galulue faatasi ai ma le Matagaluega o Tina ma Tamaitai, Atinae o Nuu ma Agafesootai, ma le Matagaluega o Leoleo ma Falepuipui.*

iii. *Asiasiga o le taulaga ma nuu tulalata i Apia i taimi o aoga.*

*O lo o faagasolo foi polokalame faalauiloa mo le Tulafono mo Aoga 2009. O nei polokalame e aofia ai:*

- *Faatalatalanoaga i le TV/Lali*
- *Faatalatalanoaga i le Leitio*
- *Faatalatalanoaga ma Sui o Nuu/Pulenuu/Sui Tamaitai o Nuu*
- *Polokalame faaleaoga i nuu ma afioga*

v. *Tulafono Faatonutonu mo le Tulafono mo Aoga 2009.*

Ua amata le galuega o le tuufaatasia o Tulafono Faatonutonu mo le Tulafono mo Aoga 2009. O nei Tulafono Faatonutonu e lagolagoina ai le Tulafono mo Aoga ma ona aiaiga faaletulafono.

**2. Fautuaina le Matagaluega ina ia taumafai pea e saili po o fea tonu o lo o faapogai mai ai le tulaga faaletonu o iuga o suega a tamaiti. Tatau foi ona uunaia pea Asiasiga e tuliloa ai le faatinoga o le galuega faafaiaoga i aoga uma a le atunuu, aemaise lava i Aoga Tulagalua.**

i. *Fautuina le Vaega e Mataitu, Lauililiu ma iloiloga galuega a le faiaoga (MERD).*

Ua i ai nei le Vaega e Mataitu, lauiliu ma iloilo le galuega a le faiaoga i le saofaiga a le Matagaluega. O lenei Vaega e patino tonu la

latou auaunaga i le mataituina, lauilu ma iloilo galuega a le faiaoga pe o talafeagai ma lelei ina ia ausia tulaga moomia (standards). O i latou foi e fautuaina aoaoga talafeagai mo le aufaigaluega i aoga. O le isi a latou matafaioi o le iloilo lea o le tulaga o lo o i ai le galue a faiaoga taitoatasi.

O lenei foi Vaega o le a nafa ma le lesitalaina faaletulafono ma faamaonia faiaoga i totonu o Samoa.

*ii. Talanoaina le Tulafono mo Faiaoga.*

O lo o faagasolo foi galuega mo le talanoaina o le Tulafono mo faiaoga. Ua maea tapenaina le Tulafono mo faiaoga, ma o le a amatalia faatalalanoaga ma faiaoga ma le mamalu lautele o le atunuu ia Aperila 2014. O le faamoemoe, e faataatia i le Laulau a Fono a le Palemene lenei Tulafono ae le i maea le 2014.

O lenei Tulafono e aofia ai le:

- Resitalaina faaletulafono o faiaoga uma e galulue i Samoa
- Faatuina lea o le Fono Aoa (Council) mo le vaaia lelei o le auaunaga faafaiaoga i totonu o Samoa.
- Amioga Pulea ma Tulafono faale-faiaoga
- Faatulagaga o le Galuega faa-faiaoga.

*iii. Taiala Aoa o le Atinae o Faiaoga (NTDF)*

O le tulaga lelei o faiaoga, o se tasi lea o vaega taua e fua i ai le aoaoina o fanau. O le faiga faavae o le Auivi o Galuega a Faiaoga o se auala lea ua tuufaatasia e vaaia lelei ai le tulaga lelei o faiaoga. O lenei taiala e aofia ai le tuufaatasia ma le faatino tulafono e resitala ai faiaoga, mataitu ai tulaga lelei o faiaoga, totogi ma aoaoga talafeagai. O le auga ina ia siitia le tulaga o le auaunaga faafaiaoga, ma faaleleia tulaga i avanoa faigaluega, aemaise o le tomai ma agavaa mo le galuega faafaiaoga.

O le Taiala Aoa o le Atinae o Faiaoga o se faiga faavae o le Auivi o Galuega a Faiaoga aua le vaaia lelei o faiaoga, iloilo tulaga lelei o le galuega ma siitia tulaga e faatino ai le galuega ma faatalanoa totogi. O le faatinoina o le NTDF e mafai ai ona faatino le 'teacher appraisal processes' po o le mataituina lea o le galue a le faiaoga aua le ofoina o metotia ma aoaoga talafeagai, aemaise o le toe iloilo o le faatinoina o le galuega i totonu o aoga mo le siitia o le aoaoina o alo ma fanau.

*iv. Suesuega i le Matematika ma le Numera.*

Ua maea faatino le suesuega i le tulaga o lo o i ai le Numera ma le Matematika i totonu o Aoga Tulagalua. O lenei suesuega na faatino e le Iunivesite Aoa o Samoa ma o lo o faailoa mai ai itu e tataua ona toe silasila i ai le Matagaluega i le aoaoina o le Numera i totonu o aoga tulagalua. O lo o faailoa mai foi lenei lava suesuega le tulaga o

lo o i ai le tomai o faiaoga i le aoaoina o le Matematika i aoga, ma ofo mai ai foi auala e ao ona toe silasila i ai i latou o lo o faatinoina aoaoga mo faiaoga.

O le suesuega foi lenei o lo o faailoa mai ai mafuaaga o le faaletonu o le aoaoina o le Matematika i aoga tulagalua. O lo o galulue le Matagaluega e faatino fautuaga o lenei suesuega.

v. *Faatulagaga o Tomai ma Agavaa o Faafaiaoga (Teacher Standards).*

Ua maea tapena foi le faatulagaga o tomai ma agavaa faafaiaoga aua le mataituina ma le iloiloina o le galuega faafaiaoga. O lenei faatulagaga o lo o atagia ai agavaa moomia ma tomai talafeagai mo le faatinoina o le galuega faafaiaoga i totonu o aoga.

O le faatulagaga o Tomai ma Agavaa o Faiaoga e aofia uma ai faiaoga i Samoa. O lo o faailoa ai manaoga talafeagai (Criteria) mo le galuega faafaiaoga e atagia ai le aoaoina o alo ma fanau, e afua mai i faatinoga ma aoaoga lelei.

O le Faatulagaga o Tomai ma Agavaa o Faiaoga e faaautu lea i tomai ma le agavaa, o le silafia ma amioga lelei e faatino ai le galuega. E faailo foi nei faatulagaga i faiaoga pasi, faiaoga resitala (pe a maea le lua tausaga o galue i totonu o aoga) ma le faiaoga ua lelei atoatoa lana auaunaga.

O faatulagaga o tomai ma agavaa e lauilu ai ma iloilo le auaunaga ma le galue a le faiaoga pe a maea le lua tausaga o galue i totonu o aoga, ma mafai ai ona siitia lona tulaga e ave ai o se faiaoga resitala faamaonia.

vi. *Mataupu Aoaoina fou mo Aoga Tulagalua.*

O le 2012 na amata faatino ai le faaaogaina o Tusi Aoga mo Mataupu Aoaoina e pei ona i ai le galuega sa faatino e suia ai mataupu mo aoga tulagalua, ae faamamaluina le 2013. O lenei polokalame na tuufaatasia ai tusi aoga mo mataupu e 7, ua aofia ai ma mataupu fou e lua, o le Soifua Maloloina ma Taaloga ma le Faatinoga o Lagona (Expressive Arts) e faaopoopo i le lima sa i ai muamua o le Saienisi, Suesuega i Olaga o Tagata, Matematika, Gagana Samoa, ma le Gagana Peretania. O le sini o mataupu aoaoina ua ave ai le faataua i le tamaitiiti ma lona ola aoaoina.

vii. *Polokalame mo le Faitau Tusi ma le Tusitusi i Aiga (Home School Literacy Programme).*

O lenei polokalame ua aotauina ai sui o le atunuu e aofia ai ma faletua o faafeagaiga ina ia mafai ai ona o latou ofo atu le fesoasoani i le faitautusi ma le tusitusi a tamaiti i nuu ma afioaga. Na amata

aoaoga i faletua o faafeagaiga ona o la latou pitolaau i aoga a faifeau ma aoga Aso Sa e faaofi ai le faitautusi. O lenei polokalame o lo o faagasolo i le taulaga i Apia, ma le naunautaiga ina ia faasoa atu i nuu i tua.

*viii. Komiti o le Faitautusi ma le Tusitusi (Literacy Task Force).*

O le Komiti o le Faitautusi ma Tusitusi, o la latou matafaioi o le ofo atu lea o le fesoasoani mo faiaoga o lo o aoaoina tamaiti e faailoa mai e le Suega a le SPELL 1 ma le SPELL 2 o lo o i ai i le tulaga e le lelei le faitautusi ma le tusitusi. E faagasolo le polokalame i aoga tulagalua e faatino ai le aoaoina o le faaleoina o upu (phonics) ma le iloilo o mataitusi ia mafai ona iloa e le tamaititi foliga o mataitusi ma faaleo ina ia mafai ai ona soo ma maua ai le fuaiupu.

*ix. Polokalame mo le faaleleia o le Faitautusi ma le Tusitusi (PaBER).*

O le polokalame mo le faaleleia o le faitautusi ma le tusitusi (PaBER) o se polokalame na pasia e le Fono a Minisita o Aoga a le Pasefika ia Oketopa 2010, ae faatupeina e le Malo o Ausetalia. O lenei polokalame e amata faatitai ia Samoa, Papua Niu Kini ma Solomona, e sailiili ai auala talafeagai e siitia ai le tulaga o le faitautusi ma le tusitusi mo alo ma fanau o le Pasefika. Na amata le polokalame ia Iulai 2012. O lenei foi Polokalame o le a fesoasoani ia i latou e tuufaatasia faiga faavae i faamaumauga talafeagai e faamalositia ai auala mo le siitia o tomai ma agavaa o tamaiti o le Pasefika.

E fa vaega taua o lenei polokalame: (a) Tulaga lelei o faiaoga; (e) Mataupu Aoaoina ma Alagaoa; (i) Faafoega lelei ma le Vaaiia lelei o Aoga; (o) Auala o Fuataga.

**3. Silasila totoa le Matagaluega i le taua o lona sao i le faafoega o Aoga i nuu i tua, ina ia maua le femalamalamaai o Komiti o Aoga ma Faiaoga ina ia mausali ai le galuega faatasi mo le faaleleia o le auaunaga aua le lumanai manuia o alo ma fanau ma le tulaga saogalemu o faleaoga mo fanau aoga.**

*i. Maliega ma Aoga (School Agreements)*

Ua maea ona toe iloilo Maliega ma Komiti o Aoga mo le faamautuina o le galulue faapaaga a le Matagaluega ma Komiti o Aoga i aoga taitasi.

*ii. Taiala o Tulaga Moomia mo le Fausia o Faleaoga.*

O se tasi lenei o Vaega taua o le fesoasoani ma le lagolago o lo o ofoina mai e le Malo o Ausetalia mo le fausia o aoga sa aafia i le afa o Eveni i le 2012, o le tuufaatasia lea o se Taiala faigofie mo aoga. O

nei Taiala e faaautu i le faafaigofieina o faamatalaga ma tulaga moomia mo faleaoga fou i galuega atinae i Samoa, ma le faatinoina o maliliega. O nei Taiala ma ona poloaiga e aofia uma ai Faalapotopotoga e fuafua e fausia faleaoga o nuu ma afioaga, Komiti o Aoga, paaga mai fafo ma galuega atinae.

iii. *Tapulaa Moomia (MSS).*

O le siitia ma le faaleleia o aoaoga e le o se mataupu fou. E tuu faatasi ai le *'Whole School Approach'* aua le faaleleia o aoga. E tolu vaega taua o leni taumafaiga: (a) ia mulimulitai i se faatinoga o se ata faataitai o fuafuaga faaletausaga mo le faaleleia o aoga, (e) siitia le tulaga lelei o le vaai ma le faatautaiga o aoga, (i) o se maliliega e fesootei ai le faaleleia o aoga, atinae o le auaunaga ma le faataua a le Matagaluega.

O Tapulaa Moomia o se auala ua taumafai e fesoasoani ai ma faailo tulaga o i ai aoga aua le silafia e le Pule Aoga, Komiti o Aoga, Vaega mo le Faafuaga o Aoga, faapea faiaoga aua le lagolagoina o le aoaoina ma le faatinoina o galuega i aoga. O le Tapulaa Moomia o manaoga talafeagai o le tulaga e tataua ona i ai aua le aoaoina o alo ma fanau. E fa vaega o leni taumafaiga: (i) Siosiomaga o le Aoga; (ii) aoaoina ma le vaai lelei o le aoga; (iii) Tomai ma Agavaa o le Faiaoga, i auala ma metotia e faatinoina ai le Galuega; ma le (iv) Fuaataga o Galuega a Tamaiti. O nei vaega e fua i ai le tulaga o le ausia ma le lelei o i ai le aoga.

**4. Silasila i le faafitauli o le toagaogao o Faiaoga, ina ia mafai ona o faatasi le faaleleia o le Polokalame mo Aoaoga (Curriculum) ma le i ai o faiaoga agavaa mo le faatinoina o le galuega.**

i. *Faalauteleina o le Tomai i Mataupu o le Faasaienisi (Science Up skilling – USP).*

O leni polokalame ua galulue faatasi ai le Matagaluega ma le Iunivesite o le Pasefika i Saute (USP). E totogiina e le Malo o Samoa avanoa e aotauina ai faiaoga e 60 mo leni polokalame – 50 o faiaoga o aoga a le Malo, ma le 10 mo aoga a Ekalesia. O faiaoga o le a aoaoina ma faamanuiaina i faailoga faasaienisi.

O le polokalame e ofoina e faalautele ai le tomai o faiaoga o lo o ua galulue i aoga i le faasaienisi. Ua fuafua foi le faatinoina o le polokalame e faaoga ai masini tekonoosi e aoga mai ai faiaoga i nuu ma afioaga o aumau ai ma galulue, ae faatoa mafuta ma le faiaoga i taimi o tuuaga a aoga.

O lo o faaauau foi le polokalame mo le aotauina o faiaoga i le Iunivesite Aoao o Samoa.

ii. *Faiaoga Lagolago (Teacher Mentors).*

O faiaoga nei ua aotauina e ofo le lagolago ma le fesoasoani i faiaoga fou a o amata ai le galuega faafaiaoga. O i latou nei o lo o galulue i aoga. E fesoasoani foi i le tapenaina o le faiaoga fou i auala uma ma tapulaa moomia e mafai ai ona resitala ma avea ma faiaoga faamaonia.

iii. *Avanoa Sikolasipi.*

O le tausaga e 2015 e amata ai se polokalame faataitai (pilo programme) e ala mai ai avanoa sikolasipi a Ausetalia ma Niu Sila, ma ua ave i ai le faamuamua i le Vaega o Aoaoga ma le Vaega o le Soifua Maloloina. E 12 sikolasipi ua ofoina mo tamaiti o le tausaga faasauni (UPY) i le Vasega Faasaienisi (Faculty of Science – Foundation) e filifilia le faiaoga e avea ma a latou galuega, e aoaoina ai i atunuu i fafo pe a ausia togi faatapulaa. O lo o ave le faamuamua i lalo o lenei polokalame i le sailia o i latou e faiaoga i mataupu o le Matematika ma le Faasaienisi ona o le utiuti o le numera o lo o i ai mo nei mataupu. O tausaga e lua mulimuli ane o lenei polokalame faataitai o le a siitia ai le aofai o avanoa i le 15, ma o le a faasafua ai nisi o avanoa mo faiaoga o lo o galulue aua le faalauteleina o le tomai e le gata i le aoaoina o le Matematika ma le Faasaienisi, ae o le faaleleia o le faitautusi ma le tusitusi. O lo o faaauau pea le auunaga a le Malo e auala atu i le Matagaluega e aoga faasikolasipi ai i latou ua fia avea ma faiaoga i le Aoga Faafaiaoga i le Iunivesite Aoao o Samoa (AoS).

iv. *Aoga Faafaiaoga – Iunivesite Aoao o Samoa (FoE).*

O lo o faaauau foi ona aoaoina faiaoga i le Aoga Faafaiaoga i le Iunivesite Aoao o Samoa. O le tausaga foi lenei (2014) ua amata ai ona suia le faailoga e aoaoina ma suesue i ai faiaoga mai le Tipiloma i le Tikeri. O faiaoga o le a faauuina o lea o latou maua le Tikeri o Aoaoga (Bachelor of Education). O lenei Tikeri o le faailoga mauualalo lea o le a ofoina mo faiaoga.

Lau Afioga i le Fofoga Fetalai, ma le faaaloalo lava.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.75, Tali a le Malo i le P.P.2013/2014 Nu.66, Lipoti a le Komiti o Mataupu Tau Aoga, Saienisi, Fesoootaiga ma Faamatalaga Tekonolosi i le P.P.2012/2013 Nu.6, P.P.2012/2013 Nu.7 & P.P.2012/2013 Nu.8, Lipoti Faaletausaga a le Matagaluega o Aoga, Taaloga ma Aganuu mo Tausaga Faaletupe 2008/2009, 2009/2010 ma le 2010/2011 ua faamaonia.*



**P.P.2014/2015 NU.76, TALI ATU A LE MALO I LE P.P.2013/2014  
NU.136, LIPOTI A LE KOMITI O LE SOIFUA MALOLOINA,  
GALUEGA TAU LE VA FEALOA, MATAUPU TAU LOTOIFALE  
MA ATINAE O AFIOAGA MA AGAFESOOTAI I LE P.P.2012/2013  
NU.55 & P.P.2013/2014 NU.74, LIPOTI FAALETAUSAGA A LE  
FAAPUTUGATUPE MO LE LUMANAI MANUIA O TAGATA  
SAMOA 2012 MA LE TAUSAGA 2013**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI  
SAILELE MALIELEGAOI:** Lau afioga i le Fofoga Fetalai ou te faatu le  
lafo, *Ina ia faamaonia e leni Fono Aoa le P.P.2014/2015 Nu.76 o lo o  
tuuina atu ai Tali a le Malo i le P.P.2013/2014 Nu.136, Lipoti a le Komiti o  
le Soifua Maloloina, Galuega Tau le Va Fealoai, Mataupu Tau Lotoifale ma  
Atinae o Afioga ma Agafesootai i le P.P.2012/2013 Nu.55 & P.P.2013/2014  
Nu.74, Lipoti Faaletausaga a le Faaputugatupe mo le Lumanai Manuia o  
Tagata Samoa 2012 ma le tausaga 2013, e tusa ai ma le Tulafono Tumau 54.*

*Faaluaina e le Sui Palemia ma le Minisita mo Galuega Tau Alamanuia ma  
Atinae a le Malo.*

**FOFOGA FETALAI:** Tulai mai lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI  
SAILELE MALIELEGAOI:** Lau Afioga i le Fofoga Fetalai, e fia tuuina  
atu ma le faaaloalo tele tali tusitusia a le Ofisa o le NPF, i mataupu ua  
fautuaina ai le Ofisa o lo o tuuina mai i le lipoti e pei ona taua i luga. O le a  
faagasolo atu se tali fuaitau atu a le Ofisa nei, i numera e pei ona i ai i lea  
lipoti.

**TALI ATU A LE MALO I LE P.P.2013/2014 NU.136, LIPOTI A  
LE KOMITI O LE SOIFUA MALOLOINA, GALUEGA TAU  
LE VA FEALOA, MATAUPU TAU LOTOIFALE MA  
ATINAE O AFIOAGA MA AGAFESOOTAI I LE P.P.2012/2013  
NU.55 & P.P.2013/2014 NU.74, LIPOTI FAALETAUSAGA A  
LE FAAPUTUGATUPE MO LE LUMANAI MANUIA O  
TAGATA SAMOA 2012 MA LE TAUSAGA 2013**

**Fautuaga 1:**

Ia silasila le Pulega i ana faiga faavae mo le toe iloiloaina , pe ua  
talafeagai ona siitia pasene o ana faamanuiaga e faamatuu atu i le  
mamalu o le atunuu i ana sui faisaofoaga i tausaga taitasi.

**Tali:**

Ua faamauina foi le fautuaga mai le Komiti mo toe asiasia o nei faiga  
faavae aemaise ai o pasene ma tului talafeagai ai ma tupe maua a le  
NPF. Ae mo le silafia e le Komiti, o lo o faatulafonoina ia le i lalo ifo  
o le 4% le pasene i le tausaga. O pasene totogiina atu i tausaga taitasi  
e fua i tupe mama i le tausaga ae le fuaina i lalo i ni faiga faavae. A

silasila le Komiti i tala o le tupe, o lo o manino o lo o totogi atoa atu lava tupe mama o lo o faamauina i tausaga taitasi ma o le i ai i se evalasi e tusa ma le 7%. A silasila le Komiti i Tala o le Tupe, o lo o manino ai le faavasegaina o aseta o lo o faafaigaluegaina aua tupe maua ma e oo atu i le 98% o lo o taatia i Samoa nei. Mo le silafia e le Komiti e oo i isi atunuu o le Pasefika e pei o Fiti e maualuga atu le tamaoaiga, e na o le tai 5% i le 5.75% o lo o tuuina atu i o latou sui. O fuafuaga alu mamao a le Komiti Faatonu o lo o i ai nei, ia tuuina atu se vaega o aseta e oo atu i le 10% e faafaigaluegaina i fafo atu o Samoa ina ia siitia ai tupe maua aua e pau lea o le auala e siitia atili ai tupe mama ona mafai lea ona siitia pasene e totogiina atu i sui e sili atu i le 7% o lo o i ai nei. Ma o le a galulue i ai le Komiti ma le afaigaluega ia ausia lea tulaga aua le siitia o pasene mo sui o le NPF.

**Fautuaga 2:**

Ina ia silasila i tulaga o faamanuiaga mo sui faisaofaga ona ua matauina i Sailiiliga a le Komiti ua na o pasene ma meaalofo tau maliu ma isi o lo o agavaa ai sui faisaofaga.

**Tali:**

Mo le silafia e le Komiti, o le sini autu o le NPF, ia tele se faaputugatupe a le sui e faaputupu i le taimi o faigaluega ai e toomaga i ai pe a malolo ritaea mai galuega. O le matafaioi la a le Komiti Faatonu ma le afaigaluega, ia teu faafaigaluega tupe ina ia faatupe ai ni pasene ia faapoopo i tausaga uma ina ia tupu ma tele le faaputugatupe seia oo ina 55 tausaga pe sili atu. A maliu la le sui e lei oo i le taimi e ritaea ai, ona maua lea o le faamanuiaga tau maliu e faapoopo i ana saofaga. E na o le pau lava ia o faamanuiaga o lo o aiaia i lalo o le Tulafono. O isi faamanuiaga o lo o i ai nei o le agavaa lea o le sui i nonogatupe mai i le NPF ma e aiaia uma i lalo o faiga faavae mo nonogatupe. O se manatu faaiu i le mataupu e pei ona laga, o le faamanuiaga e pito i sili ona taua, ia tele ma lava le faaputugatupe a le sui e faaputupu i le taimi na faigaluega ai, e tua i ai pe a oo ina malolo ritaea mai galuega.

**Fautuaga 3:**

Ina ia silasila i auala e mafai ai ona aoina mai ai nonogatupe faaletonu ona ua maitauina e le Komiti se vaegatupe tele a le Faaputuga Tupe o lo o faapea ona le mafai ona toe aoina mai nonogatupe ua le totogia.

**Tali:**

Ua faamauina le finagalo o le Komiti aua o le fua taualuga foi lea o le faamoemoe o faiga faavae mo le faafaigaluegaina o tupe a le NPF ia maualuga tupe maua e fuafua i aafiaga e ono foia ina ia siitia pea i tausaga taitasi faamanuiaga e faasafua atu i ona sui.

**Manatu aoaotetele e tusa ai o fautuaga:**

O lo o galulue pea le Komiti Faatonu aemaise ai o le Pulega e faatino fautuaga uma e tuuina mai, e tusa ma aiaiga o le Tulafono ua lima taitaiina ai galuega faatino a le Faaputuga-Tupe aua le manuia lautele o ana sui faisaoafaga.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.76, Tali a le Malo i le P.P.2013/2014 Nu.136, Lipoti a le Komiti o le Soifua Maloloina, Galuega Tau le Va Fealoai, Mataupu Tau Lotoifale ma Atinae o Afioaga ma Agafesootai i le P.P.2012/2013 Nu.55 & P.P.2013/2014 Nu.74, Lipoti Faaletausaga a le Faaputugatupe mo le Lumanai Manuia o Tagata Samoa 2012 ma le tausaga 2013, e tusa ai ma le Tulafono Tumau 54.*

**P.P.2014/2015 NU.77, TALI ATU A LE MALO I LE P.P.2013/2014 NU.115, LIPOTI A LE KOMITI O LE SOIFUA MALOLOINA, GALUEGA TAU LE VA FEALOA, MATAUPU TAU LOTOIFALE MA ATINAE O AFIOAGA MA AGAFESOOTAI I LE P.P.2013/2014 NU.73, FAAMATALAGA O GALUEGA MA TALA O TUPE A LE FAAPUTUGATUPE MO FAAMANUIAGA MO TAGATA MATUTUA I SAMOA 2012/2013**

**FOFOGA FETALAI:** Tulai mai lau Afioaga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioaga i le Fofoga Fetalai ou te faatu le lafo, *Ina ia faamaonia e lenei Fono Aoa le P.P.014/2015 Nu.77, o lo o tuuina atu ai Tali a le Malo i le 2013/2014 Nu.115, Lipoti a le Komiti o le Soifua Maloloina, Galuega Tau le Vafealoai, Mataupu Tau Lotoifale ma Atinae o Afioaga ma Agafesootai i le P.P.2013/2014 Nu.73, Faamatalaga o Galuega ma Tala o Tupe a le Faaputugatupe mo Faamanuiaga mo Tagata Matutua i Samoa 2012/2013, e tusa ai ma le Tulafono Tumau 54.*

*Faaluaaina e le Minisita mo Galuega Tau Alamanuia ma Atinae a le Malo, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioaga ma Agafesootai.*

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** Lau Afioaga i le Fofoga Fetalai mo le silafia e le Maota atoa ai ma le faafofoga a le atunuu, ou te tuuina atu Tali o lo o tuuina i lenei Pepa.

**TALI ATU A LE MALO I LE P.P.2013/2014 NU.115, LIPOTI A LE KOMITI O LE SOIFUA MALOLOINA, GALUEGA TAU LE VA FEALOA, MATAUPU TAU LOTOIFALE MA ATINAE O AFIOAGA MA AGAFESOOTAI I LE P.P.2013/2014 NU.73, FAAMATALAGA O GALUEGA MA TALA O TUPE A LE FAAPUTUGATUPE MO FAAMANUIAGA MO TAGATA MATUTUA I SAMOA 2012/2013.**

E fia tuuina atu ma le faaaloalo tele, tali tusitusia a le Ofisa o le NPF i mataupu ua fautuaina ai le Ofisa, o lo o tuina mai i le lipoti e pei ona taua i luga, ma o le a faagasolo atu i numera e pei ona i ai i le lipoti.

**Fautuaga 1:**

Fautuaina le Faaputuga-tupe ina ia tagai pea i ni auala e mausali ai pea le faagasologa lelei o le faatinoga o le auaunaga aua tama ma tina matutua o Samoa.

**Tali:**

E faamauina le faafetai a le Ofisa nei i fautuaga ua tuuina mai e le Komiti mamalu, aua ni tulaga e fia faaleleia atili o le auaunaga mo nai o tatou tama ma tina matutua.

O le a tinou ma faaauuina pea e le Ofisa o Faamanuiaga mo Tagata Matutua o Samoa le sailia o auala lelei uma, e faatino ai le tautua ma le auaunaga ofoina atu mo nai tina ma tama matutua o si o tatou atunuu, e pei ona fautuaina ai.

**Fautuaga 2:**

Fautuaina le Faaputuga-tupe ina ia tuliloaina o lo o lelei atoatoa ona maua faamanuiaga uma, e ao ona maua e le au matutua mai auauanaga talafeagai.

**Tali:**

O le a faaauuina pea le galulue punouai o le Ofisa ma le aufaigaluega ina ia mautinoa o lo o totogi atu faamanuiaga uma e agavaa i ai tama ma tina matutua i taimi talafeagai e ala i auauanaga vavave ma lelei faatino mo i latou. E faaauau foi le lesitalaina uma o i latou uma, e faamalieina aiaiga ma ua faamaonia, ua agavaa ona maua faamanuiaga o peinisione mo le aumatutua o si o tatou atunuu.

**Manatu aoatetele e tusa ai o fautuaga:**

So o se faamanuiaga e maua pe totogi atu i le au matutua, e aiaia uma lea i lalo o le Tulafono o lo o faagaioia ai nei faamanuiaga ua faamatuu mai e le Malo.

*Na tuuina atu le Fesili ma ina ua manumalo le Ioe, na tulai loa le P.P.014/2015 Nu.77, Tali a le Malo i le 2013/2014 Nu.115, Lipoti a le Komiti o le Soifua Maloloina, Galuega Tau le Vafealoai, Mataupu Tau Lotoifale ma Atinae o Afioaga ma Agafesootai i le P.P.2013/2014 Nu.73, Faamatalaga o Galuega ma Tala o Tupe a le Faaputugatupe mo Faamanuiaga mo Tagata Matutua i Samoa 2012/2013, e tusa ai ma le Tulafono Tumau 54.*

**P.P.2014/2015 NU.79, TALI ATU A LE MALO I LE P.P.2012/2013  
NU.87, LIPOTI A LE KOMITI O GALUEGA, FELAUAIIGA MA  
SIOSIOMAGA I LE P.P.2011/2012 NU.61, FUAFUAGA AUTASI MA  
FAAMATALAGA O SINI AUTU A LE PULEGA O LE SUAVAI MO  
LE VAITAIMI 2012-2014**

**FOFOGA FETALAI:** Tulai mai lau Afioga i le Minisita mo Galuega, Felauaiga ma Atinae Eeseese.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le P.P.2014/2015 Nu.79, o lo o tuuina atu ai Tali a le Malo i le P.P.2012/2013 Nu.87, Lipoti a le Komiti o Galuega, Felauaiga ma Siosiomaga i le P.P.2011/2012 Nu.61, Fuafuaga Autasi ma Faamatalaga o Sini Autu a le Pulega o le Suavai mo le Vaitaimi 2012-2014, e tusa ai ma le Tulafono Tumau 54.*

*Faaluaina e le Minisita mo le Soifua Maloloina, Minisita mo Aoga, Taaloga ma Aganuu, Minisita mo Punaoa Faanatura ma le Siosiomaga ma le Minisita mo Leoleo ma Falepuipui.*

**FOFOGA FETALAI:** Tulai mai lau Afioga i le Minisita e faitau le Tali.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai, mo le silafia e le Maota atoa ai ma le faafofoga a le atunuu, ou te faitauina Tali ua tuuina mai i le Pepa.

**TALI A LE MALO I LE P.P. 2012/2013 NU 87, LIPOTI A LE  
KOMITI O GALUEGA FEALUAIGA & SIOSIOMAGA I LE  
P.P.2011/2012 NU 61 FUAFUAGA AUTASI MA  
FAAMATALAGA O SINI AUTU A LE PULEGA O LE  
SUAVAI MO LE VAITAIMI 2012-2014.**

**Fautuaga:**

1. E fautuaina le faanatinati o le fesootai atu o ala paipa o tane o faleletaua o le Maota o le Malo i Matagalalua ma le Maota o le Matagaluega o Faamasinoga ma Pulega Tau Faamasinoga i le nofoaga o lo o vaimama ai suavai lafoai i Sogi, ina ia foia ai le faafitauli i tane o ia faleletaua ma ia ogatasi ai ma aiaiga faava o Malo o le siosiomaga.

**Tali:**

O lo o faagasolo nei le poloketi mo le faasopolia o nofoaga i Sogi ma Mulinuu i le laina o paipa mo le aoina o le suavai lafoai. O le tausaga faaletupe 2013-2014 lea sa amatalia ai lenei galuega ma o le a faamaea i le tausaga nei 2014-2015. O lenei galuega o le mafai ai ona fesootai le Maota o le Malo i Matagalalua faapea le Maota o le Matagaluega o Faamasinoga ma isi fale o le Malo ma pisinisi i Sogi ma Mulinuu, mo le aoina ma le faamamaina o le suavai lafoai.

**Fautuaga:**

2. Manaomia le galulue faatasi o le Matagaluega o Tupe ma le Pulega o le Suavai mo le vave faatinoina o isi poloketi ina ia vave maua se suavai mo afioaga o lo o manaomia le suavai.

**Tali:**

O le taimi nei ua tele ina faasopolia uma afioaga o lo o i lalo o le auaunaga a le Pulega o le suavai i le suavai maua. Vagana ai nisi o pitonuu maualuluga ma nofoaga maouta o lo o faaauau ai pea galuega ma atinae mo le suavai e faamoemoe lava foi i tupe o lo o mafai ona faasoaso mai i Tala o le Tupe a le Malo. O lo o i ai le fuafuaga mo Atinae tetele a le Pulega o lo o faapea ona galulue soosoo tauau ai ma le Matagaluega o Tupe i lona faatinoina, i lalo o le polokalame mo tupe fesoasoani a le Malo.

**Fautuaga:**

3. Ia vave faapipii se masini fou (new voltage generator) i le pou moli o lo o tu lata ane i le pamu vai fou i Falealupo, e faatonutonu ai le fesuisui ai o le malosi o le eletise e faaoga e lea pamu vai. O le vave faapipii o lea masini o le a mafai ai ona puipuia mai lea pamu vai taugata mai le faaleagaina ona o le fesuisui ai o le malosi o le eletise ma mafai ai ona faasaoina mai ai nisi vaegatupe a le Malo i le toe faatauina mai o se isi pamu vai pe a faaleagaina le pamu vai fou taugata o lo o i ai nei.

**Tali:**

Ua faamauina le fautuaga mo le agai i luma. Mo le silafia e le Komiti mamalu o le taimi nei o lo o faaogaina e le Pulega se afi (generator) mo lenei pamuvai, ona o le faateetega i aafiaga e pei ona taua i le fautuaga. Ua atoa nei le tolu tausaga o lo o faatautaia le pamu i lenei faiga ma o lo o tulaga lelei lava lona faatinoga.

**Fautuaga:**

4. Fautuaina malosi le ave o le faamuamua a le Pulega o le Suavai i le fausia o nisi faatanoa vai fou faaopoopo mo le teuina ai o le suavai i vaega o le auaunaga o lo o tamaoaiga ai le suavai aemaise lava i Fuluasou, ina ia foai ai le faafitauli o le tau faasoaso o le suavai.

**Tali:**

Fautuaina malosi le ave o le faamuamua a le Pulega o le Suavai i le fausia o nisi faatanoa vai fou faaopoopo mo le teuina ai o le suavai moomia e paaga a le Pulega, peitai sa maitauina o le faafitauli o lo o i ai nei o le tele o le suavai maumau ma le maua e ala i le liki i le laina, ma suavai o lo o viliina faasolitulafono. Olo o i ai poloketi o faatini i le taimi nei mo le toe suia o laina tuai ma laina ua i totonugalemu o auala, faatasi ai ma polokalame mo le sailia o paaga o lo o faaoga faasolitulafono le suavai. E manatu afai ae mautu ia tulaga, o le a tele le suavai e faasaoina ina ia faatumauina ma lava

pea le faasoa o le suavai. O lo o silasila foi le Pulega i le itu tau fanua moomia mo le fausia o nisi faatanoa i le lumanai pe a tumau pea le manaomia.

**Fautuaga:**

5. Fautuaina le Pulega ole Suavai ina ia faatinoina loa fesuaiga o paipa PVC i le isi ituaiga paipa fou o le Poly E pipe, ona e umi lona aoga ma mafai ona faaitiitia ai le suavai maumau e mafua mai ona o paipa papa, e pei ona maitauina e le Komiti le atu i le 70% o le suavai maumau e afua mai i paipa papa.

**Tali:**

O se tasi lenei o laasaga ua faagasolo nei lona fatinoina e le Pulega, ona o mafuaaga ua taua e le Komiti mamalu. Ua avea nei ma se tasi o tapulaa i le taiala mo galuega faainisinia a le Pulega le faamlosia o le faaaogaina o le paipa PE mo soo se galuega e manaomia ai paipa i le tele e 110mm le tele pe i lalo ifo. O lo o faatino foi polokalame faaleaoaoga mo le siitia o le iloa o le afaigaluega i le faaaogaina ma le faapipiina o nei paipa i galuega faatino. Ua auai atu foi nisi o le afaigaluega a le Pulega o le suavai mo le maitauina o se tasi o fale gaosi oloa i Fiti (Tubemakers Fiji Ltd) o lo o latou fausia nei ituaiga paipa pe talafeagai ona faatauina mai ai paipa PE nei mo galuega faatino a le Pulega.

**Fautuaga:**

6. Faamalositia le galulue faatasi o le Pulega o le Suavai ma le Matagaluega o Punaoa Faalenatura ma Siosiomaga mo le faasaoina o eleele o lo o pueina ai le suavai, ina ia mautinoa le lava o le suavai e tua i ai le auaunaga, ona na maitauina e le Komiti le tau faasoasoa o le suavai i vaitau mugala.

**Tali:**

Ua faamauina le fautuaga ma o se tasi lenei o itu o lo o faatinoina pea i lalo o le Vaega autu mo le suavai (Water Sector) o lo o galulue faatasi ai le Pulega ma le Matagaluega mo le ausia o lea tulaga. O le Ofisa Sili o le Matagaluega o lo o avea foi ma se sui o le Komiti Faatonu a le Pulega o le Suavai, ma o lo o auala atu ai nei o atinae o galulue faatasi ai ofisa e lua.

**Fautuaga:**

7. Silasila le Pulega ole suavai i le tatau ona toe faaleleia uma pamuvai tuai o vai vili o lo o i ai i le taimi nei i Upolu ma Savaii.

**Tali:**

Ua faamauina le fautuaga. O lo o galulue vava lalata le Pulega o le suavai ma le vaega o le suavai o le Matagaluega o Punaoa Faalenatura ma le Siosiomaga, i sailiiliga i pamu, vai tuai ma vai vili tuai e mafai ona toe faaaogaina. O le tele o nisi o vai vili tuai ua le toe faaaogaina e mafua ona ua ausia le suavai mai (sua lua) pe ua le

saogalemu le suavai o maua ai. O lo o ave le faamamafa ma tauamafaiga a le Pulega i le putiputi o le suavai o lo o maua i le fogaelele (surface water) ona e taugofie lona faatinoina nai lo le taugata o le pamuina mai o le suavai mai le manava o le eleele. Peitai o lo o i ai i fuafuaga a le Pulega le i ai pea o vai vili faaleoleo mo taimi mugala e faaitiitia ai le suavai maua i vaitafe ma vaipuna.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.79, Tali a le Malo i le P.P.2012/2013 Nu.87, Lipoti a le Komiti o Galuega, Felauaiga ma Siosiomaga i le P.P.2011/2012 Nu.61, Fuafuaga Autasi ma Faamatalaga o Sini Autu a le Pulega o le Suavai mo le Vaitaimi 2012-2014, ua faamaonia.*

**P.P.2014/2015 NU.80, TALI ATU A LE MALO I LE P.P.2013/2014 NU.134, LIPOTI A LE KOMITI O MATAUPU TAU AOGA, SAIENISI, FESOOTAIGA MA FAAMATALAGA TEKONOLOSI I LE P.P.2012/2013 NU.23, P.P.2012/2013 NU.78 & P.P.2012/2013 NU.79, LIPOTI FAALETAUSAGA A LE PULEGA O FALE MA MALAE TAALO A SAMOA 2008/2009, 2009/2010 & 2010/2011**

**FOFOGA FETALAI:** Tulai mai lau Afioga i le Minisita mo Galuega Tau Alamanuia ma Atinae a le Malo.

**Tofa Hon LAUTAFI FIO SELAFI PURCELL:** Faafetai i lau Afioga i le Fofoga Fetalai. Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le P.P.2014/2015 Nu.80, o lo o tuuina atu ai Tali a le Malo i le P.P.2013/2014 Nu.134, Lipoti a le Komiti o Mataupu Tau Aoga, Saienisi, Fesootaiga ma Faamatalaga Tekonolosi i le P.P.2012/2013 Nu.23, P.P.2012/2013 Nu.78 & P.P.2012/2013 Nu.79, Lipoti Faaletausaga a le Pulega o Fale ma Malae Taalo a Samoa 2008/2009, 2009/2010 & 2010/2011, e tusa ai ma le Tulafono Tumau 54.*

*Faaluaina e le Minisita mo Tupe Maua, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.*

**FOFOGA FETALAI:** Tulai mai lau Afioga i le Fofoga Fetalai.

**Tofa Hon LAUTAFI FIO SELAFI PURCELL:** Lau Afioga i le Fofoga Fetalai, mo le silafia e le Maota atoa ai ma le faafofoga a Samoa pe a o i ai lava nisi o faafogafoga mai i lenei po, ou te tulai atu e tuuina atu Tali o i totonu o lenei Pepa.

**TALI ATU A LE MALO I LE P.P.2013/2014 NU.134, LIPOTI A LE KOMITI O MATAUPU TAU AOGA, SAIENISI, FESOOTAIGA MA FAAMATALAGA TEKONOLOSI I LE P.P.2012/2013 NU.23, P.P.2012/2013 NU.78 & P.P.2012/2013 NU.79, LIPOTI FAALETAUSAGA A LE PULEGA O FALE MA MALAE TAALO A SAMOA 2008/2009, 2009/2010 &**



2010/2011.

**Fautuaga:**

1. **Ina ia toe iloiloina le aofai o le Komiti Faatonu a le Pulega ina ia ogatasi ma aiaiga o le Tulafono.**

**Tali:**

Ua mulimulitaia nei e le Pulega taiala e pei ona faataatia mai e le Malo i Komiti Faafoe ma ua na o le toafitu (7) sui o le Komiti ua i ai nei.

**Fautuaga:**

2. **Ina ia toe silasila le Pulega i le tuufaatasia o ana lipoti faaletausaga ina ia auiliili ma maioio mai faaupuga ma faamatalaga a le Pulega i galuega tauave a le Pulega e pei ona maitauina e le Komiti i ana Lipoti faaletausaga ua iloiloina.**

**Tali:**

Ua taliaina e le Pulega fautuaga a le Komiti e pei ona tuuina mai e tusa ai ma le tuufaatasia o Lipoti faaletausaga ma o le a vaavaai totoa i ai le Pulega ina ia toe faaleleia lea tulaga.

**Fautuaga:**

3. **Ina ia auiliili mai e le Pulega i lana Lipoti faaletausaga tulaga o lo o i ai ia fale ma malae taalo.**

**Tali:**

Ua taliaina e le Pulega le fautuaga e pei ona tuuina mai e le Komiti ma o le a faapea ona faatinoina i Lipoti o le a tuuina mai i le Palemene i tausaga o lumanai.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.80, Tali a le Malo i le P.P.2013/2014 Nu.134, Lipoti a le Komiti o Mataupu Tau Aoga, Saienisi, Fesootaiga ma Faamatalaga Tekonolosi i le P.P.2012/2013 Nu.23, P.P.2012/2013 Nu.78 & P.P.2012/2013 Nu.79, Lipoti Faaletausaga a le Pulega o Fale ma Malae Taalo a Samoa 2008/2009. 2009/2010 & 2010/2011 ua faamaonia.*

**P.P.2014/2015 NU.86, TALI ATU A LE MALO I LE P.P.2013/2014 NU.118, LIPOTI A LE KOMITI O LE SOIFUA MALOLOINA I LE P.P.2013/2014 NU.46, LIPOTI FAALETAUSAGA A LE FAALAPOTOPOTOGA O MEA TAU FALE A SAMOA MO LE TAUSAGA 2012**

**FOFOGA FETALAI:** Tulai mai lau Afioga i le Minisita.

**Afioga Hon LAUTAFI FIO SELAFI PURCELL:** Lau Afioga i le Fofoga Fetalai ou te toe tulai atu foi e faatu le lafo, *Ina ia faamaonia e lenei Fono*

*Aoao le P.P.2014/2015 Nu.86, Tali atu a le Malo i le P.P.2013/2014 Nu.118, Lipoti a le Komiti o le Soifua Maloloina i le P.P.2013/2014 Nu.46, Lipoti Faaletausaga a le Faalapotopotoga o Mea Tau Fale a Samoa mo le Tausaga 2012, e tusa ai ma le Tulafono Tumau 54.*

*Faaluaina e le Minisita mo Tupe Maua, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.*

**FOFOGA FETALAI:** Tulai mai lau Afioga i le Minisita.

**Afioga Hon LAUTAFI FIO SELAFI PURCELL:** Lau Afioga i le Fofoga Fetalai, mo le silafia e le Maota ma le faafofoga a le atunuu o Samoa, ou te faitauina atu Tali ua tuuina mai i totonu o lenei Pepa.

**TALI ATU A LE MALO I LE P.P.2013/2014 NU.118, LIPOTI A LE KOMITI O LE SOIFUA MALOLOINA I LE P.P.2013/2014 NU.46, LIPOTI FAALETAUSAGA A LE FAALAPOTOPOTOGA O MEA TAU FALE A SAMOA MO LE TAUSAGA 2012.**

**1. Fautuaga:**

Fautuaina le Faalapotopotoga ina ia sailiilia pea i ni auala e atili ai ona fesoasoani i le atunuu. Mo se faamama avega ia latou nonogatupe, e pei o tului mama.

**Tali:**

O lo o tulimatai pea e le Faalapotopotoga auala eseese e maua ai le faamama avega i tului o nonogatupe. E faalagolago tele lea i se faaitiitia o tului o tupe faaune mai e pei o le punavai o lo o maua mai i le Faletupe Tutotonu ona toe nono atu lea i le mamalu o le atunuu i ni tului mama.

**2. Fautuaga:**

Ia mataala pea le Faalapotopotoga i le tulituliloaina o le tologiina o nonogatupe ua faamatuuina atu i le mamalu o le atunuu, ina ia aua nei tulai mai se tulaga faaletonu i le Tala o le Tupe a le faalapotopotoga e ono taofia ai lenei fesoasoani taua ua maua e le atunuu.

**Tali:**

O lo o laualuga ma faamuamua i galuega faatino a le faalapotopotoga le tulituli faamanatu i le tologi mai o nonogatupe i taimi faatulagaina i feagaiga ua osia. O le ogatotonu lea o le auaunaga ina ia maua pea tupe e toe faaavanoa mo le mamalu o le atunuu o lo o autovaa mai mo nonogatupe.

*Na tuuina atu le Fesili ma ina ua manumalo le Ioe, na tulai loa le P.P.2014/2015 Nu.86, Tali atu a le Malo i le P.P.2013/2014 Nu.118, Lipoti a le Komiti o le Soifua Maloloina i le P.P.2013/2014 Nu.46, Lipoti Faaletausaga a le Faalapotopotoga o Mea Tau Fale a Samoa mo le Tausaga 2012 ua faamaonia.*

**P.P.2014/2015 NU.87, TALI ATU A LE MALO I LE P.P.2013/2014 NU.123, LIPOTI A LE KOMITI O MATAUPU TAU AOGA, SAIENISI, FESOOTAIGA MA FAAMATALAGA TEKONOLOSI I LE P.P.2012/2013 NU.11 & P.P.2013/2014 NU.39, LIPOTI FAALETAUSAGA A LE FAALAPOTOPOTOGA O SUESUEGA FAASAIENISI A SAMOA MO LE TAUSAGA FAALETUPE FAAIUINA ASO 30 IUNI 2011 MA LE ASO 30 IUNI 2012**

**FOFOGA FETALAI:** Tulai mai lau Afioga i le Minisita mo Punaoa Faanatura ma le Siosiomaga.

**Tofa Hon FAAMOETAU LOA LEALAI AULOTO ULAITINO FAALE TUMAALII:** Lau Afioga i le Fofoga Fetalai ou te faatu le lafo, *Ina ia faamaonia e leni Fono Aoa le P.P.2014/2015 Nu.87, o lo o tuuina atu ai Tali a le Malo i le P.P.2013/2014 Nu.123, Lipoti a le Komiti o Mataupu Tau Aoga, Saienisi, Fesootaiga ma Faamatalaga Tekonolosi i le P.P.2012/2013 Nu.11 & P.P.2013/2014 Nu.39, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe faaiuina aso 30 Iuni 2011 ma le aso 30 Iuni 2012, e tusa ai ma le Tulafono Tumau 54.*

*Faaluaina e le Minisita mo Aoga, Taaloga ma Aganuu, Minisita mo Galuega Tau Alamanuia ma Atinae a le Malo, Minisita mo Leoleo ma Falepuipui ma le Minisita mo le Soifua Maloloina.*

**FOFOGA FETALAI:** Tulai mai lau Afioga i le Minisita.

**Tofa Hon FAAMOETAU LOA LEALAI AULOTO ULAITINO FAALE TUMAALII:** Lau Afioga i le Fofoga Fetalai, o Tali nei a le Malo o lo o tuuina atu i leni Pepa, ma o le a ou faitauina atu.

**TALI ATU A LE MALO I LE P.P.2013/2014 NU.123, LIPOTI A LE KOMITI O MATAUPU TAU AOGA, SAIENISI, FESOOTAIGA MA FAAMATALAGA TEKONOLOSI I LE P.P.2012/2013 NU.11 & P.P.2013/2014 NU.39, LIPOTI FAALETAUSAGA A LE FAALAPOTOPOTOGA O SUESUEGA FAASAIENISI A SAMOA MO LE TAUSAGA FAALETUPE FAAIUINA ASO 30 IUNI 2011 MA LE ASO 30 IUNI 2012**

**Fautuaga 1:**

Faatautaia ni polokalame faalauiloa a le Faalapotopotoga e faailoa atu ai i le atunuu lautele nisi o oloa fou ua mafai ona gaosia, ma faailoa atu foi ituaiga ala'oa faalenatura eseese o lo o moomia ai le

lagolago a le atunuu i le galueaiina, ina ia mafai ai pea ona maua i totonu o Samoa ala'oa mo le gaosia o oloa eseese, mo faamoemoega o oloa auina atu i fafo, aemaise o le faaitiitita ai o oloa taugata auina mai fafo.

**Tali:**

O le tali i lenei fautuaga ua uma ona tuu atu i tali i le Fautuaga muamua (1) i le P.P.2013/2014 Nu 62, ma le Fautuaga muamua (1) i le P.P.2013/2014 Nu 64.

**Fautuaga 2:**

Faamalositia le galulue faapaaga o le Faalapotopotoga ma le Pulega o le Suavai, Matagaluega o le Soifua Maloloina, Matagaluega o Faatoaga ma Faigafaiva, i le faaauau ai o galuega eseese faasaienisi i le tulaga o le mataituina o le suavai mama ma taumafa maloloina mo le atunuu lautele.

**Tali:**

O le tali i lenei fautuaga ua uma ona tuu atu i le tali i le Fautuaga lona tolu (3) i le P.P.2013/2014 Nu.62.

**Fautuaga 3:**

Silasila le Faalapotopotoga i nisi avanoa talafeagai e ono mafai ona maua ai ni paaga faava o Malo i le tulaga i tomai o suesuega faapitoa ma suesuega faasaienisi mo le faalauteleina o le tomai i le Faalapotopotoga mo le faaleleia o ana auunaga mo le manuia o le atunuu.

**Tali:**

1. Na sainia ia Aokuso 2012 se Maliega Tusitusia o le Galulue Faatasi (Memorandum of Cooperation) i le va o le Faalapotopotoga ma le Iunivesite o Vitoria i Ueligitone (Victoria University of Wellington) i Niu Sila. O le faamoemoe o lea maliega ina ia faaleleia taunuuga o suesuega faasaienisi e faatino ma tauaveina e ia faalapotopotoga e lua. O lea feagaiga o lo o aofia ai le aiaiga i se faiga faaletausaga o se avanoa fou faasikolasipi e tasi e faatupeina atoatoa, mo se tagata faigaluega a le Faalapotopotoga e aoga ai faasikolasipi mo se faailoga tikeri "postgraduate" i le Iunivesite o Vitoria, i le tulaga o le faailoga tikeri o le "Masters po o le faailoga tikeri o le "PhD" i le amataga o le 2013. I lalo o lea lava feagaiga, o le a faapea ona aiaia ai se vaegatupe mo se sui e toatasi o le aufaigaluega a le Faalapotopotoga, e asiasi ai i le Iunivesite i tausaga taitasi e faatalatalanoa tulaga o le galulue faatasi i suesuega faasaienisi po o le faaogaina foi o nofoaga o suesuega tau tomai faapitoa. E le gata i lea, ae o le a saunia foi e le Iunivesite se vaegatupe mo se avanoa faasikolasipi e tasi i se tagata aoga mai le Iunivesite o ia lea o le a ono maua se avanoa faasikolasipi e tasi i se tagata aoga mai le Iunivesite o ia lea o le a ono maua se avanoa i tuuaga o le faaiuga o le tausaga, i le Faalapotopotoga. E lima(5) tausaga le umi o le vaitaimi o le feagaiga ma e ono mafai ona toe

faapoopo mo nisi vaitaimi e tai lima(5) tausaga i luga o le maliega a le Faalapotopotoga ma le Iunivesite. E toalua ni sui saenisi o le Faalapotopotoga o lo o aooga nei i le Iunivesite i le faailgoa o le “Masters” ma le “PhD”.

2. I le masina o Me 2013, e toalua le aufaigaluega tau tomai faapitoa a le Faalapotopotoga na maua i se polokalame faaaoaoga e lua vaiaso i mataupu tau le faitauga o meafaigaluega po o faiga o fua eseese e tusa ma faatulagaga. O lea aoaoga sa faia i le Institute o Cawthron i New Zealand, ma na faatupeina e le Polokalame o Fesoasoani a Ausetalia e taua o le Suesuega i laau toto ma Faatoaga mo Maketi i Fafu (“Pacific Horticultural & Agricultural market Access” po o le “PHAMA”), ina ia faapea ona maua ai agavaa moomia talafeagai, e taua tele i le famautinoaina o le lelei atoatoa o meafaigaluega ma maua ai taunuuga o suesuega e sao atoatoa. Ia Iuni 2013, na faatupeina ai foi e le PHAMA le auina mai i le Faalapotopotoga o se tagata tomai faapitoa e maualuga le aloaia o lona agavaa ma le poto masani, mai le Institute o Cawthron, e galue mo le tolu vaiaso, ina ia faaleleia ma siitia agavaa ma le mafai gafatia o le aufaigaluega a le Faalapotopotoga i le itu o le faaogaina o metotia fou tau suesuega. O le autu o le polokalame faa-aoaoga leni e tolu vaiaso, o le faalauteleina lea o le aotelega o le mafai gafatia tau suesuega ua aloaia ma faamaonia a le Faalapotopotoga, ia atiae le tomai faapitoa e faamalieina ai manaoga tau le faamaoniga aloaia, ma faamautinoa le i ai i le Faalapotopotoga o le mafai gafatia e tali atu ai i manaoga o i latou o manaomia le auaunaga a le Faalapotopotog, e le gata i lea a o le au gaosi oloa tulaga muamua ae faapena foi ia i latou o auina atu oloa i atunuu i fafo.

3. E toatolu ni Polofesa e taua o “Honorary Research Fellows” o lo o fesoasoani tele i le auaunaga o suesuega faasaienisi aemaise suesuega faasaienisi e faaaoaoga i ai faatekonolosi i nei onapo. E toatasi mai le Iunivesite o Newcastle, Ausetalia (auaunaga faapitoa i tekonolosi “postharvest”), o le isi mai le Iunivesite o New South Wales, Ausetalia (auaunaga faapitoa i “biofuels”), faapea ma se tasi ua loa lana tautua ae ua ritaea mai galuega i le Iunivesite o New South Wales, Ausetalia (auaunaga faapitoa i suauu maua mai i laau ma fualaaui aina). O lo o i ai foi ma ni sui ua ofoina mai le latou tautua e aunoa ma se totogi, po o “Senior Volunteers”, o le Malo o Iapani (“Japan International Cooperation Agency” po o le “JICA”) ma le Malo o Niu Sila (“New Zealand Volunteer Services Abroad” po o le “NZ-VSA”), o lo o galulue faatasi ma le Faalapotopotoga aua suesuega faapitoa i vaega o oloa gaosia o lo o manaomia le faatupeina ina ia agai pea i luma laasaga o le tulaga faapisinisi (“product commercialization”), faapea ai foi ma suesuega faasaienisi i laau Samoa e i ai le mafai gafatia mo le atinaeina o vailaau gaosia mo le togafitia o gasegase (“medicinal herbs”), ma isi e pei o “cosmetics”.

**Fautuaga 4:**

Faamalositia le uunaia malosi o le Faalapotopotoga mo le siitia o ana auunaga e ala atu i Fonotaga faatino i le atunuu ma le Pasefika i vaega tau suesuega faapitoa ma suesuega faasaienisi. O se tulaga e le gata i le siitia ai o lana auunaga ae e fesoasoani foi i le itu tau tupe mo le faatinoina o ana gafataulima.

**Tali:**

I le masina o Aperila 2012, na tuu faatasia ai e le Faalapotopotoga se Fonotaga Faaleaoaoga Faaitulagi i luga o Suesuega faasaienisi mo le Atinae o Alamanuia o le Ulu a Atunuu o le Pasefika (“Pacific Island Countries”). Na faatupeina e le Malo o Ausetalia e ala mai i ana polokalame o le Ofisa Tutotonu o Ausetalia mo Suesuega Faa-Faatoaga Faava o Malo (“Australian Centre for International Agriculture Research”) ma le Suesuega Tau Faatoaga Faapisinisi a le Pasefika mo Fuafuaga Tau Atinae (“Pacific Agribusiness Research for Development Initiative”), ma tuufatasia ai e le fonotaga ni tagata agavaa faapitoa i le Ulu mai faalapotopotoga a le Malo, faaleatunuu ma vaega o faalapotopotoga tumaoti mai Fiti, Kiripati ma Samoa, Iunivesite mai Ausetalia ma le Iunivesite o le Pasefika i Saute (“University of the South Pacific”), ma paaga tau atinae e pei o le Faalapotopotoga o Taumafa ma Faatoaga a Malo Afaatasi (“Food & Agriculture Organization”). O le faamoemoe o leni fonotaga o le toe iloilo ina lea o gaoiiga tau suesuega ma atinae i vaega autu e lua o le alamanuia o Ulu – oloa gaosi i le tulaga muamua ma faiga faatekonolosi e faaogaina ai fua o faaeleleaga, ma faamuamua ai nisi suesuega faasaienisi o le lumanai, ma faatauaina ai ni gaoiiga soofaatasi, e faaauau ai ona faagasolo le atinae gafataulima ma le taua o le alamanuia o Ulu. O se mataupu taua sa faatalatalanoaina i lea fonotaga o le itu talafeagai e faaono avefa ai le Faalapotopotoga ma nofoaga tutotonu mo suesuega faatekonolosi mo le Ulu o lona tulaga gafatia ma le mafaia ua faavaeina. O lo o faaauau pea ia faatalatalanoaga i leni fuafuaga taua.

**Fautuaga 5:**

Silasila le Faalapotopotoga i le faaleleia o le faatinoina o ana auunaga faafaufautua o lo o faipaaga ai ma isi Matagaluega ma Faalapotopotoga a le Malo ma Vaega Tumaoti, ina ia siitia ai ana tupe maua e fesoasoani ai i ana galuega faatino ma lagolago ai foi i fesoasoani a le Malo e ala i le vaega tupe faatatauina i tausaga faaletupe taitasi.

**Tali:**

O le tali i leni fautuaga ua uma ona tuu atu i le tali i le Fautuaga lona fa(4) i le P.P.2013/2014 No.64

O lea e talosagina ai leni Fono Aoao, ina ia faamaonia le P.P. 2012/2013 Nu 11 & P.P. 2013/2014 Nu 39, Lipoti Faaletausaga a le Faalapotopotoga o Suesuega Faasaienisi a Samoa mo le tausaga

faaletupe faaiuina aso 30 Iuni 2011 ma le tausaga faaletupe faaiuina aso 30 Iuni 2012.

*Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P 2012/2013 Nu 11 & P.P.2013/2014 Nu. 39, Lipoti Faaletausaga a le Faalapotopotoga o Sueseuga Faasaienisi a Samoa mo le tausaga faaletupe faaiuina aso 30 Iuni 2011 ma le tausaga faaletupe faaiuina aso 30 Iuni 2012 ua faamaonia.*

**Tofa Lealailepule Rimoni Aiafi:** Lau Afioga i le Fofoga Fetalai. Ma lou faaaloalo lava pe maua se avanoa se i tau mapu foi le Afioga i le Minisita.

**FOFOGA FETALAI:** O le a le mea lea e te tulai mai ai?

**Tofa Lealailepule Rimoni Aiafi:** Ma lou ava tele lau Afioga i le Fofoga Fetalai, ua matua logo ‘i logo ‘a i le lava tapena o le Malo i le taliga o fesili. E leai se mea o toe faanefu, ua manino atoa so o se Matagaluega. E inisi le fesili ae fa parakalafa o le tali. Ua matua faamalieina lenei Itu i le afio atu o le Caretaker Leader, le Afio atu o le Taitai fou o lenei Vaega ma lenei Vaega ona ua matua faamalieina i Tali a le Malo ua tuuina mai.

I lou ava tele ma lou faaaloalo ou te tu atu ai e faatuina le lafo ina ia pasia le tele o a tatou Pepa aua o lea ua tea le afa.

E le faapea foi faatoa fai lea tulaga lau Afioga i le Fofoga Fetalai. O lena e te silafia, e masani lava ona fai pe afai ua lotu malie le Palemene ma ua faamalieina e tusa ai ma tali mai a le Malo, ae e faamalo atu i lau Afioga i le Palemia ma le Kapeneta mo tapenaga matautia.

O le lafo lea ma le faaaloalo.

**FOFOGA FETALAI:** O lea ua maua lou finagalo Leala, vaeane foi le tuleiga ma le saunoaga. E le seetia foi le Nofoa i le malu o le tai taeao. A outou silasila lelei i le mataupu lenei, e le o se mataupu e tataua ona tatou tago faatumutumulima i ai leaga o le mataupu ua leva ona tatou vavao ai. E le tataua foi la ona tatou o e faataga fai le galuega lenei leaga ua leva ona laulauvivilu ai nusipepa ma le toatele o lena Itu, “O fea lipoti nei?” Na tuuaia ai Fepuleai lea ma Au i le faasologa o galuega a le Malo. Na tuuaia le Malo i le tuai ona tali mai. O lea la e fua le faaiuga a le Nofoa i le...ou te musu e valetuulima galuega ua uma ona fai e le Kapeneta ma le Palemene. O lea ua outou vaavaai i tali, faatoa faatino lea o le mea lea ae se i faafofoga mai le atunuu leaga o lea e faamasino mai le atunuu i a tatou mea ia e fai.

E manatu tele atu i lena Itu o le Maota ona o le tulaga i lo outou naunau mai e fesiligia, fesiligia, fesiligia ma faapea e leiloa pe sau afea. O upu na o lea sa lafo i le Maota, ae ua ou manatu o fea o le a fai i ai tali ua gapatia ai Ofisa Sili o Matagaluega aemaise o tali mai a le Malo i Minisita ma Faalapotopotoga?

O le ala foi lea e pei ona saunoa le Palemia i le taimi ua sola, ua sauni le Malo e tali. A o le a lafo atu i lau Afioga i le Palemia po o le a se faautautaga.

**Tofa Lealailepule Rimoni Aiafi:** O lea o le a faalua mai le lafo.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, toeitiiti lava uma a tatou Pepa.

Ou te faamalie atu i le Afioga i le sui usufono, ou te manatu a ta loa le itula e 9:00 tatou malolo loa, tatou toe omai taeao e faauma pe afai ua fia malolo le la Itu.

O le taua o le mataupu lenei ona e le na o tatou, ae mo le atunuu o lo o faafogafoga mai. Ana faapea e leai mea ia e alu atu i fafo, ua leva lava ona ou faapea atu ua lava loa i inei, ae leaga o lea e taoto lafoga e taua tele mo le Malo a o faafogafoga mai foi lo tatou atunuu, o i ina foi e maua ai so latou malamalamaaga i le tele o fesili sa tuuina mai e le Komiti, lea sa ou tulai atu ai ma ou fautuaina le Maota nei, e tuu mai se avanoa ona o lea sa noatia Ofisa Sili o Matagaluega i taliga-malo sa feagai ma le Malo i le Fonotaga tele a Malo Afaatasi sa fai mai i inei. O le ala lea na mafua ai ona le oo mai Tali nei ia Novema ma Tesema. O lea la ua faaauau le tatou Fonotaga ia Ianuari, o lea toeitiiti lava uma, ae onosai. O le a tatou toe omai a taeao e faauma pe a le uma i le po nei leaga o lea e i ai nai isi Tulafono Tau Faaofi. Masalo na o le taeao sesegi lava a taeao, ae se i tau faauma atu nai mea ia o lea toeitiiti ta le itula e 9:00.

**Tofa Lealailepule Rimoni Aiafi:** Lau Afioga i le Fofoga Fetalai, ua uma foi se manatu o lenei itu. E leai, o le tuualalo lava aua o a tatou galuega e faapea ona faasoa. O lea ua matou maitau atu i le lava tapena o le Malo, ae leai e le fesiligia e lenei Itu aua atonu o nisi lava o lena Itu. A o lea ua saunua le Palemia tatou te toe usu mai taeao a o le a saili malosi, atonu ua lava lea.

A o le tatalo o lea ua uma ona pai atu le tama o lenei Itu, le Afioga i le Sui Taitai e tusa ai foi ma lo matou Taitai, ia alofagia ua lava lenei po e faasala ai si alii vaeane le paia o le Maota.

O le toe soso atu lea i ou tafatafa leaga o lau pule e leai se isi o matou e latalata i ai, a o lau faautautaga e faamoemoe i ai leaga o oe e tausia aiga e lua o Samoa, a o le Palemene o Samoa.

Ia alofagia le Afioga i le Taitai o lenei Itu leaga o lona sese ma lona sasi, o le faatamala foi lea o lenei Itu. O le tuualalo lea lau Afioga ia faale-Atua lou finagalo ma ia alofagia. Na ona soso atu lava i lau Afioga ma le faaaloalo lava, ae afai e leai e le tafa lou finagalo, ua ou ofo atu lou tagata ou te alu ou te malolo ae toe faafoi mai le Taitai pe afai o lea lou finagalo. Ae ou te tatalo atu i lau Afioga aua e leai se isi, leaga o taua e toa tolusefulu faifeau na faamanuiaina taua i lo ta tofi ae ta te le i omai. E le galo ia te au lea po.

O le toe soso atu lea ma le agaga faamaualalo ma le ava tele i lau Afioga i le Fofoga Fetalai a o e le i tuua le tatou Fonotaga i lenei afiafi. Ma le faaaloalo lava.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai. E faigata lava le mea lea o le ava i le faaoololomaau a le la foi Itu. Afai o le tulaga lea, ia o le a ou faaluaina le lafo ia talia loa e le Palemene nai vaega ia e totoe ma tatou toe omai ai taeao se i faauma nai Tulafono ia e totoe. E uma lava i le taeao sesegi ona tatou malolo ai lea, a o Tali uma ia o lo o totoe e le o toe tele. O lea la ua ou tulai atu o le a faapea ona faatamalii le tatou Fonotaga, a o le a ou faaluaina le lafo ina ia talia loa le lafo faatu ua aumai, tatou aveva loa nai Tali laiti ia e totoe ua talia atoa e le Palemene.



**FOFOGA FETALAI:** Faafetai i lau Afioga i le Palemia e ala i le lafo faatu. O lea ua matauina o le finagalo o lau Afioga o le itula e 9:00, a o lea ua ta tonu le itula e 9:00 i le tatou uati. Po o fea o i ai le finagalo o lau Afioga i le Palemia ona o nai mea ia e totoe e toe luasefulu ma ona tupu a tatou Tali. O lona uiga a tuu atu e faaauau faatoa tatou taape ua ta le vaveao. O le ala lea o le toe fesili atu i lau Afioga, po o le a tatou malolo loa ae toe faaauau a tatou galuega i le aso a taeao?

## LAFO MO LE TOLOPOINA

**Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI:** O le tulaga lena, e alofa atu leaga o lea ua...afai o lea, o lea e i ai le isi a tatou Fonotaga toe lua foi vaiaso. A o le a talia le lafo ua tuuina mai mo le talia atoa o Tali nei, ae taatia atu a tatou Tulafono Tau Faaofi na e totoe se i tatou toe omai i le lua vaiaso ne i te i ua gasegase se isi, a o le agaga ia o le fia galuega e le uma. E le uma le fai aso o le Atua, ae ou te faatu atu le lafo, *Ina ia talia loa fautuaga ia e pei ona aumai e le tatou Maota nei ma tatou malolo ai loa i lenei po, ae tatou omai i le lua vaiaso o lo o lumanai ai i le isi a tatou Fonotaga ma faamaea loa mea ia o lo o totoe.*

*Faaluaina e le Afioga i le Sui Palemia ma le Minisita mo Galuega Tau Alamanuia ma Atinae a le Malo.*

*Na faamaonia le lafo.*

**FOFOGA FETALAI:** Ou te manatu o lea ua tatou taunuu i le tatou taimi malolo e pei ona faatuina le lafo e le Afioga i le Palemia, atoa ai foi ma se faautautaga na oo mai i le Fofoga o Alii o le Itu Agai. I le agaga faaaloalo ou te momoli atu le faafetai ma le faamalo i le paia ma le mamalu maualuga o le tatou Maota i lenei afiafi. E talitonu ua taunuu i se tasi o taunuuga sa o tatou manaonao i ai ona o le tele o a tatou galuega tuua sa o tatou feagai ai ona o a tatou polokalame. E tulaga ese foi lenei afiafi ona faatoa tatou alu lea i le ogasamo o le tuuina mai o Tali Tusitusia ma tali o lipoti o Komiti Filifilia sa tuuina atu i le Malo, ma e i ai foi lona tulaga o le tele o lona taua i le faasologa o a tatou galuega, aemaise le faafogafoga mai a si o tatou atunuu. E talitonu foi o lenei afiafi ua manino ma malamalama tulaga uma sa feagai ai, i le galuega tele sa feagai ai ma lo outou paia ma lo outou mamalu i Taitaifono, Sui Taitaifono, aemaise o Komiti faa-Palemene atoa sa outou mafatia ma gaseā aua le tapenaina o lipoti nei.

E le faaitiitia foi le agaga faafetai atu i lau Afioga i le Taitai o le Malo. Ua matua lagona le agaga faafetai ona o le tulaga o lea ua matua tolaulau ma folafolaina i le faafogafoga a le Maota aemaise le faafogafoga tapuai mai a Samoa, o lea lava ua tatou o e tulituliaupu le faataunuuina o lo tatou valaauina ma galuega. E talitonu foi ua manino le mata o le vai i le faafogafoga i nisi o lipoti, aemaise nisi o lipoti taua ma tali mai a le Malo sa tuufesili i ai le atunuu i le tele o nei taimi po o a faatulagaga a le Palemene i ona faiga faavae, atoa ai ma ona Tulafono e limataitaiina ai lo tatou Maota.

E momoli atu foi vaimalu i puega i lenei itula afiafi ona o mea ua tulai mai i le tatou Fonotaga lenei. Le Palemene o Samoa, o au nei e tumu i le faaaloalo i le Maota aemaise le paia i sui mamalu, o outou lava o Tootoouli o le atunuu, o le atunuu o Samoa o le atunuu ua uma ona tofitofi e leai se isi na te toe ta tulaga pe toe fagota sagolegole i ai. A o le a sa outou maitau, ia outou finagalo malilie, o le Nofoa o le Palemene o le Nofoa o le atunuu. Afai e moni upu ma tala o le faaaloalo aemaise o le faamalumu, tatou o ai laia i lena.

Lealailepule, o le agaga lena ua avatu. Ia fua se tapu ma ia i ai se aoga o mea ua tutupu. E le tau aoaia e Laupua Tamafaiga, o outou o nisi o Tootoouli o Samoa aemaise o la outou galuega o le faufautua ma ave le tuualalo i tulaga aloaia, ae aua nei avea le naunau ma mea sese. O le tatou Palemene e le tuu talaloaina, e le faaloaloavale foi. Ua uma ona i ai lona faavae papa o le Malo Tutoatasi o Samoa, ua uma ona i ai ona Tulafono Tumau e limataitaiina ai. Ua uma ona i ai Tulafono e faafoefoe ai tulaga i faiga faavae ma tu ma aga faa-Palemene. O ai la e faamamaluina ia mea? E faamamalu e le Palemene o Samoa. Ae ua avea le naunau ma avatu pea le tuualalo, o le faaaloalo i taimi uma, ua avea ma mea ua avatu ai le alofa o Misi ae ua soli ai le toga kapisu.

O lenei la afiafi o lea ua faata'i se leo ma o lea foi ua faalalolalo le Sui Taitai aemaise le paia o le Vaega Faaupufai, o lea lava ua lagona le pa'i mai o a outou talosaga ma le faatoesega. O lea foi na faalalolalo i le agaga mama se tasi o sui usufono mo Safata, ua ou talia ma aloaia, ae paga lea, ua outou vaai i aga a lo outou Taitai. E le o ni mea la e aveane ai, ae lafo atu. Aua o outou o lo o i ai le tuualalo ma le maumau iumaea. Ou te le iloa po o sao fautuaga na e fai pe leai, ae e lafo atu.

Silasila foi o lea e alaala i lena Itu o le Maota, e toalua Loia e gata ai Loia i le atunuu, e malamalama lelei. E le soona sii pe soona vaai ona e malamalama i le Tulafono. O lo o afio le Susuga i le Faafeagaiga, o lana matafaioi o le tatalo aua le manuia o le tatou Palemene. Lo outou paia ma lo outou mamalu, e le tau fai atu. O le Sui Taitai o le sa nofoia le Nofoa lea ou te saofai atu ai, tou te le maitaua le vevela o le mea lea e nofo atu ai, ae ava tele i lo tatou va nonofo ai. O lea, o a tulaga i le vaatele i lo outou talosaga mai, ia taatia mai o lea ua tolopo le Fono, ua faatu le lafo e le Afioga i le Palemia, se i aulia le masina fou sei moe manatunatu e pei ona ou fai atu. Ae ia fua ni tapu ma le tatou va nonofo ai ma tatou faamoemoe i le Alii, ia limataitaiina le tatou Fonotaga i le mea e tatau ona i ai.

Le Palemene o Samoa aemaise le tapuaiga a Samoa i lenei itula afiafi, afai e sala uta ia tonu tai. Afai foi e sipa le lamaga ma taulaulu se matou faamatalaga i lau faafogafoga Samoa, afai ua matou toliulu i le goa pe matou te faatama a le po i le gagana, e faamalulu atu, ae momoli mai pea lau tapuaiga aemaise o le tatalo leleoa a le Aufaigaluega Paia a le Atua ina ia manuia le Palemene. O lea ua faatuina le lafo mo le tolopoina o le tatou Fonotaga seia aulia le aso Fonotaga ia Fepuari. A o le i taape le Fonotaga, ou te tapa lau Afioga i le sui usufono mo le Vaa o Fonoti leaga o lea ua tuumuli atu le isi Feagaiga a le atunuu, ae tulai maia oe e fai oe ma sui o Feagaiga a Samoa e te faia le tatalo faaiu e faaiu ai le tatou Fono.

***Na tolopo Taulumaga a le Fono Aoao i le itula e 9:12 i le po seia aulia le itula e 9:00 i le taeao o le Aso Lua, 17 Fepuari 2015.***

